

ଯୀଶୁଖ୍ରୀଷ୍ଟଙ୍କ ବିଷୟରେ ଲୁକ୍ ଲେଖିଥିବା ସୁସମାଚାର ଜିସୁକ୍ରିସ୍ଟର ବିସଇ ନେଇକରି ଲୁକ୍ ଲେକିରଇବା ନିମାନ୍ କବର୍ ଏ ବଇ ବିସଇ ଜାନ୍‌ବାଟା

ଲୁକ୍ ଲେକିରଇବା ନିମାନ୍ କବର୍ ଅଇଲାନ୍ତି, ଜିସୁକ୍ରିସ୍ଟର ଜିବନେ ଅଇରଇବା ଚିକିନିକ ବିସଇର୍ କାତା । ନୁଆ ନିଅମର୍ ଚାର୍ଟା ବଇ ବିଡ୍‌ରେ ଅନି ଏଟା ଗଟେକ୍ । ସେ ବିଡ୍‌ରେ ଅନି ସବୁକେ ନିମାନ୍ କବର୍ କଇବାଇ । ଜାର୍ ଅରଡ୍ ଅଇଲାନ୍ତି ସୁବ୍ କବର୍ । ସେଟା ସବୁ ଜିସୁର୍ ମରନର୍ ପଟେ ମାଡିଉ, ମାର୍‌କ, ଲୁକ୍ ଆରି ଜଅନର୍ ଲଗେ ଅନି ଲେକା ଅଇଆଟେ । ଲୁକ୍ ଲେକ୍‌ଲା ବଇଟାନେ ଜିସୁର୍ ଜିବନେ ଗଟ୍‌ଲା ଲେକ୍‌ବା ସଙ୍ଗ୍ ତାର୍ ମରନ୍ ଆରି ମଲାଟାନେ ଅନି ଉଟ୍‌ଲା ବିସଇ ମିସା ଆଟେ । ତାର୍ ସିସମନ୍ ଜନ୍ ଜନ୍ ବିସଇ ସବୁ କରିରଇଲାଇ, ସେଟାମନ୍‌ମିସା ଏ ବଇଟାନେ ଆଟେ । ବଇକେ ପେରିଡ୍‌ମନ୍ କାମର୍ ବିସଇ ବଲି କଇବାଇ । ଲୁକ୍ ସୁବ୍‌କବର୍‌ର ବଇ କେଡେବେଲେ ଆରି କନ୍‌ଟାନେ ଲେକାଅଇ ରଇଲା, ସେ ବିସଇ କେମିସା ନିକସଙ୍ଗ୍ ନାଜାନଡ୍ । ମାତର୍ ପଣ୍ଡିଡ୍‌ମନ୍ ଜେନ୍ତିକି ଏଟା ଜିସୁକ୍ରିସ୍ଟ ଜନମ୍ ଅଇ ୭୦ ବରସ୍ ପଟେ ଲେକା ଅଇଲାଆଟେ ବଲି ବିସ୍‌ବାସ୍ କର୍‌ବାଇ ।

ଲେକ୍‌ଲା ଲକ୍ ଅଇଲାନ୍ତି ଲୁକ୍ । ସେ ଗଟେକ୍ ଡାକ୍‌ଦର୍ । ତାର୍ ଲେକା ସଇଲି ଆରି କାତା ଆରି ଚାଲିଚଲନ୍ ଜାନାଇ ଦେଲାନ୍ତିଜେ, ସେ ଗଟେକ୍ ସିକିଡ୍‌ଲକ୍ ରଇଲା । ଜିସୁର୍ ଜିବନେ ଗଟିରଇବା ସବୁ ଗଟନାର୍ ଲେକା, ନିୟମ୍ ଇସାବେ ଚିକ୍ ବାଦ୍‌ନା କର୍‌ବାକେ ଇଟା କଲାନ୍ତି । ଜେନ୍ତିକି ସେଟା ବିନ୍‌ଲକ୍‌ମନ୍ ପଡିକରି ଉପକାର୍ ପାଇବାଇ ୧:୧-୩ । ସେ ଗଟେକ୍ ଜିଉଦି ଲକ୍ ନ ରଇଲା ମିସା କଲସିଅ ୪:୧୦-୧୪ ସେ ଏ ରକାମ୍ ବାଦ୍‌ନାକରି ଲେକ୍‌ଲା । ଜିଉଦି ନଇଲା ଲକ୍‌ମନ୍

ଜେନୁତିକି ରୁଜିପାରବାଇ । ସେ ଜିଉଦିର୍ ନିତିନିୟମ୍ କଇବାଟା ଇତି ଆମେ ସଅଜେ ଦେକବାର୍ ଅଇସି ୧:୮ ।

ଲୁକ୍ ଲେକ୍‌ଲା ସୁସମାଚାର୍, ମାତିଉ ଆରି ମାର୍‌କ୍ ବଇସଙ୍ଗେ ସମାନ୍ । କାଇକେ ବଇଲେ ସେମନ୍ ସମାନ୍ ବିସଇ ଆରି ସମାନ୍ ବାବ୍‌ନାଇ କଇବାଟା ଲେକିଆଚଡ୍ । ତିନ୍‌ଟା ବଇବିଡ୍‌ରେଅନି ଲୁକ୍ ତୁବନ୍ ଦେଉ ଜଅନର୍ ଜନମ୍ ବିସଇ ତିଆର୍ କଲାଆଚେ । ଆରି ଲୁକ୍ ପାର୍‌ତନା ଉପରେ ଦିଆନ୍ ଦେଇଆଚେ ୩:୨୧;୫:୧୭;୬:୧୨;୧୧:୧-୧୨;୨୨:୩୨; ଆରି ସେ କେମା ଉପରେ ମିସା ଦିଆନ୍ କରିଆଚେ । ୩:୩, ୧୧:୪, ୧୭:୩-୪, ୨୩:୩୪, ୨୪:୪୭

ଏ ବଇବିଡ୍‌ରେ ରଇବା ବିସଇ

- ୧. ଲୁକ୍ ସୁବ୍‌କବର୍ ଉପକର୍ମ ଆର୍ ଲେକା ଉଦେସେ ବରନା କର୍ସି । ୧:୧-୪
- ୨. ଜିସୁର୍ ଜନମ୍ ଆରି ସେ କେନ୍ତ୍ର ସେବାକାମର୍ ପାଇ ତିଆର୍ ଅଇଲା । ୧:୫-୪:୧୩
- ୩. ଜିସୁର୍ କାମ୍ ପୁରାପୁରୁନ୍ ବିସଇର୍ ବେଲେ ସେ ସବୁକରି ରଇଲା ଚକିଡ୍ କାମ୍ ଆରି ତାର୍ ସିକିଆ ବିସଇ କଇଲା ଆଚେ । ଏଟା ଅଇଲାନ୍ ସୁବ୍‌କବର୍ ବଡ୍ ବାଗ୍ । ୪:୧୪-୨୧:୩୮
- ୪. ତାର୍‌ପରେ, ପଚର୍ ବାଗ୍ ଟାନେ, ଜିସୁ କେନ୍ତ୍ର ମରିରଇଲା ମସନେ ତପି ଅଇରଇଲା ଆରି ମଲାଟାନେ ଅନି ଉଟ୍‌ଲା ସେଟାମନ୍ ଆଚେ । ୨୨:୨୪

୧ ଏ ତିଅପିଲ୍ ମଆସୟ, ଆମର୍ ବିଡ୍‌ରେ ଜନ୍ ସବୁ ଗଟ୍‌ନା ଗଟ୍‌ଲା, ସେସବୁ ଲେକ୍‌ବାକେ ବେସି ଲକ୍ ଚେସ୍‌ଟା କଲାଇ । ୨ ଆରାମ୍ ଅଇଲା ମୁଲେ, ଜେଜେ ଏ ସବୁ ଦେକିରଇଲାଇ ଆରି ସୁବ୍ କବର୍ ବିନ୍ ଲକ୍‌ମନ୍‌କେ ଜାନାଇଲାଇ, ସେମନ୍ ଆମ୍‌କେ କଇଲା ଇସାବେ ଲେକ୍‌ଲାଇ । ୩ ତେବର୍‌ପାଇ ଏ ମାନନିୟ୍ ତିୟପିଲ୍. ପୁର୍‌ବେଅନି ଚିକିନିକି କଜଲଡ୍‌କରି ତେଇ ସବୁଜାକ ରିତିନିତି ସଙ୍ଗ୍ ଅଇଲାଟା ତମର୍‌ପାଇ ମୁଇ ଲେକ୍‌ବିଆକା ବଲି ମନକଲି । ୪ ଜେନ୍ତ୍ର ତୁଇ ସବୁ ବିସଇର୍ ସିକିଆ ପାଇଆଚୁସ୍, ସେ ସିକିଆର୍ ପୁରାପୁରୁନ୍ ସଡ୍ ପାଇପାରୁସ୍ ।

ତୁବନ୍ ଦେଉ ଜଅନର୍ ଜନମ୍

୫ ଜିଉଦା ଦେସର ରାଜା ଏରଦର ବେଳେ, ଅବିୟ ପୁଜାରି ଦଲେ ଜିକରିୟ ନାଉଁର ଗଟେକ୍ ପୁଜାରି ରଇଲା । ତାର ମାଇଜି ଏଲିସାବେଡ୍ । ସେ ଆରଣ ବସର ରଇଲା । ୬ ପରମେସରର ଦେକ୍‌ବା ଇସାବେ ସେମନ୍ ଦୁଇଲକ୍ ଜାକ ମାପ୍‌ରୁର ସବୁ ଆଦେସ୍, ବିଦି ଇସାବେ କରତେରଇଲା । ୭ ମାତର ସେମନ୍‌କେ ପିଲାଜିଲା ନ ରଇଲା । କାଇକେ ବଇଲେ ଏଲିସାବେଡ୍ ବାଞ୍ଜି ରଇଲା । ଆରି ସେମନ୍ ତକ୍‌ରା ତକ୍‌ରି ଅଇଜାଇରଇଲା ।

୮ ଦିନେକ୍ ଜିକରିୟ ନିଜର ଦଲର ପାଲି ଇସାବେ, ଜିଉଦିମନର ମନ୍ଦିରେ ପୁଜାରି କାମ୍ କରବାବେଲେ, ୯ ରିତିନିତି ଇସାବେ ଜିକରିୟର ନାଉଁ କେଡ୍ ପୁଟ୍‌ଲାଜେ ତାକେ ମାପ୍‌ରୁର ମନ୍ଦିରେ ଜାଇକରି ବେଦିଟାନେ ଦୁପ୍ ଦେବାକେ ପଡ୍‌ଲା । ୧୦ ଆରି ଦୁପ୍ ଦେବାବେଲେ ଲକ୍‌ମନ୍ ବାଇରେ ପାର୍ତନା କରତେ ରଇଲା ।

୧୧ ସେଡ୍‌କିବେଲେ ଏଦେ ଦେକା ! ମାପ୍‌ରୁର ଗଟେକ୍ ଦୁଡ୍ ଦୁପ୍ ଦେବା ବେଦିର ଉଜାବାଟେ ଟିଆଅଇ ତାକେ ଦରସନ୍ ଦେଲା । ୧୨ ଜିକରିୟ ତାକେ ଦେକି କିଲ୍‌ବିଲ୍ ଅଇ ଡରିଗାଲା । ୧୩ ମାତର ଦୁଡ୍ ତାକେ କଇଲା, “ଜିକରିୟ ତରନାଇ, କାଇକେବଇଲେ ତମେ ଗୁଆରି କଲାଟା ପରମେସର ସୁନିଆଟେ । ତର ମାଇଜି ଏଲିସାବେଡ୍ ଗଟେକ୍ ପିଲା ଜନମ୍ ଦେଇସି । ତମେ ତାକେ ଜଅନ୍ ବଲି ନାଉଁ ଦିଆସ୍ । ୧୪ ସେ ତମର ପାଇ ବେସି ସାର୍‌ଦା ଆନ୍‌ସି ଆରି କେତେ କେତେ ଲକ୍‌ମନ୍ ତାର ଜନମେ ସାର୍‌ଦା କରବାଇ । ୧୫ ମାପ୍‌ରୁର ଦେକ୍‌ବା ଇସାବେ ସେ ଗଟେକ୍ ଡାକ୍‌ପୁଟା ଲକ୍ ଅଇସି । ସେ ଆମଟ୍ ଅଇଜାଇରଇବା ଅଙ୍ଗୁର ରସ୍ କି ନିସା ଜିନିସ୍ ମୁଲ୍‌କେ ନ କାଏ ଆରି ମାଆର୍ ଗରବେ ଅନି ସୁକଲ୍ ଆଡ୍‌ମାଇ ପୁରାପୁରନ୍ ଅଇ ଆଇସି । ୧୬ ଆରି ଇସରାଏଲ୍ ଲକ୍‌ମନର ବିଡ୍‌ରେ ଅନି କେତେ କେତେ ଲକ୍‌ମନ୍‌କେ ମାପ୍‌ରୁ ତାର ପରମେସର ଟାନେ ବାଉଡାଇସି । ୧୭ ସେ ବବିସଡ୍‌ବକ୍‌ତା ଏଲିୟର ଆଡ୍‌ମାଇ ବପୁଅଇ ପରମେସରର ଆଗ୍ରୁ ଜାଇସି । ବାବାମନର ମନ୍ ପିଲାମନରଟାନେ ବାଉଡାଇସି । ପରମେସରର କାତା ନ ମାନ୍‌ବା ଲକ୍‌ମନ୍‌କେ ଦରମ୍ ଲକ୍‌ମନ୍ ଚିନ୍ତା କରବା ଟାନେ ବାଉଡାଇସି । ଆରି ପରମେସରର ଲକ୍‌ମନ୍‌କେ ତାର ପାଇ ଜାଗରତ୍ କରାଇସି ।”

୧୮ ତେଇ ଜିକରିୟ ଦୁଡ୍‌କେ କଇଲା, “ତମେ କଇବାଟା ସଡ୍

ଅଇସି ବଲି ମୁଇ କେନ୍ତ୍ର ଜାନବି ? କାଇକେବଇଲେ ମୁଇତା ଡକରା ଅଇଗାଲିବେ, ଆରି ମର୍ ମାଇଜି ମିସା ଡକରି ଅଇଗାଲାନି ।”

୧୯ ଦୁଡ଼ ତାକେ କଇଲା “ମୁଇ ଗାବ୍ରିଏଲ୍, ମୁଇ ପର୍ମେସର୍ ମୁଆଟେ ଟିଆ ଅଇରଇବା ଦୁଡ଼, ତମ୍‌କେ ଏ କବର୍ ଜାନାଇବାକେ ମକେ ପାଟାଇଆଟେ । ୨୦ ଦେକ୍, ଏ ସବୁ ନ ଅଇବା ଦିନ୍ ଜାକ ତୁଇ ଗୁଲାଅଇ ରଇସୁ । କାଇକେବଇଲେ ମର୍ ସବୁ ବାକିଅ ସମାନ୍ ବେଲାଇସେ ପୁରାପୁରୁନ୍ ଅଇସି । ସେଟା ସବୁ ତୁଇ ବିସ୍‌ବାସ୍ କୁରୁସ୍ ନାଇ ।” ୨୧ ଏଡ଼କି ଅଇବା ବିଡ଼ରେ ଲକ୍‌ମନ୍ ଜିକରିୟକେ ବାଇରେ ଜାଗିରଇଲା ଆରି ଦେଉଲେ ତାର ଅଲ୍‌ସମ୍ ଅଇଲାଜେ ସେମନ୍ କାବାଅଇ ଜାଇତେରଇଲା । ୨୨ ମାତର୍ ଜିକରିୟ ବାରି ଆସି ଲକ୍‌ମନ୍‌ର୍ ସଙ୍ଗ୍ କାତାଅଇ ନାପାରଲା, ତେଇ ସେ ଦେଉଲେ ଦରସନ୍ ପାଇଆଟେ ବଲି ଲକ୍‌ମନ୍ ବୁଜ୍‌ଲା ଆରି ସେ ଲକ୍‌ମନ୍‌କେ ଆଡ଼ ସଗିଆ କରି ଜାନାଇବାର୍ ଦାରଲା ଆରି ଗୁଲାଅଇକରି ରଇଲା ।

୨୩ ଜିକରିୟ ତାର ସେବା କର୍ବା ପାଲି ଦିନ୍ ସବୁ ସାରଲା ପଟେ ତାର ଗରେ ଉଟିଗାଲା । ୨୪ ଏଡ଼କି ଅଇ କେତେକ୍ ଦିନ୍ ଗାଲା ପଟେ ତାର ମାଇଜି ଏଲିସାବେଡ଼ ଗାଗ୍‌ଡେ ଅଇଲା ଆରି ସେ ପୌର୍ ମାସ୍ ଜାକ କାକେ ନ ଜାନାଇ ଗରେସେ ରଇଲା । ୨୫ ତାର୍‌ପଟେ ଏଲିସାବେଡ଼ କଇଲା, “ଲକ୍‌ମନ୍‌ର୍ ଜେଞ୍ଜେଟ୍ କର୍ବାଟା ଦୁର୍ କର୍ବାକେ ସାରାସାରି ମକେ ଦୟା କରି ମାପୁରୁ ଏନ୍ତାରି କଲାଆଟେ ।”

ଜିସୁର୍ ଜନମ୍ ବିସଇ

୨୬ ଏଲିସାବେଡ଼ ଗାଗ୍‌ଡେଅଇ ଚ ମାସ୍ ଅଇଲାକେ, ପର୍ମେସର୍ ଗାବ୍ରିଏଲ୍ ଦୁଡ଼କେ ଗାଲିଲି ରାଇଜର୍ ନାଜରିଡ଼ ନାଉର୍ ନଅରେ ଗଟେକ୍ ଦାଙ୍ଗ୍‌ଡିର୍ ଟାନେ ପାଟାଇଲା । ୨୭ ☆ସେ ଦାଙ୍ଗ୍‌ଡିର୍ ନାଉର୍ ମରିୟମ୍, ଦାଉଦ୍ ବ୍‌ସର୍ ଜସେପ୍ ନାଉର୍ ଗଟେକ୍ ଦାଙ୍ଗ୍‌ଡା ସଙ୍ଗ୍ ତାର ମାଙ୍ଗ୍‌ନି ଅଇରଇଲା । ୨୮ ଦୁଡ଼ ମରିୟମ୍‌ର୍ ଲଗେ ଆସି କଇଲା, “ଏ ନୁନି, ମାପୁରୁ ତକେ ଦୟାକଲା ଆଟେ, ଆରି ତରସଙ୍ଗ୍ ଆଟେ ।”

୨୯ ମରିୟମ୍ ସରଗର୍ ଦୁଡ଼ କଇଲା ବାକିଅ ସୁନ୍‌ଲା ଆରି କାଇଟା ବୁଜିନାପାରି ଉଡୁକ୍ ଦୁଡୁକ୍ ଅଇଜାଇକରି, ବାବିବାବି ରଇଲା ।

☆ ୧:୨୭ ୧:୨୭ ମାଡିଭ ୧:୧୮

୩୦ ଦୁତ୍ ତାକେ କଇଲା, “ମରିୟମ୍ ତର ନାଇ, ତୁଇ ମାପ୍‌ରୁର୍ ଦୟା ପାଇଆରୁସ୍ । ୩୧ ☆ଦେକ୍ ତୁଇ ଗାଗ୍‌ତେ ଅଇ ପିଲା ଗଟେକ୍ ଜନମ୍ କରସୁ ଆରି ତାର୍ ନାଉଁ ଜିସୁ ଦେଇସା । ୩୨ ସେ ଗଟେକ୍ ଡାକ୍‌ପୁଟା ଲକ୍ ଅଇସି ଆରି ସବୁର୍ ଉପ୍‌ରେ ରଇବା ପର୍‌ମେସରର୍ ପଅ ବଲି କଇବାଇ, ସରଗର୍ ମାପ୍‌ରୁ ତାକେ, ତାର୍ ଆନିଦାଦି ଦାଉଦର୍ ପାରା ରାଜା କରାଇସି । ୩୩ ସେ କାଲ୍‌କାଲ୍ ଜୁଗ୍‌ଜୁଗ୍ ଇସରାଏଲ୍ ଲକ୍‌ମନ୍‌କେ ସାସନ୍ କରସି । ତାର୍ ରାଇଜ୍ କେବେ ନ ସାରେ ।”

୩୪ ମରିୟମ୍ ଦୁତ୍‌କେ କଇଲା, “ଏଟା କେନ୍ତ୍ର ଅଇସି ? ମୁଇତା ମୁନୁସ୍‌କେ ନାଜାନି !” ୩୫ ଦୁତ୍ ତାକେ କଇଲା, “ସୁକଲ୍ ଆଡ଼ମା ଆସି ତକେ ଡାବି ଅଇସି, ଆରି ସବୁର୍ ଉପ୍‌ରେ ରଇବା ପର୍‌ମେସରର୍ ବପୁ ତକେ ଗୁଡ଼ିଆଇ ଅଇସି, ତେବର୍‌ପାଇ ଜେ ଜାଡ଼ ଅଇସି, ସେ ସୁକଲ୍ ପର୍‌ମେସରର୍ ପଅ ବଲି ଡାକ୍‌ପୁଟା ଅଇସି ।”

୩୬ ଆରି ଦେକ୍, ତର ଲାଗାର୍ ଲିତାର୍ ଏଲିସାବେତ୍ ମିସା ଡକ୍‌ରି ବେଲେ ଗାଗ୍‌ତେ ଆଟେ, ଜାକେ ଲକ୍‌ମନ୍ ବାଞ୍ଜି ବଲି କଇତେରଇଲାଇ । ତାକେ ଏବେ ତ ମାସ୍ ଅଇଲାନ୍ତି । ୩୭ କାଇକେବଇଲେ ପର୍‌ମେସରର୍‌ଟାନେ କାଇଟା ମିସା ନ ଅଇବା କାମ୍ ନାଇ, ବଲି କଇଲା ।

୩୮ ତେଇ ମରିୟମ୍ କଇଲା, “ଦେକା, ମୁଇ ଗଟେକ୍ ମାପ୍‌ରୁର୍ ଦାସି, ତମେ କଇବା ଇସାବେ ମକେ ଅ ।” ତାର୍‌ପଟେ ଦୁତ୍ ତାର୍‌ଟାନେଅନି ଉଟିଗାଲା ।

ଏଲିସାବେତ୍ ଆରି ମରିୟମ୍‌ର ବେଟ୍‌ଗାଟ୍

୩୯ ସେଡ଼କିବେଲେ ମରିୟମ୍ ବାରଇକରି ଜିଉଦା ରାଇଜର୍ ଡଙ୍ଗର୍ ଜାଗାର୍ ଗଟେକ୍ ନଅରେ ଉଟିଗାଲା । ୪୦ ତେଇ ଜିକରିୟର୍ ଗରେ ପୁରିକରି ସେ ଏଲିସାବେତ୍‌କେ ଜୁଆର୍ କଲା । ୪୧ ମରିୟମ୍ ଜୁଆର୍‌କଲାଟା ସୁନ୍‌ଲା ଦାପ୍‌ରେ ଏଲିସାବେତ୍‌ର ଗର୍‌ବେ, ପିଲା ସାର୍‌ଦା ଅଇ ତେଗଇଲା ଆରି ଏଲିସାବେତ୍ ସୁକଲ୍ ଆଡ଼ମାଇ ପୁରାପୁରନ୍ ଅଇଲା । ୪୨ ଏଲିସାବେତ୍ ଆଉଲି ଅଇକରି କଇଲା, “ତୁଇ ସବୁ ମାଇଜିମନ୍‌ର ବିତ୍‌ରେ ଅନି କେତେକ୍ ନିକ କରମର୍ ଲକ୍ ! ତର ଗରବର୍ ପିଲାଟା ମିସା କେତେକ୍ କରମ୍ ! ୪୩ ମୁଇ

☆ ୧:୩୧ ୧:୩୧ ମାଡ଼ିଉ ୧:୨୧

କେ ଜେ ମର୍ ମାପ୍ପରୁର୍ ମାଆ, ମକେ ଦେକ୍‌ବାର୍ ଆଇଲା ଆଚେ ?
 ୪୪ କାଇକେବଇଲେ, ଦେକ୍, ତୁଇ ଜୁଆରକଲାଟା ସୁନ୍‌ଲା ଦାପ୍‌ରେ
 ମର୍ ଗରବର୍ ପିଲା ସାର୍‌ଦା ଅଇ ଡେଗଇଲା । ୪୫ ଜେ ବିସ୍‌ବାସ୍
 କରସି ତାର୍ କେଡେକ୍ ନିମାନ୍ କରମ, କାଇକେବଇଲେ ମାପ୍ପରୁ
 ତାକେ ଜାଇଜାଇଟା କୁଆଅଇଲାଆଚେ, ସେ ସବୁଜାକ ଅଇସି ଆକା
 ।”

ମାପ୍ପରୁକେ ମରିୟମର୍ ମଇମା ଗିଡ଼

- ୪୬ ତେଇ ମରିୟମ୍ କଇଲା,
 “ମର୍ ଜିବନ୍ ମର୍ ମାପ୍ପରୁର୍ ମଇମା କଲାନି ।
- ୪୭ ଆରି ମର୍ ଆଡ଼ମା ମର୍ ରକିଆକାରି ପର୍‌ମେସରଟାନେ ସାର୍‌ଦା
 କଲାନି ।
 ୪୮ କାଇକେବଇଲେ ସେ ମର୍‌ପାରା କାକୁର୍‌ତିଆନିକେ ନିଜର୍
 ଗତିଦାଈଡ଼ି ବଲି ଏତାଇଲା ଆଚେ ।
- ଆରି ଦେକା ଆଜିଅନି କାଲ୍‌କାଲ୍ ଜୁଗ୍‌ଜୁଗ୍, ସବୁ ଲକ୍ ମକେ
 ପର୍‌ମେସରର୍ ତେଇଅନି ଆସିର୍‌ବାଦ୍ ମିଲ୍‌ଲା ଲକ୍ ବଲି
 କଇବାଇ ।
 ୪୯ କାଇକେବଇଲେ ସବୁର୍‌ଟାନେଅନି ବପୁର୍ ମାପ୍ପରୁ,
 ମର୍‌ପାଇ କାବାଅଇଜିବା କାମ୍ କଲାଆଚେ,
 ତାର୍ ନାଉଁ ସୁକଲ୍ ।
- ୫୦ ଆରି ଜନ୍ ଲକ୍‌ମନ୍ ତାକେ ଡରିକରି ରଇବାଇ, ଜୁଗେ ଜୁଗେ
 ସେ ସେମନ୍‌କେ ଦୟା କରସି ।
- ୫୧ ସେ ତାର୍ ନିଜର୍ ବପୁର୍ ଆଡ଼ ଦେକାଇଆଚେ,
 ସେ ଆଁକାର୍ ଲକ୍‌ମନ୍‌କେ ସେମନ୍‌ର୍ ମନେ ବାବ୍‌ନା କଲାଟା
 ଚିନ୍‌ଚତର୍ କଲା ଆଚେ ।
- ୫୨ ସେ ବଡ଼ ବଡ଼ ରାଜାମନ୍‌କେ ସେମନ୍ ରଇବାଟାନେଅନି ଉଡ଼ରାଇ
 ଦେଲା ଆଚେ,
 ଆରି କାକୁର୍‌ତିଆମନ୍‌କେ ଉପ୍‌ରେ ଉଟାଇ ଆଚେ ।
- ୫୩ ସେ ବୁକର୍ ଲକ୍‌ମନ୍‌କେ ନିକ ନିକ ବିସଇ ଦେଇ ସାର୍‌ଦା କରାଇ
 ଆଚେ,
 ସାଉକାର୍‌ଲକ୍‌ମନ୍‌କେ ରୁଟା ଆତେ ବାଉଡାଇଦେଇ ଆଚେ ।
- ୫୪ ଆମର୍ ଆନିଦାଦିମନ୍‌କେ ଜନ୍ କାତା ଦେଇରଇଲା,

ସେଟା ପୁରାପୁରୁନ୍ କଲା ଆରି ତାର୍ ନିଜର୍ ଚାକର୍
 ଇସ୍ରାଏଲର୍ ଉପକାର୍ କରି ଆଚେ ।

୫୫ ସେ ଅବ୍ରାହାମ୍ ଆରି ତାର୍ ନାତିମନ୍‌କେ ତାର୍ ଦୟା କାଲ୍‌କାଲ୍
 ଜୁଗ୍‌ଜୁଗ୍ ଏତାଅଡ଼ବଲି ଦେକାଇଲା ଆଚେ ।”

୫୬ ଆରି ମରିୟମ୍ ତିନ୍ ମାସ୍ ପାରା ଏଲିସାବେତର୍ ସଙ୍ଗ୍ ରଇ
 ନିଜର୍ ଗରେ ବାଉଡି ଗାଲା ।

ତୁବନ୍ ଦେଉ ଜଅନର୍ ଜନମ୍

୫୭ ପଚେ ଏଲିସାବେତର୍ ଆଡ଼ଗଡ଼ ସୁକ୍ ଅଇବା ଦିନ୍ କେଟି
 ଆଇଲାଜେ, ସେ ଗଟେକ୍ ପିଲା ଜନମ୍ ଦେଲା । ୫୮ ଆରି ମାପୁରୁଜେ
 ତାକେ ଦୟା କଲାଆଚେ, ଏଟା ସୁନି ଜିକରିୟର୍ ଲାଗାରିଲିତାର୍ ଲକ୍
 ଆରି ଗତିଆ କୁଟୁମ୍ ତାକର୍ ସଙ୍ଗ୍ ସାର୍ଦା କର୍ବାର୍ ଦାରଲାଇ ।

୫୯ ଆର୍ ଦିନ୍ ଗାଲାପଚେ ଲକ୍‌ମନ୍ ପିଲାର୍ ସୁନଡ଼ଟାନେ
 ଆଇଲାଇ* ଆରି ତାର୍ ବାବାର୍ ନାଉଁ ଇସାବେ ପିଲାର୍ ନାଉଁ ମିସା
 ଜିକରିୟ୍ ଦେବାକେ ମନକଲାଇ । ୬୦ ମାତର୍ ଏଲିସାବେଡ଼ କଇଲା,
 “ନାଇ ତାର୍ ନାଉଁ ଜଅନ ଦିଆ ଅ ।” ୬୧ ଲକ୍‌ମନ୍ ତାକେ କଇଲାଇ
 “ତମର୍ ବସ୍ ବିଡ଼ରେ ତା ଏନ୍ତାରି ନାଉଁର୍ ଲକ୍ କେ ମିସା ନାଇ ।”
 ୬୨ ତେଇ ସେମନ୍ ପିଲାକେ କାଇ ନାଉଁ ଦେଉଁ ବଲି ମନ୍ କଲୁସନ୍ ?
 ସେଟା ଜିକରିୟ୍‌କେ ଆଡ଼ ଦେକାଇକରି ପାଚାର୍‌ବାର୍ ଦାରଲାଇ ।

୬୩ ସେଡ଼କିବେଲେ ଜିକରିୟ୍ ଲକ୍‌ମନ୍‌କେ ଗଟେକ୍ ଲେକ୍‌ବା ପାଟା
 ମାଙ୍ଗଲା ଆରି “ଏଦେ ଦେକା ! ତାର୍ ନାଉଁ ଜଅନ୍ !” ବଲି
 ଲେକ୍‌ଲା । ତେଇ ସବୁଲକ୍ କାବା ଅଇଗାଲାଇ । ୬୪ ସେଡ଼କି
 ଦାପରେ ଜିକରିୟ୍ ଟଣ୍ଟୁ ପୁଟ୍‌ଲା, ସେ ଆରି ତରେକ୍ କାତା ଅଇ
 ପରମେସର୍‌କେ ମଇମା କର୍ବାର୍ ଦାରଲା । ୬୫ ତାର୍ ଲଗର୍ ପାକର୍
 ଲକ୍‌ମନ୍ ଡରିଗାଲାଇ, ଆରି ଏସବୁ କାତା ଜିଉଦା ରାଇଜର୍ ଡଙ୍ଗର୍
 ଜାଗାର୍ ସବୁ ବାଟର୍ ଲକ୍‌ମନ୍ କୁଆବଲା ଅଇଲାଇ । ୬୬ ଆରି
 ସୁନିରଇବା ସବୁ ଲକ୍‌ମନ୍ କାବା ଅଇକରି, ମନେ ମନେ ବାବ୍‌ଲାଇ,
 ତେବେ ଏ ପିଲା କାଇଟା ଅଇସି ? କାଇକେବଇଲେ ମାପୁରୁର୍ ବପୁ
 ପିଲାଡ଼ସଙ୍ଗ୍ ଆଚେ ବଲି ସବୁକେ ଜାନାପଡ଼ଲା ।

* ୧:୫୯ ୧:୫୯ ମନସ୍ ପିଲାର୍ ଜୁଡ଼ଟାନର୍ ଟିପର ଚାମ୍ କାବ୍‌ବାଟା ଅଇଲାନି ସୁନଡ଼

ଜିକରିୟା ବବିସତ୍‌ବକ୍ତାର କାତା

- ୨୭ ଆରି ଜଅନର୍ ବାବା ଜିକରିୟା ସୁକଲ୍ ଆଡ଼ମାଲ ପୁରାପୁରୁନ୍ ଅଇ ପର୍‌ମେସରର୍ କବର୍ କଇବାର୍ ଦାରଲା ।
- ୨୮ “ଆସା ଆମେ ଇସ୍ରାଏଲର୍ ମାପୁରୁକେ ଦନିଅବାଦ୍ ଦେଉ କାଇକେବଇଲେ ସେ ତାର ନିଜର୍ ଲକ୍‌ମନ୍‌କେ ଦୟାକରି ମୁକ୍‌ଲାଇସି ।
- ୨୯ ତାର ନିଜର୍ ଗତିଦାଙ୍‌ତା ଦାଉଦର୍ କୁଟୁମେ ଅନି ଆମର୍ ପାଇ ଗଟେକ୍ ବପୁ ସଙ୍‌ର୍ ଉଦାର୍‌କାରିଆକେ ଦେଲା ଆଟେ ।
- ୩୦ ପୁରବ୍ କାଲେଅନି ସୁକଲ୍ ରଇବା ନିଜର୍ ବବିସତ୍‌ବକ୍ତାମନର୍ ଟଣ୍ଟେଅନି କାତା ଦେଇ ଜେନ୍ତି କଇରଇଲା,
 - ୨୧ ସେନ୍ତାରି ଆମ୍‌କେ ଇନ୍ କର୍‌ବା ସବୁ ସତ୍‌ରୁମନର୍ ଟାନେଅନି ମୁକ୍‌ଲାଇ ଆଟେ ।
- ୩୧ ଜେନ୍ତି ସେ ଆମର୍ ଆନିଦାଦିମନର୍‌ପାଇ ଦୟା ଦେକାଇଆଟେ, ଆରି ସେମନର୍ ସଙ୍‌ କରିରଇବା ନିଜର୍ ସୁକଲ୍ ନିୟମ୍ ଏତାଇ ଆଟେ,
- ୩୨ ଆମର୍ ପୁରବର୍ ବାବା ଅବ୍ରାଆମ୍‌କେ ଜନ୍ କାତା ଦେଇରଇଲା ।
 - ୩୪ ଆରି ଜେନ୍ତାରିକି ସତ୍‌ରୁର୍ ଆତେଅନି ଉଦାର୍ ପାଇ ଆରୁ ।
 - ୩୫ ଜେନ୍ତାରିକି ଆମେ ଜିବନ୍‌ସାରା ଦରମ୍ ସଙ୍‌, ସୁକଲ୍ ସଙ୍‌ ତାର ସେବା କର୍‌ବାକେ, ଆମ୍‌କେ ଦୟା କର୍‌ସି ।
- ୩୬ ଏ ମର୍ ନୁନା, ତୁଇ ସବୁର୍ ଉପ୍‌ରେ ରଇବା ପର୍‌ମେସରର୍ ଗଟେକ୍ ବବିସତ୍‌ବକ୍ତା ବଲି ଡାକ୍‌ପୁଟା ଅଇସୁ । ତୁଇ ସେ ପାଟାଇରଇବା ଗଟେକ୍ ଦୁଡ଼ପାରା, ତାର୍‌ପାଇ ବାଟ୍ ତିଆର୍ କର୍‌ସୁ ।
- ୩୭ ପାପ୍‌ଟାନେଅନି କେମା ପାଇକରି ଜେନ୍ତି କି ଉଦାର୍ ଅଇବାଇ, ସେ କାତା ଜାନାଇବାକେ ଜାଇସୁ ।
- ୩୮ ଆମର୍ ପାଦ୍ ସାନ୍ତିର୍ ବାଟେ ଆନ୍‌ବାକେ, ଆମର୍ ପର୍‌ମେସରର୍ ଆଲାଦର୍ ଦୟାରଲାଗି, ଆମର୍‌ପାଇ ସର୍‌ଗେଅନି ବେଲ୍ ତାରାସି ।
 - ୩୯ ସେ ପୁରାପୁରୁନ୍ ଆଲାଦର୍ ଦୟାରଲାଗି ମାପୁରୁର୍ ଲକ୍‌ମନ୍‌କେ, ସେମନର୍ ପାପ୍‌ଟାନେଅନି ମୁକ୍‌ଲାଇବା

ଗିଆନ୍ ଦେଇସୁ । ତାର ବାଟ୍ ତିଆର୍ କର୍ବାକେ ମୁଲିଆଇସୁ
 ୮୦ ଆରି ଜଅନ୍ ବଡିକରି ଆଡ଼ମାଇ ବପୁ ଅଇଲା ଆରି ଲକ୍ମନର୍
 ଟାନେ ଜାନାଇ ନ ଅଇକରି କିନରା ଜାଗାମନ୍କେ ରଇତେ ରଇଲା
 । ପଚେ ସେ ଇସ୍ରାଏଲର୍ ଲକ୍ମନର୍ଟାନେ ବାକିଅ ସୁନାଇବାର୍
 ଦାରଲା ।

୨

ଜିସୁର୍ ଜନମ୍
 (ମାତିଉ ୧:୧୮-୨୫)

୧ ସେବେଲେ ରମିୟ ରାଇଜର୍ ବଡ଼ ସାସନ୍ କାରିଆ ଅଗସ୍ତ
 କାଇସରର୍ ଆଦେସ୍ ଇସ୍ରାଏ ସବୁଲକ୍କେ ନାଉଁ ଲେକାଇବାର୍
 ଅଇଲା । ୨ କିରିଣିୟ ନାଉଁର୍ ସାସନ୍ କାରିଆ ସିରିଆ ରାଇଜ୍ ସାସନ୍
 କର୍ବା ବେଲେ ପର୍ତୁମ୍ ତର୍ ଏନ୍ତାରି ନାଉଁ ଲେକା ଅଇରଇଲା ।
 ୩ ସେଟାର୍ପାଇ ବଲି ସବୁଲକ୍ ନାଉଁ ଲେକାଇବାକେ ନିଜର୍ ନିଜର୍
 ନଅରେ ଗାଲାଇ ।

୪ ଆରି ଜସେପ୍ ମିସା ନାଉଁ ଲେକାଇବାକେ ମରିୟମର୍ ସଙ୍ଗ୍
 ଗାଲିଲି ରାଇଜର୍ ନାଜରିତ୍ ନାଉଁର୍ ଗଟେକ୍ ନଅରେ ଅନି ଜିଉଦା
 ରାଇଜର୍ ବେଡ଼ଲିଇମ୍ ବଲି ଦାଉଦ୍ ରାଜାର୍ ଜନମ୍ ନଅରେ ଗାଲାଇ
 । କାଇକେବଇଲେ, ଜସେପ୍ ଦାଉଦ୍ ବସର୍ ଆରି ସେ କୁଟୁମର୍ ଲକ୍
 ରଇଲା । ୫ ତାର୍ସଙ୍ ମରିୟମର୍ ବିବା ମାଙ୍ଗିନି ଅଇରଇଲା,
 ଆରି ମରିୟମ୍ ଗାଗ୍ତେ ଅଇରଇଲା । ୬ ଜସେପ୍ ଆରି ମରିୟମ୍
 ବେଡ଼ଲିଇମେ ରଇଲାବେଲେ, ମରିୟମର୍ ଆଡ଼ଗଡ଼ ସୁକ୍ ଅଇବା
 ଦିନ୍ କେଟି ଆଇଲା । ୭ ଆରି ମରିୟମ୍ ତାର୍ ପଶୁଆ ପିଲାକେ ତେଇ
 ଜନମ୍ଦେଲା, ଆରି ତାକେ ଲୁଗାସଙ୍ ଗୁଡିଆଇକରି ଗରୁସାଲର୍
 ଡଙ୍ଗାକୁଣ୍ଟେ ଡୁଲାଇରଇଲା, କାଇକେବଇଲେ ସେମନ୍କେ
 ରଇବାପାଇ ବାସାଗରେ ଟାନ୍ ନ ରଇଲା ।

ମେଣ୍ଟା ଗଉଡ଼ମନ୍ ଜିସୁର୍ ଜନମ୍ କବର୍ ସୁନ୍ଲାଇ

୮ ବେଡ଼ଲିଇମ୍ ଲଗେ କେତେଟା ମେଣ୍ଟା ଚାରାଉ ଗଉଡ଼ମନ୍ ସେ
 ରାତିଆ ପଦାଇ ରଇ ତାକର୍ ମେଣ୍ଟା ଗଟାନି ଜାଗତେରଇଲାଇ ।
 ୯ ଆରି ଏଦେ ଦେକା ! ମାପ୍ତୁର୍ ଦୁଡ଼ ଗଟେକ୍ ଆସି ସେମନର୍ ଲଗେ

ଟିଆଅଇଲା, ଆରି ମାପରୁର୍ ମଇମାର୍ ଉଜଲ୍ ତାକର୍ ଚାରିବେଡ଼ି ଜଲ୍‌ସିଗାଲାଜେ ଗଉଡ଼ମନ୍ ବେସି ଡରିଗାଲାଇ । ^{୧୦} ତେଇ ଦୁଡ଼ ସେମନ୍‌କେ କଇଲା, “ଡରାମାଇ ! ଦେକା ମୁଇ ସବୁଲକର୍‌ପାଇ ଗଟେକ୍ ବେସି ସାର୍‌ଦାର୍ କବର୍ ତମ୍‌କେ ଜାନାଇଲିନି, ଜନ୍‌ଟାକି ସବୁଲକର୍‌ପାଇ ସାର୍‌ଦାର୍ ବିସଇ ଅଇସି । ^{୧୧} କାଇକେବଇଲେ, ଆଜିସେ ଦାଉଦ୍ ରାଜାର୍ ଜନମ୍ ନଅରେ ତମ୍‌ପାଇ ଗଟେକ୍ ଉଦାରକାରିଆ ଜନମ୍‌କଲା ଆତେ, ସେ କିରିସ୍‌ଟ ମାପରୁ । ^{୧୨} ଆରି ତମ୍‌ପାଇ ବଲି ଏଟା ଗଟେକ୍ ଚିନ୍‌ପାରା ଅଇସି, ତମେ ଲୁଗା ଚୁଡ଼ିଆଇକରି ଗଟେକ୍ ପିଲା ଗରୁସାଲର୍ ଡଙ୍ଗାଇ ଡୁଲାଇ ରଇବାଟା କଜି ମିଲାଇସା ।”

^{୧୩} ସେଡ଼କିବେଲେ ଅଟାଡ଼ ସର୍‌ଗେଅନି ଦୁଡ଼ମନ୍ ମାନ୍‌ଆଇ, ସେ ସରଗର୍ ଦୁଡ଼ଟାନେ କେଟି ପର୍‌ମେସରକେ ସୁମର୍‌ନା କର୍‌ବାର୍ ଦାରଲାଇ ।

^{୧୪} “ସର୍‌ଗେ ରଇବା ପର୍‌ମେସରର୍ ଜୟ ଜୟ କରୁ, ଆରି ଦର୍‌ଡନିଟାନେ ରଇବା ଜନ୍ ଲକ୍‌ମନ୍‌କେ ପର୍‌ମେସର୍ ବାର୍‌ଲାଆତେ ସେମନ୍‌କେ ସାନ୍ତି ମିଲ ।”

^{୧୫} ଦୁଡ଼ମନ୍ ମେଣ୍ଟା ଚାରାଉ ଗଉଡ଼ମନ୍‌କେ ଚାଡ଼ି ସର୍‌ଗେ ଉଟିଗାଲା ପତେ, ଗଉଡ଼ମନ୍ ତାକର୍ ତାକର୍ ବିଡ଼ରେ କୁଆବଲା ଅଇବାର୍ ଦାରଲାଇ, “ଆସା ଆମେ ସବୁ ବେଡ଼ଲିଇମ୍ ଜାକ ଜାଇକରି, ପର୍‌ମେସର୍ ଜାନାଇରଇଲା ବିସଇ ଦେକୁ ।”

^{୧୬} ତେଇଅନି ସେମନ୍ ଦାପରେ ଜାଇ କଜିକରି ମରିୟମ୍, ଜସେପ୍ ଆରି ଗରୁସାଲର୍ ଡଙ୍ଗାଇ ପିଲା ଡୁଲିରଇଲାଟା ଦେକ୍‌ଲାଇ ।

^{୧୭} ସେମନ୍ ପିଲାକେ ଦେକିକରି, ଦୁଡ଼ ଜାଇ ଜାଇଟା କଇରଇଲା, ତେଇ ରଇଲା ସବୁଲକ୍‌କେ କଇଲାଇ । ^{୧୮} ଆରି ଜେଡ଼କି ଲକ୍ ତେଇ ରଇଲାଇ ଗଉଡ଼ମନ୍‌ର୍ ଟାନେଅନି ସେ ସବୁ କାତା ସୁନି କାବା ଅଇଗାଲାଇ । ^{୧୯} ମାତର୍ ମରିୟମ୍ ଏ ସବୁ କାତା ନିଜର୍ ମନେ ସଙ୍ଗଇ, ସେ ବିସଇସେ ଚିନ୍ତା କର୍‌ବାର୍ ଦାରଲା । ^{୨୦} ଆରି ମେଣ୍ଟା ଚାରାଉମନ୍‌କେ ଦୁଡ଼ ଜେନ୍ତି କଇରଇଲା, ସେନ୍ତା ସୁନ୍‌ଲାଇ ଆରି ଦେକ୍‌ଲାଇ । ସେ ସବୁରଲାଗି ପର୍‌ମେସରର୍ ମଇମା କରି କରି ବାଅଡ଼ଲାଇ ।

ଜିସୁକେ ପର୍‌ମେସରର୍ ଗରେ ନେଲାଇ

୨୧ ✨ଆର୍ ଦିନ୍ ଅଇଲାପତେ ଜିଉଦିମନର୍ ନିୟମ ଇସାବେ ପିଲାକେ ସୁନତ୍ କର୍ବାକେ ମନ୍ଦିରେ ନେଲା । ଆରି ପିଲାର୍ ନାଉଁ ଜିସୁ ବଲି ଦିଆଅଇଲା । ଏ ନାଉଁ ମରିୟମ୍ ଗାଗ୍ତେ ନ ଅଇତେ, ସର୍ଗର୍ ଦୁତ୍ କଇରଇଲା ।

୨୨ ପତେ ଜେଡେବଲ୍ ମସାର୍ ବିଦି ଇସାବେ, ଜସେପ୍ ଆରି ମରିୟମର୍ ସୁତକ୍ ଅଇରଇବା ବେଲା ପୁରୁନ୍ ଅଇଆଇଲା, ପିଲାକେ ପର୍ମେସର୍କେ ସର୍ପି ଦେବାକେ ଜିରୁସାଲାମ୍ ମନ୍ଦିରେ ନେଲା । ୨୩ ମାପୁରୁ ଲେକା ଅଇରଇବା ସାସ୍ତର୍ ଇସାବେ, ସେ ବେଲେ ଜନ୍ ଗରେ ମିସା, ପର୍ତୁମ୍ ଜନମ୍ ଅଇଲା ପଣ୍ଡୁଆ ପିଲାମନ୍ ପର୍ମେସର୍ର ସେବାର୍ ପାଇ ସର୍ପି ଅଇବାଇ ବଲି ମାନ୍ତେ ରଇଲା । ୨୪ ଜସେପ୍ ଆରି ମରିୟମ୍ ଜିସୁକେ ଲେକା ଅଇରଇବା ସାସ୍ତର୍ ଇସାବେ ପର୍ମେସର୍କେ ସର୍ପି ଦେବାକେ ଆରି ସୁକଲ୍ ଅଇବା ବିରୁପାଇ ଦୁଇଟା ପରୁଆ ପିଲା ଦାରି ଜିରୁସାଲାମ୍ ଗାଲାଇ ।

ସିମିୟନ୍ ଆରି ଆନା ଜିସୁକେ ଦେକ୍ଲାଇ

୨୫ ସେବେଲେସେ ଜିରୁସାଲାମେ ସିମିୟନ୍ ନାଉଁର୍ ଗଟେକ୍ ଦରମ୍ ଲକ୍ ରଇଲା । ସେ ମାପୁରୁ ଦେକ୍ବା ଇସାବେ ନିମାନ୍ ଲକ୍ । ଇସ୍ରାଏଲ୍ ଦେସେ ଉଦାର୍କାରିଆ ଆସି ସାନ୍ତି ଦେଅ ବଲି ଜାଗିରଇଲା । ଆରି ତାର୍ଟାନେ ସୁକଲ୍ ଆଡ଼ମା ବାସାଅଇରଇଲା । ୨୬ ସୁକଲ୍ ଆଡ଼ମା ତାକେ ଜାନାଇଦେଇରଇଲା ଜେ, ପର୍ମେସର୍ ପାଟାଇରଇବା ଉଦାର୍କାରିଆର୍ ଦର୍ସନ୍ ନ ମିଲ୍ବାଜାକ ତାର୍ ମରନ୍ ନ ଅଏ । ୨୭ ତାକେ ଆଡ଼ମା ଚାଲାଇ ଆନ୍ଲାଜେ ସେ ଦେଉଲର୍ ତାଣ୍ଡେ ଆଇଲା, ଆରି ଜେଡେବଲ୍ ସାନ୍ପିଲା ଜିସୁର୍ ଆୟା ବାବା ତାକେ ବିତ୍ରେ ଆନ୍ଲାଇ,

୨୮ ସେଡକିବେଲେ ସିମିୟନ୍ ସାନ୍ପିଲାକେ କଲେ ଦାରି ପର୍ମେସର୍ର ମଇମା କରି କଇଲା,

୨୯ “ଏ ମାପୁରୁ ! ଏବେ ତୁଇ ନିଜର୍ ବାକିଅ ଇସାବେ

ତର୍ ନିଜର୍ ଦାସ୍ ମକେ ସାନ୍ତିସଙ୍ଗ୍ ଜିବାକେ ଦେଲୁସିନି !

୩୦ କାଇକେବଇଲେ ମର୍ ଆଁକି ତର୍ ଉଦାର୍ ଦେକି ଆତେ,

୩୧ ଜନ୍ ଉଦାରକାରିଆକେ ତମେ ସବୁଲକର୍ ମୁଆଟେ ପାଟାଇ ଆଟାସ୍ ।

୩୨ ଆରି ବିଜାତି ଲକ୍ମନର୍ପାଇ ବଲି ଜାନାଇଅଇଲା ସତର୍ ଉଜଲ୍ ଆରି ତମର୍ ଲକ୍ମନ ଇସ୍ରାଏଲର୍ ମଇମା କରି ଆଟାସ୍ ।”

୩୩ ସିମିୟନର୍ଟାନେଅନି ଜିସୁର୍ ବିସଇର୍ କାତା ସୁନି ଜସେପ୍ ଆରି ମରିୟମ୍ କାବାଅଇ ଜାଇତେ ରଇଲା । ୩୪ ଆରି ସିମିୟନ୍ ସେଲକ୍‌କେ ଆସିର୍ବାଦ୍ ଦେଇ ଜିସୁର୍ ମାକେ କଇଲା, “ଏ ପିଲା ଇସ୍ରାଏଲ୍ ଦେସର୍ କେତେ କେତେ ଲକ୍ ଉବଜ୍‌ବାଟା ଆରି କେତେ କେତେ ଲକ୍ ବୁଡିଜିବାର୍ପାଇ ବଲି ପର୍ମେସର୍ ବାଟି ପାଟାଇଲା ଲକ୍ ଅଇସି । କେତେ କେତେ ଲକ୍ମନ୍ ତାର୍ ବିରୁଦେ କଇବା, ଗଟେକ୍ ତିନ୍ ପାରା ଅଇସି । ୩୫ କେତେ କେତେ ଲକ୍ ତାକେ ବିରଦ୍ କରି ନିଜର୍ ମନ୍ ବିତ୍‌ରର୍ କାତା ସବୁ ଜାନାଇବାଇ । ଆରି ତମର୍ ଜିବ୍‌ନେ ଗଟେକ୍ କାଣ୍ଟା ବୁସିଅଇରଇଲାପାରା ତମ୍‌କେ ବେସି ଦୁକ୍ ଆଇସି ।”

୩୬ ସେ ଦାପ୍‌ରେ, ଏଦେ ଦେକା ! ଆନା ନାଉଁର୍ ଗଟେକ୍ ମାଇଜି ବବିସତ୍‌ବକ୍ତା ତାକର୍ ଲଗେ ଆଇଲା । ସେ ଆସେର୍ ବସ୍‌ର୍ ପିନ୍‌ଏଲ୍‌ର୍ ଟକି, ସେ ବେସି ଡକ୍‌ରି ଅଇଜାଇରଇଲା । ବିବା ଅଇ ମୁନ୍‌ସ୍ ସଙ୍ଗ୍ ସାଡ୍ ବରସ୍ ରଇକରି, ରାଣ୍ଟି ଅଇଗାଲା । ଆରି ତାକେ ଚାରିକଡିଚାରି ବରସ୍ ଅଇରଇଲା । ୩୭ ସେ ଦେଉଲେଅନି କେନେ ନ ଜାଇ, ଉପାସ୍ ରଇକରି ଦିନ୍ ରାତି ମାପ୍‌ରୁର୍ ଉପାସନା କର୍‌ତେରଇଲା । ୩୮ ପିଲାକେ ମାପ୍‌ରୁର୍‌ଟାନେ ସର୍‌ପି ଦେବାବେଲେ ସେ ଦେଉଲର୍ ତାଣ୍ଟେ କେଟି, ପର୍ମେସର୍‌ର୍ ମଇମା କରିକରି ଜନ୍ ଲକ୍ମନ୍ ଜିରୁସାଲାମର୍ ମୁକ୍ତି ମିଲ ବଲି ଜାଗ୍‌ତେରଇଲା, ସେ ଲକ୍ମନ୍‌କେ ପିଲାର୍ ବିସଇ କଇବାର୍ ଦାର୍ଲା ।

ଜସେପ୍ ଆରି ମରିୟମ୍ ନାଜରିତେ ବାଅଡ୍‌ଲାଇ

୩୯ ☆ପଟେ ଜସେପ୍ ଆରି ମରିୟମ୍ ମାପ୍‌ରୁର୍ ରିତିନିତି ଇସାବେ କର୍‌ବା ସବୁ କାମ୍ ସାରାଇ, ଗାଲିଲି ନିଜର୍ ନଅର୍ ନାଜରିତେ ବାଅଡ୍‌ଲାଇ । ୪୦ ଆରି ପିଲା ଦିନ୍‌କେ ଦିନ୍ ବଡିକରି ବପୁଅଇଲା,

☆ ୨:୩୯ ୨:୩୯ ମାଡିଉ ୨:୨୩

ଆରି ଗିଆନେ ପୁରାପୁରୁନ୍ ଅଇଲା । ତାକେ ପର୍ଯ୍ୟେସରର୍ ଦୟା ରଇଲା ।

ସାନ୍ ପିଲା ଜିସୁ ଦେଉଲେ ରଇବାଟା

୪୧ ଜିସୁର୍ ବାବା, ମା ସବୁବର୍ସେ ଜିଉଦିମନର୍ ନିସ୍ତାର୍ ପରବ୍ ପାଇ ଜିରୁସାଲାମେ ଜାଇତେରଇଲା । ୪୨ ତରେକ୍ ଜିସୁକେ ବାର ବରସ୍ ଅଇଲାବେଲେ ସେମନର୍ ରିତିନିତି ଇସାବେ ଜିରୁସାଲାମେ ପରବ୍ ମାନ୍ବାର୍ ଗାଲା ।

୪୩ ସେମନ୍ ପରବ୍ ସାରାଇ ବାଉଡି ଆଇଲାବେଲେ, ପିଲା ଜିସୁ ଜିରୁସାଲାମେ ରଇଗାଲା । ମାତର୍ ତାର୍ ବାବା ମାଆ ମିସା ସେ ତେଇ ରଇଲାଟା ଜାନି ନ ରଇଲା । ୪୪ ତାର୍ ସଙ୍ଗର୍ ଲକ୍ମନର୍ ସଙ୍ଗ୍ ଆଟେ କାଇକି ବଲି ବାବିକରି ସେମନ୍ ଗଟେକ୍ ଦିନର୍ ବାଟେ ଇଣ୍ଡି ଉଟି ଜାଇରଇଲା । ସେମନ୍ ସାଇପଡିସା, ତିନାର୍ ଜାନାର୍ ଲକ୍ମନକେ ପାଟାରି କଜ୍ଲା । ୪୫ ତିସେନାଇକେ ଆରି କଜି କଜି ଜିରୁସାଲାମେ ବାଉଡିଗାଲା । ୪୬ ତିନୁଦିନ୍ ପଟେ ସେମନ୍ ତାକେ ମନ୍ଦିରେ ଦେକ୍ଲା, ସେ ସାସ୍ତର୍ ସିକାଉମନର୍ ମଜାଇ ବସି, ତାକର୍ କାତା ସୁନ୍ତେରଇଲା, ଆରି ପର୍ସନ୍ ପାଟାଟେରଇଲା । ୪୭ ଆରି ତେଇ ଜେଡକି ଲକ୍ ତାର୍ କାତା ସୁନ୍ତେରଇଲା, ସବୁଲକ୍ ସେ କାତା ଅଇବାଟା ଆରି ତାର୍ ବୁଦି ଦେକି କାବାଅଇ ଜାଇତେରଇଲା । ୪୮ ଜସେପ୍ ଆରି ମରିୟମ୍ ମିସା ଜିସୁକେ ଦେକି କାବା ଅଇଗାଲା, ଆରି ତାର୍ ମାଆ ତାକେ କଇଲା, “ତୁଇ କାଇକେ ନୁନା ଆମ୍‌କେ ଏନ୍ତାରି କଲୁସ୍ ? ଦେକ୍‌ନି ତର୍ ବାବା ଆରି ମୁଇ କେତେକ୍ କିଲ୍‌ବିଲ୍ ଅଇ କଜ୍‌ଲୁନି ।”

୪୯ ତେଇ ଜିସୁ ସେମନ୍‌କେ କଇଲା, “କାଇକେ ମକେ କଜ୍‌ତେରଇଲାସ୍ ? ମର୍ ବାବାର୍ ଗରେ ମୁଇ ରଇବାର୍ ଆଟେଆକା, ଏଟା ନାଜାନି ରଇଲାସ୍ କି ?” ୫୦ ମାତର୍ ଜିସୁ ସେମନ୍‌କେ ଜନ୍ କାତା କଇଲା, ସେଟା ସେମନ୍ ବୁଜିନାପାର୍ଲା ।

୫୧ ପଟେ ଜିସୁ ତାର୍ ବାବା ମାଆ ସଙ୍ଗ୍ ନାଜରିତେ ବାଉଡି ଆଇଲା ଆରି ତାକର୍ କାତା ମାନ୍‌ତେରଇଲା, ମରିୟମ୍ ମିସା ଏ ସବୁ କାତା ନିଜର୍ ମନ୍ ବିତ୍‌ରେ ସଙ୍ଗଇ ଚିନ୍ତା କଲା । ୫୨ ଜିସୁ, ଗିଆନେ, ଗାଗ୍‌ତେ, ପର୍ଯ୍ୟେସର୍ ଆରି ଲକ୍ମନର୍ ଦୟାଇ ବଡିଆଇଲା ।

୩

ତୁବନ୍ ଦେଉ ଜଅନ୍ କଇବା ନିକ କାତା

(ମାତିଉ ୩:୧-୧୨; ମାର୍କ ୧:୧-୮; ଜଅନ୍ ୧:୧୯-୨୮)

୧ ବଡ଼ ସାସନ୍‌କାରିଆ ଡିବିରିଆ କାଇସର୍ ସାସନ୍ କର୍ବା ପନ୍ଦର ବରସ୍ ଅଇଲାବେଲେ, ପାନ୍ତ୍ରୟ ପିଲାଡ଼ ଜିଉଦା ରାଇଜ୍ ସାସନ୍ କର୍ତେରଇଲା । ଆରି ଏରଦ୍ ଗାଲିଲିର୍ ସାସନ୍‌କାରିଆ ରଇଲା । ଏରଦର୍ ବାଇ ପିଲିପ୍ ଇଡୁରିଆ ଆରି ତାକ୍‌ନିଡ଼ ରାଇଜର୍ ସାମନ୍ତ ରାଜା ରଇଲା । ଲୁସାନିଆ ନାଉର୍ ଗଟେକ୍ ଲକ୍ ଅବିଲିନି ରାଇଜର୍ ସାମନ୍ତ ରାଜା ରଇଲା । ୨ ଆନାନ୍ ଆରି କୟାପ୍ ନାଉର୍ ଦୁଇ ଲକ୍ ବଡ଼ ପୁଜାରି ରଇଲା । ସେବେଲେ ଜିକରିୟର୍ ପଅ ଜଅନ୍, ମରୁବାଲି ବୁର୍ଷି ରଇଲାବେଲେ ପର୍ମେସରର୍ କାତା ସେ ସୁନ୍‌ଲା । ୩ ଜର୍ଦନ୍ ଗାଡ଼ ଲଗେ ରଇବା ଲଗର୍ ପାକର୍ ଗାଉଁଗଣ୍ଡାଇ ଜାଇ ଜଅନ୍ ପାପ୍ କେମାର ଲାଗି, ପାପ୍‌କାମ୍ ଚାଡ଼ିକରି ମାପୁରୁର୍ ବାଟେ ଆସି ତୁବନ୍ ନେବାକେ ଜାନାଇବାର ଦାରଲା ।

୪ ଜେନ୍ତାରି ଜିସାୟ ବବିସଡ଼ବକ୍ତା ସୁନାଇରଇବା ସାସ୍ତରେ ଲେକା ଅଇଲାଆଟେ,

“ମରୁବାଲିବୁର୍ଷି ଆଉଲିଅଇ କଇବା ଗଟେକ୍ ଲକ୍ ସବଦ୍ କରି କଇଲାନି,

ମାପୁରୁ ଆଇବାଟା ଡିଆରକରା,
ତାର ଆଇବା ବାଟ୍ ସଲକାଆ ।

୫ ବଡ଼ ବଡ଼ ଡଙ୍ଗର୍ ପର୍ବତ୍ ସବୁ ସଦରମ୍ ଅଇକରି

ଗାଡ଼ କଣ୍ଟି କଣ୍ଟି ରଇବା ଆଁଗାଲ୍ ବୁଟାଲ୍ ସାରଦି ଅଇସି,

ବାଁକ୍ ଟେକ୍ ବାଟ୍ ସଲକ୍ ଅଇସି,

ଆରି କାଲ୍ ଡେପ୍ ଜମି ସଦରମ୍ ଅଇଜାଇସି ।

୬ ମର୍ପୁରୁର୍ ସବୁଲକ୍ ପର୍ମେସରର୍ ଉଦାରକାରିଆକେ ଦେକ୍‌ବାଇ ।”

୭ ☆ଜଅନ୍‌ଗାନେ ତୁବନ୍ ନେବାରଲାଗି ବାରଇ ଆଇବା ଲକ୍‌ମନ୍‌କେ ସେ କଇଲା, “ଏ ବିସ୍ ରଇଲା ସାଁପର୍ ବସ୍‌ର୍ ଲକ୍‌ମନ୍, ଆଇବା ପର୍ମେସରର୍ କପେଅନି ପାଲାଇବାକେ ତମ୍‌କେ କେ ଚେଡ଼ନା ଦେଲା ? ।” ☆ଡେବର୍‌ପାଇ ପାପ୍‌କାମ୍ ଚାଡ଼ି ନିକ

☆ ୩:୭ ୩:୭ ମାତିଉ ୧୨:୩୪;୨୩:୩୩ ☆ ୩:୮ ୩:୮ ଜଅନ୍ ୮:୩୩

କାମ୍ କରା, ଅବରାଆମ୍ତା ଆମର୍ ଆନିଦାଦି ବଲି ମନେ ମନେ ବାବାନାଇ, କାଇକେବଇଲେ ମୁଇ ତମ୍‌କେ କଇଲିନି, ପର୍‌ମେସର୍ ଏ ପାକ୍‌ନାମନର୍‌ଟାନେଅନି ମିସା ଅବରାମର୍ ପିଲାଜିଲା ଉର୍‌ଜାଇ ପାର୍‌ସି । ^୯ ✧ ଏବେମିସା ଗର୍‌ମନର୍ ବୁନ୍ଦେ କୁରାଡି ଲାଗିଆରେ, ତେବର୍‌ପାଇ ଜନ୍ ଗର୍ ନିମାନ୍ ପଲ୍ ନ ପଲେ, ସେଟା କାଟିକରି ଜଇଟାନେ ପିଙ୍ଗାଅଇସି ।”

^{୧୦} ତେଇ ଲକ୍‌ମନ୍ ଜଅନ୍‌କେ ପାଚାର୍‌ଲାଇ, “ସେନ୍ତାର୍ ଆଲେ ଆମେ କାଇଟା କର୍‌ବୁ ?”

^{୧୧} ଜଅନ୍ ସେମନ୍‌କେ କଇଲା “ଜାର୍‌ଟାନେ ଦୁଇଟା ପିନ୍‌ବା ଲୁଗା ଆରେ, ଜାକେ ନାଇ, ତାକେ ସେ ଗଟେକ୍ ଦେଅ, ଆରି ଜାର୍‌ଟାନେ କାଦି ଆରେ, ସେ ମିସା ସେନ୍ତାରି ବାଟା କରି ଦେଅ ।”

^{୧୨} ✧ ସିସ୍‌ତୁମାଙ୍ଗୁମନ୍ ମିସା ହୁବନ୍ ନେବାକେ ଆସି ତାକେ ପାଚାର୍‌ଲାଇ “ଏ ଗୁରୁ ଆମେ କାଇଟା କର୍‌ବୁ ?”

^{୧୩} ଜଅନ୍ ସେମନ୍‌କେ କଇଲା, “ତମର୍ ଜେଡ୍‌କି ନେବାର୍ ଅଦିକାର୍ ଆରେ, ତାର୍‌ତେଇଅନି ଅଦିକ୍ ମାଙ୍ଗା ନାଇ ।”

^{୧୪} ସନିଅମନ୍ ମିସା ତାକେ ପାଚାର୍‌ବାର୍ ଦାର୍‌ଲାଇ, “ଆରି ଆମେ କାଇଟା କର୍‌ବୁ ?”

ଜଅନ୍ ସେମନ୍‌କେ କଇଲା, “ବପୁ ଦେକାଇ କାଇଟା ମିସା ଜିକି ଆନା ନାଇ କି ନାତାଇକରି କାର୍ ଦନ୍‌ସଁପତି ଆନା ନାଇ, ତମ୍‌କେ ଜେଡ୍‌କି କୁଲି ମିଲ୍‌ଲାନି ସେଡ୍‌କି ନେଇକରି ସାର୍‌ଦା ସଙ୍ଗ୍ ରୁଆ ।”

^{୧୫} ଲକ୍‌ମନ୍ ଆସାଅଇ କିରିସ୍‌ଟେକେ ଜାଗ୍‌ତେ ରଇଲାଇ ଜେ, କେତେବେଲେ ଏ ମିସା କିରିସ୍‌ଟ ଅଇରଇସି ବଲି ବାବି, ଜଅନର୍ ବିସଇ ଚିନ୍ତା କର୍‌ତେରଇଲାଇ । ^{୧୬} ତେବେ ଜଅନ୍ ସବୁଲକ୍‌ମନ୍‌କେ କଇଲା, “ମୁଇସିନା ତମ୍‌କେ ପାନିଟାନେ ହୁବନ୍ ଦେଲିନି, ମାତର୍ ମର୍‌ଟାନେଅନି ଅଦିକ୍ ବପୁର୍‌ଲକ୍ ଆଇଲାନି, ମୁଇ ତାର୍ ଗତିଦାଙ୍ଗ୍‌ତା ଅଇ ପାଦର୍ ପାଣ୍ଡୁଇ ମିସା କୁସ୍‌ଲାଇବାକେ ମର୍ ଅଦିକାର୍ ନାଇ । ସେ ତମ୍‌କେ ଜଇସଙ୍ଗ୍ ଆରି ସୁକଲ୍ ଆଡ଼ମାଇ ହୁବନ୍ ଦେଇସି । ^{୧୭} ତାର୍ ଆଡେ କୁଲାଆରେ, ତେବେ ସେ କଟାରେ ରଇଲା ଦାନ୍ ପରିଚଲ୍ କରି ଚୁଲିଆଇ କଲ୍‌କିଟାନେ ସଙ୍ଗ୍‌ଇସି ।

କାଈ କାମେ ନ ଆଇବାଟା ଜାକ ସବୁବେଲେ ଲାଗିରଇବା ଜଇଟାନେ ପଡ଼ାଇଦେଇସି ।”

୧୮ ଜିଅନ୍ ଏନ୍ତାରି କେତେକ୍ କେତେକ୍ ଉପଦେସ୍ ଦେଇକରି ଲକ୍ମାନକେ ମାପ୍ପୁରୁରବାଟେ ଆଇବାକେ ମନ୍ କରାଇତେରଇଲା ଆରି ମାପ୍ପୁରୁ ନିକ କାତା ସୁନାଇତେରଇଲା ଆରି ପାପ୍ କରବାଟାନେଅନି ବାଅଡ଼ବାକେ ବୁଜାଇତେରଇଲା । ୧୯ ✠ମାତର୍ ସାମନ୍ତ ରାଜା ଏରଦ୍ ନିଜର୍ ବାଇର୍ ମାଇଜି ଏରଦିଆକେ ସଙ୍ଗାଇଲାକେ ତାର୍ କରିରଇବା ବିନ୍ ବିନ୍ ପାପ୍କାମର୍ ବିସଇ ଜାନି ଜିଅନ୍ ତାକେ ଦମ୍ କାଇତେରଇଲା । ୨୦ ଏରଦ୍ ଜିଅନ୍କେ ବନ୍ଦିକରି ସେ କରିରଇବା ସବୁ ପାପ୍କାମର୍ ସଙ୍ଗ୍ ଏ ବଡ଼ ପାପ୍ ମିସା ଜଡ଼ଲା ।

ଜିସୁର୍ ତୁବନ୍

(ମାତିଉ ୧୩:୧୭; ମାର୍କ ୧:୯-୧୧)

୨୧ ସବୁଲକ୍ ତୁବନ୍ ନେଲା ପଟେ ଜିସୁ ମିସା ତୁବନ୍ ନେଲା । ଆରି ପାର୍ତନା କରବାବେଲେ, ଏଦେ ଦେକା ! ବାଦଲ୍ ଉଗାଡ଼ିଅଇଗାଲା, ୨୨ ✠ଆରି ସୁକଲ୍ ଆଡ଼ମା ପରୁଆର୍ ଗାଗଡ଼ ଦାରି ଉଡ଼ରି ଆସି, ଜିସୁର୍ ଉପରେ ବସ୍ଲା । ସର୍ଗେଅନି ଗଟେକ୍ ଏନ୍ତାରି ସବଦ୍ ଆଇଲା, “ତୁଇସେ ମର୍ ଆଲାଦର୍ ପିଲା, ତରଟାନେ ମୁଇ ବେସି ସାର୍ଦା ଅଇଲିନି ।”

ଜିସୁର୍ ଆନିଦାଦିମନର୍ ଇସାବ୍

(ମାତିଉ ୧:୧-୧୭)

୨୩ ଜିସୁ ପର୍ମେସରର୍ କାମ୍ ଆରମ୍ କଲାବେଲେ ତାକେ ଡିରିସ୍ ବରସ୍ ଅଇରଇଲା । ଲକ୍ମାନର୍ ବାବ୍ନା ଇସାବେ, ଜିସୁ ଜସେପର୍ ପଅ, ଜସେପ୍ ଏଲିର୍ ପଅ । ୨୪ ଏଲି ମଡ଼ତାତର୍ ପଅ, ମଡ଼ତାଡ଼ ଲେବିର୍ ପଅ, ଲେବି ମଲ୍କିର୍ ପଅ, ମଲ୍କି ଜନୟର୍ ପଅ, ଜନୟ ଜସେପର୍ ପଅ, ୨୫ ଜସେପ୍ ମତିତିଆର୍ ପଅ, ମତିତିଆ ଅମସର୍ ପଅ, ଅମସ୍ ନାଉମର୍ ପଅ, ନାଉମ୍ ଏସ୍ମିର୍ ପଅ, ଏସ୍ମି ନଗୟର୍ ପଅ, ୨୬ ନଗୟ ମଅତର୍ ପଅ, ମଅତ୍ ମତିତିଆର୍ ପଅ, ମତିତିଆ ସମଇର୍ ପଅ, ସମୟ୍ ଜସେକର୍ ପଅ, ଜସେକ୍ ଜଦାର୍ ପଅ,

✠ ୩:୧୯ ୩:୧୯ ମାତିଉ ୧୪:୩,୪; ମାର୍କ ୬:୧୭,୧୮ ✠ ୩:୨୭ ୩:୨୭ ମାତିଉ ୩:୧୭; ମାର୍କ ୧:୧୧; ଲୁକ୍ ୯:୩୫

୨୭ ଜଦା ଜଅନର ପଅ, ଜଅନ୍ ରେସାର ପଅ, ରେସା ଜିରୁବାବେଲର ପଅ, ଜିରୁବାବେଲ ସିଅଲ୍‌ତିଏଲର ପଅ, ସଅଲ୍‌ତିଏଲ ନେରିର ପଅ, ୨୮ ନେରି ମଲ୍‌କିର ପଅ, ମଲ୍‌କି ଅଦିର ପଅ, ଅଦି କସାମର ପଅ, କସାମ ଏଲୁଦାନର ପଅ, ଏଲୁଦାନ ଏରର ପଅ, ୨୯ ଏର ଜିୟସୁଅର ପଅ, ଜିୟସୁଅ ଏଲିଏଜର ପଅ, ଏଲିଏଜ୍ ଜରିମର ପଅ, ଜରିମ୍ ମଡ଼ତାତର ପଅ, ମଡ଼ତାଡ଼ ଲେବିର ପଅ, ୩୦ ଲେବି ସିମିୟନର ପଅ, ସିମିୟନ ଜିଉଦାର ପଅ, ଜିଉଦା ଜସେପର ପଅ, ଜସେପ ଜନାମର ପଅ, ଜନାମ ଏଲିଆକିମର ପଅ, ୩୧ ଏଲିଆକିମ୍ ମଲାଅର ପଅ, ମଲାଅ ମନାର ପଅ, ମନା ମତତାର ପଅ, ମତତା ନାତନର ପଅ, ନାତନ ଦାଉଦର ପଅ, ୩୨ ଦାଉଦ୍ ଜିୟସୁଅର ପଅ, ଜିୟସୁଅ ଆବେଦର ପଅ, ଆବେଦ୍ ବୟଜର ପଅ, ବୟଜ୍ ସେଲଅର ପଅ, ସେଲଅ ନଅସନର ପଅ, ୩୩ ନଅସ୍ ଅମିନାଦାବର ପଅ, ଅମିନାଦାବ୍ ଅଦମିନର ପଅ, ଅଦମିନ୍ ଅରନିର ପଅ, ଅରନିର ଏସରନର ପଅ, ଏସରନ୍ ପେରସର ପଅ, ପେରସ୍ ଜିଉଦାର ପଅ, ୩୪ ଜିଉଦା ଜାକୁବର ପଅ, ଜାକୁବ୍ ଇସାକର ପଅ, ଇସାକ୍ ଅବ୍ରାମର ପଅ, ଅବ୍ରାଆମ୍ ତେରଅର ପଅ, ତେରଅ ନାଅର ପଅ, ୩୫ ନାଅର ସରୁଗର ପଅ, ସରୁଗ୍ ରଗୁର ପଅ, ରଗୁ ପେଲଗର ପଅ, ପେଲଗ୍ ଏବର ପଅ, ଏବ ସେଲଅର ପଅ, ୩୬ ସେଲା କଇନାନର ପଅ, କଇନାନ୍ ଆର୍ପାକ୍‌ସତର ପଅ, ଆର୍ପାକ୍‌ସେତର ସେ ମର ପଅ, ସେମ୍ ନଅର ପଅ, ନଅ ଲାମେକର ପଅ, ୩୭ ଲାମେକ୍ ମିତୁସେଲଅର ପଅ, ମିତୁସେଲଅ ଅନକର ପଅ, ଅନକ୍ ଜାରେଦର ପଅ, ଜାରେଦ୍ ମଅଲେଲର ପଅ, ମଅଲେଲ୍ କେନାନର ପଅ ୩୮ କେନାନ୍ ଏନସର ପଅ, ଏନସ୍ ସେତର ପଅ, ସେତ ଆଦମର ପଅ, ଆଦମ୍ ପର୍ମେସରର ପଅ ।

୪

ଜିସୁକେ ସଇତାନର ପରିକା

(ମାତିଉ ୪:୧-୧୧; ମାର୍କ ୧:୧୨-୧୩)

୧ ଜିସୁ ସୁକଲ୍ ଆଡ଼ମାଈ ପୁରାପୁରୁନ୍ ଅଇକରି ଜର୍ଦ୍ଦନ୍ ଗାଡେଅନି ବାଉଡି ଆଇଲା । ଆରି ସଇତାନର ଟାନେ ପରିକା କରାଇବାକେ ତାକେ ଆଡ଼ମା ଚାଲାଇ ନେଲା । ତେଇ ଚାଲିସ୍ ଦିନ୍ ଜାକ ସଇତାନ୍

ତାଙ୍କେ ପରିକା କରତେରଇଲା । ^୨ ସର୍ତ୍ତେ ଦିନ୍ ସାରଲା ପତେ ସେ ବୁକ୍‌କେ ବାୟାଚୁରା ଅଇଗାଲା ।

^୩ ତେଇ ସଇତାନ୍ ଜିସୁକେ କଇଲା, “ତୁଇ ଜଦି ପର୍‌ମେସରର୍ ପ, ତେବେ ଏ ପାକ୍‌ନା କାଦି ଅ ବଲି ଆଦେସ୍ ଦେସ୍ ।”

^୪ ଜିସୁ ତାଙ୍କେ କଇଲା, “ପର୍‌ମେସରର୍ ସାସ୍‌ତରେ ଲେକାଅଇ ଆଚେ, ମୁନ୍‌ସ୍ ଅବ୍‌କା କାଦି କାଇ ନ ବଞ୍ଚେ ।”

^୫ ତାର୍‌ପତେ ସଇତାନ୍ ଜିସୁକେ ଗଟେକ୍ ଉର୍ ଜାଗାଇ ତାକି ଦାରିଜାଇ କରି ଆକିମିଟ୍‌କା ମାର୍‌ବା ଏଡ୍‌କି ପର୍‌କେ ଜଗତର୍ ସବୁ ରାଇଜ୍ ଦେକାଇଲା । ^୬ ଆରି ଜିସୁକେ କଇଲା, “ମୁଇ ତକେ ଏ ସବୁ ଦନ୍ ସଂପତିର୍ ଅଦିକାର୍ ଆରି ମଇମା ଦେବି । କାଇକେବଇଲେ ସେଟା ସବୁ ମକେ ସର୍‌ପିଦେଲାଆଚେ, ଆରି ମୁଇ ଜାକେ ମନ୍ କର୍‌ବି, ତାକେ ଦେବି । ^୭ ତେବର୍‌ପାଇ, ଜେବେ ତୁଇ ମକେ ଜୁଆର୍ କର୍‌ସୁ, ତେବେ ସେ ସବୁଜାକ ତର୍ ଅଇସି ।”

^୮ ଜିସୁ ତାଙ୍କେ କଇଲା, “ପର୍‌ମେସରର୍ ସାସ୍‌ତରେ ଲେକାଅଇଆଚେ, ତୁଇ ତର୍ ପର୍‌ମେସର୍କେସେ ଜୁଆର୍ କର୍‌ସୁ, ଆରି ତାକେସେ ସେବା କର୍‌ସୁ ।”

^୯ ପତେ ସଇତାନ୍ ଜିସୁକେ ଜିରୁସାଲାମେ ତାକିଦାରିଜାଇ, ମନ୍‌ଦିରର୍ ଚାଉନି ଟିପେ ଟିଆକରାଇ କଇଲା, “ତୁଇ ଜଦି ପର୍‌ମେସରର୍ ପ, ତେବେ ଇଡିଅନି ତଲେ ଡେଗଇଦେସ୍, ^{୧୦} କାଇକେବଇଲେ ସାସ୍‌ତରେ ଲେକାଆଚେ ତକେ ରକିଆ କର୍‌ବାକେ ପର୍‌ମେସର୍ ତାର୍ ନିଜର୍ ଦୁଡ୍‌ମନକେ ଆଦେସ୍ ଦେଇସି । ^{୧୧} ଆରି ମିସା ଲେକା ଆଚେ, ‘ଜେଡ୍‌କି ତର୍ ପାଦ୍ ପାକ୍‌ନାଇ ନ ପାଏ, ସେଟାର୍‌ପାଇ ଦୁଡ୍‌ମନ୍ ତକେ ଆତେଦାରି ଟେକି ନେବାଇ ।’”

^{୧୨} ଜିସୁ ସଇତାନ୍‌କେ କଇଲା, “ଏଟା ମିସା ଲେକାଆଚେ, ତୁଇ ତର୍ ମାପୁର୍ ନିଜର୍ ପର୍‌ମେସର୍କେ ପରିକା କର୍ ନାଇ ।”

^{୧୩} ସଇତାନ୍ ସବୁ ରକାମର୍ ପରିକା ସାରାଇଲା ପତେ, ଆରି ତରେକ୍ ବେଲା ମିଲ୍‌ବାଜାକ କେତେ ଦିନର୍ ପାଇ ଜିସୁକେ ଚାଡି ଉଟିଗାଲା ।

ଜିସୁର୍ ସେବା କାମ୍ ଆରାମ୍

(ମାତିଉ ୪:୧୨-୧୭; ମାର୍କ ୧:୧୪-୧୫)

୧୪ ତାରପରେ ଜିସୁ ଆତ୍ମାଲ ବପୁଅଇକରି ଗାଲିଲି ରାଇଜେ ବାଉଡିଗାଲା । ଆରି ତାର କବର୍ ଗାଲିଲି ରାଇଜର୍ ଗୁଲାଇ ଗାଉଁମନ୍ ଜାନ୍‌ଲାଇ । ୧୫ ପରେ ଜିସୁ ଜିଉଦିମନ୍‌ର୍ ପାର୍ତନା ଗରମନ୍‌କେ ବୁଲି ବୁଲି ସିକିଆ ଦେଇକରି ସବୁ ଲକର୍‌ଟାନ୍‌େ ଅନି ଡାକ୍‌ପୁଟା ପାଇବାର୍ ଦାରଲା ।

ଜିସୁକେ ନାଜରିତର୍ ଲକ୍ ନାମତ୍‌ନାଇ
(ମାତିଉ ୧୩:୫୩-୫୮; ମାର୍କ ୬:୧-୬)

୧୬ ଏଡକିବିତ୍‌ରେ ନାଜରିତେ, ଜନ୍ ଜାଗାଇ କି ଜିସୁ ସାନ୍‌ବେଲେ ଅନି ବଡ୍ ଅଇରଇଲା, ସେ ଜାଗାଇ ଗାଲା । ଆରି ନିଜର୍ ରିତିନିତି ଇସାବେ, ବିସରାମ୍ ବାରେ ଜିଉଦିମନ୍‌ର୍ ପାର୍ତନା ଗରେ କେଟି ଦରମ୍ ସାସ୍‌ତର୍ ପଡ୍‌ବାକେ ଚିଆ ଅଇଲା । ୧୭ ସେଡକିବେଲେ ତାକେ ଜିସାୟ ବବିସତ୍‌ବକ୍‌ତା ଲେକିରଇଲା ଦରମ୍ ସାସ୍‌ତର୍ ଦିଆଅଇଲା, ଆରି ଜିସୁ ସେ ଜିସାୟ ବଇଟାନ୍‌େ ଲେକାଅଇରଇଲା ଏଣ୍ଡାରି ବାକିଅ ମେଲାକରି ପାଇଲା ।

୧୮ “ମାପ୍‌ରୁର୍ ଆତ୍ମା ମର୍ ସଙ୍‌ ଆଟେ,
ତେବର୍‌ପାଇ ନଇଲା ମଇଲା ଲକ୍‌ମନ୍‌ର୍‌ଟାନ୍‌େ ସୁବ୍ କବର୍
ଜାନାଇବାକେ, ପର୍‌ମେସର୍ ମକେ ବାଟିକରି ପାଟାଇଲା,
ବନ୍ଦି ଗରେ ରଇବା ଲକ୍‌ମନ୍‌କେ ମୁକ୍‌ଲାଇବାକେ,
କାଣା ଲକ୍‌ମନ୍‌କେ ଦେକାଇବା ବିସଇ ଜାନାଇବାକେ ଆରି
ଦୁକର୍ ଲକ୍‌ମନ୍‌କେ ମୁକ୍‌ଲାଇବାକେ,

୧୯ ଆରି ମାପ୍‌ରୁ ତାର ଲକ୍‌ମନ୍‌କେ ରକିଆ କର୍‌ବା ବେଲା
ଆସିଆଟେ, ବଲି ଜାନାଇବାକେ
ସେ ମକେ ପାଟାଇଆଟେ ।”

୨୦ ପରେ ସେ ସାସ୍‌ତର୍ ଡାବି, ପାର୍ତନା ଚାଲାଇବା ଗଟେକ୍ ଲକ୍‌କେ ବାଉଡାଇଦେଇ ବସିଦେଲା । ପାର୍ତନା ଗରେ ରଇଲା ଲକ୍‌ମନ୍ ତାକେସେ ଦେକ୍‌ତେରଇଲାଇ । ୨୧ ଜିସୁ ଲକ୍‌ମନ୍‌କେ କଇବାର୍ ଦାରଲା, “ଆଜି ତମେ ସୁନ୍‌ଲା ଏ ଦରମ୍ ସାସ୍‌ତରର୍ ବାକିଅ ପୁରାପୁରୁନ୍ ଅଇଲା ।”

୨୨ ଜିସୁର୍ ବିସଇ ନେଇକରି ସବୁଲକ୍ ନିକ ସାକି ଦେବାର୍ ଦାରଲା ଆରି ସେ କଇବା, ମନ୍‌କେ ପାଇଲା ବାକିଅ ସୁନି

କାବାଅଇଲା, ଆରି ସେମନ୍ “ଏଟାକାଇ ଜସେପର୍ ପ ନଏଁ ଜେ ?”
 ବଲି କଇବାରଦାରଲା ।

୨୩ ଜିସୁ ଲକ୍ମନ୍‌କେ କଇଲା, “ତମେ ସେ ଗାଲା କାତା
 ଆରିତରେକ୍ କଇସା ବଲି ମୁଇ ଜାନିରଇଲି, ଏ ଅସ ଦେଉ, ନିଜେ
 ତୁଇ ନିକ ଅ, ଆରି କପର୍ନାତମେ ଜାଇ ଜାଇଟା ଗଟିଆତେ ବଲି
 ଆମେ ସୁନିଆରୁ, ସେଟା ସବୁ ଏ ଜାଗାଇ, ତର୍ ନିଜର୍ ଜନମ୍
 ନଅରେ ମିସା କର୍ ।” ୨୪ ✨“ମାତର୍ ମୁଇ ତମ୍‌କେ ସତ୍ କଇଲିନି,
 ବବିସତ୍‌ବକ୍ତା ଅଇରଇବା କାକେମିସା ନିଜର୍ ଗାଏଁ ନ ନାମତ୍ ।”

୨୫ “ମାତର୍ ମୁଇ ତମ୍‌କେ ସତ୍‌କାତା କଇଲିନି, ଜେତେବେଲେ
 ବବିସତ୍‌ବକ୍ତା ଏଲିୟର୍ ବେଲେ ତିନ୍‌ବରସ୍ ତ ମାସ୍ ଜାକ
 ବାଦଲେଅନି ପାନିମାରେ ନାଇକେ ଗୁଲାଇ ଦେସେ ମର୍ତ୍ତି
 ଅଇରଇଲା, ସେବେଲେ ଇସ୍ରାଏଲ୍ ଦେସେ କେତେ କେତେ
 ରାଣ୍ଡିମାଇଜିମନ୍ ରଇଲା । ୨୬ ରଇଲେ ମିସା ପର୍ମେସର୍
 ଏଲିୟକେ କାରଲଗେ ମିସା ନ ପାଟାଇ ସିଦନ୍ ଦେସର୍ ସାରିପତ୍
 ବଲି ଗଟେକ୍ ଜାଗାଇ, ଗଟେକ୍ ରାଣ୍ଡିମାଇଜିର୍ ଲଗେ ପାଟାଇଲା ।
 ୨୭ ଆରି ମାପୁରୁର୍ ବବିସତ୍‌ବକ୍ତା ଏଲିସାୟର୍ ବେଲେ ଇସ୍ରାଏଲ୍
 ଦେସେ କେତେ କୁସ୍ତି ରଗି ରଇଲା, ଏଲେ ମିସା ତାକର୍ ବିତ୍‌ରେ
 କାକେମିସା ନିକକରି ନ ରଇଲା, ସୁରିଆ ଦେସର୍ ନାମାନ୍ ନାଉର୍
 ଲକ୍‌କେ ସେ ନିକକରି ରଇଲା ।”

୨୮ ଜିଉଦିମନର୍ ପାର୍ତନା ଗରେ ଏ କାତା ସୁନି ଲକ୍ମନ୍ ବେସି
 ରିସାଅଇଗାଲା । ୨୯ ଆରି ସେମନ୍ ଉଟିକରି ଜିସୁକେ ନଅରେଅନି
 ବାର୍‌କରାଇଦେଲା । ତାକର୍ ନଅରର୍ ଜନ୍ ପିର୍‌ବତ୍ ଉପ୍‌ରେ
 ତିଆର୍ ଅଇରଇଲା, ସେ ପର୍‌ବତର୍ ଦାରେଅନି ତଲେ ପିଙ୍ଗିଦେଉଁ
 ବଲି, ତାକେ ତେଇ ଦାରିଗାଲା । ୩୦ ମାତର୍ ଜିସୁ ସେମନ୍‌ର୍
 ବିତ୍‌ରେ ପୁରି ଉଟିଗାଲା ।

**ଜିସୁ ଗଟେକ୍ ତୁମା ଡସିରଇବା ଲକ୍‌କେ ନିମାନ୍ କଲା
 (ମାର୍‌କ ୧:୨୧-୨୮)**

୩୧ ଜିସୁ ଗାଲିଲି ରାଇଜର୍ କପର୍ନାତମ୍ ନାଉର୍ ଗଟେକ୍ ନଅରେ
 ଆଇଲା, ଆରି ବିସ୍ରାମ୍‌ବାରେ ଲକ୍‌ମନ୍‌କେ ସିକିଆ ଦେବାର୍

✨ ୪:୨୪ ୪:୨୪ ଜଅନ୍ ୪:୪୪

ଦାରୁଲା । ୩୨ ☆ଲକ୍ମନ୍ ତାର ସିକାଇବାଟା ଦେକି କାବାଅଇଗାଲାଇ, କାଇକେବଇଲେ ତାର ବାକିଅ ଅଦିକାର୍ ସଙ୍ଗ୍ ରଇଲା । ୩୩ ଦିନେକ୍ ଜିଉଦିମନର୍ ପାର୍ତନା ଗରେ ଗଟେକ୍ ତୁମା ତସିରଇବା ଲକ୍ ରଇଲା । ସେ ଆଉଲିଅଇ କିରକିରି କଇଲା, ୩୪ “ଏ ନାଜରିତର୍ ଜିସୁ, ଆମଟାନେ ତର୍ କାଇ କାମ୍ ଆଟେ ? ତୁଇ କାଇ ଆମ୍‌କେ ମରାଇବାକେ ଆସିଆତୁସ୍ ? ତୁଇ କେ ସେଟା ମୁଇ ଜାନି, ତୁଇ ପର୍ମେସରର୍ ସୁକଲ୍ ଲକ୍ ।”

୩୫ ଜିସୁ ତାକେ ଦମ୍‌କାଇ କରି କଇଲା, “ତୁପ୍ ର, ଆର୍ଟାନେଅନି ବାରଇ ଜା ।” ତେଇଅନି ସେ ତୁମା ସେ ଲକ୍‌କେ ସବୁର୍ ମୁଆଟେ ଅଦରାଇଲା ଆରି, ତାକେ କାଇଟା ନ କରି ତାର୍ ଗାଗ୍‌ତେଅନି ବାରଇ ଉଟିଗାଲା ।

୩୬ ତେଇ ସବୁଲକ୍ କାବାଅଇକରି ତାକର୍ ତାକର୍ ବିତ୍‌ରେ କୁଆବଲା ଅଇଲାଇ, “ଏଟା କାଇ କାତା, ସେ ବପୁ ଆରି ଅଦିକାର୍ ସଙ୍ଗ୍ ତୁମାମନ୍‌କେ ମିସା ଆଦେସ୍ ଦେଲାନି । ସେମନ୍ ମିସା ବାରଇ ଗାଲାଇନି ।” ୩୭ ଜିସୁର୍ ଏ କବର୍ ସେ ଜାଗାର୍ ଗୁଲାଇବାଟର୍ ଲକ୍ ଜାନୁଲାଇ ।

**ଜିସୁ କେତେ କେତେ ଲକ୍ମନ୍‌କେ ନିମାନ୍ କଲା
(ମାତିଉ ୮:୧୪-୧୭; ମାର୍କ ୧:୨୯-୩୪)**

୩୮ ପଟେ ଜିସୁ ଜିଉଦିମନର୍ ପାର୍ତନା ଗରେଅନି ଉଟି ସିମନର୍ ଗରେ ଗାଲା । ସିମନର୍ ସାତ୍‌ରିକେ ବେସି ଜର୍ ଅଇରଇଲାଜେ ସେମନ୍ ତାର୍ ବିସଇ ନେଇ ଜିସୁକେ କଇଲାଇ । ୩୯ ତେଇ ସେ ସିମନର୍ ସାତ୍‌ରିର୍ ଲଗେ ଚିଆଅଇ ଜର୍‌କେ ଦମ୍‌କାଇଲା ଆରି ତାକେ ଜର୍ ଚାଡିଗାଲା । ସେଦାପ୍‌ରେ ସେ ଉଟିକରି ସେମନ୍‌କେ ସେବା କର୍‌ବାର୍ ଦାରୁଲା ।

୪୦ ବେଲ୍‌ବସି ସଞ୍ଜ୍ ଅଇଲାଜେ ଜର୍‌ଦୁକା ଅଇରଇଲା ଲକ୍ମନ୍‌କେ ଜିସୁର୍ ଲଗେ ଆନ୍‌ଲାଇ, ଆରି ସେ ଜର୍‌ଦୁକାର୍ ଲକ୍ମନ୍‌କେ ଗଟେକ୍ ଗଟେକ୍ ଲକ୍‌ର୍ ଉପ୍‌ରେ ଆତ୍ ସଙ୍ଗ୍‌ଇ ନିକ କଲା । ୪୧ ତୁମା ଦାରିରଇବା ବେସି ଲକ୍ମନ୍ ମିସା କିରକିରି କରି “ତୁଇ ପର୍ମେସରର୍ ପଅ !” ବଲି ଲକ୍‌ର୍ ଟାନେଅନି ଚାଡି ପାଲାଇଲାଇ

☆ ୪:୩୨ ୪:୩୨ ମାତିଉ ୭:୨୮,୨୯

। ଜିସୁ ସେମାନଙ୍କେ ଦମ୍ଭକାଈ କରି କାତାଅଇବାକେ ମିସା ଦେଏନାଇ, କାଈକେବଇଲେ ସେମନ୍ ତାକେ କିରିସଟ ବଲି ଜାନିରଇଲାଇ ।

**ପାର୍ତନା ଗରେ ଜିସୁର ସିକିଆ
(ମାର୍କ ୧:୩୫-୩୯)**

୪୨ ସାକାଲ୍ ପାଇଲାଜେ ଜିସୁ ନଅରେ ଅନି ବାରଇ ଗଟେକ୍ କିନରା ଜାଗାଇ ଗାଲା । ଲକ୍ମନ୍ କଜି କଜି ତାର ଲଗେ ଆଇଲାଇ, ଆରି ସେ ଜେକ୍ଟିକି ତାକର ଲଗେଅନି ଉଚିନଜାଅ ବଲି ଅଟ୍ଟକାଈବାକେ ଚେସଟା କଲାଇ । ୪୩ ମାତର ଜିସୁ ସେମନ୍‌କେ କଇଲା, “ବିନ୍ ବିନ୍ ନଅରେ ମିସା ମୁଇ ପର୍ମେସରର ରାଇଜର ନିକ କବର ଜାନାଇବାର ଆଚେ, କାଈକେ ବଇଲେ ସେଟାର୍‌ପାଇ ପର୍ମେସର୍ ମକେ ପାଟାଇଆଚେ ।”

୪୪ ଆରି ସେ ଜିଉଦା ଦେସର୍ ଜିଉଦି ଲକ୍ମନ୍‌ର ପାର୍ତନା ଗର୍ମନ୍‌କେ ବାକିଅ ସୁନାଇବାର ଦାରଲା ।



**ଜିସୁ ପର୍ତୁମ୍ ସିସମନ୍‌କେ ଡାକ୍ଲା
(ମାତ୍ତ ୪:୧୮-୨୨; ମାର୍କ ୧:୧୩-୨୦)**

୧ *ଦିନେକ୍ ଜିସୁ ଗିନେସରଡ୍ ଗାଡ୍‌କଣ୍ଡି ଚିଆଅଇରଇଲା ବେଲେ ଲକ୍ମନ୍ ମାଣ୍ଡାଚୁଣ୍ଡା ଅଇ ପର୍ମେସରର ବାକିଅ ସୁନ୍‌ଡେରଇଲାଇ ।

୨ ସେଡ୍‌କିବେଲେ ସେ ଗାଡ୍‌କଣ୍ଡି ଦୁଇଟା ଡଙ୍ଗା ରଇଲାଟା ଦେକ୍ଲା, କେଉଟ୍‌ମନ୍ ଡଙ୍ଗାଅନି ଉଡ୍‌ରି ଜାଲ୍ ଦଇଡେରଇଲାଇ । ୩ ସେ ଡଙ୍ଗାମନ୍‌ର ବିଡ୍‌ରେଅନି ଜନ୍‌ଟା କେଉଟ୍ ସିମନ୍‌ଟା ରଇଲା, ଜିସୁ ତେଇ ଚଗିକରି “କଣ୍ଡିତେଇଅନି କଣ୍ଡେକ୍ ଦୁର୍ ପାନିଡେଇ ଚାଲାଇନେ ।” ବଲି ସିମନ୍‌କେ କଇଲା, ଆରି ଡଙ୍ଗାଈ ବସିକରି ସିକିଆ ଦେବାର ଦାରଲା ।

୪ ଜିସୁ କାତା ସାରାଇକରି ସିମନ୍‌କେ କଇଲା, “ଡେଙ୍ଗ୍ ପାନିଟାନେ ଜାଇକରି ମାର୍ ଦାରବାକେ ତମର୍ ଜାଲ୍ ପାକାଆ ।”

୫ *ଡେଇ ସିମନ୍ କଇଲା, “ଏ ଗୁରୁ ଆମେ ସବୁଲକ୍ ଗୁଲାଈରାତି କସ୍‌ଟ କରି ଗଟେକ୍ ମିସା ଦାରୁନାଇ, ମାତର ତମର୍ କାତା ଦାରି

☆ ୫:୧ ୫:୧ ମାତ୍ତ ୧୩:୧,୨; ମାର୍କ ୩:୯,୧୦;୪:୧ ☆ ୫:୫ ୫:୫ ଜଅନ୍ ୨୧:୩

ମୁଇ ଜାଲ୍ ପାକାଇବି ।” ୭ ✨ଆରି ଜାଲ୍ ପାକାଇଲାକେ, ଏଦେ ଦେକା ! ଏନ୍ତି ମାଡ୍ ଲାଗିଲାକେ ତାକର୍ ଜାଲ୍ ଚିରିଅଇବାର୍ ଦାରଲା । ୭ ତଙ୍ଗାକ ମାଡ୍ ବର୍ଡି କଲାକେ ସେ ଦୁଇଟା ତଙ୍ଗା ବୁଡ୍‌ଲା ପାରା ଅଇଗାଲା । ୮ ଏଟା ଦେକି ସିମନ୍ ପିତର୍ ଜିସୁର୍ ପାଦେ ମାଣ୍ଡିକୁଟା ଦେଇ ଜୁଆର୍ କରି କଇଲା, “ମର୍ଟାନେଅନି ଜାଆ ମାପୁରୁ, କାଇକେବଇଲେ ମୁଇ ଗଟେକ୍ ପାପି ମୁନ୍ସୁ ।”

୯ କାଇକେବଇଲେ ତେଇ ସେମନ୍ ଏତେକ୍ ମାଡ୍ ଦାରିରଇଲାକେ, ସେଟା ଦେକି ସିମନ୍‌ର୍ ସଙ୍ଗାରିମନ୍ କାବାଅଇଗାଲା । ୧୦ ଆରି ଜେବଦିର୍ ଦୁଇଟା ପ ଜାକୁର୍ ଆରି ଜଅନ୍ ଜନ୍‌ଲକ୍‌ମନ୍ ସିମନ୍‌ର୍ ସଙ୍ଗାରି ରଇଲାକ, ସେମନ୍ ମିସା ସେନ୍ତାରିସେ କାବା ଅଇଗାଲା । ଆରି ଜିସୁ ସିମନ୍‌କେ କଇଲା, “ତରାନାଇ, ଆଜିଅନି ତମେ ମାଡ୍ ନ ଦାରି, ଲକ୍‌ମନ୍‌କେ ମର୍ଟାନେ ଆନ୍‌ସା ।”

୧୧ ତେଇ ସେମନ୍ ସବୁ ତାକର୍ ତଙ୍ଗା କଣ୍ଡି ଆନି ଚାଡ଼ିଦେଇକରି ଜିସୁର୍ ପଟେ ପଟେ ଗାଲାକ ।

**ଜିସୁ ଗଟେକ୍ ବଡ଼ ରଗିକେ ନିମାନ୍ କଲା
(ମାତିଉ ୮:୧-୪; ମାର୍କ ୧:୪୦-୪୫)**

୧୨ ତରେକ୍ ଜିସୁ ଗଟେକ୍ ନଅରେ ରଇଲାବେଲେ ଗଟେକ୍ ଗୁଲାକ ଗାଗତେ ବଡ଼ରଗ୍ ଅଇରଇବା ଲକ୍ ତେଇ ରଇଲା । ସେ ଡାଣ୍ଡାସନ୍ ପଡ଼ି ମୁ ବୁର୍ବି ଚିଆଇ ଜିସୁକେ ବାବୁଜିଆ କରି କଇଲା, “ଏ ମାପୁରୁ, ତମେ ଜଦି ମନ୍‌କଲୁସ୍‌ନି ବଇଲେ, ମକେ ନିକ କରିପାରୁସ୍ ।”

୧୩ ତେଇ ଜିସୁ ଆଡ଼ ଲାମାଇ ତାକେ ଚିଇ କରି କଇଲା, “ମୁଇ ମନ୍ କଲିନି, ତୁଇ ସୁକଲ୍ ଅ ।” ଦାପ୍‌ରେସେ ତାର୍ ବଡ଼ ରଗ୍ ଚାଡ଼ିଗାଲା । ୧୪ ଆରି ଜିସୁ ତାକେ ଆଦେସ୍ ଦେଇ କଇଲା, “ଏ କାତା କାକେ କ ନାଇ । ମାତର୍ ପୁଜାରିର୍ ଲଗେ ଜା ଆରି ସେ ତକେ ପରିକା କରି ଦେକ । ତୁଇ, ‘ନିକ ଅଇଲିଆତି’ ବଲି ବିନ୍ ଲକର୍ ଚାନେ ସାକିଦେବାକେ ମସାର୍ ଆଦେସ୍ ଇସାବେ ବିରୁ ଦେସ୍ ।”

୧୫ ମାତର୍ ଜିସୁର୍ କବର୍ ଗୁଲାକ ଚାରିବେଡ଼ିର୍‌ଲକ୍ ଜାନ୍‌ଲାକ । ତାର୍ କାତା ସୁନ୍‌ବାପାଇ ଆରି ନିଜର୍ ନିଜର୍ ରଗେଅନି ନିକ ଅର୍‌ବଲି

✨ ୫:୭ ୫:୭ ଜଅନ୍ ୨୧:୭

ଗାଦି ଲକ୍ଷ୍ମୀନ୍ ଚୁଲ୍‌ଅଇବାର ଦାରଲା । ୧୬ ମାତର୍ ଜିସୁ କିନରା ଜାଗାମନ୍‌କେ ଜାଇ ପାର୍‌ତନା କରତେରଇଲା ।

ଜିସୁ ଗଟେକ୍ ଚେରେଙ୍ଗ୍ ରଗିକେ ନିମାନ୍ କଲା
(ମାତିଉ ୯:୧-୮; ମାର୍କ ୨:୧-୧୨)

୧୬ ଦିନେକ୍ ଜିସୁ ସିକିଆ ଦେଇତେରଇଲା । ତେଇ ଗାଲିଲିର ସବୁ ଗାଏଁଅନି, ଜିଉଦା ଆରି ଜିରୁସାଲମେଅନି ଆସିରଇବା ପାରୁସିମନ୍ ଆରି ନିଅମ୍ ସିକାଉମନ୍ ତେଇ ବସିରଇଲା । ଆରି ରଗିମନ୍‌କେ ନିକ କରବାକେ ମାପ୍‌ରୁର୍ ବପୁ, ଜିସୁକେ ରଇଲା । ୧୮ ଆରି ଏଦେ ଦେକା ! ଗଟେକ୍ ଚେରେଙ୍ଗ୍‌ବାଡ୍ ଦାରଲା ମୁନୁସକେ, କେତେଲକ୍ କଟ୍ ମିସ୍‌ତେ ବଇଆନିକରି, ଗର୍ ବିଡ୍‌ରେ ନେଇ ଜିସୁର୍ ମୁଆଟେ ସଙ୍ଗାଉବଲି, ଚେସଟା କରତେରଇଲା । ୧୯ ମାତର୍ ଚିପାଟେଲାରଲାଗି, ତାକେ ବିଡ୍‌ରେ ନେବାକେ ବାଟ୍ ମିଲେନାଇ । ଏଦେ ଦେକା ! ସେମନ୍ ରଗିକେ ଗର୍ ଉପ୍‌ରେ ଚଗାଇ ଚାଉନି ଉଜାଡି, କଟ୍ ମିସ୍‌ତେ ଲକ୍ଷ୍ମୀମନ୍ ମଜାଇ ଜିସୁର୍ ମୁଆଟେ ଉଡ୍‌ରାଇଦେଲା । ୨୦ ଜିସୁ ସେମନ୍‌ର୍ ବିସ୍‌ବାସ୍ ଦେକି କଇଲା, “ଏ ବାବୁ, ତମର୍ ସବୁ ପାପ୍ କେମା ଅଇଗାଲାବେ ।”

୨୧ ସାସ୍‌ତର୍ ସିକାଇବା ଲକ୍ଷ୍ମୀମନ୍ ଆରି ପାରୁସି ଲକ୍ଷ୍ମୀମନ୍ ମନେ ମନେ କୁଆବଲା ଅଇ, ଏନ୍ତି କଇବାର ଦାରଲା, “ଏ କେ ଜେ ପର୍‌ମେସର୍‌ର ନିନ୍ଦାକଲାନି ? ପର୍‌ମେସର୍‌କେ ଚାଡି ଆରି କେ ପାପ୍ କେମା କରିପାରସି ?”

୨୨ ତେଇ ସେମନ୍ ମନେ ମନେ କୁଆବଲା ଅଇବାଟା ଜାନିକରି ସେମନ୍‌କେ ଜିସୁ କଇଲା, “ତମେ କାଇକେ ସବୁଲକ୍ ନିଜର୍ ମନେ ମନେ ଏନ୍ତାରି କୁଆବଲା ଅଇଲାସ୍‌ନି ? ୨୩ କାଇଟା ଉପାସ୍ କାତା ? ତର୍ ସବୁ ପାପ୍ କେମା ଅଇଗାଲା ବଲି କଇବାଟା, କି ଉଟିକରି ଇଣ୍ଡି ଜା ବଲି କଇବାଟା ? ୨୪ ମାତର୍ ପୁର୍‌ତିବିର୍ ସବୁ ପାପ୍ କେମା କରବାକେ ପର୍‌ମେସର୍‌ର୍ ଚାନେଅନି ଆଇଲା ନର୍‌ପିଲା ମର୍ ଅଦିକାର୍‌ଆଟେ ।” ଏଟା ତମେ ଜେନ୍ତି ଜାନିପାରାସ୍ । ଏଟାପାଇ ଜିସୁ ଚେରେଙ୍ଗ୍‌ବାଡ୍ ଦାରଲା ରଗିକେ କଇଲା, “ମୁଇ ତକେ କଇଲିନି, ଉଟ୍ ନିଜର୍ ବିଡ୍‌ନା ଦାରି ଗରେ ଜା ।”

୨୫ ସେଦାପ୍ତରେ ଚେରେଙ୍ଗ ଦାର୍ଲୀ ଲକ୍ ସବୁଲକର ଦେକ୍ତେ ଉଚିକରି ଜନ୍ କଟେ ସଇରଇଲା, ସେଟା ବଇ ପର୍ମେସରର୍ ମଇମା କର କର ତାର୍ ଗରେ ଉଚିଗାଲା । ୨୬ ତେଇ ରଇଲା ସବୁଲକ୍ କାବା ଅଇଜାଇକରି ପର୍ମେସରର୍ ମଇମା କର୍ବାର୍ ଦାର୍ଲୀଇ ଆରି ମାପ୍ତୁର୍ ଚକିଡ୍ କାମ୍ ଦେକି, “ଆଜି ଆମେ କେବେ ନ ଅଇଲାଟା ଦେକ୍ଲୁ !” ବଲି କଇଲାଇ ।

ଜିସୁ ଲେବିକେ ଡାକ୍ଲାଇ

(ମାତିଉ ୯:୯-୧୩; ମାର୍କ ୨:୧୩-୧୭)

୨୭ ତାର୍ପଟେ ଜିସୁ ବାରଇଜାଇ ଲେବି ନାଉଁର୍ ଗଟେକ୍ ସିସ୍ତୁମାଙ୍ଗୁ, ସିସ୍ତୁମାଙ୍ଗୁମନ୍ ମାଙ୍ଗ୍‌ବାଟାମେ ବସିରଇବାଟା ଦେକି, ତାକେ କଇଲା, “ମର୍ସଙ୍ଗ୍ ଆଉ ।” ୨୮ ତେଇ ଲେବି ସବୁଜାକ ଚାଡିଦେଇ ଉଚିକରି ଜିସୁର୍ ସଙ୍ଗ୍ ଜିବାର୍‌ଦାର୍ଲା ।

୨୯ ଆରି ଲେବି ଜିସୁର୍‌ପାଇ ନିଜର୍ ଗରେ, ଗଟେକ୍ ବଡ୍ ବଜିକଲା । ତେଇ ସିସ୍ତୁମାଙ୍ଗୁମନ୍, ଅଦିକ୍ ଲକ୍ ଆରି ବିନ୍ ବିନ୍ ଲକ୍‌ମନର୍ ସଙ୍ଗ୍ ସେ କାଇବାକେ ବସ୍ଲା । ୩୦ ତେଇ ପାରୁସିମନ୍ ଆରି ତାକର୍ ଦଲର୍ ସାସ୍ତର୍ ସିକାଉମନ୍ ଜିସୁର୍ ମୁଆଟେ ତାର୍ ସିସ୍‌ମନ୍କେ ଦସ୍ ଦେକାଇ କଇଲାଇ, “ତମେ କାଇକେ ସିସ୍ତୁମାଙ୍ଗୁମନର୍ ସଙ୍ଗ୍ ଆରି ପାପିମନର୍ ସଙ୍ଗ୍ ମସି କିଆ ପିଆ କଲାସ୍‌ନି ?”

୩୧ ଜିସୁ ସେମନ୍‌କେ କଇଲା, “ଜାକେ ଦୁକାଦାରି ରଇସି, ସେସେ ଅସ କାଇସି, ଜାକେ ଦୁକା ଦାରେ ନାଇ ତାକେ ଅସ ଲଡାନାଇ । ୩୨ ମୁଇ ଦରମ୍ ଲକ୍‌ବଲି ନିଜ୍‌କେ ବାବ୍‌ବା ଲକ୍‌ମନର୍ ପାଇ ଆସିନାଇ, ମାତର୍ ପାପି ଲକ୍‌ମନ୍କେ ପାପେଅନି ମନ୍ ବାଦ୍‌ଲାଇବାକେ ଆଇଲିଆଟି ।”

ଉପାସ୍ ବିସଇନେଇ ସିକିଆ

(ମାତିଉ ୯:୧୪-୧୭; ମାର୍କ ୨:୧୮-୨୨)

୩୩ କେତେକ୍ ଲକ୍ ଜିସୁକେ ପାଚାର୍‌ଲାଇ, “ତୁବନ୍ ଦେଉ ଜଅନର୍ ସିସ୍‌ମନ୍ ତର୍‌କେତର୍ ଉପାସ୍ କରି ପାର୍‌ତନା କର୍‌ବାଇ ।

☆ ୫:୩୦ ୫:୩୦ ଲୁକ୍ ୧୫:୧,୨

ପାରୁଥିବନର ସିସ୍ତମନ୍ ମିସା ସେନ୍ତାରି ସେ କର୍ବାଇ । ମାତର୍ ତମର୍ ସିସ୍ତମନ୍ କିଆ ପିଆ କର୍ବାଇ ।”

୩୪ ଜିସୁ ସେମନ୍‌କେ କଇଲା, “ବର୍ବାଟର୍ ଲକ୍‌ମନର୍‌ସଙ୍ଗ୍ ବର୍ ରଇଲାବେଲେ, ତମେ କାଇ ସେମନ୍‌କେ ଉପାସ୍ କରାଇପାରାସ୍ ? ନାଇ, ନାପାରାସ୍ । ୩୫ ମାତର୍ ବେଲା ଆଇସି, ଜେଡେବେଲେ ତାକର୍‌ଟାନେଅନି ବର୍‌କେ ତାକିଦାରିଜିବାଇ, ସେଡ୍‌କିବେଲେ ସେମନ୍ ଉପାସ୍ କଇବାଇ ।”

୩୬ ଜିସୁ ସେମନ୍‌କେ ଆରି ଗଟେକ୍ ଉଦାଅରନ୍ ଦେଇ କଇଲା, “କେ ମିସା ପୁରନା ଲୁଗା ପାଟିରଇଲାଟାନେ ନୁଆଲୁଗା ଚିରି ଚାପ୍ ନ ଦେଅଡ୍, ଚାପ୍ ଦେଲେ ନୁଆଟା ମିସା ନସିଜାଇସି, ନୁଆ ଲୁଗାର୍ ଚାପ୍ ପୁରନାଟାନେ ନ ମିସେ । ୩୭ ବେସି ଦିନର୍ ପୁରନା ଗାଗ୍‌ରିଟାନେ କେ ମିସା ଏବେ ଉଡ୍‌ରାଇଲା ମଦ୍ ନ ରକଅଡ୍, ତେଇ ଜଦି ସେ ମଦ୍ ରକଇ ତାବିଦେଲେ, ଗାଗ୍‌ରି ପୁଟିକରି ପଡାଅଇଜାଇସି । ୩୮ ତେବେ ମଦ୍ ଉଡ୍‌ରାଇଲା ଦାପ୍‌ରେ ନୁଆ ଗାଗ୍‌ରିଟାନେ ରକଇ ସଙ୍ଗାଇବାଆଟେ । ୩୯ ଆରି କେ ମିସା ପୁରନା ମଦ୍ କାଇକରି ଏବେ ଉଡ୍‌ରାଇଲା ମଦ୍ କାଇବାକେ ମନ୍ ନ କରଡ୍, କାଇକେବଇଲେ, ସେ ବାସିଟା ଆକା ନିକ ବଲି କଇସି ।”



ବିସ୍ତରାମ୍ ଦିନ୍ ବିସଇ ନେଇ ପର୍‌ସନ୍
(ମାତିଉ ୧୨:୧-୮; ମାର୍କ ୨:୨୩-୨୮)

୧ ତରେକ୍ ବିସରାମ୍ ବାରେ ଜିସୁ ତାସ୍ ରଇଲା ପଦାବାଟେ ଜିବାବେଲେ ତାର୍ ସିସ୍ତମନ୍ କେଡ୍ ଚିଡାଇ ଆତେ ରମ୍‌ଦି କାଇଡେରଇଲାଇ । ୨ ସେମନ୍‌କେ ଦେକ୍‌ଡେରଇବା ପାରୁସି ଲକ୍‌ମନର୍ ବିଡ୍‌ରେଅନି କେଡେଲକ୍ କଇଲାଇ, “ବିସ୍ତରାମ୍ ବାରେ ଜନ୍‌ଟା କର୍‌ବାର୍ ବିଦି ନଏଁ, ସେଟା ତମେ କାଇକେ କଲାସ୍‌ନି ?”

୩ ଜିସୁ ସେମନ୍‌କେ କଇଲା, “ଦାଉଦ୍ ଆରି ତାର୍ ସଙ୍ଗର୍ ଲକ୍‌ମନ୍ ବୁକେ ରଇଲାବେଲେ, ଦାଉଦ୍ କାଇଟା କିରିରଇଲା, ସେଟା କାଇ ତମେ ପଡାସ୍ ନାଇ କି ? ୪ ସୁନା, ଦାଉଦ୍ ପର୍‌ମେସରର୍ ଗରେ ପୁରି, ପର୍‌ମେସରକେ ସର୍‌ପି ଅଇରଇଲା ଜନ୍ ରୁଟି, ପୁଜାରିମନ୍‌କେ ଚାଡି

ଆରି କେ ମିସା କାଇବାର ବିଦି ନ ରଇଲା, ସେଟା ନେଇକରି କାଇଲା ଆରି ତାର ସଙ୍ଗର୍ ଲକ୍ମନକେ ମିସା ଦେଇରଇଲା ।”

୫ ଆରି ଜିସୁ କଇଲା, “ପର୍ମେସର୍ ପାଟାଇରଇବା ନରପିଲା ମୁଇ ବିସ୍ରାମ୍ ବାରେ ଲକ୍ମନ କାଇଟା କର୍ବାର ଆଟେ କାଇଟା କର୍ବାର ନାଇ, ସେଟା କଇବାର ମର୍ ଅଦିକାର୍ ଆଟେ ।”

ଆଡ଼ ସୁକିଜାଇରଇଲା ଲକ୍ ନିକ ଅଇଲା

(ମାତିଉ ୧୨:୯-୧୪; ମାର୍କ ୩:୧-୬)

୬ ଆରି ଜିସୁ ବିନ୍ ଗଟେକ୍ ବିସ୍ରାମ୍‌ବାରେ, ଜିଉଦି ଲକ୍ମନର୍ ପାର୍ତନା ଗରେ ଜାଇକରି ସିକାଇତେରଇଲା । ତେଇ ଗଟେକ୍ ଲକ୍ ରଇଲା । ତାର ଉଜା ଆଡ଼ ସୁକିଜାଇରଇଲା । ୭ ଆରି ଜିସୁ ବିସ୍ରାମ୍‌ବାରେ ମିସା କେ ଜାନେ ନିକ କର୍ସି, ଏଟା ଦେକୁ ବଲି ପାରୁସି ଲକ୍ମନ ଆରି ସାସ୍ତର୍ ସିକାଉମନ୍ ତାକେସେ ଦେକି ଦେକି ରଇଲାଇ, କାଇକେବଇଲେ ତାର ବିରୁଦେ ଦସ୍ ଦାର୍‌ବାକେ । ୮ ମାତର୍ ଜିସୁ ତାକର୍ ମନେ ବାବ୍‌ଲାଟା ଜାନିକରି, ଜନ୍ ଲକ୍ ଆଡ଼ ସୁକିଜାଇରଇଲା, ତାକେ କଇଲା, “ଉର୍ ଆରି ସବୁଲକ୍ ମୁଆଟେ ଚିଆ ଅ ।” ଆରି ସେଲକ୍ ଉଚି ଚିଆଅଇଲା । ୯ ତେଇ ଜିସୁ ସେମନ୍‌କେ କଇଲା, “ମୁଇ ତମ୍‌କେ ପାଟାର୍‌ଲିନି, ବିସ୍ରାମ୍‌ବାରେ ବିଦି ଇସାବେ କାଇଟା କର୍ବାର ? ନିକ କର୍ବାର କି କାରାପ୍ କର୍ବାର ? ଜିବନ୍ ବଟାଇବାର କି ମରାଇବାର ?” ୧୦ ଆରି ସେ ଚାରିବେଡ଼ି ସବୁକେ ଦେକି ସେ ଲକ୍‌କେ କଇଲା, “ତମ୍ ଆଡ଼ ଲାମାଆ ।” ତେଇ ସେ ସେନ୍ତାର୍ କଲା, ଆରି ତାର ଆଡ଼ ପୁରାପୁରୁନ୍ ନିକ ଅଇଗାଲା ।

୧୧ ମାତର୍ ପାରୁସିମନ୍ ଆରି ସାସ୍ତର୍ ସିକାଉମନ୍ ବେସି ରିସା ଅଇଗାଲା ଆରି ଜିସୁର୍ ବିରୁଦେ “କାଇଟା କରୁ ?” ବଲି ତାକର୍ ତାକର୍ ବିତ୍‌ରେ ନିଆଇ କଲାଇ ।

ଜିସୁ ବାର୍‌ଟା ସିସ୍‌ମନ୍‌କେ ବାଟଲା

(ମାତିଉ ୧୦:୧-୪; ମାର୍କ ୩:୧୩-୧୯)

୧୨ ସେବେଲେ ଦିନେକ୍ ଜିସୁ ପାର୍ତନା କର୍‌ବାକେ ବାରଇ, ପର୍‌ବତେ ଗାଲା ଆରି ଗୁଲାଇରାତି ପର୍‌ମେସର୍‌କେ ପାର୍ତନା କରି କରି ରଇଲା । ୧୩ ସାକାଲ୍ ପାଇଲାକେ, ଜିସୁ ସିସ୍‌ମନ୍‌କେ ଲଗେ ଡାକି

ସେମାନର ବିତ୍ତରେଅନି ବାର ଲକ୍ଷକେ ବାଟୁଲା, ଆରି ସେମାନଙ୍କେ ପେରିତ୍ ବଲି ନାଉଁ ଦେଲା । ^{୧୪} ସେମନ୍ ରଇଲା, ସିମନ୍ ଜାକେ କି ସେ ପିତର୍ ବଲି ମିସା ନାଉଁ ଦେଲା, ଆରି ସିମନ୍ ବାଇ ଆନ୍ଦରିୟ, ଜାକୁବ୍ ଆରି ଜଅନ୍, ପିଲିପ୍ ଆରି ବାର୍ତଲମି । ^{୧୫} ମାତିଉ ଆରି ତମା, ଆଲ୍ପିର୍ ପ ଜାକୁବ୍ ଆରି ସିମନ୍, ଜାକେ କି କାଇ କାମ୍ କରବାକେ ମିସା ଆଗତୁ ଅଇସି ବଲି କଇବାଇ । ^{୧୬} ଜାକୁବର୍ ପ ଜିଉଦା ଆରି ଇସ୍କାରିତ ଜିଉଦା, ଜେ କି ଜିସୁକେ ସତ୍‌ରୁମନ୍‌କେ ସର୍ପିଦେଇ ରଇଲା ।

ଜିସୁ ସିକିଆ ଦେଲା ଆରି ନିକ କଲା

(ମାତିଉ ୪:୨୩-୨୫)

^{୧୭} ଆରି ଜିସୁ ପେରିତ୍‌ମନ୍‌ର ସଙ୍ଗ୍ ଉତ୍‌ରିକରି, ଗଟେକ୍ ସଦର୍ମ ରଇଲା ଜାଗାଇ ଟିଆଅଇଲା । ଆରି ତେଇ ତାର୍ ବେସି ସିସ୍‌ମନ୍, ଜିଉଦା ରାଇଜର୍ ବେସି ଲକ୍, ଜିରୁସାଲାମ୍ ଆରି ସମ୍‌ତୁର୍ ପାଲି ରଇବା ସର ଆରି ସିଦନ୍ ସଅରେଅନି ବେସି ଲକ୍‌ମନ୍ ରୁଣ୍ଡିରଇଲାଇ । ^{୧୮} ଲକ୍‌ମନ୍ ତାର୍ ବାକିଅ ସୁନ୍‌ବାକେ ଆରି ନିଜର୍ ନିଜର୍ ରଗେଅନି ନିକ ଅଇବାକେ ଆସିରଇଲାଇ । ଜନ୍ ଲକ୍‌ମନ୍ ତୁମା ଦାରାଇଅଇ ଦୁକ୍ କସ୍‌ଟ ପାଇତେରଇଲାଇ, ସେମନ୍‌କେ ଜିସୁ ନିକ କଲା । ^{୧୯} ସବୁଲକ୍‌ମନ୍ ଜିସୁକେ ଚିଇବାକେ ଚେସ୍‌ଟା କରତେରଇଲାଇ । କାଇକେବଇଲେ ତାର୍ ଗାଗ୍‌ତେଅନି ମାପ୍‌ରୁର୍ ବପୁ ବାରଇତେରଇଲା ଆରି ସବୁଲକ୍‌ମନ୍‌କେ ନିକ କରତେରଇଲା ।

ସୁକ୍ ଆରି ଦୁକ୍

(ମାତିଉ ୫:୧-୧୨)

^{୨୦} ସେବେଲେ ଜିସୁ ନିଜର୍ ସିସ୍‌ମନ୍‌ର ବାଟେ ଦେକି କଇଲା,
 “ତମେ ଏବେ କାକୁର୍ତି ଅଇଆତାସ୍ ତମର୍ କେତେକ୍ ନିକ କରମ୍,
 କାଇକେବଇଲେ ପର୍‌ମେସରର୍ ରାଇଜ୍ ତମର୍‌ଟା ।
^{୨୧} ତମେମନ୍ ଏବେ ବୁକେ ଆତାସ୍, ତମର୍ କେତେକ୍ ନିକ କରମ୍,
 କାଇକେବଇଲେ, ତମ୍‌କେ ପର୍‌ମେସର୍ ପୁରାପୁରୁନ୍ ଦେଇସି ।
 ତମେମନ୍ ଏବେ କାନ୍‌ଲାସ୍‌ନି, ତମର୍ କେତେକ୍ ନିକ କରମ୍,
 କାଇକେବଇଲେ ତମେମନ୍ ସାର୍‌ଦା ଅଇକରି ଆଁସା ।”

୨୨ ☆ଲକ୍ଷ୍ମୀନ ଜେବେ ପରମେସ୍ଵର ପାଟାଲରଇବା ନରପିଲା ମର
 ଲାଗି ତମ୍ଭେ ଇନ୍ କରବାଇ, ଆରି ବେଗ୍‌ଲାଇ ଦେବାଇ, ନିନ୍ଦାକରି
 ତମ୍ଭେ ନାଉଁ ମନ୍ଦ ବଲି ଦାରବାଇ, ତମ୍ଭେ କେତେକ୍ ନିକ କରମ୍ ।
 ୨୩ ☆ସେ ଦିନେ ସାର୍‌ଦା ଅଇ ନାଟ୍ କରସା । କାଇକେବଇଲେ ଦେକା,
 ସରଗେ ତମ୍ଭେ ପୁରୁସ୍କାର୍ ଅଦିକ୍ ଆରି ସେନ୍ତାରି ତା ସେମାନର୍
 ଆନିଦାଦିମନ୍, ବଦିସ୍‌ତ୍‌ବକ୍‌ତାମନ୍‌କେ କରତେରଇଲାଇ ।
 ୨୪ ମାତର୍ ଏ ଡଣ୍ଡ ପାଉମନ୍, ତମେମନ୍ ଏବେ ସାଉକାର୍ ଆଗାସ୍,
 କାଇକେବଇଲେ ତମେ ନିଜେ ନିଜେ ସୁକ୍ ପାଇଲାସ୍‌ବେ ।
 ୨୫ ଏ ଡଣ୍ଡପାଉମନ୍, ଏବେ ତମେ ନିକସଙ୍ଗ୍ କାଇଲାସ୍‌ନି,
 କାଇକେବଇଲେ, ତମେ ବୁକେସେ ରଇସା ।
 ଏ ଡଣ୍ଡପାଉମନ୍, ତମେମନ୍ ଏବେ ଆସ୍‌ଲାସ୍‌ନି,
 କାଇକେବଇଲେ ପତେ ଦୁକେ ରଇକରି କାନ୍ଦସା ।
 ୨୬ “ଜେତେବେଲେ ତମ୍ଭେ ଲକ୍ଷ୍ମୀନ ବଲ୍ ବଲିକରି ବାବ୍‌ଲାଇନି,
 ଏ ଡଣ୍ଡପାଉମନ୍, ତାକର୍ ଆନିଦାଦି ତା ମାପ୍‌ରୁର୍ କାତା
 ବୁଲ୍‌କାଉମନ୍‌ପାଇ ସେନ୍ତାରି କରତେରଇଲାଇ ।”

**ସତ୍‌ରୁମନ୍‌କେ ମିସା ଆଲାଦ୍ କରା
 (ମାତିଉ ୫:୩୮-୪୮,୬:୧୨)**

୨୭ “ମାତର୍ ତମେମନ୍ ସୁନି ଆଗାସ୍‌ଜେ ମୁଇ ତମ୍ଭେ କଇଲିନି,
 ତମ୍ଭେ ସତ୍‌ରୁମନ୍‌କେ ଆଲାଦ୍ କରା, ଜନ୍ ଲକ୍ଷ୍ମୀନ ତମ୍ଭେ ଇନ୍
 କରବାଇ, ସେମାନର୍ ମଙ୍ଗଲ୍ କରା । ୨୮ ଜନ୍ ଲକ୍ଷ୍ମୀନ ତମ୍ଭେ
 ସାଇପ୍ ଦେବାଇ, ସେମନ୍‌କେ ଆସିର୍‌ବାଦ୍ କରା । ଜନ୍ ଲକ୍ଷ୍ମୀନ
 ତମ୍ଭେ ଇଜଡ୍ ଜିକ୍‌ବାଇ, ସେମାନର୍‌ପାଇ ପାର୍‌ତନା କରା । ୨୯ ଜେ
 ତମ୍ଭେ ଗଟେକ୍ ଗାଲେ ଚାପଡ୍ ମାର୍‌ସି, ତାକେ ଆରିଗଟେକ୍ ଗାଲ୍
 ମିସା ଦେକାଇଦିଆସ୍ । ଜେ ତମ୍ଭେ ଚାଦର୍ ଦାରିଜାଇସି, ତାକେ
 ତମ୍ଭେ ପିନ୍‌ଲାଟା ନେବାକେ ମିସା ମନା କରାନାଇ । ୩୦ ଜେ
 ତମ୍ଭେ ମାଙ୍ଗ୍‌ସି, ତାକେ ଦିଆସ୍ । ଆରି ଜେ ତମ୍ଭେ ଦନ୍ ସିମ୍‌ପତି
 ଉଦାର୍ ନେଇସି, ତାର୍‌ଟାନେଅନି ସେଟା ଆରିତରେକ୍ ମାଙ୍ଗାନାଇ ।
 ୩୧ ☆ଲକ୍ଷ୍ମୀନ ତମ୍ଭେ ଜେନ୍ତି କରଡ୍ ବଲି ମନ୍ କଲାସ୍‌ନି, ତମେମିସା
 ସେମାନର୍‌ଟାନେ ସେନ୍ତାରି କରା ।”

☆ ୬:୨୨ ୬:୨୨ ୧ ମ ପିତର୍ ୪:୧୪ ☆ ୬:୨୩ ୬:୨୩ ପେରିଡ୍ ୭:୫୨ ☆ ୬:୩୧ ୬:୩୧
 ମାତିଉ ୭:୧୨

୩୨ “ଆରି ଜନ୍ ଲକ୍ମନ୍ ତମ୍ଭେ ଆଲାଦ୍ କଲାଇନି, ଜଦି ସେମନ୍‌କେସେ ତମେ ଆଲାଦ୍ କରସା ବଇଲେ କାଇ ଆସିର୍ବାଦ୍ ପାଇସା ? କାଇକେବଇଲେ ପାପିମନ୍ ମିସା ସେନ୍ତାରି କରବାଇ । ୩୩ ଜଦି ଜନ୍ ଲକ୍ମନ୍ ତମର୍ ମଙ୍ଗଲ୍ କଲାଇନି, ସେମନ୍‌କେସେ ମଙ୍ଗଲ୍ କରସା ବଇଲେ, କାଇ ଆସିର୍ବାଦ୍ ପାଇସା ? କାଇକେବଇଲେ ପାପିମନ୍ ମିସା ସେନ୍ତାରି କରବାଇ । ୩୪ ଆରି ଜନ୍ ଲକ୍ମନ୍‌ରଟାନେଅନି ତମର୍ ମିଲାଇବାର୍ ଆସା ରଇସି, ଜଦି ସେମନ୍‌କେସେ ଉଦାର୍ ଦେଇସା ବଇଲେ, ତମେ କାଇ ଆସିର୍ବାଦ୍ ପାଇସା ? ପାପିମନ୍ ମିସା ସମାନ୍ ଇସାବେ ବାନ୍ଧଲାଟା ମିଲବଲି, ରୁନ୍ ଦେବାଇ । ୩୫ ମାତର୍ ତମର୍ ସତ୍ତୁମନ୍‌କେ ଆଲାଦ୍ କରା । ଆରି ସେମନ୍‌ର୍ ମଙ୍ଗଲ୍ କରା । ରୁନ୍ ବାନ୍ଧ ବଲି ଆସା ନ କରି, ରୁନ୍ ଦିଆସ୍ । ସେନ୍ତାରିକଲେ ତମର୍ ପୁରୁସ୍କାର୍ ଅଦିକ୍ ଅଇସି । ଆରି ତମେ ପର୍ମେସର୍‌ର୍ ପ ଅଇସା । କାଇକେବଇଲେ ସେ ନ ମାନ୍‌ବା ଲକ୍ମନ୍ ଆରି କରାପ୍ ଲକ୍ମନ୍ ମିସା ଦୟାକାରିଆ । ୩୬ ତମର୍ ସରଗର୍ ବାବା ଜେନ୍ତାରି ଦୟା କଲାନି, ସେନ୍ତାରି ତମେ ମିସା ଦୟା କରା ।”

**ବିନ୍ ଲକ୍ମନ୍‌କେ ବିଚାର୍ କରାନାଇ
(ମାତିଉ ୭:୫-୭)**

୩୭ “ବିନ୍‌ଲକ୍ମନ୍ ବିଚାର୍ କରାନାଇ, ସେନ୍ତାରିକଲେ ପର୍ମେସର୍ ତମ୍ଭେ ବିଚାର୍ କରସି । ଦସ୍ ନ ଦିଆସ୍, ସେନ୍ତାରିକଲେ ପର୍ମେସର୍ ତମ୍ଭେ ଦସ୍ ନ ଦାରେ । କେମା କରା, ସେନ୍ତାରିକଲେ ତମ୍ଭେ କେମା ମିଲସି । ୩୮ ବିନ୍ ଲକ୍ମନ୍ ଦାନ୍ କରା, ସେନ୍ତାରିକଲେ ପର୍ମେସର୍ ତମ୍ଭେ ଦାନ୍ ଦେଇସି, ଲକ୍ମନ୍ ମାନ୍‌ଟାନେ କାଦି ପୁରୁନ୍‌କରି ତାକେ ଚାପି ଜୁଲାଇ, ଉତ୍ତଲାଇକରି, ତମର୍ ଅଟିତେଇ ଦେବାଇ, କାଇକେବଇଲେ ଜନ୍ ଇସାବେ ତମେ ନାପ୍‌ସା, ସେ ଇସାବେ ସେ ତମ୍ଭେ ନାପି ଦିଆଅଇସି ।” ୩୯ ✨ଜିସୁ ସେମନ୍‌କେ ଉଦାଅରନ୍ ଦେଇ କଇଲା, “କାଣା କାଇ କାଣାକେ ବାଟ୍ ଦେକାଇପାରେକି ? ନାଇ, ନାପାରେ । ଜଦି ସେମନ୍ ସେନ୍ତାରି କରବାଇ ବଇଲେ ଦୁଇଲକ୍ମନ୍‌କା କାଲେ ନ ଅଦ୍‌ରତ୍

☆ ୬:୩୯ ୬:୩୯ ମାତିଉ ୧୫:୧୪

କି ? ୪୦ ✨ ଗୁରୁରଟାନେଅନି ସିସ୍ ବଡ଼ ନାଇ । ମାତର ସିସ୍‌ମନ୍ ସିକିଆ ପାଇ ସାରାଇଲେ ସିସ୍‌ଅଇ ଗୁରୁର ସମାନ୍ ଅଇବାଇ ।”

୪୧ “ଆରି କାଇକେ ତମର ବାଇର ଆଁକିଟାନେ ରଇବା ସାନ୍ କାରରା ଦେକ୍‌ଲାସ୍‌ନି ? ମାତର ତମର ନିଜର ଆଁକିଟାନେ ଜନ୍ ବଡ଼ କାରରା ଆଚେ, ସେଟା ବାବିଦେକାସ୍‌ନାଇ । ୪୨ ତମେ ନିଜର ଆଁକିଟାନେ ରଇବା ବଡ଼ଟା କାରରା ନ ଦେକିକରି, ନିଜର ବାଇର ଆଁକି ଟାନେ ରଇବା ସାନ୍ କାରରା ଦେକି କେନ୍ତ୍ର କଇପାରାସ୍, ଆଉ ବାଇ ତମର ଆଁକିଅନି କାରରା ବାରକରାଇଦେବି ? ଏ କୁଟିଆଲ୍‌ମନ୍, ପରତୁମ୍ ନିଜର ଆଁକିଅନି କାରରା ବାରକରାଇପାକା, ତାରପତେ ନିଜର ବାଇର ଆଁକିଟାନେ ରଇବା କାରରା ସବୁ ବାରକରାଇବାକେ, ନିକକରି ଦେକିପାରାସ୍ ।”

ଗର୍ ଆରି ତାର ପଲ୍

(ମାତିଉ ୭:୧୭-୨୦; ୧୨:୩୩-୩୫)

୪୩ “ନିକ ଗଟେ କାରାପ୍ ପଲ୍ ନ ପଲେ, କାରାପ୍ ଗଟେ ନିକ ପଲ୍ ନ ପଲେ । ୪୪ ✨ କାଇକେବଇଲେ ଗର୍‌ମନ୍‌କେ ତାର ପଲ୍‌ରଲ୍‌ଗି ଜାନିଅଇସି । କାଟା ଗଟେଅନି ଲକ୍‌ମନ୍ ତୁମ୍‌ରି ପଲ୍ ନ ତଲଡ଼, କି କାଟା ବୁଟାଇଅନି ଅଙ୍ଗୁର ପଲ୍ ନ ତଲଡ଼ । ୪୫ ✨ ନିକ ଲକ୍ ନିଜର ମନ୍ ବିଡ଼ରର ଗରବ୍‌ବିଡ଼ରେ ଅନି ନିକଟା ବାରକରାଇସି । ଆରି କାରାପ୍ ଲକ୍‌ମନ୍ ନିଜର ମନ୍ ବିଡ଼ରର ଗରବ୍‌ଟାନେ ଅନି କାରାପ୍‌ଟା ବାରକରାଇବାଇ । କାଇକେବଇଲେ, ମନ୍‌ବିଡ଼ରେ ଚିନ୍ତା କରବାଟା, ଟଣ୍ଟ କାତା କଇସି ।”

ଦୁଇଟା ରକାମର ଗର୍‌ବାନ୍‌ବା ଲକ୍

(ମାତିଉ ୭:୨୪-୨୭)

୪୬ “ଆରି ତମେ କାଇକେ ମକେ ଏ ମାପ୍‌ରୁ ଏ ମାପ୍‌ରୁ, ବଲି ଡାକିକରି ମର୍ ଆଦେସ୍ ମାନାସ୍ ନାଇ ? ୪୭ ଜେ ମିସା ମର୍‌ଲଗେ ଆସି, ମର୍ କାତା ସୁନି, ସେଟା ସବୁ ମାନ୍‌ସି, ସେ କାର୍ ସମାନ୍ ରଇସି, ସେଟା ମୁଇ ତମ୍‌କେ ଦେକାଇବି । ୪୮ ସେ ଏନ୍ତାରି ଗଟେକ୍ ଗର୍ ଉଟାଇବା ଲକ୍‌ରପାରା । ଜେ ଗଇର୍ କରି କୁନି, କୁନାଦି ପାକ୍‌ନା

✨ ୭:୪୦ ୭:୪୦ ମାତିଉ ୧୦:୨୪,୨୫; ଜଅନ୍ ୧୩:୧୭; ୧୫:୨୦ ✨ ୭:୪୪ ୭:୪୪ ମାତିଉ ୧୨:୩୩ ✨ ୭:୪୫ ୭:୪୫ ମାତିଉ ୧୨:୩୪

ଉପରେ ବସାଇଲା । ବନିଆ ପାନି ଆସି ସେଟା ଉଲ୍‌କା ମାରୁଲା ମିସା ସେଟା ବସୁଲାଇ ନାପାରୁଲା । କାଇକେବଇଲେ ସେଟା ନିମାନକରି ଉଟାଇରଇଲା । ^{୪୯} ମାତର ଜନ୍ ଲକ୍‌ମନ୍ ମରକାତା ସୁନିକରି ମିସା ସେ ଇସାବେ ଚଲାଚଲ୍‌ତି ନ କରଡ଼, ସେ କୁନାଦି ନ କରି, ବାଲି ଉପରେ ଗରକଲା ଲକରପାରା । ଜବର ଅଇତେ ଉଦକାମାରୁଲା ଦାପରେ ସେ ଗର ବସୁଲିଗାଲା ଆରି ସେଟା ଅପରବଲ୍ ବିନାସ୍ ଅଇଲା ।”



ଜିସୁ ଗଟେକ୍ ରମିୟ ଲକର ଗତି ଦାଙ୍ଗ୍‌ତାକେ ନିକ କଲା
(ମାତିଉ ୮:୫-୧୩)

^୧ ଜିସୁ ଲକ୍‌ମନ୍‌କେ ସବୁ କାତା କଇ ସାରାଇକରି କପରନାଉମ୍ ସଅରେ କେଟଲା । ^୨ ସେବେଲେ ସଏଟା ସନିଅମନ୍‌ର୍ ମୁକିଆର୍ ଗଟେକ୍ ଗତିଦାଙ୍ଗ୍‌ତା, ଜର୍ ଅଇକରି ମଲାପାରା ଅଇଜାଇରଇଲା । ସେ ତାକେ ନିଜରଲକ୍ ପାରା ଆଲାଦ୍ କର୍ତେରଇଲା । ^୩ ସେ ଜିସୁର୍ ବିସଇର୍ କବର ସୁନି, ଜିସୁ ଜେଡ୍‌କି ଆସି ତାର୍ ଗତିଦାଙ୍ଗ୍‌ତାର୍ ଜିବନ୍ ରକିଆ କରସି ବଲି ବାଦ୍‌ଲା । ସେଟାର୍‌ପାଇ ଜିସୁର୍ ଲଗେ କେତେଟା ଜିଉଦି ପାର୍‌ଚିନ୍‌ମନ୍‌କେ ପାଟାଇ ତାକେ ବାବୁଜିଆ କଲାଇ । ^୪ ପାର୍‌ଚିନ୍‌ମନ୍ ଜିସୁର୍‌ଲଗେ କେଟିକରି ତାକେ ଜୁଆର୍ ବିଆର୍ କରି କଇବାର୍ ଦାରୁଲାଇ, “ତାର୍‌ପାଇ ତମେ ଏନ୍ତାରି କରିରଇଲେ, ନିକରଇସି । ^୫ କାଇକେବଇଲେ ସେ ଆମର୍ ଲକ୍‌ମନ୍‌କେ ଆଲାଦ୍ କରସି ଆରି ନିଜେ ସେ ଆମର୍ ସବୁଲକର୍ ପାଇ ପାର୍‌ତନାଗର୍ ତିଆର୍‌କରି ଦେଇଆଟେ ।”

^୬ ତେଇ ଜିସୁ ତାକର୍ ସଙ୍ଗ୍ ଗାଲା । ସେ ଗରେ କେଟ୍‌ବାକେ କଣ୍ଟେକ୍ ଦୁର୍ ରଇଲାକେ, ସଏଟା ସନିଅମନ୍‌ର୍ ମୁକିଆ ଲକ୍‌ମନ୍‌କେ ପାଟାଇ ତାକେ କଇଲା, “ମାପୁର୍, କସଟ୍ ଉଆନାଇ, କାଇକେବଇଲେ ତମେ ଜେ ମର୍ ଗରେ ପାଦ୍ ପାକାଇସା, ମର୍ ଏନ୍ତାରି ବାଗିଅ ନାଇ । ^୭ ଏଟାର୍‌ପାଇ ମୁଇ ତମର୍‌ଟାନେ ଆଇବାକେ ମନ୍ କରିନାଇ । ମାତର୍ ଗଟେକ୍ ପଦ୍ ଆଦେସ୍ କରା, ମର୍ ଗତିଦାଙ୍ଗ୍‌ତା ନିକ ଅଇଜାଇସି । ^୮ ମୁଇ ଗଟେକ୍ ଲକର ତଲେ କାମ୍ କର୍ତେରଇଲେ ମିସା ମର୍ ତଲେ ସନିଅମନ୍ ଆତଡ଼ । ଆରି

ମୁଇ ଗଟେକ୍ ଲକ୍‌କେ ଜା ବଲି କଇଲେ, ସେ ଜାଇସି । ବିନ୍ ଲକ୍‌କେ ଆଉ ବଇଲେ ସେ ଆଇସି । ମର୍ ଗତିଦାଙ୍ଗ୍‌ତାକେ ଏଟା କର୍ ବଇଲେ, ସେ ସେଟା କର୍ସି ।”

^୯ ଜିସୁ ତାର୍ ଏ ସବୁ ବିସଇ ସୁନି କାବା ଅଇଗାଲା, ଆରି ବୁଲିକରି ତାର୍ ପଟେ ଆଇଡେରଇବା ଲକ୍‌ମନ୍‌କେ କଇଲା, “ମୁଇ ତମ୍‌କେ କଇଲିନି, ଇସ୍ରାଏଲ୍ ବିଡ଼ରେ ମିସା ଏଡେକ୍ ବଡ଼ ବିସବାସି ନ ମିଲଡ଼ ।”

^{୧୦} ଆରି ଜିସୁକେ ଡାକ୍‌ବାକେ ଜାଇରଇଲା ଲକ୍‌ମନ୍ ଗରେ ବାଉଡ଼ି ଆସି ଗତିଦାଙ୍ଗ୍‌ତା ନିକ ଅଇରଇବାଟା ଦେକ୍‌ଲାଇ ।

ଜିସୁ ଗଟେକ୍ ରାଣ୍ଡିମାଇଜିର୍ ମରିଜାଇରଇଲା ଦାଙ୍ଗ୍‌ତା ପିଲାକେ ଉଟାଇଲା

^{୧୧} ତେଇଅନି ଜିସୁ ନାଇନ୍ ନାଉର୍ ନଅରେ ଗାଲା । ତାର୍‌ସଙ୍ଗ୍ ସିସମନ୍ ଆରି ଲକ୍‌ମନ୍ ବେସି ଜାଇଡେରଇଲାଇ ।

^{୧୨} ସେ ନଅରର୍ ଦୁଆର୍‌ଲଗେ କେଟୁ କେଟୁ, ଏଦେ ଦେକା ! ଲକ୍‌ମନ୍ ଗଟେକ୍ ମଲା ଲକ୍‌କେ ବଇଆନ୍‌ଡେ ରଇଲାଇ । ସେ ନିଜର୍ ମାଆର୍ ଗଟେକ୍ ସେ ପିଲା, ଆରି ସେ ମାଇଜି ରାଣ୍ଡିଟା । ନଅରର୍ ବେସିଲକ୍‌ମନ୍ ତାର୍ ସଙ୍ଗ୍ ରଇଲାଇ । ^{୧୩} ସେ ରାଣ୍ଡି ମାଇଜିକେ ଦେକି ଜିସୁ ଦୁକ୍‌କଲା ଆରି ତାକେ କଇଲା, “ଏ ମାଆ କାନ୍‌ନାଇ ।” ^{୧୪} ଆରି, ଜିସୁ ଜାଇକରି ଡାଣ୍ଡିଆ ଚିଇଲାକେ ବଇ ଆନ୍‌ଡେରଇବା ଲକ୍‌ମନ୍ ଚିଆଅଇଲାଇ । ଆରି ସେ କଇଲା, “ମୁଇ ତକେ କଇଲିନି, ନୁନା ଉର୍ !” ^{୧୫} ତେଇ ସେ ଦାଙ୍ଗ୍‌ତା ଉଟିବସଲା ଆରି କାତା କଇବାର୍ ଦାର୍‌ଲା । ଆରି ଜିସୁ ସେ ଦାଙ୍ଗ୍‌ତାକେ ତାର୍ ମାକେ ସର୍ପିଦେଲା ।

^{୧୬} ତେଇ ସବୁଲକ୍ ଡରିଗାଲାଇ, ଆରି ପର୍‌ମେସରର୍ ମଇମା କରି କରି କଇଲାଇ “ଆମର୍ ବିଡ଼ରେ ଗଟେକ୍ ମଆନ୍ ବବିସଡ଼ବକ୍‌ତା ଆଇଲାଆଟେ, ଆରି ପର୍‌ମେସର୍ ନିଜର୍ ଲକ୍‌ମନ୍‌କେ ଉଦାର୍ କର୍‌ବାକେ ଆସିଆଟେ ।”

^{୧୭} ଜିସୁର୍ ଏ ବିସଇର୍ କାତା ଗୁଲାଇ ଜିଉଦା ଦେସେ ଆରି ଚାରିବାଟର୍ ଗାଉଁଗଣ୍ଡା୍ ଲକ୍‌ମନ୍ ଜାନ୍‌ଲାଇ ।

ଦ୍ରବନ୍ ଦେଉ ଜଅନର୍ ଦୁଇଟା ସିସ୍
(ମାଡ଼ିଉ ୧୧:୨-୧୯)

୧୮ ପରେ ତୁବନ୍ ଦେଉ ଜଅନର୍ ସିସ୍‌ମନ୍ ଏ ସବୁ କାତା ଜଅନ୍‌କେ ଜାନାଇଲା । ୧୯ ତେଇ ଜଅନ୍ ନିଜର୍ ସିସ୍‌ମନର୍ ବିତ୍‌ରେଅନି ଦୁଇଲକ୍‌କେ ଡାକି ମାପୁରୁର୍ ଲଗେ ଏନ୍ତାରି କଇ ପାଟାଇଲା, “ଜେ ଆଇବାର ରଇଲା, ସେ ଲକ୍‌ ତମେସେ କି ? କି କାଇ ବିନ୍ ଲକ୍‌କେ ଆମେ ଜାଗୁ ?”

୨୦ ସେ ଲକ୍‌ମନ୍ ଜିସୁର୍‌ଲଗେ କେଟିକରି କଇଲା, “ତୁବନ୍ ଦେଉ ଜଅନ୍ ଆମ୍‌କେ ଏନ୍ତାରି କଇ ତମର୍‌ଲଗେ ପାଟାଇଆରେ, ଜେ ଆଇବାର ରଇଲା, ସେ ଲକ୍‌ ତମେ କି ? କି କାଇ ଆମେ ଆରି ବିନ୍ ଲକ୍‌କେ ଜାଗୁ ?”

୨୧ ସେବେଲେ ଜିସୁ ଜର୍ ଦୁକା, ଆରି ତୁମା ଦାରଲା ଲକ୍‌ମନ୍‌କେ ନିକ କଲା । ଆରି କେତେଟା କାଣାମନ୍‌କେ ମିସା ଆଁକି ଡିସାଇଲା ।

୨୨ ଜିସୁ ଜଅନର୍ ସିସ୍‌ମନ୍‌କେ କଇଲା, “ତମେମନ୍ ଜନ୍ ଜନ୍‌ଟା ଦେକ୍‌ଲାସ୍ ଆରି ସୁନ୍‌ଲାସ୍, ସେଟା ସବୁ ଜାଇ ଜଅନ୍‌କେ ଜାନାଆ, କାଣା ଲକ୍‌ମନ୍ ଦେକିପାରଲାଇନି, ଚଟାମନ୍ ଇଣ୍ଡ୍ରୁଲଲାଇନି, ବଡ଼ ରଗିମନ୍ ନିକ ଅଇଲାଇନି, ବଇରା ଲକ୍‌ମନ୍ ସୁନ୍‌ଲାଇନି, ମଲାଲକ୍‌ମନ୍ ଜିବନ୍‌ଅଇ ଉଟ୍‌ଲାଇନି, ଆରି ଦୁକର୍ ଲକ୍‌ମନ୍‌କେ ମାପୁରୁର୍ ବାକିଅ ସୁନାଇଅଇଲାନି । ୨୩ ଜନ୍‌ଲକ୍‌ ମକେ ‘କିରିସ୍‌ଟ’ ସେ କି ନର୍ସ ?” ବଲି ନ ବାବିକରି ବିସ୍‌ବାସ୍ କରସି, ତାର କେତେକ୍ ନିକ କରମ୍ ।”

୨୪ ଜଅନର୍ ସିସ୍‌ମନ୍ ବାଉଡିଗାଲାପରେ ଜିସୁ ଲକ୍‌ମନ୍‌କେ ଜଅନର୍ ବିସଇ କଇବାରଦାରଲା, “କାଇଟା ଦେକ୍‌ବାକେ ତମେ ମରୁବାଲି ବୁର୍ସ୍ ବାରଇ ଜାଇରଇଲାସ୍ ? କାଇ ପବନେ ଜୁଲ୍‌ତେରଇବା ବାଉସ୍ ନାଲା ? ୨୫ ସେଟା ନଇଲେ ତମେ କାଇଟା ଦେକ୍‌ବାକେ ବାରଇଜାଇ ରଇଲାସ୍ ? କାଇ ଜବର୍ ତାବୁଦେଇ ବସ୍‌ତର୍ ଗେନି ପିନ୍‌ରଇବା ଗଟେକ୍ ଲକ୍‌କେ ଦେକ୍‌ବାକେ ? ଦେକା, ଜନ୍ ଲକ୍‌ମନ୍ ଜେ କି ସୁନ୍‌ର୍ ବସ୍‌ତର୍ ପିନ୍‌କରି, ସୁକର୍ ସଙ୍ଗ ଦିନ୍ ବିତାଇବାଇ, ସେମନ୍ ତା ରାଜାର ନଅରେ ରଇବାଇ । ୨୬ ସେନ୍ତାର ନଇଲେ କାଇକେ ବାରଇ ଜାଇରଇଲାସ୍ ? କାଇ ଗଟେକ୍ ବବିସ୍‌ତ୍‌ବକ୍‌ତାକେ ଦେକ୍‌ବାକେ ? ମୁଇ ତମ୍‌କେ ସତ୍ କଇଲିନି, ଜଅନ୍ ବବିସ୍‌ତ୍‌ବକ୍‌ତାମନ୍‌ର୍ ତେଇଅନି ମିସା ଅଦିକାର୍ ରଇବା ଲକ୍ ।” ୨୭ ଜାର ବିସଇ ନେଇକରି ଦରମ୍ ସାସ୍‌ତରେ

ଲେକାଆତେ । ପରମେସର୍ କଇଲା, “ଆମେ ନିଜର୍ ଦୁଡ଼କେ ତମର୍ ଆଗେ ପାଟାଇଲୁନି, ସେ ତମର୍ ମୁଆଟେ ତମର୍ପାଇ ବାଟ୍ ତିଆର୍ କରସି, ଏ ସେ ଲକ୍ । ୨୮ ମୁଇ ତମକେ ସଡ଼ କଇଲିନି, ମାଇଜିମନର୍ ଟାନେଅନି ଜାଡ଼ କରିରଇବା ସବୁର୍ ବିଡ଼ରେ, ଜଅନର୍ ଟାନେଅନି ଆରି ମୁକିଅ କେ ମିସା ନାଇ, ଏଲେମିସା ପର୍ମେସରର୍ ରାଇଜେ ଜେ ସାନ୍, ସେ ଜଅନର୍ ଟାନେଅନି ବଡ଼ ।”

୨୯ ✧ଜନ୍‌ଲକ୍‌ମନ୍ ଏ ସବୁ କାତା ସୁନ୍‌ତେରଇଲାଇ, ସେମନ୍, ଜେନ୍ତାରିକି ସିସ୍‌ତୁମାଙ୍ଗୁମନ୍ ମିସା ପର୍ମେସରର୍ ଦାବିକଲାଟା ମାନି ଜଅନର୍ ଟାନେ ହୁବନ୍ ନେଇରଇଲାଇ । ୩୦ ମାତର୍ ପାରୁସିମନ୍ ଆରି ନିଅମ୍ ସିକାଉମନ୍ ତାକର୍ ଜିବନର୍ପାଇ ପର୍ମେସର୍ କରିରଇବା ଜଜ୍‌ନା ମାନଡ଼ନାଇ, ଆରି ଜଅନର୍‌ଟାନେ ହୁବନ୍ ନେଅଡ଼ନାଇ । ୩୧ ଜିସୁ ଆରିତରେକ୍ କଇଲା, ଏବର୍ ଲକ୍‌ମନ୍‌କେ ମୁଇ କାର୍ ସଙ୍ଗ୍ ସମାନ୍ କରବି ? ଆରି ସେମନ୍ କାର୍ ପାରା ? ୩୨ ଜନ୍ ପିଲାମନ୍ ଡାଣ୍ଡେବାଟେ ବସି ସେମନ୍ ସେମନ୍ ଡାକାଡାକିଅଇ କୁଆକୁଇ ଅଇବାଇ, “ ଅଇରେ, ଆମେ ତମର୍‌ଲଗେ ବାଉଁସି ପୁକ୍‌ଲୁ, ତମେ ନାଟ୍ କରାସନାଇ, ଦୁକର୍ ଗିଡ଼ ଗାଇଲୁ, ତମେ କାନ୍ଦାସନାଇ, ସେମନ୍ ତାକର୍‌ପାରା । ୩୩ କାଇକେବଇଲେ, ହୁବନ୍ ଦେଉ ଜଅନ୍ ଆସି ଉପାସେ ରଇ, ଆମଟ୍ ଅଇଲା ପଲ୍‌ରସ୍ ମିସା କାଏନାଇ, ଆରି ତମେ ତାକେ କଇଲାସ୍‌ନି ହୁମା ଦାରିଆଟେ ବଲି । ୩୪ ପର୍ମେସର୍ ପାଟାଇରଇବା ନର୍‌ପିଲା ମୁଇ ଆସି କିଆପିଆ କଲିନି, ଆରି ତମେମନ୍ କଇଲାସ୍‌ନି, ଦେକା ଅ ! ଏ ଗଟେକ୍ କାଉରାଟା ଆରି ମଦୁଆଟା, ସିସ୍‌ତୁମାଙ୍ଗୁମନର୍ ଆରି ପାପିମନର୍ ମଇତର୍ । ୩୫ ମାତର୍ ଜନ୍‌ଲକ୍‌ମନ୍ ପର୍ମେସରର୍ ଗିଆନ୍ ମାନ୍‌ବାଇ, ସେମନର୍‌ଟାନେ ମାପୁରୁ ସଡ଼ ଇସାବେ ଡିସ୍‌ସି ।”

ପାରୁସି ସିମନର୍ ଗରେ ଜିସୁ

୩୬ ଆରି ପାରୁସିମନର୍ ବିଡ଼ରେଅନି ଗଟେକ୍ ଲକ୍ ଜିସୁକେ କାଇବାକେ ଡାକ୍‌ଲା । ତେଇ ଜିସୁ ପାରୁସିର୍ ଗରେ ଜାଇକରି କାଇବାକେ ବସିଲା । ୩୭ ✧ଆରି ଦେକା, ସେ ନଅରେ ଗଟେକ୍ ପାପି

✧ ୭:୨୯ ୭:୨୯ ମାଡ଼ିଉ ୨୧:୩୨; ଲୁକ୍ ୩:୧୨ ✧ ୭:୩୭ ୭:୩୭ ମାଡ଼ିଉ ୨୭:୭; ମାର୍‌କ୍ ୧୪:୩; ଜଅନ୍ ୧୨:୩

ମାଇଜି ରଇଲା । ଜିସୁ ପାରୁସିର୍ ଗରେ କାଇବାକେ ବସିଆଚେ ବଲି ଜାନିକରି, ସେ ଗଟେକ୍ କଣ୍ଡିତେଇ ବାସ୍ନା ଚିକନ୍ ଆନ୍ଲା । ୩୮ ପର୍ବାଟେ ଜିସୁର୍ ପାଦଲଗେ ଚିଆଅଇ ଆଁସୁ ଜରାଇ ଜରାଇ ତାର୍ ଆଁସୁ ପାନି ସଙ୍ଗ୍ ଜିସୁର୍ ପାଦ୍ ବିଜାଇକରି ତାର୍ ଚେଣ୍ଡିସଙ୍ଗ୍ ସେଟା ପୁର୍ବାର୍ ଦାରଲା । ଆରି ତାର୍ ପାଦେ ଚୁମି ଚୁମି କରି ସେ ଚିକନ୍ ଲାଗାଇବାର୍ ଦାରଲା । ୩୯ ସେଟା ଦେକିକରି ଜନ୍ ପାରୁସି ତାକେ ଡାକିରଇଲା, ସେ ମନେ ମନେ ବାବ୍ଲା, “ଜଦି ଏ ଲକ୍ ବବିସତ୍ତବକ୍ତା ଅଇରଇତା ବଇଲେ, ଆକେ ଜେ ଚିଇଲାନି, ସେ କେ ଆରି ସେଟା କେନ୍ତାର୍ ମାଇଜି, ବଲି ଜାନ୍ତା । କାଇକେବଇଲେ ସେ ଗଟେକ୍ ପାପି ମାଇଜି ।”

୪୦ ଜିସୁ ତାକେ କଇଲା, “ସିମନ୍ ତକେ ମୁଇ ଅଲପ୍ କଇବାର୍ ଆଚେ ।” ସେ କଇଲା, “ଗୁରୁ କୁଆ ଡେବେ ।”

୪୧ “ଗଟେକ୍ ସାଉକାରର୍ ରୁନ୍ ନେଇରଇବା ଦୁଇଲକ୍ ରଇଲାଲ, ଗଟେକ୍ଲକ୍ ପାଁସ୍ ରୁପାଟାଙ୍ଗା ଆରି ଗଟେକ୍ଲକ୍ ପଟାସ୍ ରୁପାଟାଙ୍ଗା ରୁନ୍ କରିରଇଲାଲ । ୪୨ ରୁନ୍ ବାନ୍ଦବାକେ ସେମନ୍କେ କାଇଟା ନ ରଇଲାଜେ, ସାଉକାର୍ ଦୁଇଲକର୍ ଜାକ ରୁନ୍ ଚାଡିଦେଲା । ଡେବେ ସେମନ୍ର୍ ବିତ୍ତରେ କେ ତାକେ ବେସି ଆଲାଦ୍ କର୍ସି ?”

୪୩ ସିମନ୍ କଇଲା, “ମୁଇ ବାବ୍ଲିନି, ସାଉକାର୍ ଜାକେ ଅଦିକ୍ ରୁନ୍ ଚାଡିଦେଲା, ସେ ।” ଜିସୁ ତାକେ କଇଲା, “ତମେ ଚିକ୍ ବିଚାର୍ କଲାସ୍ ।” ୪୪ ଆରି ଜିସୁ ସେ ମାଇଜିର୍ବାଟେ ମୁ ବୁଲାଇକରି ସିମନ୍କେ କଇଲା, “ଏ ମାଇଜିକେ ଦେକ୍ଲୁସିନି ? ମୁଇ ତମର୍ ଗରେ ଆଇଲି, ମକେ ଗଡ୍ ଦଇବାକେ ପାନି ଦିଆସ୍ନାଇ, ମାତର୍ ଏ ତାର୍ ଆଁସୁପାନି ସଙ୍ଗ୍ ମର୍ ପାଦ୍ ବିଜାଇ ତାର୍ ଚେଣ୍ଡିସଙ୍ଗ୍ ସେଟା ପୁରିଦେଲା । ୪୫ ତମେ ମକେ ଚୁମାସ୍ନାଇ, ମାତର୍ ମୁଇ ବିତ୍ତରେ ଆଇଲା ବେଲେଅନି ଏ ମର୍ ପାଦେ ଚୁମି ଚୁମି, ତାକେନାଇ । ୪୬ ତମେ ମକେ ସନ୍ମାନର୍ ସଙ୍ଗ୍ ମୁଣ୍ଡେ ଚିକନ୍ ଲାଗାଆସ୍ନାଇ, ମାତର୍ ଏ ମର୍ ପାଦେ ବାସ୍ନା ଚିକନ୍ ଲାଗାଇଲା । ୪୭ ଡେବର୍ପାଇ ମୁଇ ତକେ କଇଲିନି, ଏ ମାଇଜିର୍ କେତେ କେତେ ପାପ୍ କେମାଅଇଲାଆଚେ, କାଇକେବଇଲେ ସେ ବେସି ଆଲାଦ୍ କଲା, ମାତର୍ ଜାକେ ଅଲପ୍ କେମା ଦିଆଅଇସି, ସେ ଅଲପ୍ ଆଲାଦ୍ କର୍ସି ।”

୪୮ ଆରି ଜିସୁ ସେ ମାଇଜିକେ କଇଲା, “ତର୍ ସବୁ ପାପ୍ କେମା ଅଇଲା ଆଚେ ।”

୪୯ ତେଇ ଜିସୁରସଙ୍ଗ୍ କାଇବାକେ ବସିରଇବା ଲକ୍ମନ୍ ମନେ ମନେ କଇବାର୍ ଦାର୍ଲାଇ, “ପାପ୍ ମିସା କେମାକଲାନିଜେ, ଏ କେ ?”

୫୦ ମାତର୍ ଜିସୁ ସେ ମାଇଜିକେ କଇଲା, “ତୁଇ ମକେ ବିସ୍‌ବାସ୍ କଲାର୍‌ପାଇ ବଲି ରକିଆ ପାଇଆତୁସ୍, ସାନ୍ତିସଙ୍ଗ୍ ଉଟିଜା ।”

୮

ସିସ୍‌ମନର୍ ସଙ୍ଗ୍ ଜିସୁ

୧ ତେଇଅନି ଚନେକ୍ ଗାଲାପଚେ, ଜିସୁ ନଅରେ ନଅରେ ଆରି ଗାଏଁ ଗାଏଁ ପର୍‌ମେସରର୍ ରାଇଜର୍ ସୁବ୍‌କବର୍ କଇ ବୁଲ୍‌ବାର୍ ଦାର୍ଲା, ଆରି ବାରଟା ସିସ୍‌ମନ୍ ତାର୍ ସଙ୍ଗ୍ ରଇଲାଇ । ୨ * ଜନ୍ ମାଇଜିମନ୍ ତୁମାଦାର୍ଲା ଟାନେଅନି ଆରି ଜର୍‌ଦୁକା ଟାନେଅନି ନିକ ଅଇରଇଲାଇ, ସେମନ୍ ମିସା ତାର୍ ସଙ୍ଗ୍ ରଇଲାଇ । ମାଇଜିମନର୍ ବିତ୍‌ରେଅନି ମରିୟ୍‌ମ୍ ଜାକେ କି ମଗ୍‌ଦଲିନି ମରିୟ୍‌ମ୍ ବଲି କଇବାଇ । ଜାର୍‌ଟାନେଅନି ସାତଟା ତୁମା ବାରଇ ଜାଇରଇଲାଇ । ୩ ଏରଦ୍ ରାଜାର୍ ଗୁମସ୍‌ତା କୁଜାର୍ ମାଇଜି ଜଆନା, ସସନା, ଆରି କେତେକ୍ କେତେକ୍ ମାଇଜିମନ୍, ଜିସୁର୍ ସଙ୍ଗ୍ ରଇ ନିଜର୍ ନିଜର୍ ଦନ୍ ସାରାଇ ତାକେ ସେବା କର୍‌ତେରଇଲାଇ ।

ବିଅନ୍ ବୁନ୍‌ବା ଚାସିର୍ କାତା

(ମାତିଉ ୧୩:୧-୯; ମାର୍କ ୪:୧-୯)

୪ ଜେତେବେଲେ ଲକ୍ମନ୍ ଗଟେକ୍ ଜାଗାଇ ବୁଲ୍‌ଅଇଲାଇ, ଆରି ନଅରେ ନଅରେ ଅନି ତାର୍‌ଲଗେ ଆଇଲାଇଜେ ଜିସୁ ଏନ୍ତି ଉଦାଅରନ୍ ଦେଇ କଇଲା, ୫ “ଗଟେକ୍ ଚାସି ତାର୍ ବିଅନ୍ ବୁନ୍‌ବାକେ ବାରଇଲା । ସେ ବୁନ୍‌ ବୁନ୍‌ କେତେଟା ବିଅନ୍ ବାଟେ ଅଦର୍ଲା । ଲକ୍ମନ୍ ସେଟା ମାଣ୍ଡୁରୁଣ୍ଡୁ କରିଦେଲାଇ ଆରି ଚତଇମନ୍ ଆସି କାଇଦେଲାଇ । ୬ କେତେଟା ପାକ୍‌ନା ବାଡି ରଇଲା ବୁଏଁ ଅଦର୍ଲା, ସେଟା ଆଁକରି ଗାଜା ଅଇଲା, ମାତର୍ ମାଟି ନ ବିଜିରଇଲାଜେ

* ୮:୭ ୮:୭ ମାତିଉ ୨୭:୫୫,୫୬; ମାର୍କ ୧୫:୪୦,୪୧; ଲୁକ୍ ୨୩:୪୯

ସୁକିଗାଲା । ^୭ କେତେଟା କାଟାବୁଟାମାନର ମଜା ଅଦରଲା । କାଟାବୁଟାମାନ ଦାପରେ ବଢ଼ିକରି ଆକରଲାଟାମାନଙ୍କେ ଚାପିଦେଲା । ଠାରି ବାକି କେତେଟା ନିକ ଜମିଟାନେ ଅଦରଲା ଆରି ସଏ ଗୁନ୍ ପଲ୍ ପଲ୍ଲା ।” ଏଟା କଇସାରାଇ ଜିସୁ ଆଉଲିଅଇକରି କଇଲା, “ଜାକେ ସୁନ୍‌ଲାପାରା କାନ୍ ଆଟେ, ସେ ସୁନ୍ ।”

ଉଦାଅରନର ଅରତ୍

(ମାତିଉ ୧୩:୧୦-୧୭; ମାର୍କ ୪:୧୦-୧୨)

^୮ ତାର ସିସ୍‌ମନ୍ ଏ ଉଦାଅରନ୍ ଦେଇରଇବାଟା କାଇଟା ଅଇରଇସି ବଲି ତାକେ ପାଟାର୍‌ବାର୍ ଦାରଲାଇ । ^{୧୦} ତେଇ ଜିସୁ ସେମନ୍‌କେ କଇଲା, “ପର୍‌ମେସରର୍ ରାଇଜର୍ ଟିକିନିକି ବିସଇ ଜାନତ୍ ବଲି ତମ୍‌କେ ଗିଆନ୍ ଦିଆଅଇଲାଆଟେ, ମାତର୍ ବିନଲକ୍‌ମନ୍‌କେ ଉଦାଅରନ୍ ଦେଇ କଇଅଇସି, ଜେନ୍ତାରିକି ସେମନ୍ ଦେକି ଦେକି ନ ଦେକତ୍ କି ସୁନି ସୁନି ମିସା ନ ବୁଜତ୍ ।”

ବିଅନ୍ ବୁନ୍‌ବାଟାର୍ ଅରତ୍

(ମାତିଉ ୧୩:୧୮-୨୩; ମାର୍କ ୪:୧୩-୨୦)

^{୧୧} “ଉଦାଅରନର୍ କାତା ଏନ୍ତାରି, ବିଅନ୍ ଅଇଲାନ୍ ପର୍‌ମେସରର୍ ବାକିଅ । ^{୧୨} ବାଟ୍‌ଲଗେ ଅଦରଲା ବିଅନ୍, ଏନ୍ତାରି ଲକ୍‌ମନ୍‌ପାରା, ଜେମନ୍ ବାକିଅ ସୁନ୍‌ବାଇ । ତାର୍‌ପଟେ ସଇତାନ୍ ଆସି, ଜେନ୍ତାରି ସେମନ୍ ବିସବାସ୍ କରି ରକିଆ ନ ପାଅତ୍, ସେ ଲକ୍‌ମନ୍‌ର ମନ୍‌ବିତ୍‌ରେଅନି ବାକିଅ ଜିକିନେଇସି । ^{୧୩} ପାକ୍‌ନାବାଡ଼ି ବୁର୍‌ ଅଦରଲା ବିଅନ୍ ଏନ୍ତାରି ଲକ୍‌ମନ୍‌କେ ବୁଜାଇସି । ସେମନ୍ ବାକିଅ ସୁନି ସାର୍‌ଦାସଙ୍ ମାନ୍‌ବାଇ, ମାତର୍ ସେମନ୍‌କେ ଚେର୍ ନ ରଇଲାର୍‌ପାଇ ବଲି ଚନେକ୍ ବିସବାସ୍ କର୍‌ବାଇ ଆରି କାଇଆଲେ ପରିକା ବେଲାଇ ବିସବାସ୍ ଚାଡ଼ିଦେବାଇ । ^{୧୪} ଆରି କାଟାବୁଟାମାନର୍ ମଜା ଅଦରଲା ବିଅନ୍ ଏନ୍ତାରି ଲକ୍‌ମନ୍‌କେ ବୁଜାଇସି । ଜନ୍‌ଲକ୍‌ମନ୍ ବାକିଅ ସୁନ୍‌ବାଇ, ମାତର୍ ଜଗତର୍ ଚିନ୍ତା, ଦନ୍ ସଁପତିର୍ ଚିନ୍ତା କରି କରି ଚାପିଅଇଜିବାଇ । ତେଇ ନିକ ଦାନ୍ ନ ଅଏ । ^{୧୫} ଆରି ନିମାନ୍ ବୁର୍‌ ଅଦରଲା, ବିଅନ୍ ଏନ୍ତାରି ଲକ୍‌ମନ୍‌କେ ବୁଜାଇସି । ଜନ୍ ଲକ୍‌ମନ୍ କି ନିମାନ୍ ଆରି ଦରମ୍ ମନେ ବାକିଅ ସୁନିକରି ସେଟା ଡାଟ୍ ସଙ୍ ଦାରି ସଙ୍‌ଇବାଇ ଆରି ଜାଗିରଇକରି ପଲ୍‌ପଲ୍‌ବାଇ ।”

ମାନ ତଲେ ବଡ଼ି
(ମାର୍କ ୪:୨୧-୨୫)

୧୭ ✧ “ବଡ଼ି ଡସାଇ କରି କେ ମିସା ଡାଲାଡାବି ନ ସଙ୍ଗାଅଡ଼ । କି କର୍ ତଲେ ନ ସଙ୍ଗାଅଡ଼ । ମାତର୍ ବଡ଼ି କୁଦରା ଉପ୍ରେ ସଙ୍ଗାକବାଇ । ଜେନ୍ତାରିକି ଆଇଲା ଲକ୍ମନ୍ ଉଜଲ୍ ଦେକିପାରଡ଼ ।”

୧୭ ✧ “କାଇକେବଇଲେ, ଏନ୍ତାରି ଲୁଟିରଇବା ବିସଇ କାଇଟା ନାଇ, ଜନ୍ତା ଜାନା ନ ପଡେ । ଡାବିଅଇରଇବା ବିସଇ କାଇଟା ନାଇ ଜନ୍ତା ଉଗାଡ଼ି ନଏଁ ।”

୧୮ ✧ “ସେଟାର ପାଇ, ଜେନ୍ତାରି ସୁନ୍ସା, ସେ ବିସଇ ନେଇକରି ଜାଗରଡ଼ ରୁଆ । କାଇକେବଇଲେ ଜାକେ ଆଚେ ତାକେ ଅଦିକ୍ ଦିଆଅଇସି । ଆରି ଜାକେ ନାଇ, ସେ ଜେଡ଼କି ନିଜର୍ଟା ଆଚେ ବଲି ବାବସି, ସେ ଅଲପ୍ଟା ମିସା ଡାଟାଟାନେଅନି ନିଆଅଇସି ।”

ଜିସୁର୍ ମାଆ ଆରି ବାଇମନ୍
(ମାତିଉ ୧୨:୪୬-୫୦; ମାର୍କ ୩:୩୧-୩୫)

୧୯ ଜିସୁର୍ ମାଆ ଆରି ବାଇମନ୍ ତାର୍ ଲଗେ ଆଇଲାଇ । ମାତର୍ ଲକ୍ମନ୍ ଜବର୍ ରଇଲାଇକେ ତାର୍ ସଙ୍ଗା ମିସିନାପାର୍ଡେ ରଇଲାଇ । ୨୦ ତେଇ ଜିସୁକେ ଏ କବର୍ ଦେଲାଇ, “ତମର୍ ମାଆ ଆରି ବାଇମନ୍ ତକେ ଦେକ୍ବାକେ ମନ୍କରି ବାଇରେ ଚିଆଅଇଲାଇ ଆଚଡ଼ ।”

୨୧ ମାତର୍ ଜିସୁ ଲକ୍ମନ୍କେ କଇଲା, “ଜନ୍ ଲକ୍ମନ୍ ପରମେସରର୍ ବାକିଅ ସୁନ୍ବାଇ ଆରି ମାନ୍ବାଇ ସେମନ୍ ମର୍ ମାଆ ଆରି ବାଇମନ୍ ।”

ଜିସୁ ବାଉପବନ୍କେ ଡେବାଇଲା
(ମାତିଉ ୮:୨୩-୨୬; ମାର୍କ ୪:୩୫-୪୧)

୨୨ ଦିନେକ୍ ଜିସୁ ଆରି ତାର୍ ସିସମନ୍ ଗଟେକ୍ ଡଙ୍ଗା ଚଗ୍ଲାଇ, ଆରି ସେ ସିସମନ୍କେ କଇଲା, “ଆସା, ଗାଡ଼ ସେପାଟେ ଜୁ ।” ତେଇ ସେମନ୍ ଡଙ୍ଗା ମେଲ୍ଲାଇ । ୨୩ ମାତର୍ ଡଙ୍ଗାଗାଟି ଗାଲାବେଲେ ଜିସୁ ସଇଦେଲା । ସେଡ଼କିବେଲେ ଗାଡେ ଅଟାଡ଼ ବାଉପବନ୍ ଆଇଲା

✧ ୮:୧୭ ୮:୧୭ ମାତିଉ ୫:୧୫; ଲୁକ ୧୧:୩୩ ✧ ୮:୧୭ ୮:୧୭ ମାତିଉ ୧୦:୨୬; ଲୁକ ୧୨:୨ ✧ ୮:୧୮ ୮:୧୮ ମାତିଉ ୨୫:୨୯; ଲୁକ ୧୯:୨୭

ଆରି ଡଙ୍ଗାଈ ପାନିପୁରି ବରଡ଼ି ଅଇବାର୍ ଦାରଲା । ସେମନ୍ ବଡ଼ ବିପଦେ ପଡ଼ିଗାଲା । ୨୪ ତେଇ ସିସ୍ତମନ୍ ଜିସୁରଲଗେ ଆସି ତାକେ ଡଙ୍ଗାଈ କଇଲା “ଏ ଗୁରୁ, ଏ ଗୁରୁ, ଆମେ ମରିଜିବୁବେ !” ତେଇ ଜିସୁ ଉଟିକରି ପବନ୍ ଆରି ବଡ଼ ଲଅଡ଼ିକେ ଦମ୍‌କାଇଲା, ଆରି ସେଟା ସବୁ ଚିମ୍‌ରାଇଅଇ ଡବିର୍ ଅଇଲା । ୨୫ ସେ ସିସ୍ତମନ୍‌କେ କଇଲା, “ତମର୍ ବିସ୍‌ବାସ୍ କେନେ ଅଇଲା ?” ମାତର୍ ସେମନ୍ ଡରିକରି କାବାଅଇ ନିଜେ ନିଜେ କଇବାର୍ ଦାରଲା । “ତେବେ ଏ କେ ଜେ ପବନ୍ ଆରି ପାନିକେ ମିସା ଆଦେସ୍ ଦେଲା ଦାପ୍‌ରେ, ସେଟା ସବୁ ତାର୍ ଆଦେସ୍ ମାନବାଇ ।”

ଜିସୁ ଗଟେକ୍ ଡୁମା ଦାରିରଇବା ଲକ୍‌କେ ନିକକଲା
(ମାତିଉ ୮:୨୮-୩୪; ମାର୍କ ୫:୧-୨୦)

୨୬ ପରେ ଜିସୁ ଆରି ତାର୍ ସିସ୍ତମନ୍ ଗାଲିଲି ମୁଆଟର୍ ସେପାଟେ ଗରାସିୟମନ୍‌ର ଜାଗାଈ କେଟ୍‌ଲା । ୨୭ ଜିସୁ ଡଙ୍ଗାଈଅନି ଉଡ଼ିଲା ଦାପ୍‌ରେ, ସେ ନଅରର୍ ଗଟେକ୍ ଡୁମାଦାରଲା ଲକ୍ ତାକେ ବେଟ୍‌ଅଇଲା । ସେ ବେସି ଦିନେଅନି କାଜଟା ନ ପିନ୍‌କରି ଗରେ ନ ରଇ, ମସ୍‌ନେ ରଇତେ ରଇଲା । ୨୮ ସେ ଜିସୁକେ ଦେକି କିର୍‌କିରି ତାର୍ ପାଦେ ଅଦ୍‌ରି, ଆଉଲିଅଇ କଇଲା, “ଏ ବେସି ବପୁର୍‌ସଙ୍ଗ୍ ରଇବା ପର୍‌ମେସରର୍ ପଅ ଜିସୁ, ମର୍ ଲଗେ ତମର୍ କାଇ କାମ୍ ଆଟେ ? ମୁଇ ତମ୍‌କେ ବାବୁଜିଆ କରି କଇଲିନି, ମକେ କସ୍‌ଟ ନ ଦିଆ ।” ୨୯ କାଇକେ ବଇଲେ ଜିସୁ ଡୁମାକେ ସେ ମୁନୁସର୍ ଟାନେଅନି ବାରିଜାଅ ବଲି ଆଦେସ୍ ଦେଇରଇଲା । ସେ ଡୁମା ସେଲକ୍‌କେ ଦାରିଲାଗିରଇଲା, ଆରି ଲକ୍‌ମନ୍ ତାକେ ସିକିଲି ସଙ୍ଗ୍ ବାନ୍ଦି ଜାଗ୍‌ତେ ରଇଲା । ମାତର୍ ସେ ବାନ୍ଦିଲାଟା ସବୁ ଚିତାଇ ପାକାଇତେରଇଲା ଆରି ଡୁମା ତାକେ କିନରା ଜାଗାମନ୍‌କେ ଦାରିଜାଇତେରଇଲା ।

୩୦ ଜିସୁ ତାକେ ପାଟାରଲା, “ତର୍ ନାଉଁ କାଇ ନାଉଁ ?” ସେ କଇଲା, ବାଇନି, କାଇକେ ବଇଲେ ତାକେ ଗାଦା ଡୁମାମନ୍ ଦାରି ରଇଲା । ୩୧ ଆରି ଜିସୁ ଜେନ୍ତିକି ସେମନ୍‌କେ ପାଟାଲେ ଜିବାକେ ଆଦେସ୍ ନ ଦେଏ, ଏଟାର୍ ପାଇ ସେମନ୍ ତାକେ ବାବୁଜିଆ କର୍‌ବାର୍ ଦାରଲା ।

୩୨ ତେଜ କୁପୁଲି ଲଗେ ଗଟେକ୍ ମାନ୍ଦା ଗୁସ୍ତରି ରାସି ଚାର୍ତେତେ ରଇଲାଇ । ଆରି ସେ ଜେନ୍ତାରି ସେମନ୍ଦକେ ସେ ଗୁସ୍ତରି ମାନ୍ଦାର୍ ମଜାଇ ପୁର୍ବାକେ ଆଦେସ୍ ଦେଇସି, ଏଟାର୍ ପାଇ ସେମନ୍ଦ ଜିସୁକେ ବାବୁଜିଆ କଲାଇ । ୩୩ ଜିସୁ ସେମନ୍ଦକେ ଆଦେସ୍ ଦେଲା ଦାପ୍ତରେ ତୁମାମନ୍ ସେ ମୁନ୍ନୁସର୍ତ୍ତାନେଅନି ବାରଇ ଗୁସ୍ତରି ରାସିର୍ ମଜାଇ ପୁର୍ଲାଇ । ପୁର୍ଲାକେ ଗୁସ୍ତରି ମାନ୍ଦା ଜବର୍ ପାଲାଇକରି ଗଡ଼ଗଡ଼ାବାଟେ ଜାଇ ଗାଡେ ଅଦ୍ଦରି ମରିଗାଲାଇ ।

୩୪ ଗୁସ୍ତରି ଚାରାଇତେ ରଇଲା ଲକ୍ମନ୍ଦ୍ ସେ ଗଟ୍ଟନା ଦେକି ପାଲାଇକରି ନଅରେ ଆରି ଗାଉଁମନ୍ଦକେ ଜାଇ ସେ କାତା ଜାନାଇଲାଇ । ୩୫ ତେଜ ଲକ୍ମନ୍ଦ୍ ସେ ଗଟ୍ଟନା ଦେକ୍ବାକେ ବାରଇ ଆଇଲାଇ ଆରି, ସେମନ୍ଦ୍ ଜିସୁର୍ ଲଗେ ଆସି ଜନ୍ ମୁନ୍ନୁସର୍ ଚାନେଅନି ତୁମାମନ୍ ବାରଇଲାଇ, ସେ ଲକ୍ ଲୁଗା ପିନ୍ଦି ନିକ ମନର୍ ସଙ୍ଗ୍ ଜିସୁର୍ ପାଦ୍ ତଲେ ବସି ରଇବାଟା ଦେକି ଡରିଗାଲାଇ । ୩୬ ଆରି ଜନ୍ଲକ୍ମନ୍ଦ୍ ଏଟା ସବୁ ଦେକି ରଇଲାଇ, ସେମନ୍ଦ୍ ସେ ତୁମା ଦାରଲା ଲକ୍ କେନ୍ତାରି ନିକ ଅଇଲା, ସେଟା ବିନ୍ ଲକ୍ମନ୍ଦକେ ଜାନାଇଲାଇ । ୩୭ ତେଜ ଗରାସିୟମନ୍ଦର୍ ଚାରିବେଡ଼ିତ୍ ଜାଗାର୍ ଲକ୍ମନ୍ଦ୍ ଜିସୁକେ ତାକର୍ଚାନେଅନି ଜିବାକେ ଗୁଆରି କଲାଇ । କାଇକେବଇଲେ ସେମନ୍ଦ୍ ବେସି ଡରିଜାଇ ରଇଲାଇ ଆରି, ଜିସୁ ଗଟେକ୍ ଡଙ୍ଗାଇ ବସି ବାଉଡି ଆଇଲା । ୩୮ ମାତର୍ ଜନ୍ ଲକ୍ଚାନେଅନି ତୁମାମନ୍ ବାରଇଜାଇ ରଇଲାଇ, ସେ ଜିସୁର୍ ସଙ୍ଗ୍ ରଇବି ବଲି ଗୁଆରି କର୍ବାର୍ଦାଦାରଲା । ୩୯ ମାତର୍ ସେ ତାକେ କଇକରି ପାଟାଇଲା । “ତର୍ ଗରେ ବାଉଡି ଜା ଆରି ପର୍ମେସର୍ ତର୍ଲାଗି ଜନ୍ ଜନ୍ କାମ୍ କଲାଆଟେ ସେ ସବୁ କଇଦେସ୍ ।” ତେଜ ସେ ଲକ୍ ଇଣ୍ଡିଜାଇ ଜିସୁ ତାର୍ ପାଇ ଜନ୍ ଜନ୍ କାମ୍ କରଇଲା, ଗୁଲାଇ ନଅରେ ଜାନାଇବାର୍ ଦାରଲା ।

**ଜାଇରସର୍ ଟକି ଆରି ବନି ଜିବା ମାଇଜି ନିକ ଅଇଲାଇ
(ମାତିଉ ୯:୧୮-୨୬; ମାର୍କ ୫:୨୧-୪୩)**

୪୦ ଜିସୁ ଗାଡ଼ ସେପାଟେ ଅନି ଏ ପାଟେ ଆରିତରେକ୍ ବାଉଡି ଆଇଲା ପିଟେ, ଲକ୍ମନ୍ଦ୍ ତାକେ ସାର୍ଦା ସଙ୍ଗ୍ ମାନ୍ଦାଇ । କାଇକେ ବଇଲେ ସେମନ୍ଦ୍ ତାକେ ଜାଗି ରଇଲାଇ । ୪୧ ଆରି ଏଦେ ଦେକା

! ଜାଇରସ୍ ନାଉଁର୍ ଗଟେକ୍ ଲକ୍ ଆଇଲା । ସେ ଜିଉଦି ଲକ୍ମନର୍ ପାର୍ତନା ଗରର୍ ମୁକିଆ ରଇଲା । ସେ ଜିସୁର୍ ପାଦ୍ ତଲେ ଅଦ୍ରି ତାର୍ ଗରେ ଆଇବାକେ ଗୁଆରି କଲା । ୪୨ କାଇକେ ବଇଲେ ତାଉଁକେ ଗଟେକ୍ସେ ବାର ବରସ୍ ଟକି ରଇଲା ଆରି ସେ ମଲାପାରା ଅଇଜାଇରଇଲା । ମାତର୍ ଜିସୁ ଜାଇତେ ରଇବାବେଲେ ଲକ୍ମନ୍ ତାର୍ ଉପ୍ରେ ମାଣ୍ଡାଚୁଣ୍ଡାଅଇଜାଇତେ ରଇଲା ।

୪୩ ସେଡକିବେଲେ ବାର ବରସ୍ ଦାରି ବନି ଜାଇତେ ରଇବା ଗଟେକ୍ ରଗିନି ମାଇଜି ରଇଲା । ନିଜର୍ ସବୁତାବୁ ସାରାଇକରି ମିସା* କାର୍ ଲଗେ ଜାଇ ନିକ ଅଇ ନାପାର୍ଲା । ୪୪ ସେ ପର୍ବାଟେଅନି ଆସି ଜିସୁର୍ ଲୁଗା ଜାଲି ଚିଇଲା । ଚିଇଲା ଦାପ୍ରେ ତାର୍ ବନି ଜିବାଟା ତେବ୍ଲା । ୪୫ ତେଇ ଜିସୁ କଇଲା, “କେ ମକେ ଚିଇଲା ?” ମାତର୍ ସବୁ ଲକ୍ ନାଇ ବଲି କଇଲାକେ, ପିତର୍ କଇଲା, “ଏ ଗୁରୁ ଲକ୍ମନ୍ ମାଣ୍ଡାଚୁଣ୍ଡାଅଇ ତମର୍ ଉପ୍ରେ ଡାବିଅଇଆଇଲାକିନି ।”

୪୬ ମାତର୍ ଜିସୁ କଇଲା, “କେ କି ଗଟେକ୍ ଲକ୍ ମକେ ଚିଇଲା, କାଇକେ ବଇଲେ ମର୍ ବିଡ୍ରେଅନି ବପୁ ବାରଇଲା ବଲି ମୁଇ ଜାନ୍ଲି ।” ୪୭ ଜେଡେବଲ୍ ମାଇଜି ଦେକ୍ଲାକେ ମୁଇ ଲୁଚିନାପାରି, ସେ ତରତରି ତରତରି ଆସି ଜିସୁର୍ ପାଦେ ଅଦ୍ରି, କାଇଟାର୍ ପାଇ ତାକେ ଚିଇଲା, ଆରି କେନ୍ଦାରି ଦାପ୍ରେ ନିକ ଅଇଲା, ସେଟା ସବୁ ଲକର୍ ମୁଆଟେ ଜାନାଇଲା । ୪୮ ତେଇ ଜିସୁ ତାକେ କଇଲା, “ନୁନି ତର୍ ବିସ୍ବାସ୍ ତକେ ନିମାନ୍ କଲାଆଟେ ସାନ୍ତିଅଇ ଉଟିଜା ।”

୪୯ ସେ ଏ କାତା କଇବା ବେଲେ ଜିଉଦିମନର୍ ପାର୍ତନା ଗରର୍ ମୁକିଆ ଜାଇରସ୍ ଗରେଅନି ଗଟେକ୍ ଲକ୍ ଆସି କଇଲା, “ତମର୍ ଟକି ମରିଗାଲାବେ, ଗୁରୁକେ ଆରି କସ୍ ଦିଆସ୍ ନାଇ ।”

୫୦ ମାତର୍ ଜିସୁ ଏଟା ସୁନି ଜାଇରସ୍କେ କଇଲା, “ତରାନାଇ ଅବ୍‌କା ବିସ୍ବାସ୍ କରା, ସେ ବର୍ସି ।”

୫୧ ଜିସୁ ଜାଇରସ୍ ଗରେ ଆସି ପିତର୍, ଜଅନ୍ ଆରି ଜାକୁର୍ ଆରି ଟକିର୍ ବାବା ମାଆ କେ ଚାଡକରି କାକେ ମିସା ବିଡ୍ରେ ଡାକିନେଏ ନାଇ । ୫୨ ମାତର୍ ସବୁ ଲକ୍ ଟକିର୍ ଲାଗି କାନ୍ଦି କାନ୍ଦି କରି ବୁକେ

* ୮:୪୩ ୮:୪୩ କେଡେଟା ପାଣ୍ଡାଲିପିଗାନେ ଏ ପଦ ଲେକାଅଏନାଇ

ମାରିଅଇତେ ରଇଲାଇ । ତେଇ ଜିସୁ କଇଲା “କାନ୍ଦା ନାଇ, ସେ ମରେ ନାଇ, ମାତରୁ ସଇ ଦେଲାଆଚେ ।”

୫୩ ମାତରୁ ଟକି ମରିଗାଲାଆଚେ ବଲି ଜାନି ରଇଲାଇଜେ ଲକ୍‌ମନ୍ ଜିସୁକେ କିଜାଇବାର ଦାରଲାଇ । ୫୪ ମାତରୁ ଜିସୁ ଟକିରୁ ଆତେ ଦାରି କଇଲା, “ଏ ନୁନି ଉଟ୍ ।” ୫୫ ତେଇ ଟକିରୁ ଜିବନ୍ ବାଉଡି ଆଇଲା, ଆରି ସେ ସେଡକି ବେଲେସେ ଉଟ୍‌ଲା । ଜିସୁ ତାକେ କାଇଟା ଆଲେ କାଇବାକେ ଦିଆସ୍ ବଲି ଆଦେସ୍ ଦେଲା । ୫୬ ତେଇ ଟକିରୁ ବାବା ମା କାବା ଅଇଗାଲାଇ, ମାତରୁ ଜିସୁ ସେ ଗଟ୍‌ନାର କାତା କାକେ ଜାନାଆ ନାଇ ବଲି ଆଦେସ୍ ଦେଲା ।



ଜିସୁ ବାର୍ତ୍ତା ସିସ୍‌ମନ୍‌କେ ପାଟାଇଲା
(ମାତିଉ ୧୦:୫-୧୫; ମାର୍କ ୬:୭-୧୩)

୧ ପଚେ ଜିସୁ ବାର୍ତ୍ତା ସିସ୍‌ମନ୍‌କେ ରୁଣ୍ଡାଇକରି, ସେମନ୍‌କେ ସବୁ ଡୁମା ଚାଡାଇବାକେ, ରଗ୍ ନିକ କରବାକେ ବପୁ ଆରି ଅଦିକାର ଦେଲା । ୨ ଆରି ସେମନ୍‌କେ ପର୍‌ମେସରର୍ ରାଇଜ୍ ଜାନାଇବାକେ ଆରି ରଗ୍‌ଦୁକା ଅଇରଇବା ଲକ୍‌ମନ୍‌କେ ନିକ କରବାକେ ପାଟାଇଲା । ୩ ସେମନ୍‌କେ କଇଲା, “ତମେ ଜିବାବେଲେ ତାଙ୍ଗ୍ କି ମୁନା କି ରୁଟି, କି ତାରୁ କାଇଟା ମିସା ନିଆନାଇ । ପିନ୍‌ଲାଟା ଚାଡିକରି ଆରି ଉଟ୍‌କା ନିଆନାଇ । ୪ ଜେଡେବେଲେ ତମ୍‌କେ ଜାର୍ ଗରେ ଡାକିନେବାଇ, ସେ ନଅର୍ ଚାଡି ଜିବାଜାକ ତେଇସେ ରୁଆ । ୫ ଆରି ଜେଡେଲକ୍ ତମ୍‌କେ ନ ମାନଡ୍, ସେ ନଅରେଅନି ବାରଇ ଆଇବା ବେଲାଇ, ତାକର୍ ବିରୁଦେ ସାକି ଇସାବେ ତମର୍ ପାଦେଅନି ଦୁଲି ପାପ୍‌ଡି ଦିଆସ୍ ।”

୬ ତେଇଅନି ସିସ୍‌ମନ୍ ଜାଇକରି ଗାଉଁ ଗାଉଁ ବୁଲି ଗୁଲାଇ ଜାଗାଇ ସୁବ୍ କବର୍ କଇ କଇ ଆରି ଜର୍‌ଦୁକାର୍ ଲକ୍‌ମନ୍‌କେ ନିମାନ୍ କରବାର ଦାରଲାଇ ।

ଏରଦ୍ ଚିନ୍‌ତାରେ ପଡିଗାଲା
(ମାତିଉ ୧୪:୧-୧୨; ମାର୍କ ୬:୧୪-୨୯)

☆ ୯:୫ ୯:୫ ପେରିଡ୍ ୧୩:୫୧ ☆ ୯:୫ ୯:୫ ଲୁକ୍ ୧୦:୪-୧୧

୭ ✧ ଏତକ୍‌ବିତ୍‌ରେ ଗାଲିଲିର ମୁକିଅ ରାଜା ଏରଦ୍ ଏ ସବୁ ଅଇରଇବା ବିସଇ ଜାନି କାନାବାନା ଅଇଗାଲା । କାଇକେବଇଲେ ତୁବନ୍ ଦେଉ ଜଅନ୍ ମଲାତେଇଅନି ଉର୍ଲାଆଚେ ବଲି କେ କେ କଇତେରଇଲାଇ ।^୭ ଆରି, କେ କେ ଏଲିୟ୍ ଦରସନ୍ ଦେଲାଆଚେ ବଲି କଇଲାଇ । ବିନ୍ ଲକ୍‌ମନ୍ ପୁର୍ବକାଲର୍ ବବିସତ୍‌ବକ୍‌ତାମନ୍‌ ବିତ୍‌ରେଅନି ଗଟେକ୍‌ଲକ୍ ଉଟି ଆସିଆଚେ ବଲି କଇତେ ରଇଲାଇ ।^୮ ମାତର୍ ଏରଦ୍ କଇଲା, “ମୁଇ ତା ତୁବନ୍ ଦେଉ ଜଅନ୍‌ର୍ ମୁଣ୍ଟ୍ କାଟାଇଆଟି, ମାତର୍ ଜାର୍ ବିସଇ ଆମେ ଏନ୍ତାର୍ କାତା ସୁନ୍‌ଲୁନି, ଏ କେ ?” ଆରି ସେ ତାକେ ଦେକ୍‌ବିବଲି ଚେସ୍‌ଟା କର୍ତେରଇଲା ।

ଜିସୁ ପାଁର୍ ଅଜାର୍ ଲକ୍‌ମନ୍‌କେ କୁଆଇଲା ବିସଇ
(ମାତିଉ ୧୪:୧୩-୨୧; ମାର୍କ ୬:୩୦-୪୪; ଜଅନ୍ ୬:୧-୧୪)

୧୦ ପଚେ ବାର୍‌ଟା ସିସ୍‌ମନ୍ ବାଉଡି ଆସି ଜାଇ ଜାଇଟା କରିରଇଲାଇ, ସେ ସବୁ ଜିସୁର୍ ଲଗେ ବାତାଇଦେଲାଇ । ତେଇଅନି ଜିସୁ ଜେନ୍ତିକି ଲକ୍‌ମନ୍‌ର୍‌ଟାମେଅନି ବିନେ ରଇବାକେ ସେମନ୍‌କେ ବେତ୍‌ସାଇଦା ନାଉର୍ ନଅରେ ଡାକିନେଲା ।^{୧୧} ମାତର୍ ଲକ୍‌ମନ୍ ସେଟା ଜାନିକରି ତାକର୍ ପଚେ ପଚେ ଗାଲାଇ । ଜିସୁ ସେମନ୍‌କେ ମିସା ଆଲାଦ୍‌କରି ଡାକି ପର୍‌ମେସରର୍ ରାଇଜର୍ ବିସଇ କଇବାର୍ ଦାରଲା । ଆରି ଜନ୍ ଲକ୍‌ମନ୍ ନିକ ଅଇବାର୍ ରଇଲା, ସେମନ୍‌କେ ନିକକଲା ।

୧୨ ଏତକ୍‌ବିତ୍‌ରେ ଦିନ୍ ସାରି ରାତିଅଇବାର୍ ଆରାମ୍ ଅଇଲା, ତେଇ ପାଟାଇରଇବା ବାର୍‌ଟା ସିସ୍ ଜିସୁର୍‌ଲଗେ ଆସି କଇଲାଇ, “ଲକ୍‌ମନ୍ ଜାଇକରି ତାକର୍‌ପାଇ ବାସା ଆରି କାଦିର୍‌ପାଇ ଚାରିବେଡ୍‌ତିର୍ ଗାଉଁ ଆରି ଗୁଡାମନ୍‌କେ କଜଡ୍ । ସେଟାର୍‌ପାଇ ତମେ ସେମନ୍‌କେ ମେଲାନି ଦିଆସ୍ । କାଇକେବଇଲେ ଆମେ ଇତି ମେଲାନ୍ ଜାଗାଇ ଆତୁ ।”

୧୩ ମାତର୍ ଜିସୁ ସେମନ୍‌କେ କଇଲା, “ତମେ ସେମନ୍‌କେ କାଇବାକେ ଦିଆସ୍ ।” ସେମନ୍ କଇଲାଇ, “ଆମର୍‌ଲଗେ ଏକାଇ ପାଁର୍‌ଟା ରୁଟି ଆରି ଦୁଇଟା ମାର୍ ଚାଡି ଅଦିକ୍ ନାଇ । ସେନ୍ତାର୍‌ଆଲେ ଆମେ ଜାଇକରି ଏ ସବୁଲକର୍‌ପାଇ କନ୍ତିଅନି କାଦି ଗେନ୍‌ବୁ ?”

✧ ୯:୭ ୯:୭ ମାତିଉ ୧୭:୧୪; ମାର୍କ ୮:୨୮; ଲୁକ ୯:୧୯

୧୪ କାଇକେବଇଲେ ସେମନ୍ ଅବକା ମୁନୁସ୍‌ପିଲାମନ୍‌ସେ ପାଁର୍ ଅଜାର ରଇଲାଇ । ଜିସୁ ସିସ୍‌ମନ୍‌କେ କଇଲା, “ଗଟେକ୍ ଗଟେକ୍ ଦାଡ଼ି, ପଟାସ୍ ଲକ୍‌କେ ଲାକା ବସାଆ ।”

୧୫ ତେଇ ସେମନ୍ ସେନ୍ତାରିକରି ଲକ୍‌ମନ୍‌କେ ବସାଇଲାଇ ।
 ୧୬ ଆରି, ଜିସୁ ପାଁର୍ଟା ରୁଟି ଆରି ଦୁଇଟା ମାଟ୍ ଦାରି, ସରଗ୍‌ବାଟେ ମୁ କରି ଦନିଅବାଦ୍ ଦେଲା ଆରି ବାଙ୍ଗାଇକରି ସିସ୍‌ମନ୍‌କେ ବାଟାକଲା ।
 ୧୭ ତେଇ ସବୁଲକ୍ ପେଟ୍ ପୁର୍ତେ କାଇଲାଇ ଆରି ସାନ୍ତି ଅଇଲାଇ । ପଟେ ସିସ୍‌ମନ୍ ତେଇ ଅଗ୍‌ଲି ରଇବା ବାଙ୍ଗାଇଲାଟାମନ୍ ବାର ଡାଲା ଉବରାଇଲାଇ ।

ଜିସୁକେ ପିତର୍ ମାନଲା

(ମାତିଉ ୧୬:୧୩-୧୯; ମାର୍କ ୮:୨୭-୨୯)

୧୮ ତରେକ୍ ଜିସୁ ଗଟେକ୍ ଲକ୍‌ସେ କିନରା ଜାଗାଇ ବସି ପାର୍‌ତନା କରବାବେଲେ ସିସ୍‌ମନ୍ ତାରୁଲଗେ ଆଇଲାଇ, ଆରି ସେ ସିସ୍‌ମନ୍‌କେ ପାଟାରଲା, “ମୁଇ କେ ବଲି ଲକ୍‌ମନ୍ କଇଲାଇନି ?”

୧୯ ☆ସେମନ୍ କଇଲାଇ, “କେ କେ ହୁବନ୍ ଦେଉ ଜଅନ୍, ଆରି କେ କେ ଏଲିୟ, ଆରି କେ କେ ପୁର୍ବର୍ ବବିସ୍‌ତବକ୍‌ତାମନ୍‌ ବିଡ଼ରେଅନି ଗଟେକ୍‌ଲକ୍ ମଲାତେଇଅନି ଜିବନ୍ ଅଇଲାଆଟେ ବଲି କଇଲାଇନି ।”

୨୦ ☆ସେ ସିସ୍‌ମନ୍‌କେ ପାଟାରଲା, “ମାତର୍ ତମେ ମୁଇ କେ ବଲି ବାବ୍‌ଲାସ୍‌ନି ?” ପିତର୍ କଇଲା “ତମେ ପର୍‌ମେସର୍ ପାଟାଇଲା କିରିସ୍‌ଟ ।”

ଜିସୁ ତାର୍ ମରନ୍‌ର୍ ବିସଇ ଜାନାଇଲା

(ମାତିଉ ୧୬:୨୦-୨୮; ମାର୍କ ୮:୩୦; ୯:୧)

୨୧ ତେଇ ଜିସୁ ଏଟା କାକେ ନ କଇବାପାଇ ସେମନ୍‌କେ ଜାଗରତ୍‌କରି ଡିଆରଲା ।^{୨୨} ସେ ସେମନ୍‌କେ କଇଲା, “ପର୍‌ମେସର୍ ପାଟାଇଲା ନର୍‌ପିଲା ମୁଇ ବେସି ଦୁକ୍ କସ୍‌ଟ ଅଇବାର୍‌ଆଟେ । ପାର୍‌ଚିନ୍‌ମନ୍, ସାସ୍‌ତର୍ ସିକାଉମନ୍ ଆରି ମୁକିଅ ପୁଜାରିମନ୍ ମକେ

☆ ୯:୧୯ ୯:୧୯ ମାତିଉ ୧୪:୧,୨; ମାର୍କ ୬:୧୪,୧୫; ଲୁକ୍ ୯:୭,୮ ☆ ୯:୨୦ ୯:୨୦ ଜଅନ୍ ୬:୨୮,୨୯

ନ ନାମତ୍ । ସେମନ୍ ମକେ ମରାଇବାଇ । ଆରି ତିନ୍ଦିନ୍ ପତେ ମୁଇ ଆରିତରେକ୍ ମଲାତେଇଅନି ଜିବନ୍ ଅଇ ଉତ୍ତ୍ବି ।”

୨୩ ✧ ସେଡ଼କିବେଲେ ଜିସୁ ସବୁଲକ୍‌କେ କଇଲା, “ତେବେ କେ ମିସା ମରସଙ୍ଗ୍ ଆଇବାକେ ମନ୍ କର୍ସି, ସେ ନିଜର୍ ମନ୍‌କଲାଟା ସବୁ ଚାଡ଼ିଦେବାର୍ ଆଚେ, ଆରି ସବୁଦିନ୍ ତାର୍ ନିଜର୍ କୁରସ ବଇ ମର୍ ସଙ୍ଗ୍ ଆସ । ୨୪ ✧ କାଇକେବଇଲେ, ଜେ ନିଜର୍ ଜିବନ୍ ବଢ଼ାଇବାକେ ମନ୍ କର୍ସି, ସେ ସେଟା ଆରାଇସି । ମାତର୍ ଜେ ମର୍ପାଇବଲି ଜିବନ୍ ଆରାଇସି, ସେ ସେଟା ରକିଆ କର୍ସି । ୨୫ ଆରି ଜଦି ଗଟେକ୍ ମୁନ୍ସୁ ଗୁଲାଇ ଦୁନିଆ ଜିତିକରି ନିଜେ ବିନାସ୍ ଅଇସି, କି ଆରାଇସି, ତେବେ ତାର୍ କାଇ ଲାବ୍ ? ୨୬ ତେବେ କେ ମିସା ମର୍ପାଇ ଆରି ମର୍ ବାକିଅର୍ ଲାଜ୍ ଅଇସି, ଜେଡ଼କିବେଲେ ପର୍ମେସର୍ ପାଟାଇରଇବା ନର୍ପିଲା ମୁଇ ନିଜର୍ ଆରି ବାବାର୍, ଆରି ସୁକଲ୍ ଦୁଡ଼ମନ୍‌ର୍ ମଇମାସଙ୍ଗ୍ ବାଉଡ଼ି ଆଇବି, ସେଡ଼କିବେଲେ ତାର୍ ବିସଇ ନେଇ ଲାଜ୍‌ଅଇବି । ୨୭ ମାତର୍ ମୁଇ ତମକେ ସଡ଼ କଇଲିନି, ପର୍ମେସର୍‌ର୍ ରାଇଜ୍ ନ ଦେକ୍‌ବାଜାକ ଇତି ଚିଆଅଇରଇବା ଲକ୍‌ମନ୍‌ର୍ ବିତ୍ତରେଅନି କେତେଲକ୍, ପର୍ମେସର୍‌ର୍ ରାଇଜ୍ ଦେକ୍‌ବାଇ ।”

ଜିସୁ ବିନ୍ ରକାମ୍ ତିସଲା

(ମାତିଉ ୧୭:୧-୮; ମାର୍କ ୯:୨-୮)

୨୮ ଜିସୁ ଏ ସବୁ କଇ ପାକାପାକି ଆଟ୍‌ଦିନ୍ ଗାଲାପତେ, ଜଅନ୍, ପିତର୍ ଆରି ଜାକୁବର୍ ସଙ୍ଗ୍ ପାର୍ତନା କର୍ବାକେ ପର୍ବଡ଼ ଉପ୍ରେ ଗାଲା । ୨୯ ଆରି, ସେ ପାର୍ତନା କର୍ବାବେଲେ ତାର୍ ମୁ ବିନ୍ ଅଇଗାଲା ଆରି ସେ ପିନ୍‌ଲା ଲୁଗା ଦବ୍ ଅଇ ବିଜ୍‌ଲିପାରା ଜିକ୍‌ମିକିଗାଲା । ୩୦ ଆରି ଏଦେ ଦେକା ! ସେଦାପ୍ରେ ମସା ଆରି ଏଲିୟ୍ ତାର୍‌ସଙ୍ଗ୍ କାତାବାର୍ତା ଅଇବାର୍ ଦାର୍‌ଲାଇ । ୩୧ ସେମନ୍ ସରଗର୍ ମଇମାସଙ୍ଗ୍ ତିସତେ ରଇଲାଇ । ସେ କେନ୍ତ୍ର ଜିରୁସାଲାମେ ଦୁକ୍ କସ୍‌ଟ ପାଇ ମରିକରି ପର୍ମେସର୍‌ର୍ ଜଜ୍‌ନା ସିଦ୍ କର୍ବାର୍ ଆଚେ ବଲି ସେମନ୍ ଜିସୁର୍‌ସଙ୍ଗ୍ କାତା

✧ ୯:୨୩ ୯:୨୩ ମାତିଉ ୧୦:୩୮; ଲୁକ୍ ୧୪:୨୭ ✧ ୯:୨୪ ୯:୨୪ ମାତିଉ ୧୦:୩୯; ଲୁକ୍ ୧୭:୩୩; ଜଅନ୍ ୧୨:୨୫

ଅଇଲା । ୩୨ ସେତୁକିବେଳେ ପିତରୁ ଆରି ତାର ସଙ୍ଗର ଲକ୍ମନ ଚାଟିଅଇତେ ସଇଦେଇରଇଲା, ମାତରୁ ସେମନ୍ ତେତାଅଇ ଜାଗରତୁ ଅଇବାକେ, ଜିସୁର ମଇମା ଆରି ତାରସଙ୍ଗ ଦୁଇଲକ୍ ଚିଆଅଇରଇବାଟା ଦେକ୍ଲା । ୩୩ ମସା ଆରି ଏଲିୟ ବାରଇ ଜିବା ବେଳେ ପିତରୁ ଜିସୁକେ କଇବାରୁ ଦାରଲା, “ଏ ଗୁରୁ, ଆମେ ତା ଏ ଜାଗାଇ ଆରୁ, ଏଟା ନିକ ଜାଗା, ଇତି ତିନଟା କୁଡିଆ ତିଆର କରୁ । ତମରପାଇ ଗଟେକ୍, ମସାରପାଇ ଗଟେକ୍ ଆରି ଏଲିୟରପାଇ ଗଟେକ୍ ।” ମାତରୁ ସେ କାଇଟା କଇଲାନି, ସେଟା ସେ ଜାନିନାପାରଲା ।

୩୪ ସେ ଏନ୍ତି କଇବାବେଳେ ବାଦଲ୍ ଆସି ସେମନ୍‌କେ ଡାବିଅଇଦେଲା । ବାଦଲ୍ ଡାବିଦେଲାକେ ସେମନ୍ ଭରିଗାଲା । ୩୫ ☆☆ଆରି, ବାଦ୍‌ଲେଅନି ଏନ୍ତି ବାକିଅ ଆଇଲା, “ଏଟାସେ ମର ପିଲା, ଆକେ ମୁଇ ବାଟିଆଟି, ସେ କଇବାଟା ସୁନା ।”

୩୬ ସେ ସବଦ୍ ଅଇଲାପତେ ଜିସୁ ଗଟେକ୍‌ଲକ୍‌ସେ ତିସ୍‌ଲା । ଆରି, ସେମନ୍ ଚିମ୍ରା ଅଇରଇଲା, ତେଇ ଜାଇଜାଇଟା ଦେକିରଇଲା, ସେବେଳେ ସେ କାତା କାକେ ନ କଇ, ମନେ ଦାରିରଇଲା ।

**ଜିସୁ ତୁମା ତସ୍‌ଲା ପିଲାକେ ନିକ କଲା
(ମାତିଉ ୧୭:୧୪-୨୭; ମାର୍କ ୯:୧୪-୧୭)**

୩୭ ଆରକରୁ ଦିନେ ଜିସୁ ଆରି ତିନଟା ସିସମନ୍ ତଙ୍ଗରେଅନି ଉଡ଼ରି ଆଇଲା । ଆରି ସେ ଜାଗାଇ ବେସି ଲକ୍ମନ ଡାକରସଙ୍ଗ ବେଟ୍ ଅଇଲା । ୩୮ ଆରି ଦେକା ଲକ୍ମନରୁ ବିଡ଼ରେଅନି ଗଟେକ୍ ଲକ୍ ଆଉଲିଅଇ କଇଲା, “ଏ ଗୁରୁ ମୁଇ ତମ୍‌କେ ବାବୁଜିଆ କଲିନି, ମର ପିଲାକେ ଅଲପ୍ ଦେକି ଦୟାକରା, କାଇକେବଇଲେ ସେ ମର ଗଟେକ୍ ବଲି ପଅ । ୩୯ ଦେକା, ତାକେ ଗଟେକ୍ ତୁମା ଦାରସି, ଆରି ସେ ଅଟାଡ଼ କିରକିରି ଉଟସି, ତାକେ ସେ ଏନ୍ତି ମଡିପାକାଇସିଜେ, ତାର ମୁଏଅନି ପେପୁଲ୍ ବାରଇଜାଇସି, ଆରି ସେ ତାକେ କଣ୍ଡିଆବଣ୍ଡିଆ କରି ତାରଟାନେଅନି କସ୍‌ଟେ ବାରଇଜାଇସି ।

☆ ୯:୩୫ ୯:୩୫ ମାତିଉ ୩:୧୭,୧୭:୧୮; ମାର୍କ ୧:୧୧; ଲୁକ୍ ୩:୨୨ ☆ ୯:୩୫ ୯:୩୫ ୨ ଯ ପିତରୁ ୧:୧୭,୧୮

୪୦ ତାକେ ତୁମା ଚାଡ଼ାଇବାକେ ବଲି ମୁଇ ତମର୍ ସିସ୍‌ମନ୍‌ର୍ ଲଗେ ଆନି ଗୁଆରି କରିରଇଲି, ମାତର୍ ସେମନ୍ ନାପାରୁଲାଇ ।”

୪୧ ଜିସୁ କଇଲା, “ଏରେ କରାପବାଟେ ଜାଇ ବିସ୍‌ବାସ୍ ନ କଲା ଲକ୍‌ମନ୍, କେତେ କାଲ୍ ଆରି ମୁଇ ତମର୍‌ସଙ୍ଗ୍ ମୁରୁଟି ରଇବି, ପିଲାକେ ଇତି ଦାରିଆସା ।”

୪୨ ପିଲା ଆଇବାବେଲେ କାର୍ ଆଡ଼ମା ତାକେ ବୁର୍‌ଆପ୍‌ଟିଦେଇ ମଡ଼ିପାକାଇଲା, ସେ ଆଡ଼ମାକେ ଜିସୁ ଦମ୍‌କାଇଲା ଆରି ପିଲାକେ ନିକକରି ତାର୍ ବାବାକେ ସର୍‌ପିଦେଲା । ୪୩ ତେଇ କେବେ ଦେକି ନ ରଇବା ପର୍‌ମେସର୍‌ର୍ ବପୁ ଦେକି ସବୁଲକ୍ କାବା ଅଇଗାଲାଇ ।

ଜିସୁ ତାର୍ ମରନର୍ ବିସ୍‌ଏ ଜାନାଇଲା

(ମାତିଉ ୧୭:୨୨-୨୩; ମାର୍କ ୯:୩୦-୩୨)

୪୪ ତାର୍ କରିରଇବା ସବୁ କାମର୍‌ଲାଗି ସବୁଲକ୍ ଚକିଡ଼ ଅଇବାବେଲେ ସେ ସିସ୍‌ମନ୍‌କେ କଇଲା, “ଏବେ ମୁଇ କାତା ନିମାନ୍‌କରି କଇଦେଲିନି, ସୁନା । କାଇକେବଇଲେ ପର୍‌ମେସର୍‌ ପାଟାଇରଇବା ନର୍‌ପିଲା ମୁଇ ବିସ୍‌ବାସେ ବିସ୍‌ଦେଲାପାରା ଲକ୍‌ମନ୍‌କେ ସର୍‌ପି ଅଇବାର୍ ଗାଲିନି ।” ୪୫ ମାତର୍ ସିସ୍‌ମନ୍ ସେ କାତା ବୁଜିନାପାରୁଲାଇ, ଆରି ସେଟା ତାକର୍‌ଟାନେଅନି ଲୁଟିରଇଲା । ତେବର୍‌ପାଇ ସେମନ୍ ଏଟା ବୁଜିନାପାରୁଲେ ମିସା ଜିସୁକେ ପାଟାର୍‌ବାକେ ଭର୍‌ତେରଇଲାଇ ।

ସରଗ୍ ରାଇଜେ କେ ବଡ଼

(ମାତିଉ ୧୮:୧-୫; ମାର୍କ ୯:୩୩-୩୭)

୪୬ ☆ତରେକ୍ ସିସ୍‌ମନ୍‌ର୍ ବିଡ଼ରେ କେ ମୁକିଆ, ସେ ବିସଇ ନେଇ ଦଦାପେଲା ଅଇଲାଇ । ୪୭ ମାତର୍ ଜିସୁ ତାକର୍ ମନ୍‌ବିଡ଼ରର୍ କାତା ଜାନିକରି, ଗଟେକ୍ ସାନ୍ ପିଲାକେ ଦାରୁଲା ଆରି ତାକର୍ ମୁଆଟେ ଟିଆକରି ସେମନ୍‌କେ କଇଲା, ୪୮ ☆“କେ ମିସା ମର୍ ନାଉଁଦାରି ଏ ପିଲାକେ ନାମ୍‌ସି, ସେ ମକେ ନାମ୍‌ସି । ଜେ ମକେ ନାମ୍‌ସି, ସେ ମର୍ ପାଟାଇରଇବା ବାବାକେ ନାମ୍‌ସି । ସେଟାର୍‌ପାଇ ତମର୍ ବିଡ଼ରେ ଜେ ସବୁର୍ ଟାନେଅନି ସାନ୍, ସେ ପର୍‌ମେସର୍ ତେଇ ମୁକିଅ ।”

☆ ୯:୪୬ ୯:୪୭ ଲୁକ ୨୨:୨୪ ☆ ୯:୪୮ ୯:୪୮ ମାତିଉ ୧୦:୪୦; ଲୁକ ୧୦:୧୭; ଜଅନ୍ ୧୩:୨୦

ଜନ୍ ଲକ୍ ତମର ବିରଦ୍ ନର୍ସ, ସେ ତମର ବାଟେ
(ମାର୍କ ୯:୩୮-୪୦)

୪୯ ତେଇ ଜଅନ୍ କଇଲା, “ଏ ଗୁରୁ, ଆମେ ଗଟେକ୍ ଲକ୍, ତମର ନାଉଁ ଦାରି ତୁମା ଚାଡାଇବାଟା ଦେକ୍ଲୁ ଆରି ତାକେ ନ କର୍ ବଲି ତେବାଇଲୁ କାଇକେବଇଲେ ସେ ଆମର ଦଲର ଲକ୍ ନର୍ସ ।”
୫୦ ମାତର ଜିସୁ ସେମନ୍‌କେ କଇଲା, “ତେବାଆ ନାଇ, ଜନ୍‌ଲକ୍ ତମର ବିରଦେ ନାଇ, ସେମନ୍ ତମର ବାଟେ ।”

ଗଟେକ୍ ସମିରଣିୟ ଗାଉଁ ଜିସୁକେ ନାମତ୍ ନାଇ

୫୧ ପଟେ ଜେତେବେଲେ ଜିସୁର ସରଗେ ଜିବାର ବେଲା କେଟିଆଇତେରଇଲା, ସେତେବେଲେ ସେ ଜିରୁସାଲାମ୍ ଜିବାକେ ମନ୍‌କଲା ।
୫୨ ସେ ଜିବା ଆଗତୁ କେତେଟା ଲକ୍‌ମନ୍‌କେ ପାଟାଇଲା । ସେମନ୍ ଜାଇକରି ଜିସୁରପାଇ ସବୁ କର୍ବାକେ ସମିରଣିୟମନ୍‌ର ଗଟେକ୍ ଗାଏଁ କେଟୁଲାଇ ।
୫୩ ମାତର ଜିସୁ ଜିରୁସାଲାମ୍ ଜିବାକେ ମନ୍‌କଲାଆଟେ ବଲି ଜାନିକରି, ତାକେ ଡାକି ବସାଅଡୁନାଇ ।
୫୪ ଏଟାଦେକି ଜାକୁର୍ ଆରି ଜଅନ୍ କଇଲାଇ, “ମାପୁରୁ ଏଲିୟ ମିସା ଜେକ୍ତି କରିରଇଲା, *ସେନ୍ତାରସେ ଆମେ ବାଦ୍‌ଲେଅନି ଜଇ ଅଦରାଇ ସେମନ୍‌କେ ନାସ୍‌କର୍ବାକେ ତମେ ମନ୍ କଲାସ୍‌ନି କି ?”

୫୫ ମାତର ଜିସୁ ବୁଲିକରି ସେମନ୍‌କେ ଦମ୍‌କାଇକରି କଇଲା, “ତମେମନ୍ କେନ୍ତାରି ଆଡ଼ମାର୍ ଲକ୍, ଏଟା ନାଜାନାସ୍ । ମାପୁରୁ ପାଟାଇରଇବା ନର୍‌ପିଲା ମୁଇ ମୁନୁସ୍‌ମନ୍‌ର ଜିବନ୍ ନାସ୍ କର୍ବାକେ ନ ଆସି, ରକିଆ କର୍ବାକେ ଆସିଆଟେ ।”
୫୬ ତାରପଟେ ସେମନ୍ ଆରିଗଟେକ୍ ଗାଏଁ ଉଟିଗାଲାଇ ।

ଜିସୁର ସିସ୍ ଅଇବାକେ ମନ୍ କର୍ବା ଲକ୍‌ମନ୍
(ମାତିଉ ୮:୧୯-୨୨)

୫୭ ସେମନ୍ ଜିବାବେଲେ ବାଟେ ଗଟେକ୍ ଲକ୍ ଜିସୁକେ କଇଲା, “ତମେ ଜନ୍ ଜାଗାଇ ଜାଇସା, ମୁଇ ତମର୍‌ସଙ୍ଗ୍ ଆଇବି ।”

* ୯:୫୪ ୯:୫୪ କେତେଟା ପାଣ୍ଡୁ ଲିପିଟାନେ ଏନ୍‌ତାରି ଲେକା ଅଏ ନାଇ

୫୮ ଜିସୁ ତାକେ କଇଲା, “କକପାନ୍ଦିର ପାଆର ଆଚେ, ଚତଇମନ୍‌କେ ଗୁଡା ଆଚେ, ମାତର୍ ମାପରୁ ପାଟାଇରଇବା ନରପିଲା ମକେ ବସବାକେ ନିଜର୍ ଗର୍ ନାଇ ।”

୫୯ ତାରପଚେ ଜିସୁ ଆରିଗଟେକ୍ ଲକ୍‌କେ କଇଲା, “ମରସଙ୍ଗ୍ ଆଉ ।” ମାତର୍ ସେ କଇଲା, “ପର୍ତ୍ତୁମ୍ ଜାଇ ମର୍ ବାବାକେ ଦନ୍ କରୁଆଇବାଜାକ ମକେ ଆଦେସ୍ ଦିଆ ।” ୬୦ ମାତର୍ ଜିସୁ ତାକେ କଇଲା, “ମଲାଲକ୍‌ମନ୍ ମଲାଲକ୍‌ମନ୍‌କେ ଦନ୍ କରବାକେ ଚାଡ଼ିଦିଆସ୍, ମାତର୍ ତମେ ଜାଇ ପର୍ମେସରର୍ ରାଇଜ୍ ଜାନାଆ ।” ୬୧ ଆରିଗଟେକ୍ ଲକ୍ କଇଲା, “ମାପରୁ ମୁଇ ତମରସଙ୍ଗ୍ ଆଇବି, ମାତର୍ ଗରର୍ ଲକ୍‌ମନ୍‌କେ ଗାଲିନି ବଲି କଇକରି ଆଇବାକେ ଆଦେସ୍ ଦିଆ ।”

୬୨ ମାତର୍ ଜିସୁ ତାକେ କଇଲା, “ଜେ କସବାବେଲେ ନଙ୍‌ଲ୍‌ଦାରି ପଚେ ଦେକିଲାଗିରଇସି, ସେ ପର୍ମେସରର୍ ରାଇଜ୍ ସେବା କରବାକେ ଅଦିକାର ନ ପାଏ ।”

୧୦

ଜିସୁ ସତୁରି ଦୁଇଟା ସିସମନ୍‌କେ ପାଟାଇଲା

୧ ତାରପଚେ ମାପରୁ ଆରି ସତୁରିଦୁଇ ଲକ୍‌କେ ମିସାଇଲା ଆରି ସେ ଜନ୍ ଜନ୍ ଜାଗାଇ ଆରି ଜନ୍ ଜନ୍ ନଅରେ ଜିବାକେ ମନ୍ କରୁରଇଲା, ସେ ଜାଗାମନ୍‌କେ ଦୁଇ ଦୁଇ ଲକ୍‌କରି, ସେ ଜିବା ଆଗ୍‌ତୁ ପାଟାଇଲା । ୨ *ଆରି ଜିସୁ ସେମନ୍‌କେ କଇଲା, ଜମିତେଇ ପସଲ୍ ସିନା ଅଦିକ୍, ମାତର୍ କାମ୍‌କରୁମନ୍ ଉନା । ତେବର୍‌ପାଇ ତାର୍ ଚାସ୍‌କେତେ, ଅଦିକ୍ ଲକ୍‌ମନ୍‌କେ ପାଟାଇ ଦେବାକେ ଜମି ସାଉକାର୍‌ଗାନେ ଜାନାଆ । ୩ *ତମେ ଜାଆ । ଦେକା, ବାଲିଆତୁରକାମନ୍‌ ବିତ୍‌ରେ ମେଣ୍ଟାମନ୍‌କେ ପାଟାଇଲା ପାରା ମୁଇ ତମ୍‌କେ ପାଟାଇଲିନି । ୪ ତାଲା, ମୁନା କି ପାଣ୍ଡୁକ ମିସା ନିଆନାଇ, ଆରି ବାଟେ କାକେ ଜୁଆର୍ କରାନାଇ । ୫ ଜାର୍ ଗରେ ତମେ କେଟ୍‌ଲେ, ପର୍ତ୍ତୁମ୍ କରା, ଏ ଗରେ ସାନ୍ତି ମିଲ । ୬ ଜଦି ସେ ଜାଗାଇ ଗଟେକ୍ ସାନ୍ତିର୍ ଲକ୍ ରଇସି, ସେନ୍ତାଆଲେ ତମର୍

☆ ୧୦:୨ ୧୦:୨ ମାତିଉ ୯:୩୭,୩୮ ☆ ୧୦:୩ ୧୦:୩ ମାତିଉ ୧୦:୧୭

ଆସିବାରୁ ତାକେ ମିଲୁସି ।^୭ ✱ ତାକରଲଗେ ଜନ୍ତା ରଇସି, ସେଟା କାଇକରି, ସେ ଗରେ ରୁଆ । କାଇକେବଇଲେ, ପାଇଟିକରୁ ନିଜରୁ ବୁଡି ପାଇବାଇଆକା । ଗର୍ ଗର୍କେ ଜାଆନାଇ ।^୮ ଜନ୍ ନଅରେ ତମେ କେଟଲେ, ଆରି ଲକ୍ମନ୍ ତମ୍ବେ ଡାକିନେଲେ, ତେଇ ତମ୍ବେ ଜନ୍ତା କାଇବାକେ ଦେଲେ ସେଟା କାଆ ।^୯ ସେ ଜାଗାଇ ଜର୍ ଦୁକା ଅଇରଇଲା ଲକ୍ମନ୍କେ ନିକ କରା, ଆରି ସେମନ୍କେ କୁଆ ପର୍ମେସରର ରାଇଜ୍ ତମରଲଗେ ସେ ।^{୧୦} ✱ମାତର୍ ଜନ୍ ନଅରେ ତମେ କେଟସା, ତେଇର୍ ଲକ୍ ତମ୍ବେ ନ ଡାକିନେଲେ, ସେ ଡାଣ୍ଡେଅନି, ସେ ସାଇ ଅନି ବାରଇ କୁଆ,^{୧୧} ✱ତମର୍ ନଅରର୍ ଜନ୍ ଦୁଲି ଆମର୍ ପାଦେ ଲାଗିଆରେ, ସେଟାମିସା ତମର୍ପାଇ ପାପ୍ଡିଦେଲୁନି, ଅଇଲେମିସା ପର୍ମେସରର ରାଇଜ୍ ଲଗେସେ, ଏଟା ତମେ ଜାନିରୁଆ ।^{୧୨} ✱ମୁଇ ତମକେ ସଡ଼ କଇଲିନି, ବିଚାର ଅଇବାଦିନେ ସେ ନଅରର୍ ଦସା, ଡଣ୍ଡୁରଲାଗି ସଦମର୍ ଦସାତେଇଅନି ଅଦିକ୍ ରଇସି ।

**ବିସ୍ବାସ୍ ନ କର୍ବା ନଅର୍ ମନ୍କେ ଜିସୁର୍ ଚେଡନା
(ମାତିଉ ୧୧:୨୦-୨୪)**

^{୧୩} ଅଇରେ ଡଣ୍ଡୁପାଇବାକେ ଜାଗିରଇବା କରାଜିନ୍ ! ଅଇରେ ଡଣ୍ଡୁପାଇବାକେ ଜାଗିରଇବା ବେଡ଼ସାଇଦା ! ତମର୍ଗାନେ ବପୁର୍ସଙ୍ଗ୍ ଜନ୍ ଜନ୍ ନ ଅଇବା କାମ୍ମନ୍ ଅଇଲାଆରେ, ସେ ସରୁ ସର ଆରି ସିଦନେ ଅଇରଇତା ବଇଲେ, ସେମନ୍ କେତେକାଲ୍ ପୁର୍ବେ ବାସ୍ତା ପିନ୍, ଚାରେ ବସି, ମାପୁରୁଗାନେ ମନ୍ ବାଉଡାଇତାଇ ।^{୧୪} ଅଇଲେମିସା ବିଚାରଦିନେ ତମର୍ ଦସା ସର ଆରି ସିଦନର୍ ଦସାଟାନେଅନି ଅଦିକ୍ ଅଇସି ।^{୧୫} ଆରି ଏ କପର୍ନାଉମ୍, ସରଗ୍ ଜେଡ଼କି ଡର୍, ତୁଇ କାଇ ସେଡ଼କିଜାକ ଡର୍ ଅଇସୁ କି ? ପାତାଲ୍ ଜେଡ଼କି ତଲେ ଆରେ, ସେଡ଼କି ତଲେ ତକେ ଆନାଅଇସି ।

✱ ୧୦:୭ ୧୦:୭ ୧ମ କରନ୍ତିୟ ୯:୧୪; ୧ମ ତିମତି ୫:୧୮ ✱ ୧୦:୧୦ ୧୦:୧୦
 ପେରିଡ଼ ୧୩:୫୧ ✱ ୧୦:୧୧ ୧୦:୧୧ ମାତିଉ ୧୦:୭-୧୪; ମାର୍କ ୬:୮-୧୧; ଲୁକ୍ ୯:୩-୫
 ✱ ୧୦:୧୨ ୧୦:୧୨ ମାତିଉ ୧୧:୨୪; ମାତିଉ ୧୦:୧୫

୧୭ ✨ଜେଡେବେଲେ ଜନ୍ ଲକ୍ମନ ତମର କାତା ସୁନ୍‌ବାଇ, ସେମନ୍ ମର କାତା ସୁନ୍‌ବାଇ । ଜନ୍ ଲକ୍ମନ ତମକେ ନ ମାନଡ଼, ସେମନ୍ ମକେ ନ ମାନଡ଼, ଆରି ଜନ୍ ଲକ୍ମନ ମକେ ନ ମାନଡ଼, ସେମନ୍ ମକେ ପାଟାଇରଇବା ପରମେସରକେ ମିସା ନ ମାନଡ଼ ।

୧୭ ତାରପଟେ ସେ ସତୁରି ଲକ୍ ବାଉଡ଼ି ଆଇଲାଇ ଆରି ସାରଦାଅଇକରି କଇଲାଇ, “ମାପୁରୁ, ତମର ନାଉଁ ଦାରି ଆଦେସ୍ ଦେଲେ ତୁମାମନମିସା ଆମର କାତା ମାନଲାଇନି ।” ୧୮ ମାତର ଜିସୁ ସେମନ୍‌କେ କଇଲା, “ସଇତାନ୍ ବାଦ୍‌ଲେଅନି ବିଜ୍‌ଲି ପାରା ଅଇ ଅଦରବାଟା ମୁଇ ଦେକଲି । ୧୯ ଦେକା, ମୁଇ ତମକେ ସାଁପ୍ ଆରି ବିସ୍‌କାକ୍‌ତା ଉପ୍‌ରେ ଇଶ୍‌ବାକେ ବପୁ ଦେଲିଆଟି, ଆରି ସତୁରୁର ଉପ୍‌ରେ ରଇବା ବପୁ ମିସା ଦେଲିଆଟି । ତମକେ କେ ମିସା କାଇଟା କରିନାପାରଡ଼ । ୨୦ ଏଲେମିସା ଆତ୍‌ମାମନ୍ ଆମର କାତା ମାନଲାଇନି ବଲି ସାରଦା ଉଆନାଇ । ତମର ନାଉଁମନ୍ ସରଗେ ଲେକାଅଇଆଟେ ବଲି ସାରଦାଉଆ ।”

ଜିସୁ ପରମେସରକେ ପାର୍ତନା କଲା

୨୧ ଜିସୁ ସେ ତାଣ୍ଟେ ସୁକଲ୍‌ଆତ୍‌ମାଇ ପୁରୁନ୍‌ଅଇ କଇଲା, “ଏ ବାବା ! ସରଗ୍ ଆରି ମତ୍‌ପୁରର ମାପୁରୁ ! ତୁଇ ଗିଆନି ଆରି ବୁଦ୍‌ରଇବା ଲକ୍‌ମନରଟାନେଅନି ଏ କାତା ଲୁଟାଇରଇଲେ ମିସା, ସାନ୍ ପିଲାମନର୍ ପାରା ଲକ୍‌ରଟାନେ ଜାନାଇଲାସ୍ । ଏଟାରପାଇ ତମକେ ସୁମରନା କଲିନି । ଉଁ ବାବା, କାଇକେବଇଲେ ତମେ ଏନ୍ତାଟା ଦେକ୍‌ବାକେ ମନକରଡେ ରଇଲାସ୍ । ୨୨ ✨ମର୍ ବାବାର ସବୁ ବିସଇ ମକେ ସର୍ପି ଅଇଲାଆଟେ, ଆରି ପଅ କେ, ଏଟା ବାବାକେ ଚାଡ଼ି ଆରି କେ ନାଜାନଡ଼, ଆରି ବାବା କେ, ଏଟା ପଅକେ ଚାଡ଼ି କେ ନାଜାନଡ଼ । ପଅ ଜାରଲଗେ ମର୍ ବାବାକେ ଜାନାଇବି ବଲି ମନକରିରଇସି, ସେସେ ଜାନିରଇସି ।” ୨୩ ଜିସୁ ସିସ୍‌ମନର୍‌ବାଟେ ମୁ ବୁଲାଇ ସେମନ୍‌କେ କଇଲା, “ତମେ ଜନ୍ ଜନ୍‌ଟା ଦେକ୍‌ଲାସନି, ସେ ସବୁ ଜେ ଦେକ୍‌ସି, ସେଟା ନିକ । ୨୪ କାଇକେବଇଲେ ମୁଇ ତମକେ କଇଲିନି, ତମେ ଜନ୍ ଜନ୍‌ଟା ଦେକ୍‌ଲାସନି, ସେ ସବୁଜାକ

✨ ୧୦:୧୭ ୧୦:୧୭ ମାଡିଉ ୧୦:୪୦; ମାରକ ୯:୩୭; ଲୁକ୍ ୯:୪୮; ଜଅନ୍ ୧୩:୨୦

✨ ୧୦:୨୨ ୧୦:୨୨ ଜଅନ୍ ୩:୩୫; ଜଅନ୍ ୧୦:୧୫

ଦେକ୍‌ବାକେ କେତେ କେତେ ରାଜାମନ୍ ଆରି ମାପ୍‌ରୁ କବର୍ ଜାନାଉମନ୍ ମନ୍‌କଲାଇ, ମାତର୍ ଦେକିନାପାରଲାଇ । ଆରି ତମେ ଜନ୍ ଜନ୍‌ଟା ସୁନ୍‌ଲାସ୍‌ନି, ସେ ସବୁ ସୁନ୍‌ବାକେ ସେମନ୍ ମନ୍‌କଲାଇ, ମାତର୍ ସୁନ୍‌ନାପାରଲାଇ ।”

ସମିରଣିୟ ଗତର୍ ନିକ ଲକ୍

୨୫ ✧ ତାର୍‌ପତେ ଗଟେକ୍ ଦରମ୍ ସାସ୍‌ତର୍ ସିକାଉ ତାକେ ପରିକାକରି ପାଟାରଲା, “ଏ ଗୁରୁ କେବେ ନ ସାର୍‌ବା ଜିବନ୍ ମିଲାଇବାକେ ଆଲେ ମୁଇ କାଇଟା କର୍‌ବାର୍ ଆତେ ?”

୨୬ ଜିସୁ ତାକେ କଇଲା, “ନିୟ୍‌ମ୍ ସାସ୍‌ତରେ କାଇଟା ଲେକାଆତେ ? ତୁଇ କେନ୍ତାରି ପଡ଼୍‌ଲୁସ୍‌ନି ?”

୨୭ ସେ କଇଲା, “ତମେ ନିଜର୍ ସବୁ ଗାଗଡ଼୍, ମନ୍, ଆଡ଼୍‌ମା ଆରି ବପୁ ଦେଇ ପର୍‌ମେସର୍‌କେ ଆଲାଦ୍ କରା । ଆରି ପଡ଼ିସାର୍ ଲକ୍‌ମନ୍‌କେ ନିଜର୍ ସମାନ୍ ଆଲାଦ୍ କରା ।”

୨୮ ତାର୍‌ପତେ ଜିସୁ ତାକେ କଇଲା, “ତମେ ଟିକ୍ କଇଲାସ୍ । ଏନ୍ତା କର୍, ତେବେ ଜିବନ୍ ମିଲାଇସୁ ।”

୨୯ ମାତର୍ ସେ ନିଜେ ଦରମ୍‌ଲକ୍ ବଲି ଦେକାଇବାକେ ମନ୍‌କରି ଜିସୁକେ ପାଟାରଲା, “ତେବେ କେ ମର୍ ପଡ଼ିସାର୍ ଲକ୍ ?”

୩୦ ଜିସୁ ତାକେ କଇଲା, ଗଟେକ୍ ଲକ୍ ଜିରୁସାଲମେଅନି ଜିରିଅ ଜିବାବେଲେ ଚର୍‌ମନର୍ ମୁଆଟେ ପଡ଼ିଲା । ଚର୍‌ମନ୍ ତାର୍ ଲୁଗାପଟିଆ ଚାଡାଇ, ତାକେ ମାର୍‌ଲାଇ ଆରି ମରିଗାଲାପାରା ଅଇଲାକେ ଚାଡ଼ି ଉଟିଗାଲାଇ । ୩୧ ସେଟା ଅଇସାରି କେତେପର୍ ଜିବାକେ ଗଟେକ୍ ପୁଜାରି ସେ ବାଟେ ଜାଇତେରଇଲା ଆରି ତାକେ ଦେକି, ବାଟ୍ ପିଟାଇଅଇ ଉଟିଗାଲା । ୩୨ ସେନ୍ତାରିସେ ଗଟେକ୍ ଲେବିୟ୍ ଲକ୍ ମିସା ସେ ଜାଗାଇ ଆସି ତାକେ ଦେକି ବାଟ୍ ପିଟାଇଅଇ ଉଟିଗାଲା । ୩୩ ମାତର୍ ସମିରଣିୟର୍ ଗଟେକ୍ ଲକ୍ ତାର୍‌ଲଗେ ଆସି, ଦେକିଲା ଆରି ବେସି ମନ୍‌ଦୁକ୍ କଲା । ୩୪ ଆରି ତାର୍‌ଲଗେ ଜାଇ ମାଡ଼୍‌ଅଇ କଣ୍ଡିଆ ବଣ୍ଡିଆ ଅଇଲାଟାନେ, ଟିକନ୍ ଆରି ଆମର୍ ଅଞ୍ଜୁରସ୍ ଲାଗାଇଦେଲା । ତାକେ ଗର୍‌ଣ୍ଡା ବାନ୍ଦି, ଗଦଉପରେ

✧ ୧୦:୨୫ ୧୦:୨୫ ମାତିଉ ୨୨:୩୫-୪୦; ମାର୍କ ୧୨:୨୮-୩୪

ବସାଇ, ଲକ୍ଷ୍ମୀନ୍ ବସି ମିଟିଙ୍ଗ୍ କରବା ଗରେ ନେଇ ସେବାଜତନ୍ କଲା । ୩୫ ତାର୍ ଆରକର୍ ଦିନେ ସିମରଣିୟ ଲକ୍ ଦୁଇଟା ରୁପାଟାଙ୍ଗା ବାରକରାଇ, ମିଟିଙ୍ଗ୍ ଗରର୍ ମୁକିଆକେ ଦେଇ କଇଲା, “ଆର୍ ସେବା ଜତନ୍ କରା, ଆରି ଅଦିକ୍ କରଟ ଅଇଲେ, ସେଟା ମୁଇ ବାଉଡିଆଇବା ବେଲେ ତମକେ ସୁଜିଦେବି ।”

୩୬ ଏ ତିନୁଲକର୍ ବିତ୍ତରେଅନି କେ ଚର୍ମନର୍ ଟାନେ ମାଡ଼କାଉ ଲକର୍ ପଡ଼ିସାର ଲକ୍ ବଲି ବାବ୍ଲୁସ୍ନି ?

୩୭ ସାସ୍ତର ସିକାଉ କଇଲା, “ଜନ୍ ଲକ୍ ତାକେ ଦୟାକଲା, ସେ ଆକା ।” ଜିସୁ ତାକେ କଇଲା, “ଜା ତୁଇ ମିସା ସେନ୍ତାରି କର୍ ।”

ଜିସୁ ମାର୍ତ୍ତା ଆରି ମରିୟମର୍ ଗରେ ଗାଲା

୩୮ ✧ଜିସୁ ଆରି ତାର୍ ସିସ୍ମନ୍ ଜିବାବେଲେ ଗଟେକ୍ ଗାଏଁ କେଟ୍ଲାଇ । ତେଇ ମାର୍ତ୍ତା ନାଉଁର୍ ଗଟେକ୍ ମାଇଜି ଜିସୁକେ ତାର୍ ଗରେ ତାକି ବସାଇଲା । ୩୯ ମାର୍ତ୍ତାକେ ମରିୟମ୍ ନାଉଁର୍ ଗଟେକ୍ ବଇନି ରଇଲା । ସେ ମାପୁରୁର୍ ପାଦେ ବସି ତାର୍ ବାକିଅ ସୁନ୍ତେରଇଲା । ୪୦ ମାତର୍ ମାର୍ତ୍ତାକେ ବେସି ପାଇଟି ରଇଲାଜେ ଦାନ୍ଦା ଅଇଜାଇତେ ରଇଲା । ତେବର୍ପାଇ ସେ ଜିସୁରଲଗେ ଆସି କଇଲା, “ଏ ମାପୁର, ମର୍ ବଇନି ଗରର୍ ସବୁ ପାଇଟି ମକେ ସେ କରାଇଲାନି, ସେବାଟେ କାଇ ତମର୍ ମନ୍ ନାଇ କି ? ସେଟାପାଇ ତାକେ କୁଆ, ସେ ମକେ ଆସି ସାଇଜ କର ।”

୪୧ ମାତର୍ ମାପୁର ତାକେ କଇଲା, “ଏ ମାର୍ତ୍ତା, ତୁଇ ବେସି ବିସଇ ଚିନ୍ତା କରି, ଦାନ୍ଦାଅଇଗାଲୁସ୍ନି, ୪୨ ମାତର୍, ଗଟେକ୍ ବିସଇ ଆକା ସବୁର୍ଟାନେଅନି ମୁକିଅ । ସେଟା ମରିୟମ୍ ବାଟିକରି ନେଇଆଟେ । ସେଟା ତାର୍ଟାନେଅନି କେ ନେଇ ନାପାରତ୍ ।”

୧୧

ପାର୍ତନା ବିସଇ ନେଇ ସିକିଆ

(ମାତିଉ ୨:୯-୧୩, ୨:୭-୧୧)

୧ ତରେକ୍ ଜିସୁ ଗଟେକ୍ ଜାଗାଇ ପାର୍ତନା କର୍ତେରଇଲା । ସେ ପାର୍ତନା କରି ସାରାଇଲା ପତେ, ତାକର୍ ସିସ୍ମନର୍ ବିତ୍ତରେଅନି

ଗଟେକ୍ ଲକ୍ ତାକେ କଇଲା, “ଏ ମାପ୍‌ରୁ ତୁବନ୍ ଦେଉ ଜଅନ ଜେନ୍ତାରି ନିଜର୍ ସିସ୍‌ମନ୍‌କେ ପାର୍‌ତନା କର୍‌ବାକେ ସିକାଇଲା, ତମେମିସା ଆମ୍‌କେ ପାର୍‌ତନା କର୍‌ବାକେ ସିକାଆ ।”

^୨ ଜିସୁ ସେମନ୍‌କେ କଇଲା, ଜେତେବେଲେ ତମେ ପାର୍‌ତନା କର୍‌ସା, ସେତକିବେଲେ କୁଆ,

“ବାବା ତମର୍ ନାଉଁ ସୁକଲ୍‌ବଲି ସବୁଲକ୍ ମାନଡ଼ ।
ତମର୍ ରାଇଜ୍ ଆସ ।

^୩ ସବୁଦିନ୍ ଆମ୍‌କେ ଆମର୍ ଦର୍‌କାର୍ ରଇଲା କାଦି କାଇବାକେ ଦିଆ ।

^୪ ଆମର୍ ସବୁ ପାପ୍ କେମା କରିଦିଆସ୍,
କାଇକେବଇଲେ ଆମେ ମିସା ଆମର୍ ବିରୁଦେ ବୁଲ୍ କଲା
ଲକ୍‌ମନ୍‌କେ କେମା କଲୁନି ।

ଆମ୍‌କେ ପାପ୍ ଦସ୍ କରାଇବା ସବୁର୍‌ତେଇଅନି ରକିଆ କରା
।”

^୫ ପଟେ ଜିସୁ ତାର୍ ସିସ୍‌ମନ୍‌କେ କଇଲା, “ତମର୍ ଏନ୍ତାରି କାର୍ ମଇତର୍ ଆଟେ କି, ଜାର୍‌ଲଗେ କି ତମେ ମଜାରାତି ଜାଇ କଇପାରାସ୍, ଏ ମଇତର୍, ମକେ ତିନ୍‌ଟା ରୁଟି ଉଦାର୍ ଦେଇରୁଆ,
^୬ କାଇକେବଇଲେ, ମର୍ ଗଟେକ୍ ବେସି ଦୁରର୍ ସାଙ୍ଗ୍ ଆସିଆଟେ, ତାକେ କାଇବାକେ ଦେବାକେ ମର୍‌ଲଗେ କାଇଟାମିସା ନାଇ ।
^୭ ଆରି ବିତ୍‌ରେଅନି ସେ କଇସି, ମକେ କସ୍‌ଟ ଦିଆନାଇ, କାପାଟ୍ ଡାବ୍‌ଲୁବେ, ଆରି ମର୍‌ସଙ୍ଗ୍ ମର୍ ପିଲାମନ୍ ସଇଆଟଡ଼ । ତମ୍‌କେ ଉଟିକରି ଦେଇନାପାରି ।^୮ ମୁଇ ତମ୍‌କେ କଇଲିନି, ତମର୍ ମଇତର୍ ଅଇରଇଲେ ମିସା ସେ ଉଟିକରି ରୁଟି ନ ଦେଏ, ମାତର୍ ତମେ ଲାଜ୍ ନ ଅଇ ମାଙ୍ଗିଲାଗିରଇଲେ, ସେ ଉଟିକରି ତକେ ଜେତକି ଲଡା, ସେତକି ଦେଇସି ।”

^୯ ମୁଇ ତମ୍‌କେ କଇଲିନି, ମାଙ୍ଗା ତେବେ ତମ୍‌କେ ଦିଆଅଇସି । କଜା, ତେଇ ତମେ ମିଲାଇସା । କାପାଟେ ବାଜାଆ, ତେଇ ତମର୍‌ପାଇବଲି ଉଗାଡି ଦିଆଅଇସି ।^{୧୦} କାଇକେବଇଲେ, ଜେ ମାଙ୍ଗିସି, ସେ ପାଇସି । ଜେ କଜ୍‌ସି, ସେ ମିଲାଇସି । ଜେ କାପାଟେ ବାଜାଇସି, ତାର୍‌ପାଇ କାପାଟ୍ ଉଗାଡି ଦିଆଅଇସି ।^{୧୧} “ଆରି ତମର୍ ବିତ୍‌ରେ ଏନ୍ତାରି ବାବା କେ ଆଟେ, ଜେ କି ଜନ୍ ବାବାକେ ତାର୍ ପଅ

ମାତ୍ର ମାଙ୍ଗଲେ, ତାକେ ମାତ୍ର ନ ଦେଇ ସାଁଠୁ ଦେଇସି ? ୧୨ କି ଗାର୍ ମାଙ୍ଗଲେ, ସେ ତାକେ ବିସ୍ତକାକ୍ତା ଦେଇସି ? ୧୩ ତେବେ ତମେ କରାଠୁ ଲକ୍ ଅଇଲେ ମିସା, ନିଜର୍ ନିଜର୍ ପିଲାମନକେ ନିକ ନିକ ବିସଇ ଦେବାର ଜାନାସ । ତେବେ ଜନ୍ ବାବା ସରଗେଅନି ଦାନ କଲାନି, ସେ ଜାନେ, ସେ ତାକେ ମାଙ୍ଗବା ଲକ୍‌କେ କେତେକ୍ ଅଦିକ୍ ସୁକଲ୍ ଆଡ଼ମା ଦେଇସି !”

ଜିସୁ ଆରି ବାଆଲ୍‌ଜିବୁଲ୍

(ମାତିଉ ୧୨:୨୨-୩୦; ମାର୍କ ୩:୨୦-୨୭)

୧୪ ତରେକ୍ ଜିସୁ ଗଟେକ୍ ଲକ୍‌ରେତେଅନି ତୁମା ଚାଡ଼ାଇତେରଇଲା । ସେ ତୁମା ଗୁଲାଟା । ତୁମା ବାରଇଗାଲା ପଚେ ଗୁଲା ଲକ୍ କାତା କଇଲା । କାତାକଇଲାକେ ତେଇ ରଇବା ଲକ୍‌ମନ୍ କାବାଅଇଗାଲାଇ । ୧୫ *ମାତର୍ ସେମନ୍‌ର୍ ବିତ୍‌ରେ କେ କେ କଇଲାଇ, “ସେ ତୁମାମନ୍‌ର୍ ନେତା ବାଲ୍‌ଜିବୁଲ୍‌ର୍ ସାଇଜ ନେଇ ତୁମା ଚାଡ଼ାଇସି ।”

୧୬ *ବିନ୍‌ଲକ୍‌ମନ୍ ଜିସୁକେ ପରିକାକରି ପାନ୍ଦେ ପାକାଇବାକେ ବାବ୍‌ତେ ରଇଲା । ତେବର୍‌ପାଇ ପର୍‌ମେସର୍ ତାର୍ ରକିଆକାରି ବଲି ସବୁକେ ଜାନାଇବାକେ ଗଟେକ୍ କାବାଅଇଜିବା ତିନ୍ ଦେକାଇବାକେ କଇଲାଇ । ୧୭ ମାତର୍ ଜିସୁ ତାକର୍ ମନ୍‌ର୍ କାତା ଜାନି, ସେମନ୍‌କେ କଇଲା, “ଗଟେକ୍ ରାଇଜ୍ ଦୁଇ ବାଗ୍ ଅଇକରି, ନିଜର୍ ନିଜର୍ ବିରୁଦେ ଜୁଇଦ୍ କଲେ, ସେଟା କୁରୁପ୍‌ନାସ୍ ଅଇଜାଇସି । ଗଟେକ୍ ଗର୍‌ର୍ ଲକ୍ ନିଜର୍ ନିଜର୍ ବିରୁଦେ ଲାଗ୍‌ଲେ, ସେ ଗର୍ ମିସା ବାଞ୍ଜିଜାଇସି । ୧୮ ଆରି ସଇତାନ୍ ମିସା ବାଗ୍ ବାଗ୍ ଅଇ, ନିଜର୍ ବିରୁଦେ ଉଟ୍‌ଲାନି ବଇଲେ, ତାର୍ ରାଇଜ କେନ୍ତି ତବିର୍ ଅଇକରି ରଇସି ? ନାଇ ନ ରଏ । ମୁଇ କାଇକେ ଏଟା କଇଲିନି ବଇଲେ, ବାଲ୍‌ଜିବୁଲ୍‌ର୍ ସାଇଜ ନେଇ ତୁମା ଚାଡ଼ାଇଲିନି ବଲି ତମେ ତା କଇଲାସିନି । ୧୯ ତମର୍ ପଅମନ୍ ବାଲ୍‌ଜିବୁଲ୍‌ର୍ ବପୁ ପାଇ ସେମନ୍‌କେ ଚାଡ଼ାଇବାଇ, ତେବର୍‌ପାଇ ସେମନ୍‌ସେ ତମ୍‌କେ ବିଚାର୍ କର୍‌ବାଇ । ୨୦ ନାଇ, ମୁଇ ପର୍‌ମେସର୍‌ର୍ ବପୁସଙ୍ଗ୍ ତୁମା ଚାଡ଼ାଇବି ।

☆ ୧୧:୧୫ ୧୧:୧୫ ମାତିଉ ୯:୩୪;୧୦:୨୫ ☆ ୧୧:୧୬ ୧୧:୧୬ ମାତିଉ ୧୨:୩୮;୧୬:୧; ମାର୍କ ୮:୧୧

ତେବେ ତା ଏଟା ଜାନାଇ ଦେଲାନ୍ତି, କି ପର୍ଯ୍ୟେସରର୍ ରାଇଜ୍ ତମର୍ ଲଗେ କେଟ୍‌ଲାବେ ବଲି ।”

୨୧ “ଜେତେବେଲେ ଗଟେକ୍ ବପୁର୍ ଲକ୍ ଆଡ଼ଅତିଆର୍ ଦାରି ନିଜର୍ ଗର୍ ଜାଗ୍‌ସି, ସେତେବେଲାଜାକ ତାର୍ ଦନ୍ କାଇଟା ନ ଅଏ ।
୨୨ ମାତର୍ ଜେତେବେଲେ ତାର୍ ଟାନେଅନି ଅଦିକ୍ ବପୁର୍‌ଲକ୍ ଆସି, ତାକେ ଲାଗିକରି ଜିତ୍‌ସି । ଗରର୍ ସାଉକାର୍ ଜନ୍ ଆଡ଼ଆଡ଼ିଆର୍ ଦାରି ନିଜେ ରକିଆ ପାଇତେରଇଲା , ସେ ସବୁଜାକ ବପୁର୍ ଲକ୍ ଚାଡ଼ାଇନେଇସି । ଆରି ଚାଡ଼ାଇ ନେଲାଟା ସେ ମନ୍‌କଲା ପାରା କାକେ ମିସା ବାଟା କରିଦେଇସି ।

୨୩ ☆“ଜେ ଆମକେ ବିରଦ୍ ନ କରେ, ସେ ଆମର୍ ନିଜର୍ ଲକ୍ । ଜେ ମର୍ ସଙ୍ଗ୍ କୁଡ଼ାଏନାଇ, ସେ ବିଟିପାକାଇସି ।”

ଗଟେକ୍ ଡୁମା ବାରଇଗାଲା

(ମାତିଡ ୧୨:୪୩-୪୫)

୨୪ “ଗଟେକ୍ କରାପ୍ ଆଡ଼ମା ମୁନୁସର୍‌ଟାନେଅନି ବାରଇଗାଲାପତେ, ସେ ଆଡ଼ମା ବିସ୍‌ରାମ୍ କର୍‌ବାକେ ସୁକ୍‌ଲା ଜାଗାଇ କନ୍‌ଆଲେ ଲକ୍‌ଟାନେ ରଇବାକେ କଜି ବୁଲ୍‌ସି । ଆରି ଜାଗା ନ ମିଲ୍‌ଲେ କଇସି, ମୁଇ ଜନ୍ ଲକ୍‌ଟାନେଅନି ବାରଇଆସି ରଇଲି, ସେ ଲକ୍‌ଟାନେସେ ବାଉଡ଼ି ଜିବି । ୨୫ ଜେତେବେଲେ ସେ ଡୁମା ଚାଡ଼ଲା ମୁନୁସର୍‌ଲଗେ ଆସି ପରିଚଲ୍‌ରଇ ନିମାନ୍ ସଜାଇଅଇରଇଲାଟା ଦେକ୍‌ସି । ୨୬ ତାର୍‌ପତେ ସେ ଡୁମା ଜାଇକରି ତାର୍‌ଟାନେଅନି ବାନିଆରଇବା ବିନ୍ ବିନ୍ ସାଡ଼ଟା ଡୁମାମନ୍‌କେ ଡାକିଆନ୍‌ସି । ସେମନ୍ କେଟିକରି ତେଇ ବାସା ଅଇବାଇ, ଆରି ସେ ଲକ୍ ଆଗ୍‌ତୁ ଜେଡ୍‌ଡାର୍ ଅଇରଇଲା, ତାର୍‌ତେଅନି ସାରାସାରି ଅଦିକ୍ କରାପ୍ ଅଇଜାଇସି ।”

ସଡ଼ ସାର୍‌ଦା

୨୭ ଜିସୁ ଏଣ୍ଡାରି ସବୁ କାତା କଇବାବେଲେ ଲକ୍‌ମନ୍‌ର୍ ବିଡ଼ରେଅନି ଗଟେକ୍ ମାଇଜିଟକି ଆଉଲିଅଇ କଇଲା, “କେତେକ୍ କରମର୍ ମାଆ ଜେ କି ତମ୍‌କେ ଜନମ୍ ଦେଲା ଆରି ନିଜର୍ ଦୁଦ୍ କୁଆଇଲା ।”

୨୮ ମାତର ଜିସୁ କଇଲା, “ନାଇ, ଜନ୍ ଲକ୍ମନ ପର୍ଯ୍ୟେସରର୍ ବାକିଅ ସୁନ୍‌ବାଇ ଆରି ସେଟା ମାନ୍‌ବାଇ, ସେମନ୍ ନିକ କରମର୍ ଲକ୍ମ

କାବାଅଇ ଜିବାପାରା କାମର୍ ଲାଗି ଦାବି
(ମାତିଉ ୧୨:୩୮-୪୨)

୨୯ ✨ ଲକ୍ମନ ଦଲ୍ ଦଲ୍ ଅଇ ଜିସୁରଲଗେ ଟୁଲ୍ ଅଇବାବେଲାଇ ସେ କଇବାର୍ ଦାର୍ଲା । “ଏବର୍ ଜୁଗର୍ ମୁନୁସ୍‌ମନ୍ କରାପ୍, ଏମନ୍ କାବା ଅଇଜିବା କାମର୍ ଚିନ୍ କଜ୍‌ଲାଇନି । ମାତର ଜୁନସ୍‌କେ ଗଟ୍‌ଲା ଚିନ୍ ଚାଡ଼ିକରି ଆରି କାଇ ବିନ୍ ଚିନ୍ ମିସା ଦିଆ ନ ଅଏ । ୩୦ କାଇକେବଇଲେ ଜୁନସ୍ ଜେନ୍ତ୍ର ନିନିବିୟ୍ ଲକ୍ମନର୍‌ପାଇ ଚିନ୍‌ପାରା ଅଇଲା, ପର୍ଯ୍ୟେସର୍ ପାଟାଇରଇବା ନର୍‌ପିଲା ମୁଇ ମିସା ଏବର୍ ଲକ୍ମନର୍‌ପାଇ ଚିନ୍ ପାରା ଅଇବି । ୩୧ ବିଚାର୍‌ନା ଦିନେ ଦକିନ୍ ଦେସେ ରଇବା ସେବା ନାଉର୍ ରାନି, ଏବର୍ ଲକ୍ମନର୍ ବିରଦେ ଉଚି, ଏମନ୍‌କେ ଦସି କରାଇସି, କାଇକେବଇଲେ ସେ ରାନି, ସଲ୍‌ମନ୍ ରାଜା ସିକାଇରଇବା ଗିଆନର୍ କାତା ସୁନ୍‌ବାକେ ବେସି ଦୁରଅନି ଆସିରଇଲା । ଆରି ଦେକା ! ସଲ୍‌ମନର୍‌ଟାନେଅନି ଅଦିକ୍ ବଡ଼ ଲକ୍ ଇତି ଆଟେ । ୩୨ ବିଚାର୍‌ନାଦିନେ ନିନିବିର୍ ଲକ୍ମନ ଏବର୍ ମୁନୁସ୍‌ମନର୍ ବିରୁଦେ ଚିଆଅଇ ଏମନ୍‌କେ ଦସି କର୍‌ବାଇ । କାଇକେବଇଲେ ସେମନ୍, ଜୁନସ୍ ମାପ୍‌ରୁର୍ କାତା ଜାନାଇଲାକେ, ପାପ୍‌କାମେଅନି ବାଉଡ଼ିରଇଲାଇ, ଆରି ଦେକା ! ଜୁନସ୍‌ଟାନେଅନି ବଡ଼ ଲକ୍ ଇତି ଆଟେ ।

୩୩ ✨ “କେ ମିସା ବଡ଼ି ତସାଇ ମାନ୍‌ତଲେ ଡାବିକରି ନ ସଙ୍ଗଅଡ଼ । ମାତର ବଡ଼ି ସଙ୍ଗଇବା କୁଦରାଇ ସଙ୍ଗଇବାଇ, ଜେନ୍ତ୍ରାରିକି ଗର୍‌ବିଡ଼ରେ ଜିବାଲକ୍ମନ ଉଜଲ୍ ଦେକିପାର୍‌ବାଇ । ୩୪ ତମର୍ ଆଁକି, ଗାଗଡ଼ର୍ ବଡ଼ି । ଜେଡେବଲ୍ ତମର୍ ଆଁକି ନିକ ରଇସି, ସେଡେବେଲେ, ତମର୍ ଗୁଲାଇ ଗାଗଡ଼ ମିସା ଉଜଲ୍ ଅଇସି । ମାତର ଜେଡେବେଲେ ସେଟା ମୁର୍‌କି ରଇସି, ସେଡ଼କିବେଲା ତମର୍ ଗାଗଡ଼ ମିସା ଆନ୍ଦାର୍ ଅଇଜାଇସି । ୩୫ ଡେବେ ମନେ ରଅ, ଜାଗରଡ଼ଅଇ ରୁଆ, ଜେନ୍ତ୍ରକି ତମର୍ ବିଡ଼ରର୍ ଉଜଲ୍ କେବେ ଆନ୍ଦାର୍ ନ ଅଏ ।

✨ ୧୧:୨୯ ୧୧:୨୯ ମାତିଉ ୧୬:୪; ମାର୍‌କ ୮:୧୨ ✨ ୧୧:୩୩ ୧୧:୩୩ ମାତିଉ ୫:୧୫; ମାର୍‌କ ୪:୨୧; ଲୁକ ୮:୧୭

୩୬ ଏଗାରପାଇଁ ତମର ଗୁଲାଇ ଗାଗଡ଼ ଜଦି ଉଜଲ୍ ଅଇସି ଆରି ତେଇର୍ କଣ୍ଠେକ୍ ମିସା ଆନ୍ଦାର ନ ରଏ, ସେନ୍ତାରୁଅଇଲେ, ବଡ଼ି ଜେନ୍ତି ଜଗଜଗି ଜାଇ ଉଜଲ୍ ଦେଇସି, ସେନ୍ତାରି ତମର ଗୁଲାଇ ଗାଗଡ଼ ଉଜଲ୍ ଅଇସି ।”

ଜିସୁ ପାରୁସିମନ୍‌କେ ଆରି ସାସ୍‌ତର ସିକାଉମନ୍‌କେ ଦସ୍ ଦେଲା
(ମାତିଉ ୨୩:୧-୩୬; ମାର୍କ ୧୨:୩୮-୪୦)

୩୭ ଜିସୁ କାତା କଇସାରାଇଲା ପଟେ ଗଟେକ୍ ପାରୁସିଲକ୍ ତାକେ ନିଜର୍ ଗରେ କାଇବାକେ ଡାକ୍‌ଲା, ଆରି ଗରେ ବସାଇଲା । ୩୮ ମାତର୍ ଜିସୁ ଜିଉଦି ରିତିନିତି ଇସାବେ ଦୁଆପୁଟା ନ ଅଇରଇଲାକେ ଏଟା ଦେକି ସେ ପାରୁସି ଲକ୍ କାବା ଅଇଗାଲା । ୩୯ ଜିସୁ ତାକେ କଇଲା, “ତମେ ପାରୁସିମନ୍ ଗିନା ଆରି ତାଲାର୍ ବାଇରେ ମାଞ୍ଜିରଇସା, ମାତର୍ ତମର୍ ବିତ୍‌ରର୍ ସକ୍ତି ବେନ୍‌ବେନା ରଇସି । କରାପ୍‌ଟା ଆରି ଲବ୍ କର୍‌ବାଟା ସବୁ ପୁରୁନ୍ ଅଇଆଟେ । ୪୦ ଏ ବକ୍‌ଆମନ୍ ! ଜେ ଗାଗଡ଼ର୍ ବାଇରର୍‌ଟା ଡିଆର୍ କଲା ଆଟେ, ସେ କାଇ ବିତ୍‌ରର୍‌ଟା ମିସା ଡିଆର୍ କରେନାଇ କି ? ୪୧ ତେବର୍‌ପାଇଁ ତମେ ଜନ୍‌ଟା କଟିକରି ସଙ୍ଗଇ ଆଟାସ୍, ସେଟା ଦୁକିରୁକି ଲକ୍‌ମନ୍‌କେ ଦାନ୍‌କରା, ଆରି ଦେକା, ତମେ ପୁରାପୁରୁନ୍ ପରିଚଲ୍ ଅଇଜାଇସା ।”

୪୨ “ଅଇରେ ପାରୁସିମନ୍ ! ତମର୍ ଉପ୍‌ରେ ଗଟେକ୍ ବଡ଼ ଡଣ୍ ଲାଦିଅଇସିବେ ! କାଇକେବଇଲେ ତମର୍ ବାତେଅନି କାମାଇଲାଟା ଦସ୍‌ବାଗ୍ ଅନି ବାଗେକ୍ ଦେଲାସ୍‌ନି । ମାତର୍ ତମେ ନିଆଇ ଆରି ଦୟା ଏଲା କଲାସ୍‌ନି । ଏଟାସଙ୍ଗ୍ ବାଗେକ୍ ଦେବାଟା ମିସା ଚାଡ଼୍‌ବାର୍ ନାଇ ।”

୪୩ “ଅଇରେ ପାରୁସିମନ୍, ତମର୍ ଉପ୍‌ରେ ଗଟେକ୍ ବଡ଼ ଡଣ୍ ଲାଦିଅଇସିବେ ! କାଇକେବଇଲେ ତମେ ପାର୍‌ତନାଗରେ ମୁକିଅ ଜାଗାଇ ବସ୍‌ବାକେ ମନ୍ କର୍‌ସା ଆରି ଆଟେବାଟେ ଲକ୍‌ମନ୍‌ରଟାନ୍‌ଅନି ଜୁଆର୍ କରାଇଅଇବାକେ ବଲ୍ ବଲାଅଇସା । ୪୪ ଅଇରେ ପାରୁସିମନ୍ ! ତମର୍ ଉପ୍‌ରେ ଗଟେକ୍ ବଡ଼ ଡଣ୍ ଲାଦିଅଇସିବେ । କାଇକେବଇଲେ, ତମେ ନ ଡିସ୍‌ବା ସମାଦି ପାରା । ତାର୍ ଉପ୍‌ରେ ଆସା ଜା କର୍‌ବା ଲକ୍‌ମନ୍ ସେଟା ସମାଦି ବଲି ନାଜାନଡ଼ ।”

୪୫ ତେଜ ସାସ୍ତର ସିକାଇବା ଦରମ୍ ଗୁରୁମନର ବିତ୍ତରେଅନି ଗଟେକ୍ ପଣ୍ଡିତ୍ ଜିସୁକେ କଇଲା, “ଏ ଗୁରୁ ତମେ ପାରୁସିମନର ବିସଇ କଇକରି ଆମ୍‌କେ ଲାଜ୍ କରାଇଲାସିନି ।”

୪୬ ଜିସୁ କଇଲା, “ଅଇରେ ସାସ୍ତର ସିକାଉ ପଣ୍ଡିତ୍‌ମନ୍ ! ତମର ଉପ୍‌ରେ ଗଟେକ୍ ବଡ଼ ଡଣ୍ଡ୍ ଲାଦିଅଇସିବେ ! କାଇକେବଇଲେ ତମେ ଲକ୍‌ମନ୍‌କେ ବେସି ଆବଡ଼୍ ନିୟମ୍ ମାନ୍‌ବାକେ କଇଲାସିନି, ଆରି ସେ ନିୟମ୍ ମାନ୍‌ବାକେ ମୁଲ୍‌କେ ଆଇଁଟିତେଇ ଉଟାଇବା ଏଡ଼କି ମିସା ସାଇଜ୍ କରାସ୍ ନାଇ । ୪୭ ଅଇରେ, ଡଣ୍ଡ୍ ପାଉମନ୍ ! ତମର ଉପ୍‌ରେ ଗଟେକ୍ ବଡ଼ ଡଣ୍ଡ୍ ଲାଦିଅଇସିବେ । କାଇକେବଇଲେ, ତମେ ବବିସତ୍‌ବକ୍‌ତାମନର ମସନେ ସମାଦି ତିଆର୍ କର୍‌ତେରଇସା, ମାତର୍ ତମର୍ ଆନିଦାଦିମନ୍ ସେମନ୍‌କେ ମରାଇରଇଲାଇ । ୪୮ ତେବେ ତମର୍ ଆନିଦାଦିମନର ଦରମ୍ କରମ୍ ବିସଇର୍ ତମେ ସାକି ଆଚାସ୍ । ଆରି ସେଟା ମାନ୍‌ଲାସିନି କାଇକେବଇଲେ ସେମନ୍ ସିନା ବବିସତ୍‌ବକ୍‌ତାମନ୍‌କେ ମରାଇରଇଲାଇ, ମାତର୍ ତମେ ସେମନର୍ ସମାଦିର୍ କାମ୍‌ତିଆର୍ କଲାସିନି । ୪୯ ତେବେ ପର୍‌ମେସର୍ ମିସା ନିଜର୍ ରୁଦିରେ କଇଲାଆଟେ, ମୁଇ ବବିସତ୍‌ବକ୍‌ତାମନ୍‌କେ ଆରି କବର୍ ନେଉମନ୍‌କେ ସେମନର୍ ଲଗେ ପାଟାଇବି । ସେମନର୍ ବିତ୍ତରେ କେତେଲକ୍‌କେ ସେମନ୍ ମରାଇବାଇ ଆରି କେତେଲକ୍‌କେ ନିନ୍ଦାକରି କସଟ୍ ଦେବାଇ । ୫୦ ସେଟାର୍‌ପାଇ ଜଗଡ଼୍ ତିଆର୍‌ଅଇଲାଟାନେଅନି, ଏବଲର୍ ବେଲେଅନି ଆରାମ୍ କରି ବର୍‌କିଆର୍ ପ ଜିକରିୟର୍ ଜାକ, ଜାକେ କି ତମେ ମନ୍‌ଦିର୍ ଆରି ବେଦିର୍ ମଜାଇ ମରାଇରଇଲା ଜେଡ଼କି ବବିସତ୍‌ବକ୍‌ତାମନ୍‌କେ ମରାଇଆଚାସ୍ ସେ ସବୁ ଡଣ୍ଡ୍ ଏ ଆଜିକାଲିର୍ ଲକ୍‌ମନ୍ ପାଇବାର୍ ଆଟେ । ୫୧ ସେ ସବୁର୍ ମୁଲିଅ, ଏବର୍ ଲକ୍‌ମନର୍ ଟାନେଅନି ନିଆ ଅଇସି ।”

୫୨ “ଅଇରେ, ଦରମ୍‌ଗୁରୁମନ୍ ! ତମର ଉପ୍‌ରେ ଗଟେକ୍ ବଡ଼ ଡଣ୍ଡ୍ ଲାଦିଅଇସିବେ ! କାଇକେବଇଲେ, ତମେ ପର୍‌ମେସର୍‌ର ଗିଆନର୍ କାପାଟ୍ ଡାବିଦେଇ ଆଚାସ୍ । ନିଜେ ପର୍‌ମେସର୍‌ର ଗିଆନଟାନେ ନ ଜାଇକରି ତେଇ ଜିବାକେ ମନ୍‌କଲା ଲକ୍‌ମନ୍‌କେ ମିସା ବାଦାଦେଲାସ୍ ।”

୫୩ ଆରି ଜିସୁ ତେଇଅନି ବାରଇଗାଲାପଟେ, ପାରୁସିମନ୍ ଆରି

ସାସ୍ତ୍ରର ସିକାଉମନ୍ ବେସି ଡାଟ୍‌ସକ୍ ଜିସୁକେ ବିରଦ୍ କରବାକେ ଆରାମ୍ କଲାଇ । ^{୫୪} ତାର୍‌ଟାନେଅନି ବୁଲ୍ ଦାର୍‌ବାକେ କାଇ କାଇ ପରସନ୍ ପାଟାର୍‌ବାର୍ ଦାର୍‌ଲାଇ ।

୧୨

ପାରୁସିମନ୍‌ ପାରା ଉଆନାଇ

(ମାତିଉ ୧୦:୨୭-୨୭)

^୧ ☆ଏଡକି ବିଡରେ ଅଜାର୍ ଅଜାର୍ ଲକ୍ ବୁଲ୍‌ଅଇକରି, ତାକର୍ ତାକର୍ ବିଡରେ ମାଣ୍ଡାବୁଣ୍ଡା ଅଇଜାଇଡେ ରଇଲାଇ, ସେଡକିବେଲେ ଜିସୁ ପର୍‌ଡୁମ୍ ନିଜର୍ ସିସ୍‌ମନ୍‌କେ କଇବାର୍ ଦାର୍‌ଲା, “ପାରୁସିମନ୍‌ କମିର୍ ପାରା କପର୍ ତେଇଅନି ଜାଗରଡ୍ ଅଇରୁଆ । ^୨ ☆ଡାବିଅଇରଇବା ସବୁ ବିସଇ ଜାନାପଡ୍‌ସି, ଆରି ଲୁଟିରଇବା ବିସଇ ସବୁ ଦେକାଅଇସି । ^୩ ତେବର୍‌ପାଇ, ତମେମନ୍ ଜିନ୍ ଜନ୍‌ଟା ଆନ୍‌ରେ କଇଆଟାସ୍, ସେ ସବୁଜାକ ଉଜଲେ ସୁନ୍‌ବାଇ, ଆରି ଜନ୍ ଜନ୍‌ଟା ବିଡରଗରେ, କେ ନ ସୁନ୍‌ଡେ କଇଆଟାସ୍, ସେଟା ଗରର୍ ଚାନିଉପରେ ଅନି ସୁନାଇଅଇସି ।”

ପର୍‌ମେସର୍‌କେସେ ଡରା

(ମାତିଉ ୧୦:୨୮-୩୧)

^୪ “ମାତର୍ ତମେ ମର୍ ମଇତର୍, ତମକେ ମୁଇ କଇଲିନି, ଜନ୍ ଲକ୍‌ମନ୍ ଗାଗଡ୍‌କେ ମରାଇବାଇ, ମାତର୍ ତାରିପଚେ ତମର୍ ଆଡ୍‌ମାକେ କାଇଟା କରିନାପାରଡ୍, ସେମନ୍‌କେ ଡରାନାଇ । ^୫ ମାତର୍ କାକେ ଡରସା, ସେଟା ମୁଇ ତମକେ ଜାନାଇବି, ମରାଇଲାପଚେ ନର୍‌କେ ପିଙ୍‌ବାକେ ଜାର୍ ଅଦିକାର୍ ଆଚେ, ତାକେ ଡରା, ଉଁ ମୁଇ ତମକେ ସଡ୍ କଇଲିନି, ପର୍‌ମେସର୍‌କେ ଡରା ।

^୬ “ପାଁଟ୍‌ଟା ଚେଟିଆ ଚଡଇ କାଇ ଅଲପ୍ ଡାରୁକେ ବିକା ନଅଏ କି ? ଏଲେ ମିସା ସେମନ୍‌ ବିଡରେଅନି ଗଟେକ୍‌କେ ମିସା ପର୍‌ମେସର୍ ନ ପାସ୍‌ରେ । ^୭ ମାତର୍ ତମର୍ ମୁଣ୍ଡର୍ ସବୁ ଚେଣ୍ଡି ମିସା ଏଜା ଅଇଲାଆଚେ । ଡରାନାଇ, ତମେମନ୍ କେଡେକ୍ କେଡେକ୍ ଚେଟିଆ ଚଡଇର୍ ଟାନେଅନି ମୁକିଅ ।”

☆ ୧୨:୧ ୧୨:୧ ମାତିଉ ୧୭:୬; ମାର୍କ ୮:୧୫

☆ ୧୨:୨ ୧୨:୨ ମାର୍କ ୪:୨୨; ଲୁକ ୮:୧୭

ଜିସୁକେ ନାମି କରି ଚାଡ଼ବାଟା
(ମାତିଉ ୧୦:୩୨-୩୩; ୧୨:୩୨; ରମିୟ ୧୦:୯-୧୦)

୮ “ଆରି ମୁଇ ତମକେ କଇଲିନି, ଜେ ଜଦି ମକେ ଲକ୍ମନର ମୁଆଟେ ନାମସି ଆରି ବିସ୍ବାସ କରସି, ପରମେସର୍ ପାଟାଇରଇବା ନରପିଲା ମୁଇ ମିସା ପରମେସରର୍ ଦୁତ୍ତମନର୍ ମୁଆଟେ ତାକେ ନାମବି ।^୯ ମାତର୍ ଜେ ଲକ୍ମନର୍ ମୁଆଟେ ମକେ ନ ନାମି, ବିସ୍ବାସ ନ କରେ, ତାକେ ପରମେସରର୍ ଦୁତ୍ତମନର୍ ମୁଆଟେ ମୁଇ ଇନ୍ କରବି ।”

୧୦ ☆“ଆରି ଜେ ପରମେସର୍ ପାଟାଇରଇବା ନରପିଲାର୍ ବିରୁଦେ କଇଲେ, ତାକେ କେମା ଦିଆଅଇସି, ମାତର୍ ଜେ ସୁକଲ୍ ଆଡ଼ମାର୍ ବିରୁଦେ କଇସି, ତାକେ କେମା ନ ଦିଆଅଏ ।

୧୧ ☆“ଆରି ଜେତେବେଲେ ସେମନ୍ ତମକେ ଜିଉଦି ଲକ୍ମନର୍ ପାର୍ତନା ଗରେ, ସାସନ୍ କରବା ଲକ୍ମନର୍ତାନେ କି ବିନ୍ ବିନ୍ ଅଦିକାରି ମନର୍ତାନେ ବାନ୍ଦିନେଲେ, ସେଡ଼କିବେଲେ କାଇଟାବଲି କଇସା, ସେ ବିସଇ ନେଇକରି ଚିନ୍ତା କରାନାଇ ।^{୧୨} କାଇକେବଇଲେ କାଇଟା କଇବାକେ ଅଇସି, ସେବେଲାଇ ସୁକଲ୍ଆଡ଼ମା ତମକେ ସିକାଇସି ।”

ବକୁଆ ସାଉକାର୍ କାତା

୧୩ ଲକ୍ମନର୍ ଗଅଲି ବିଡ଼ରେଅନି ଗଟେକ୍ ଲକ୍ ଜିସୁକେ କଇଲା, “ଏ ଗୁରୁ, ମର୍ ବାବାର୍ ସପତି ବାଗ୍ବାଟା କରବାକେ ମର୍ ବାଇକେ କୁଆ ।”^{୧୪} ଏଟା ସୁନି ଜିସୁ ତାକେ କଇଲା, “ଏ ମଇତର୍, ତମର୍ ବିଡ଼ରେ ନିଆଇ କରବାକେ ଆରି ଦନ୍ସପତି ବାଗ୍ବାଟା କରିଦେବାକେ ମକେ କେ ଅଦିକାର୍ ଦେଲାଆଟେ ?”^{୧୫} ଆରି ଜିସୁ ସେମନ୍କେ କଇଲା, “ଜାଗର୍ତା, ସବୁରକାମର୍ ଲକ୍ କରବାଟାନେଅନି ନିଜେ ନିଜେ ଦୁରେ ରୁଆ । କାଇକେବଇଲେ ଗଟେକ୍ ଲକ୍ ଜିବନ୍ତାନେଅନି ଦନ୍ସପତି ବଡ଼ ବିସଇ ନଏ ।”

୧୬ ଆରି ସେ ଲକ୍ମନକେ ଗଟେକ୍ ଉଦାଅରନ୍ ଦେଇ କଇଲା, ଗଟେକ୍ ସାଉକାର୍କେ ତାର୍ ଜମିଟାନେଅନି ବେସି ତାସ୍ ପାଟଲା ।

☆ ୧୨:୧୦ ୧୨:୧୦ ମାତିଉ ୧୨:୩୨; ମାର୍କ ୩:୨୯ ☆ ୧୨:୧୧ ୧୨:୧୧ ମାତିଉ ୧୦:୧୯,୨୦; ମାର୍କ ୧୩:୧୧; ଲୁକ୍ ୨୧:୧୪,୧୫

୧୭ ସେ ଲକ୍ ମନେ ମନେ ବାବ୍‌ନାକରି କଇଲା, “କାଇଟା କରବି ? ମର୍ କାଦି ଆନି ସଙ୍ଗଇବାକେ ଜାଗାନାଇ ।” ୧୮ ଆରି ସେ କଇଲା, “ଏନ୍ତାରି କରବି, ମର୍ କାଦି ସଙ୍ଗଇବା ଗରର୍ କତି ବାଙ୍ଗାକକରି ବଡ଼ ବଡ଼ କରି ତିଆରକରବି ଆରି ତେଇ ମର୍ ସବୁ କାଦିକଣ୍ଡା ଜାଗରଡ଼ କରି ସଙ୍ଗଇବି । ୧୯ ଆରି ମର୍ ଜିବନ୍‌କେ କଇବି, ର ଜିବନ୍, ତରପାଇବଲି ବେସି ବରସର୍ କାଦିକଣ୍ଡା ସଙ୍ଗଇ ଅଇଲାଆଟେ, ପୁଣ୍ଡ, କାଆ ଆରି ଆରାମ୍‌ସଙ୍ଗ ର ।” ୨୦ ମାତର୍ ପର୍‌ମେସର୍ ତାକେ କଇଲା, “ଏରେ ବକୁଆ ଜଦି ଆଜି ରାତି ପର୍‌ମେସର୍ ତର୍ ଜିବନ୍ ମାଙ୍ଗସି ବଇଲେ, ତୁଇ ତରପାଇ ଜେଡ଼କି ସଙ୍ଗଇଆରୁସ, ସେ ସବୁ କାରଟା ଅଇସି ? ୨୧ ଜେ ନିଜରପାଇ ଦନ୍ ଜତନ୍ କରି ସଙ୍ଗଇସି, ସେ ପର୍‌ମେସରର୍ ମୁଆଟେ ସାତକାର ନଏଁ, ତାରପାଇ ଏନ୍ତାରି ଗଟସି ।”

ମାପ୍‌ରୁ ଟାନେ ବିସ୍‌ବାସ୍ କରବାର୍
(ମାତିଉ ୨:୨୫-୩୪)

୨୨ ଜିସୁ ନିଜର୍ ସିସ୍‌ମନ୍‌କେ କଇଲା, “ଏଟାରପାଇ ମୁଇ ତମ୍‌କେ କଇଲିନି, କାଇଟା କାଇକରି ଜିବନ୍ ବଞ୍ଚାଉ ଆରି ଗାଗଡ଼ପାଇ କାଇଟା ପିନ୍‌ରୁ ବଲି ଚିନ୍ତା କରାନାଇ । ୨୩ କାଇକେବଇଲେ କାଦିଟାନେଅନି ଜିବନ୍ ଆରି ବସ୍‌ତରଟାନେଅନି ଗାଗଡ଼ ଆକା ମୁକିଅ । ୨୪ ଚଡ଼ଇମନର୍ ବିସଇନେଇକରି ବାବିଦେକା, ସେମନ୍ ନ ବୁନଡ଼ କି ନ କାଟଡ଼, ଆରି ସେମନର୍ ବାଣ୍ଟାରଗର୍ କି କାଦି ସଙ୍ଗଇବା ଆମାର୍ ଗର୍ ନାଇ । ଅଇଲେ ମିସା ମାପ୍‌ରୁ ସେମନ୍‌କେ କାଦି ଜାଗାଇଦେଇସି । ତମେ ଚଡ଼ଇମନର୍ ଟାନେଅନି କେତେକ୍ ଅଦିକାରର୍ ଲକ୍ । ୨୫ ତମର୍ ବିଡ଼ରେ ଏନ୍ତାରିଲକ୍ ନ ରଅଡ଼, ଜେ କି ଚିନ୍ତାକରି ତାର୍ କଣ୍ଡେକ୍ ମିସା ଆଇସ୍ ବଡ଼ାଇ ପାରସି । ୨୬ ତେବରପାଇ ତମେମନ୍ ଗଟେକ୍ ସାନ୍ ବିସଇ ମିସା କରିନାପାରଲାସ୍‌ନି ବଇଲେ ବଡ଼ ବଡ଼ ବିସଇ କାଇକେ ଚିନ୍ତା କଲାସ୍‌ନି ? ୨୭ ପୁଲ୍‌ମନର୍ ବିସଇ ବାବିଦେକା, ସେମନ୍ କେନ୍ତ୍ର ପୁଟ୍‌ଲାଇନି, ସୁତା ନ କାଟଡ଼ କି ଲୁଗା ନ ବୁନଡ଼ । ଏଲେମିସା ମୁଇ ତମ୍‌କେ କଇଲିନି, ସବୁଟାନେଅନି ମଆନ୍ ଆରି ଦନି ରାଜା ସଲ୍‌ମନ୍ ମିସା ସେ ପୁଲ୍‌ମନର୍ ବିଡ଼ରେଅନି ଗଟେକ୍ ପୁଲ୍‌ର୍ ଏଡ଼କି ସଜାଇ ନ ଅଇରଇଲା । ୨୮ ଆଜି ଜନ୍ ଗାଁସ୍ ପଦାଇ ଆଟେ, କାଲିକେ ସେଟା ରୁଣ୍ଡାଇ ଜଇ ଲାଗାଇବାଇ । ସେଟାକେ

ପରମେସର୍ ଏନ୍ତାରି ବେସ୍ ଦେଲାନି ବଇଲେ, ଏ ଅଲପ୍ ବିସ୍‌ବାସ୍ କର୍‌ବା ଲକ୍‌ମନ୍, ସେ ତମ୍‌କେ ପିନ୍‌ବାକେ କେତେକ୍ ଅଦିକ୍ ଦେଇସି ।”

୨୯ “ଆରି କାଇଟା କାଇରୁ ? ବଲି ଚିନ୍ତାକରି ଲାଗିରୁଆନାଇ, ୩୦ କାଇକେବଇଲେ ପରମେସର୍‌କେ ନାଜାନ୍‌ଲା ଲକ୍‌ମନ୍ ଏ ସବୁ ବିସଇ କଜିବୁଲ୍‌ବାଇ । ମାତର୍ ଏ ସବୁ ବିସଇ ତମ୍‌କେ ଦର୍‌କାର୍, ସେଟା ତମର୍ ବାବା ଜାନିରଇସି । ୩୧ ମୁଇ କଇଲିନି ତମେ ପରମେସର୍‌ର ସରଗ୍ ରାଇଜ୍ କଜା, ଆରି ଏ ସବୁ ବିସଇ ସେ ତମ୍‌କେ ଦେଇସି ।”

**ସରଗ୍ ରାଇଜେ ଦନ୍
(ମାତିଉ ୬:୯-୨୧)**

୩୨ ଏ ଉନା ମେଣ୍ଟାରାସି, ଡରାନାଇ, କାଇକେବଇଲେ ତମର୍ ବାବା ତମ୍‌କେ ତାର୍ ରାଇଜ୍ ଦେବାକେ ମନ୍‌କଲାଆଟେ । ୩୩ ତମ୍‌କେ ଜନ୍ ଜନ୍‌ଟା ଆଟେ, ସେଟା ବିକିଦେଇ ଗରିବ୍‌ମନ୍‌କେ ଦାନ୍ କରା । ଜନ୍‌ଟା କି କେବେ ନ ସାରେ, ନିଜର୍ ନିଜର୍‌ପାଇ ଏନ୍ତାରି କାଣା ନ ଅଇବା ବେସ୍‌ନି ତିଆରକରା । ଜନ୍‌ଟାନେ ଚର୍ ନ ଆସେ କି କିଡାମନ୍ ମିସା ନ ନସାଅଡ୍ । ସର୍‌ଗେ ଏନ୍ତାରି ନ ସାର୍‌ବା ଦନ୍ ସଙ୍ଗ୍‌ଇରୁଆ । ୩୪ କାଇକେବଇଲେ ଜନ୍‌ଟାନେ ତମର୍ ଦନ୍, ତେଇସେ ତମର୍ ମନ୍ ।

ତରିକ୍‌ନା ରଇବା ଗତି ଦାଙ୍ଗ୍‌ତା

୩୫ ☆“ତମର୍ ଆଟର୍ ତୁଆଲ୍ ବାନ୍ଦିଅଇ ସେବା କର୍‌ବାକେ ଜାଗିରୁଆ, ଆରି ବଡି ଲାଗ୍‌ତେରଅ । ୩୬ ☆ ମାପ୍‌ରୁ ବିବା ବଜିଟାନେଅନି ବାଉଡିଆସି କାପାଟେ ବାଜାଉ ବାଜାଉ ଜନ୍‌ଲକ୍‌ମନ୍ ଦାପ୍‌ରେ କାପାଟ୍ ଉଗାଡ୍‌ବାକେ ଜାଗିରଇବାଇ, ତମେ ସେମନ୍‌ରପାରା ଅଇରୁଆ । ୩୭ ମାପ୍‌ରୁ ଆସି ଜନ୍ ଦାଙ୍ଗ୍‌ତାମନ୍‌କେ ଜାଗ୍‌ରଡ୍ ରଇବାଟା ଦେକ୍‌ସି, ସେମନ୍ କେତେ ନିକ କରମର୍ ଲକ୍ । ମୁଇ ତମ୍‌କେ ସଡ୍ କଇଲିନି, ସେ ନିଜର୍ ଆଁଟାଇ ତୁଆଲ୍ ବାନ୍ଦିକରି, ସେମନ୍‌କେ କାଇବାକେ ବସାଇ, ତାକର୍‌ଲଗେ ଜାଇ ସେବାକର୍‌ସି । ୩୮ ଆରି ସେ ଜଦି ମଜାରାତି କି କୁକ୍‌ତାତାକେ ମିସା ଆସି ସେମନ୍‌କେ, ସେନ୍ତାରି ରଇବାଟା ଦେକ୍‌ସି, ସେନ୍ତାରିଆଲେ ସେ ଦାଙ୍ଗ୍‌ତାମନ୍

☆ ୧୨:୩୫ ୧୨:୩୫ ମାତିଉ ୨୫:୧-୧୩ ☆ ୧୨:୩୬ ୧୨:୩୬ ମାର୍କ ୧୩:୩୪-୩୬

କେତେ ନିକ କରମର ଲକ୍ । ୩୯ ☆ମାତର ଏଟା ଜାନିରୁଆ, କେତେବେଲେ ଚର୍ ଆଇସି, ଏଟା ଗରର ସାଉକାର୍ ଜେବେ ଜାନସି, ସେନ୍ତାରୁଆଲେ ସେ ନିଜର ଗରର ପେଡି ବାଙ୍ଗାକବାକେ ନ ଦେଏ । ୪୦ ତମେ ମିସା ଜାଗରଡ଼ଅଇ ରୁଆ, କାଇକେବଇଲେ, କେବେ ତମେ ବାବି ନ ରୁଆସ, ସେ ବେଲେ ପର୍ମେସର୍ ପାଟାଇରଇବା ନର୍ପିଲା ମୁଇ ଆଇବି ।”

**ବିସ୍ବାସ କରବା ଗତି ଦାଙ୍ଗତା କି ବିସ୍ବାସ ନକରବାଟା
(ମାତିଉ ୨୪:୪୫-୫୧)**

୪୧ ସେଟାସୁନି ପିତର୍ କଇଲା, “ଏ ମାପୁରୁ ତମେ ଆମ୍ବକେସେ କି ସବୁଲକ୍‌କେ ଏନ୍ତାରି କାତା ଦେକାଇ କଇଲାସିନି ?”

୪୨ ଜିସୁ କଇଲା, “ବିସ୍ବାସେ ରଇବା ଲକ୍ ଆରି ବୁଦିମାନ୍ ଲକ୍ କେ ଆଚଡ଼ ? ତାକେ ସେ ସାଉକାର୍ ଗର୍ ଚାଲାକବା ଦାଇଡ଼ ଦେଇସି । ସେ ସମାନ୍ ବେଲାଇ ବିନ୍ ଦାଙ୍ଗତାମନ୍‌କେ କାଦି ଜାଗାଇ ଦେଇସି । ୪୩ ସାଉକାର୍ ଆସି, ତାର୍ ନିଜର୍ ଦାଙ୍ଗତା ଏନ୍ତାର୍ କରବାଟା ଦେକ୍‌ସି ବଇଲେ ସେ କେତେ ନିକ କରମର ଲକ୍ । ୪୪ ମୁଇ ତମ୍‌କେ ସଡ଼ କଇଲିନି, ସେ ତାକେ ନିଜର୍ ସବୁର୍ ଉପ୍ରେ ଅଦିକାର୍ ଦେଇସି । ୪୫ ଜଦି ସେ ଦାଙ୍ଗତା, ମର୍ ସାଉକାର୍ ଆଇବାଟା ଅଲ୍‌ସମ୍ ଅଇସି ବଲି ମନେକରି, ମାଡୁଆଲ୍ ଅଇ ବିନ୍ ଦାଙ୍ଗତାମନ୍‌କେ ଲାଗ୍‌ମାର୍ କରବାର୍ ଆରାମ୍ କରସି, ୪୬ ସେନ୍ତାରୁଆଲେ ଜନ୍ ଦିନେ ସେ ଜାଗି ନ ରଏ, ଆରି ସେ କେତେବେଲେ ଆଇବାଟା ଜାନି ନ ରଏ, ସେ ସାଉକାର୍ ଆସି ତାକେ ବେସି ବଡ଼ ଡଣ୍ଟ ଦେଇସି । ଆରି ବିସ୍ବାସ୍ ନ କରବା ଲକ୍‌କେ ସଙ୍ଗ୍ ମିସାଇ ଦେଇସି ।”

୪୭ “ଆରି ଜନ୍ ଦାଙ୍ଗତା ନିଜର୍ ସାଉକାର୍ ମନ୍ ଜାନିକରି ଜାଗରଡ଼ ନ ଅଇରଏ, କି ସାଉକାର୍ ମନ୍‌କଲା ଇସାବେ ପାଠି ନ କରେ, ତାକେ କରତା ସଙ୍ଗ୍ ଅପର୍‌ବଲ୍ ମାଡ଼ ଅଇସି । ୪୮ ମାତର୍ ଜେ ତାର୍ ମନ୍‌କଲାଟା ନାଜାନିକରି, ଡଣ୍ଟିଲ୍‌ବା କାମ୍ କରବାର୍ ଦାରସି, ତାକେ ଅଲ୍‌ପ୍ ମାଡ଼ ଅଇସି । ଜନ୍ ଲକ୍‌କେ ଅଦିକ୍ ଦିଆଅଇରଇସି, ତାକେ ଅଦିକ୍ ଦାବି କରାଅଇସି । ଆରି ଲକ୍‌ମନ୍ ତାକେ ଜାର୍‌ଲଗେ ଅଦିକ୍ ସର୍ପି ଦେଲାଇଆଚଡ଼, ଅଦିକ୍ ଅଦିକ୍ ଦାବି କରବାଇ ।”

☆ ୧୨:୩୯ ୧୨:୩୯ ମାତିଉ ୨୪:୪୩,୪୪

ଜିସୁର ଲାଗି ବାଗ୍ ବାଗ୍ ଅଇବାଟା

୪୯ ଜିସୁ କଇଲା, “ମୁଇ ଏ ଦୁନିଆଇ ଜଇ ଲାଗାଇବାର୍ ଆଇଲିଆଟି । ସେଟା ଜଦି ଲାଗବାକେ ଆରାମ୍ ଅଇଲାନି, ସେନ୍ତ୍ରାଆଲେ ମୁଇ ମନକଲାଟା ପୁରାପୁରୁନ୍ ଅଇଗାଲାବେ ।
 ୫୦ ✧ମାତର୍ ମକେ ଆରି ଗଟେକ୍ ତୁବନେ ତୁବନ୍ ନେବାକେ ପଡ଼ସି, ଆରି ସେଟା ନ ସାର୍ବାଜାକ, ମର୍ ମନ୍‌ବିତ୍ତରେ କେନ୍ତ୍ର କସ୍ଟ ଲାଗଲାନି । ୫୧ ଜଗତେ ସାନ୍ତି ଦେବାକେ ଆସିଆଟେ ବଲି ତମେ କାଇ ମକେ ବାବ୍‌ଲାସ୍‌ନି କି ? ନାଇ ମୁଇ ସାନ୍ତି ଆନ୍‌ବାକେ ନାଇ, ମାତର୍ ବିଚାରନା କରବାକେ ଆସିଆଟି । ୫୨ ଏବେଅନି ଗଟେକ୍ ଗରେ ପାଁର୍ ଲକ୍ ରଇଲେ, ଦୁଇଲକର୍ ବିରୁଦେ ତିନଲକ୍ ଆରି ତିନଲକର୍ ବିତ୍ତରେ ଦୁଇ ଲକ୍ ବାଗ୍ ଅଇବାଇ । ୫୩ ପଅର୍ ବିରୁଦେ ବାବା, ବାବାର ବିରୁଦେ ପଅ, ଜିଇର୍ ବିରୁଦେ ମା, ମାଆର୍ ବିରୁଦେ ଜିଇ, ବୁଆରିର୍ ବିରୁଦେ ସାଡ଼ରି, ସାଡ଼ରିର୍ ବିରୁଦେ ବୁଆରି ବିନେ ଅଇବାଇ ।”

ବେଲା ଦେକି ଜାନ୍‌ବାଟା

(ମାତିଉ ୧୭:୨-୩)

୫୪ ଆରି ଜିସୁ ଲକ୍‌ମନକେ କଇଲା, “ବୁଡ଼ତି ଦିଗେ ବାଦଲ୍ ଚଗ୍‌ବାଟା ଦେକ୍‌ଲେ, ପାନି ଆଇସିବେ ବଲି କଇସା । ଆରି ସେନ୍ତାରି ସେ ଅଇସି । ୫୫ ଆରି ଦକ୍‌ଶିନ୍‌ଦିଗ୍ ବାଟେଅନି ପବନ୍ ମାର୍‌ବାଟା ଜାନ୍‌ଲେ କାରା ଅଇସି ବଲି କଇସା । ଆରି ସେଟା ସେନ୍ତାରି ଅଇସି । ୫୬ ଏ କୁଟିଆଲ୍‌ମନ୍, ତମେ ଜଗତର୍ ଆରି ସରଗର୍ କାତା ଜାନି ପାଗ୍ କେନ୍ତ୍ର ଅଇସି ବଲି ଆଗ୍‌ତୁ କଇଲାସ୍‌ନି, ମାତର୍ ଏବେ କାଇଟା ଗସ୍‌ସି, ସେଟା କାଇକେ ନାଜାନ୍‌ଲାସ୍‌ନି ?”

ସତ୍ତରୁ ସଙ୍ଘ୍ ମିସ୍‌ବାଟା

(ମାତିଉ ୫:୨୫-୨୬)

୫୭ “ଆରି ନିଜେ ନିଜେ କାଇକେ ଟିକ୍ ବିଚାର କରାସ୍ ନାଇ ? ୫୮ ଜଦି ତମର୍ ବିରଦିସଙ୍ଘ୍ ବିଚାରକାରିଆରଲଗେ ଗାଲାସ୍‌ନି, ମଜାବାଟେ ତାର୍‌ସଙ୍ଘ୍ ବୁଜାମାନା ଅଇବାକେ ଚେସ୍‌ଟା କରା । ନଇଲେ କେତେବେଲେ ସେ ତମକେ ବିଚାରକାରିଆର୍ ଟାନେ

✧ ୧୨:୫୦ ୧୨:୫୦ ମାର୍‌କ ୧୦:୩୮

ଜିକିନେଇସି, ବିଚାରକାରିଆ ସନିଅମନର୍ ଆତେ ସର୍ପିଦେଇସି, ସନିଅମନ୍ ତମ୍‌କେ ବନ୍ଦି ଗରେ ନେଇ ପୁରାଇଦେବାଇ ।” ୫୯ ମୁଇ ତମ୍‌କେ କଇଲିନି, “କେନ୍ତୁକଲେ ମିସା ସବୁ ଡାବୁ ନ ସୁଦ୍‌ବାଜାକ ସେ ଜାଗାଇଅନି ବାରଇ ଆସିନାପାରାସ୍ ।”

୧୩

ନିଜର୍ ପାପକାମେଅନି ବାଉଡା, ନଇଲେ ମର୍‌ସା

୯ ଗାଲିଲିଅନି କେତେ ଲକ୍ ଆସି ପାର୍ତନା ଗରେ ବଲି ଦେଇତେରଇଲାବେଲେ ପିଲାଡ଼ ଡାବୁ ସଇନମନ୍‌କେ ପାଟାଇ ଗାଲିଲିଅ ମନ୍‌କେ ମରାଇଲା । ତେଇ ମଲାଲକର୍ ବନି ପୁଦ୍‌ଲା ପସୁର୍ ବନି ସଙ୍ଗ୍ ମିସୁଲା । ଏ ବିସଇ କେତେଲକ୍ ଆସି ଜିସୁକେ ଜାନାଇଲାଇ । ୧୦ ତେଇ ଜିସୁ ସେମନ୍‌କେ କଇଲା, “ଏ ସବୁ କସ୍‌ଟ ପାଇବାକେ, ଏ ଗାଲିଲିୟମନ୍ ବିନ୍ ସବୁ ଗାଲିଲିୟମନ୍‌ଟ ଟାନେଅନି ଅଦିକ୍ ପାପ୍ କଲାଇ ଆତଡ଼ ବଲି ବାବ୍‌ଲାସନି କି ? ୧୧ ମୁଇ ତମ୍‌କେ କଇଲିନି, ଜେତେବେଲେ ଜାକ ପାପେଅନି ମନ୍ ନ ବାଦ୍‌ଲାଆସ, ତମେ ସବୁ ଲକ୍ ସେନ୍ତାରି କୁରୁପ୍‌ନାସ୍ ଅଇଜାଇସା । ୧୨ ନଇଲେ ସିଲଅତେଇ ରଇଲା ଜନ୍ ଅର୍‌ର ଲକର୍ ଉପ୍‌ରେ ବଡ଼ ଗର୍ ଅଦ୍‌ରି ମରିଜାଇ ରଇଲା, ସେମନ୍ ତେବେ ? ତମେ ସେମନ୍‌କେ ଜିରୁସାଲାମର୍ ବିନ୍ ଲକ୍‌ମନର୍ ଟାନେଅନି ଅଦିକ୍ ପାପ୍ କଲାଇ ଆତଡ଼ ବଲି ବାବ୍‌ଲାସନି କି ? ୧୩ ନାଇ, ମୁଇ ତମ୍‌କେ କଇଲିନି, ପାପେଅନି ମନ୍ ନ ବାଦ୍‌ଲାଇଲେ ତମେସବୁ ଲକ୍ ସେନ୍ତାରି କୁରୁପ୍‌ନାସ୍ ଅଇଜାଇସା ।”

ପଲ୍ ନ ପଲ୍‌ବା ହୁମ୍‌ରି ଗଟର୍ କାତା

୧୪ ଆରି ଜିସୁ ଏ କାତାନି କଇଲା, ଗଟେକ୍ ଲକର୍ ଅଙ୍ଗୁର୍ ବାତେ ଗଟେକ୍ ହୁମ୍‌ରି ଗଟ୍ ରପିରଇଲା । ସେ ସାଉକାର୍ ଆସି ତେଇ ପଲ୍ କଜ୍‌ଲା, ମାତର୍ ମିଲେନାଇ । ୧୫ ସେଟାପାଇ ସାଉକାର୍ ଅଙ୍ଗୁର୍ ବାତର୍ ଜାଗୁଆଲ୍‌କେ କଇଲା, “ଦେକା, ଏଟା ତିନ୍ ବରସ୍ ଅଇଲା ମୁଇ ଆସି ଏ ହୁମ୍‌ରି ଗଟେ ପଲ୍ କଜ୍‌ଲିନି ମାତର୍ ମିଲାଇ ନାଇ, ଏଟା କାଟି ପାକା । ଏଟା କାଇକେ ବେକାର୍ ମାଟିକେ ମିସା କାରାପ୍ କରସି ?” ୧୬ ମାତର୍ ଜାଗୁଆଲ୍ ସାଉକାର୍‌କେ କଇଲା, “ସାଉକାର୍ ଏଟାକେ

ବରସେକ୍ ମିସା ଚାଡ଼ିଦେଉଁ, ମୁଇ ଏ ବିତ୍ତରେ ଗଚର୍ ଚାରିବେଡ଼ତି କୁନିକରି କଡ଼ ଦେବି, ^୯ ତାରୁ ପଚେ ଜଦି ପଲ୍ ଦାରଲେଡା ନିକ, ନଇଲେ ତାକେ କାଟି ପାକାଉ ।”

ଜିସୁ ବିସ୍‌ରାମ୍‌ବାରେ ଗଟେକ୍ କୁବ୍‌ଡ଼ି ମାଇଜିକେ ନିକ କଲା

^{୧୦} ତରେକ୍ ଜିସୁ ବିସ୍‌ରାମ୍‌ବାରେ ଗଟେକ୍ ପାରତନା ଗରେ ସିକିଆ ଦେଇତେରଇଲା । ^{୧୧} ତେଇ ଗଟେକ୍ ମାଇଜି ରଇଲା । ତାକେ ତୁମା ଦାରି ଅଟ୍‌ର ବରସ୍ ଜାକ କୁବ୍‌ଡ଼ି ଅଇରଇଲା । ସେ ବିଲ୍‌କୁଲ୍ ସିଦା ଅଇ ଇଣ୍ଡି ନାପାର୍‌ତେ ରଇଲା । ^{୧୨} ଜିସୁ ତାକେ ଦେକି ଲଗେ ଡାକି କଇଲା, “ଏ ନିନି ତକେ ମୁଇ, ଏ କୁବ୍‌ଡ଼ି ରଗେଅନି ନିକ କଲିନି ।” ^{୧୩} ଜିସୁ ସେ ମାଇଜିର୍ ଉପ୍‌ରେ ଆଡ଼ ସଙ୍ଗଇଲା । ସେ ମାଇଜି ସେ ଦାପ୍‌ରେସେ ସଲକ୍ ଅଇ ପର୍‌ମେସର୍‌କେ ମଇମା କର୍‌ବାର୍ ଲାଗଲା । ^{୧୪} ଜିସୁ ବିସ୍‌ରାମ୍‌ଦିନେ ସେ ମାଇଜିକେ ନିକ କଲାଟା ଦେକି ଜିଉଦିମନ୍‌ର୍ ପାରତନା ଗରର୍ ମୁକିଆ ବେସି ରିସା ଅଇଗାଲାଇ । କାଇକେ ବଇଲେ ଲକ୍‌ମନ୍‌କେ ନିକ କର୍‌ବାଟା ଗଟେକ୍ କାମ୍ ବଲି ଜିଉଦି ଲକ୍‌ମନ୍ ବାବ୍‌ତେ ରଇଲାଇ । ସେଟାର୍ ପାଇ ପାରତନା ଗରର୍ ମୁକିଅ କଇଲା, “ଗଟେକ୍ ଆଟେ କାମ୍ କର୍‌ବାକେ ତଅ ଦିନ୍ ଆଟେ, ସେ ଦିନ୍ ମନ୍‌କେ ତମେ ନିକ ଅଇବାକେ ଆସା । ମାତର୍ ବିସ୍‌ରାମ୍‌ବାରେ ନିକ ଅଇବାକେ କେବେ ମିସା ଆସାନାଇ ।”

^{୧୫} ମାତର୍ ଜିସୁ ତାକେ ଆରି ତେଇ ରଇଲା ଲକ୍‌ମନ୍‌କେ କଇଲା, “ଏ କୁଟିଆଲ୍‌ମନ୍ ! ତମେ ତମର୍ ଗରୁମନ୍‌କେ ମେଲି ପାନି କୁଆଇବାକେ ନିଆସ୍ ନାଇ କି ? ସେଟା ମିସା ଗଟେକ୍ କାମ୍‌ସେ ।”

^{୧୬} “ମୁଇ ତାକେ ନିକ କଲି ଆଟି । ଏ ମାଇଜି ଅବ୍‌ରାଆମର୍ କୁଟୁମର୍ ଲକ୍ । ସଇତାନ୍ ତାକେ ଅଟ୍‌ର ବରସ୍ ଜାକ ଦାରି ରଇଲା । ସେ ମାଇଜି ବିସ୍‌ରାମ୍ ବାରେ ନିକ ଅଇବାଟା ଟିକ୍ ନର୍‌ବ୍ କି ?” ^{୧୭} ଜିସୁ କଇଲା କାତା ସୁନି ତାର୍ ବିରଦି ଲକ୍‌ମନ୍ ଲାଜ୍ ଅଇଲାଇ । ମାତର୍ ବିନ୍ ଲକ୍‌ମନ୍ ସେ କର୍‌ବା ସବୁ କାବାଅଇଜିବା କାମ୍ ଦେକି ସାର୍‌ଦା ଅଇଗାଲାଇ ।

ସର୍‌ସୁ ମୁଞ୍ଜିର୍ ଉଦାଅରନ୍

(ମାଡ଼ିଉ ୧୩:୩୧-୩୨; ମାର୍‌କ ୪:୩୦-୩୨)

୧୮ ତାର ପଟେ ଜିସୁ କଇଲା, “ପର୍ଯ୍ୟେସରର୍ ରାଇଜ୍ କେନ୍ତ୍ରାଟା, ଆରି ମୁଇ କାଇଟା ସଙ୍ଗ୍ ସେଟା ସମାନ କର୍ବି ? ୧୯ ପର୍ଯ୍ୟେସରର୍ ରାଇଜ୍ ଗଟେକ୍ ବଡ଼ ବର୍ ଗଟର୍ ସାନଟା ମୁଞ୍ଜି ପାରା । ଗଟେକ୍ ଲକ୍ ଗଟେକ୍ ସାନଟା ମୁଞ୍ଜି ରପିଦେଲା । ସେ ମୁଞ୍ଜି ତେଇ ଗାଜା ଅଇ ବଡ଼ ଗଟ୍ପାରା ଅଇଲା ଆରି ଚଡ଼ଇମନ୍ ଆସି ତାର କେନ୍ଦାଇ ଗୁଡ଼ା ବାନ୍ଦିଲା ।”

**କମିରର ଉଦାଅରନ୍
(ମାତିଉ ୧୩:୩୩)**

୨୦ ଜିସୁ ଆରି କଇଲା, “ପର୍ଯ୍ୟେସରର୍ ରାଇଜ୍ କେନ୍ତ୍ରାଟା ଆରି କାଇଟା ସଙ୍ଗ୍ ସମାନ କରିଅଇସି ?” ୨୧ ସେଟା କମିର୍ ପାରା । ଜନ୍ଟା କି ଗଟେକ୍ ମାଇଜି ମାନେକ୍ ଗୁଣ୍ଡଟାନେ କଣ୍ଡେକ୍ କମିର୍ ପାକାଇ ଚକଟ୍ଲା ଆରି ସାରାସାରି ସେ କମିର୍, ଗୁଲାଇ ଗୁଣ୍ଡ ଆମର୍ କରାଦେଲା ।

**ଟିପୁଞ୍ଜି ବାଟେ ଜିବା ବିସଇ
(ମାତିଉ ୭:୧୩-୧୪, ୨୧:୨୩)**

୨୨ ତାର ପଟେ ଜିସୁ ତାର ସିସ୍ମାନର୍ ସଙ୍ଗ୍ ଜିରୁସାଲମେ ଗାଲାବେଲେ ଗାଉଁମନ୍‌କେ ଆରି ଗଡ଼ମନ୍‌କେ ପର୍ଯ୍ୟେସରର୍ ରାଇଜର୍ ବିସଇ ସିକାଇ ଦେଲା । ୨୩ ସେବେଲେ ଲକ୍‌ମନ୍‌ ବିଡ଼ରେଅନି ଗଟେକ୍ ଲକ୍ ଜିସୁକେ କଇଲା, “ଏ ମାପ୍‌ରୁ, ଉନା ଲକ୍‌ମନ୍‌ସେ ପାପେ ଅନି ରକିଆ ପାଇବାଇ କି ?”

ଜିସୁ ସେମନ୍‌କେ କଇଲା, ୨୪ “ଟିପୁଞ୍ଜି ଦୁଆର୍ ବାଟେ ପୁରବାକେ ଚେସ୍‌ଟା କରା । କାଇକେ ବଇଲେ ବେସି ଲକ୍‌ମନ୍ ସେ ଟିପୁଞ୍ଜିବାଟ୍‌ଦେଇ ଜିବାକେ ଚେସ୍‌ଟା କର୍ବାଇ ମାତର୍ ଜାଇ ନାପାରଡ଼ । ୨୫ ମୁଇ ଗଟେକ୍ ଗରର୍ ସାଉକାର ପାରା । ଜେଡେବଲ୍ ସେ ସାଉକାର କାପାଟ୍ ଡାବି ଦେଇସି । ସେଡ଼କି ବେଲେ ତମେ ଦୁଆରେ ଟିଆ ଅଇ ରଇସା ଆରି କାପାଟ୍ ଡକ୍ ଡକ୍ କରି ଏ ମାପ୍‌ରୁ ଆମର୍ ପାଇ କାପାଟ୍ ଉଗାଡ଼ା ! ବଲି ଜୁଆର୍ ବିଆର୍ କର୍ସା । ମାତର୍ ସେ କାପାଟ୍ ନ ଉଗାଡ଼ି ସେମନ୍‌କେ କଇସି, ‘ତମେ କନ୍‌ତିଅନି ?’ ମୁଇ ତମ୍‌କେ ମୁଲ୍‌କେ ନାଜାନି । ୨୬ ମାତର୍ ତମେ କଇସା ‘ଏ ମାପ୍‌ରୁ ଆମେ ତମର୍ ସଙ୍ଗ୍ କାଇପିଇ ଅଇରଇଲୁ, ତୁଇ ଆମର୍

ଦୁଆର ମନ୍କେ ସିକିଆ ଦେଇତେରଇଲୁସ୍ ବଲି କଇସା’ ୨୭ ଆରି ସେ ତମ୍ବେ କଇସି, ତମେ କନ୍ ଜାଗାର୍ ଲକ୍ମନ୍ ମୁଇ ତମ୍ବେ ମୁଲ୍‌କେ ନାଜାନି, ଏ କରାପ୍ କାମ୍ କରବା ଲକ୍ମନ୍, ‘ତମେ ସବୁ ମର୍ ମୁଆଟେ ଅନି ଉଟି ଜା ।’ ୨୮ ☆ଆରି ସେ ତମ୍ବେ ପାଟାଇଦେବା ଜାଗାଇଅନି ଅବରାଆମ୍ ଇସାକ୍, ଜାକୁର୍, ଆରି ପର୍ମେସରର୍ ଟାନେଅନି ଆସି ରଇଲା ବବିସତ୍ ବକ୍ତାମନ୍ ରଇବାଟା ଦେକ୍‌ସା । ମାତର୍ ପର୍ମେସର୍ ତାର୍ ରାଇଜେ ତମ୍ବେ ଜାଗା ନ ଦେଏ । ଜେତେବଲ୍ ଏଟା ଅଇସି, ସେ ବେଲା ସେଟା ଦେକି, ତମେ କାଇକାଇ କାରାପ୍ କାମ୍‌ମନ୍ କରି ରଇଲାସ୍ ସେଟା ସବୁ ଏତାଇ କରି ମାରିତପିଅଇ କାନ୍‌ସା ଆରି ଦାଡ୍ ମୁଣ୍ଟ୍ କାଡ୍‌ରି ଅଇସା । ୨୯ ଆରି ଜିଉଦି ନଇଲା ଲକ୍ମନ୍ ଏ ଦୁନିଆର୍ ସବୁ କନ୍‌ବିକନ୍‌ସି ଅନି ଆସି ପର୍ମେସରର୍ ରାଇଜେ କାଇବାକେ ବସ୍‌ବାଇ । ୩୦ ☆ଆରି ଦେକା, ସାରାସାରି ରଇଲା ଲକ୍ ଆଗତ୍ ଅଇବାଇ ଆରି ଆଗତ୍ ରଇବା ଲକ୍ମନ୍ ପଟେ ଅଇଜିବାଇ ।”

**ଜିସୁ ଜିରୁସାଲମ୍‌କେ ଦେକିକରି କାନ୍‌ଲାଇ
(ମାତିଉ ୨୩:୩୭-୩୯)**

୩୯ ସେଡ୍‌କିବେଲେ କେତେଟା ପାରୁସି ଲକ୍ମନ୍ ଜିସୁର୍ ଲଗେ ଆସି କଇଲାଇ, “ତମେ ଏ ଜାଗା ଚାଡି ଉଟି ଜା, କାଇକେ ବଇଲେ ଏରଦ୍ ତମ୍ବେ ମରାଇବାକେ ମନ୍ କଲାନି ।”

୩୨ ଜିସୁ ସେମନ୍‌କେ କଇଲା, “ତମେ ଜାଇ ସେ କଲିଆପାରା ଲକ୍‌କେ କୁଆ, ଦେକ୍ ଆଜି ଆରି କାଲି ମୁଇ ତୁମା ଚାଡାଇଲିନି ଆରି ନିକ କଲିନି । ଆରି ପର୍ଦିନ୍‌କେ ମୁଇ ମର୍ କାବା ଅଇଜିବା କାମ୍‌କଲିନି । ପର୍ମେସରର୍ ଜଜ୍‌ନାଇ ରଇଲା ବେଲା କେଟ୍‌ବା ଆଗତ୍, ମୁଇ ଏନ୍ତି କାମ୍ କରି ସାରାଇବି । ୩୩ କାଇଟା ମିସା ଅ, ମୁଇ ଆଜି, କାଲିକେ ଆରି ପର୍ଦିନ୍‌କେ ଜାଇତେ ରଇବାର୍ ଆଟେ, କାଇକେ ବଇଲେ ପର୍ମେସରର୍ ଟାନେଅନି ଆଇଲା ସବୁ ବବିସତ୍‌ବକ୍ତାମନ୍‌କେ ଜିରୁସାଲାମେସେ ମରାଇଆତଡ୍ ।”

☆ ୧୩:୨୮ ୧୩:୨୮ ମାତିଉ ୨୨:୧୩;୨୫:୩୦ ☆ ୧୩:୨୮ ୧୩:୨୮ ମାତିଉ ୮:୧୧,୧୨
 ☆ ୧୩:୩୦ ୧୩:୩୦ ମାତିଉ ୧୯:୩୦;୨୦:୧୭; ମାର୍କ ୧୦:୩୧

୩୪ ଜିସୁ କଇଲା, “ଏ ଜିରୁସାଲମର୍ ଲକ୍ମନ୍ ! ପରମେସର୍ ତମର୍ତାନେ ଜେଡକି ପାଟାଇରଇଲା ବବିସତ୍‌ବକ୍ତାମନ୍‌କେ ମାରି ମରାଇଲାସ୍ ! ଆରି ପେରିତ୍‌ମନ୍‌କେ ତରକେ ତର୍ ପାକନା ମାରି ମରାଇଲାସ୍ । ତେବେ ତମର୍ପାଇ ମର୍ ଲଗେ ଗଟେକ୍ କାତା ଆଚେ । ମାଇ କୁକୁଡା ଜେନ୍ତି ତାର୍ ଚିଆଁମନ୍‌କେ ତେନା ତଲେ ରୁଣ୍ଡାଇସି, ମୁଇ ସେନ୍ତି କେତେ ତର୍ ତମ୍‌କେ ରକିଆ କର୍ବାକେ ମନ୍ କଲି । ମାତର୍ ସେନ୍ତି କର୍ବାକେ ତମେ ନ ଦିଆସ୍ । ୩୫ ଦେକା, ତମର୍ ମନ୍ଦିର୍ ଚାଡିଦେଇ ଆଚଡ୍ । ସେଟାର୍ ପାଇ ପରମେସର୍ ଏବେ ତମ୍‌କେ ‘ପାରତନା ଗର୍ ଆରି ତମର୍ ଗଡ୍ ନିଜେ ରକିଆ କରା’ ବଲି ଚାଡି ଦେଲାଆଚେ । ମୁଇ ତମ୍‌କେ କଇଲିନି, ପରମେସର୍ ଜନ୍ ଲକ୍‌କେ ଆସିର୍ବାଦ୍ କରି ଆମର୍ ଲଗେ ପାଟାଇଲାଆଚେ ବଲି ମର୍ ବିସଇ ନେଇ, ତମେ ନ କଇବାଜାକ ମକେ ଦେକିନାପାରାସ୍ ।”

୧୪

ଜିସୁ ଗଟେକ୍ ରଗିକେ ନିକକଲା

୧ ତରେକ୍ ଜିସୁ ବିସରାମ୍‌ବାରେ ବଜି କାଇବାକେ ଗଟେକ୍ ପାରୁସି ନେତାର୍ ଗରେ ଗାଲା । ଆରି ସେମନ୍ ଜିସୁକେ କାଇଆଲେ ବୁଲ୍ ଦାର୍ବାକେ ଆକିମରାଇ ଦେକ୍‌ତେ ରଇଲାଇ । ୨ ତେଇ ଜିସୁ ତାର୍ ମୁଆଟେ ଗଟେକ୍ ପୁଲାରଗ୍ ଅଇରଇଲା ଲକ୍‌କେ ଦେକ୍‌ଲା । ୩ ତାର୍ ପଚେ ଜିସୁ ସେ ପାରୁସି ଆରି ମସାର୍ ନିୟମ୍ ସିକାଇଦେବା ଲକ୍‌ମନ୍‌କେ ପାଟାରଲା । “ମସାର୍ ନିୟମ୍ ଇସାବେ ବିସରାମ୍‌ବାରେ ଗଟେକ୍ ରଗ୍ ଅଇଲା ଲକ୍‌କେ ନିକ କର୍ବା ବିଦି ଆଚେ କି ନାଇ ?”

୪ ମାତର୍ ସେମନ୍ କାଇଟାବଲି ମିସା ନ କଇ ହୁପ୍‌ତାପ୍ ଅଇ ରଇଲାଇ । ସେଟାର୍ ପାଇ ଜିସୁ ସେ ରଗିକେ ଚିଇଲା ଆରି ନିକ କରି ପାଟାଇ ଦେଲା । ୫ ତାର୍ ପଚେ ଜିସୁ ସେମନ୍‌କେ ପାଟାରଲା, “ ବିସରାମ୍‌ବାରେ ତମର୍ ବିଡ୍‌ରେଅନି ଗଟେକ୍ କାର୍‌ଆଲେ ନିଜର୍ ପିଲା ନଇଲେ ଗଟେକ୍ ଗରୁ କୁଇସାଲେ ଅଦ୍‌ରି ରଇଲେ ତାକେ ଦାପ୍‌ରେ ଜିକି ନ ଆନାସ୍ କି ?” ୬ ଏତର୍ ମିସା ସେମନ୍ ଏ କାତାର୍ ଉତର୍ ଦେଇ ନାପାରୁଲାଇ ।

ସତ୍‌ଦରମ୍ ରଇ ସେବାକର୍‌ବାର୍

୭ ଆରି ତେଇ କାଇବାର ଆସି ରଇଲା ଲକ୍ମନ୍ ନିଜର ନିଜର ପାଇ ମୁକିଅ ଜାଗା ବାଟି ରଇଲା । ସେଟା ଜିସୁ ଦେକି କରି ସେମନ୍‌କେ ଏ ଉଦାଅରନ୍ ଦେଇ କଇଲା, ^୮ “ଜେତେବେଲା ତମ୍‌କେ କାରୁଆଲେ ବିବାଗରେ ଜିବାକେ ଡାକ୍‌ବାଇ, ସେବେଲା ମୁକିଅ ଲକ୍ମନ୍ ବସ୍‌ବା ଜାଗାଇ ଜାଇ ବସାନାଇ । କାଇକେ ବଇଲେ ସେମନ୍ ତମର୍‌ତେଇଅନି ବଡ଼ ଲକ୍‌କେ ମିସା ବିବାଗାନେ ଜିବାକେ ଡାକି ରଇବାଇ । ^୯ କେ ତମ୍‌କେ ଆରି ବଡ଼ ଲକ୍‌କେ ଡାକ୍‌ଲା ଆରେ ସେ ଆସିକରି ତମ୍‌କେ କଇସି, ‘ଆକେ ଏ ନିକ ଜାଗା ଦେସ୍’ ବଲି । ତେଇ ତମେ ଉଟି ମୁକିଅ ନଇଲା ଜାଗାଇ ଜାଇ ବସ୍‌ବାରୁ ଆରେ । ସେବେଲାଇ ତମ୍‌କେ ବେସି ଲାଜ୍ ଲାଗ୍‌ସି । ^{୧୦} ମାତର୍ ଜେତେବଲ୍ ତମ୍‌କେ ଡାକ୍‌ବାଇ, ସେଡ଼କିବେଲେ ତମେ ଜାଇ ମୁକିଅ ନଇଲା ଜାଗାଇ ବସା । ସେବେଲା ତକେ ଡାକ୍‌ଲା ଲକ୍ ଆସି କଇସି, ‘ଏ ମଇତର୍ ତୁଇ କାଇକେ ଇତି ବସିଆରୁସ୍ ? ଆଉ ଏ ନିମାନ୍ ଜାଗାଇ ବସ୍’ । ସେବେଲା ତମର୍ ସଙ୍ଗ୍ ବସ୍‌ଲା ସବୁ ଲକ୍‌ମନ୍‌ର ମୁଆଟେଅନି ଡାକିନେଇ ନିକ ଜାଗାଇ ବସାଇ ଦେଇସି । ଆରି ସବୁ ଲକ୍‌ର ମୁଆଟେ ତମେ ସନ୍‌ମାନ୍ ପାଇସା । ^{୧୧} *କେ ନିଜ୍‌କେ ବଡ଼ ଲକ୍ ବଲି ବାବ୍‌ଲାନି ତାକେ ପର୍‌ମେସର୍ ସାନ୍ କରାଇସି । ଆରି କେ ନିଜ୍‌କେ ସାନ୍ ଲକ୍ ବଲି ବାବ୍‌ସି ତାକେ ପର୍‌ମେସର ବଡ଼ କରାଇସି ।” ବଲି କଇଲା ।

^{୧୨} ତାର୍‌ପରେ ଜିସୁ ବଜିତେଇ ଡାକ୍‌ଲା ଲକ୍‌କେ କଇଲା, “ତୁଇ ଲକ୍‌ମନ୍‌କେ ବଜିତେଇ ଡାକ୍‌ବା ବେଲାଇ ତର୍ ମଇତର୍‌ମନ୍‌କେ, ବାଇମନ୍‌କେ, ନିଜର୍ ଲକ୍‌ମନ୍‌କେ ଆରି ସାଉକାର୍ ଲକ୍‌ମନ୍‌କେ ଡାକ୍ ନାଇ । କାଇକେବଇଲେ ସେମନ୍ କେତେବଲ୍ ମିସା ତକେ ଡାକିକରି ତୁଇ ଦେଲାପାରା ବଜି ବାଉଡାଇ ଦେଇପାରଡ଼ । ^{୧୩} ତେବେ ତୁଇ ବଜି କଲେ ଗରିବ୍, କାଣା, ଚଟା ଆରି ଚେରେଙ୍ଗ୍‌ରଗି ଏନ୍ତାରି ଲକ୍‌ମନ୍‌କେ ଡାକି ଦେସ୍ । ^{୧୪} ସେନ୍ତି କଲେ ପର୍‌ମେସର୍ ତକେ ଆସିର୍‌ବାଦ୍ କରୁସି । କାଇକେ ବଇଲେ ଏନ୍ତାରି ଲକ୍‌ମନ୍ ତୁଇ ଦେଲା ବଜି ବାଉଡାଇ ଦେଇ ନାପାରଡ଼ । ପର୍‌ମେସର୍ ଦରମ୍ ଲକ୍‌ମନ୍‌କେ ମଲାଟାନେଅନି ଉଟାଇଲା ବେଲେ ତକେ ପୁରୁସ୍‌କାର୍ ମିଲୁସି ।”

☆ ୧୪:୧୧ ୧୪:୧୧ ମାତିଉ ୨୩:୧୨; ଲୁକ ୧୮:୧୪

ବଡ଼ ବଜିର ଉଦାଅରନ୍
(ମାତିଉ ୨୨:୧-୧୦)

୧୫ ଜିସୁ କଇଲା ବିସଇ ସୁନିକରି ତାର ସଙ୍ଗ୍ ବଜିତେଇ କାଇବାକେ ବସି ରଇଲା ଲକ୍ମନର ବିତ୍ରେଅନି ଗଟେକ୍ ଲକ୍ କଇଲା, “କେ କେ ପରମେସରର ରାଇଜେ ତାର ସଙ୍ଗ୍ ବଜି କାଇବାକେ ବସିବାଇ, ସେଟା ତାକର୍ ପାଇ ଗଟେକ୍ ବଡ଼ ଆସିରବାଦ୍ ।”

୧୬ ଜିସୁ ସେ ଲକ୍‌କେ କଇଲା, “ତରେକ୍ ଗଟେକ୍ ଲକ୍ ବେସି ବଡ଼ ବଜି କଲା ।” ସେ ବଜିତେଇ ବେସି ଗତିଆମନ୍‌କେ ଡାକି ରଇଲା । ୧୭ ଆରି ରାୟବାଟା ଟିକ୍ ଅଇଲା ପତେ ସାଉକାର୍ ତାର ଗତିଦାଙ୍ଗ୍‌ତାକେ ଡାକି କଇଲା, “ମୁଇ ବଜିର ପାଇ ଡାକ୍‌ଲା ଲକ୍‌କେ ଜାଇ କଅ, କାଇବାଟା ଅଇଗାଲାବେ କାଇବାକେ ଆସତ୍ ।” ୧୮ ମାତର ଲକ୍ମନ ଗଟେକ୍ ରକାମ୍ କଇଲାଇ, “ମକେ କାମ୍ ଆତେ, ନ ଆସୁ” ବଲି । ଗଟେକ୍ ଲକ୍ କଇଲା “ମୁଇ ନୁଆ ବେତା ଗେନ୍‌ଲି ଆତି ସେ ବେତା ଦେକ୍‌ବାକେ ଜିବି । ଆସି ନାପାରି, ଦୟାକରି ତର ସାଉକାର୍‌କେ ଅଲପ୍ କଇଦେସ୍ ।” ୧୯ ଆରି ଗଟେକ୍ ଲକ୍ କଇଲା, “ମୁଇ ପାଁଟ୍‌ମୁଣ୍ଟ୍ ଗରୁ ଗେନ୍‌ଲି ଆତି, ଗରୁମନ୍‌କେ କସିକରି ଦେକ୍‌ବାକେ ଗାଲିନି । ଆସିନାପାରି ଦୟାକରି ତର ସାଉକାର୍‌କେ ଅଲପ୍ କଇଦେସ୍ ।” ୨୦ ଆରି ଗଟେକ୍ ଲକ୍ କଇଲା, “ମୁଇ ନୁଆରେ ବିବା ଅଇଆତି, ତେବେ ମୁଇ ଆସି ନାପାରି ।”

୨୧ ତାର ପତେ ସେ ଗତିଦାଙ୍ଗ୍‌ତା ଆସି ସାଉକାର୍‌କେ ଏ ସବୁ କାତା ଜାନାଇଲା । ସେଟା ସୁନି ସାଉକାର୍ ବେସି ରିସାଅଇଜାଇ ତାକେ କଇଲା, “ଦାପ୍‌ରେ ଜାଇକରି ନଅରେ ଆରି ଗାଉଁ ମନ୍‌କେ ରଇଲା ଗରିବ୍, କାଣା, ଚଟା, ବଇରା ଆରି ତେରେଙ୍ଗ୍‌ରଗିମନ୍‌କେ ଇତି ଡାକି ଆନ୍ ।” ୨୨ ସେ ଗତିଦାଙ୍ଗ୍‌ତା ଜାଇକରି ସାଉକାର୍ କଇଲାପାରା ଲକ୍ମନ‌କେ ଆନଲା । ତାର ପତେ ଗତିଦାଙ୍ଗ୍‌ତା ତାର ସାଉକାର୍‌କେ କଇଲା, “ଏ ସାଉକାର୍ ତୁଇ କଇଲା ଇସାବେ ମୁଇ ଡାକିଆନ୍‌ଲି । ଏଲେ ମିସା ଆରି କେତେ ଲକ୍‌ର ପାଇ ଜାଗା ଆତେ ।” ୨୩ ଆରି ସାଉକାର୍ ସେ ଗତିଦାଙ୍ଗ୍‌ତାକେ କଇଲା, “ଗଡ଼ର ସତକ୍ ପାଲି ରଇଲା ଲକ୍ମନ‌କେ ଆରି ଗାଏଁ ରଇଲା ଗରିବ୍ ଲକ୍ମନ‌କେ ଜାଇକରି ଡାକିଆନ୍ । ମର୍ ଗରେ ଲକ୍ ପୁରୁନ୍ ଅଅଡ଼ ବଲି ମୁଇ

ମନ୍ କଲିନି ।” ୨୪ ତାରପଟେ ଜିସୁ କଇଲା, “ମୁଇ ଜନ୍ ଲକ୍ମନ୍‌କେ ପରତୁମ୍ ଡାକିରଇଲି, ସେମନ୍ କଣ୍ଠେକ୍ ମିସା ଚାକି ନାପାରତ୍ ।”

**ସିସ୍ ଅଇବାର୍ ମୁଲିଅ
(ମାତିଉ ୧୦:୩୭-୩୮)**

୨୫ ତରେକ୍ ବେସି ଲକ୍ମନ୍ ଜିସୁର୍ ସଙ୍ଗ୍ ଜାଇତେ ରଇଲା । ଆରି ସେ ପର୍ବାଟେ ବୁଲିକରି ସେମନ୍‌କେ କଇଲା । ୨୬ ☆ “ଜେ ମର୍ ଲଗେ ଆସିକରି ନିଜର୍ ବାବା, ମାଆ, ମାଇଜି ପିଲା, ବାଇ ବଇନି ଆରି ନିଜ୍‌କେ ମର୍ତେଇଅନି ଅଦିକ୍ ଆଲାଦ୍ କରସି, ସେ ମର୍ ସିସ୍ ଅଇନାପାରେ । ୨୭ ☆ ଗଟେକ୍ ଲକ୍ ମର୍ ପଟେ ପଟେ ଇଣ୍ଟ୍‌ବାର୍‌ଆଲେ, ତାକେ ଦିଆଅଇଲା କୁରୁସ୍ ବଇକରି ନ ଇଣ୍ଟେ ବଇଲେ, ସେ କେବେ ମର୍ ସିସ୍ ଅଇନାପାରେ । ୨୮ ତମେ ଜଦି ଗଟେକ୍ ବଡ଼ ଗର୍ ବାନ୍ଦିବାକେ ମନ୍ କଲାସିନି ବଇଲେ, ବାନ୍ଦିବା ଆଗତୁ କେତେକ୍ କର୍ତ ଅଇସି ସେଟା ବସି କରି ଇସାବ୍ କରସା । ଆରି ସେ ଗରର୍ ସବୁ କାମ୍ କରିସାରାଇବାକେ ତମର୍ ଲଗେ ସେଡ଼କି ଡାବୁ ଆଚେକି ନାଇ ବଲି ଇସାବ୍ କରିଦେକ୍‌ସା । ୨୯ ତମେ ଜଦି ଇସାବ୍ କରି ନ ଦେକ୍‌ଲେ ଗର୍ କାମ୍ ଆରାମ୍ କରି ସାରାଇ ନାପାରାସ୍ । ସେ କାମ୍ କରି ନ ସାରାଇଲେ ତମ୍‌କେ ଦେକ୍‌ବା ଲକ୍ମନ୍ ଆସିକରି ଲାଜକରି ଦେବାଇ । ୩୦ ସେମନ୍ କଇବାଇ, ଏ ଲକ୍ ବଡ଼ଟା ଗର୍ ବାନ୍ଦିବାର୍ ଆରାମ୍ କଲା, ମାତର୍ ସାରାଇବାର୍ ନାପାରଲା ।”

୩୧ ଆରି ଜିସୁ କଇଲା, “ଗଟେକ୍ ରାଜା ଦସ୍‌ଅଜାର୍ ସନିଅ ଦାରି, କଡେଅଜାର୍ ସନିଅ ରଇଲା ରାଜାସଙ୍ଗ୍ ଜୁଇଦ୍ କର୍ବାର୍ ଆଇଲେ, ପରତୁମ୍ ତାର୍ ସନିଅମନ୍ ସଙ୍ଗ୍ ବସିକରି ତାର୍ ଦସ୍‌ଅଜାର୍ ସନିଅମନ୍ ସଙ୍ଗ୍ ଜୁଇଦ୍ କଲେ ଜିତି ଅଇସି କି ନାଇ ବଲି ଜଜ୍‌ନା ନ କରେକି ? ୩୨ ଜଦି ସେ ରାଜା ଜିତି ନସି ବଲି ବାବ୍‌ଲେ ସେମନ୍ ଦୁରିକେ ରଇଲା ବେଲେସେ, ଏ ରାଜା ତାର୍ କେତେଟା ଲକ୍‌କେ ପାଟାଇ କରି, ଜୁଇଦ୍ ନ କରି ସାକ୍ତିର୍ ରାଜିନାମା କର୍ବାକେ କଇସି । ୩୩ ତମେମିସା ସେନ୍ତାରିସେ ମର୍ ସିସ୍ ଅଇବାକେ ମନ୍ କଲେ ତମର୍‌ତେଇ ରଇଲା

☆ ୧୪:୨୭ ୧୪:୨୭ ମାତିଉ ୧୦:୩୭ ☆ ୧୪:୨୭ ୧୪:୨୭ ମାତିଉ ୧୦:୩୮; ୧୭:୨୪; ମାର୍କ ୮:୩୪; ଲୁକ୍ ୯:୨୩

ସରୁଟା ଚାଡ଼ିଦେବାକେ ମନ୍ କରବାର ଆତେ । ନଇଲେ ତମେ ମର୍ ସିସ୍ ଅଇ ନାପାରାସ୍ ।”

ତପ୍ପରା ରଇବା ନୁନ୍
(ମାତିଉ ୫:୩; ମାର୍କ ୯:୫୦)

୩୪ “ନୁନ୍ ଗଟେକ୍ ବଡ଼ିଆ ଦିନ୍ସୁ । ନୁନ୍ ଜଦି ନୁନ୍ ପାରା କରିଆ ନ ଅଇଲେ ସେଟା ଆରିତରେକ୍ କେନ୍ତ୍ର ନୁନ୍ପାରା କରିଅଇସି । ୩୫ ସେଟା ମାଟି କି କଡ଼ କରବାକେ ମିସା କାମେ ନ ଆସେ । ସେଟା ପିଙ୍ଗି ଦେବାରସେ ଅଇସି । ଜାକେ ସୁନ୍ଲୀପାରା କାନ୍ ଆତେ ସେ ସୁନ୍ ।”

୧୫

ଆଜ୍ଞା ମେଣ୍ଟା
(ମାତିଉ ୧୮:୧୨-୧୪)

୧ *ଦିନେକ୍ ଜିସୁ କଇବା କାତା ସୁନ୍ବାକେ ସିସ୍ତୁ ମାଙ୍ଗ୍ବା ଲକ୍ମନ୍ ଆରି ଏନ୍ତ୍ର ବେସି ପାପିଲକ୍ମନ୍ ତାର୍ ଲଗେ ଆଇତେ ରଇଲାଇ । ୨ ତେଇ ପାରୁସି ଲକ୍ମନ୍ ଆରି ନିୟ୍ମ୍ ସିକାଇ ଦେବା ଲକ୍ମନ୍, ଏଟା ଦେକି ତାର୍ ବିରଦେ ଏନ୍ତ୍ର କଇବାର୍ ବସ୍ଲାଇ । “ଏ ଲକ୍ମକେ ଦେକା, ସେ ପାପି ଲକ୍ମନ୍ର ସଙ୍ଗ୍ ମଇତର୍ ପାରା ଅଇ ତାକ୍ ସଙ୍ଗ୍ ମିସ୍ତେ କାଇଲାନ୍ତି ।” ୩ ସେଟାର୍ ପାଇ ଜିସୁ ସେମନ୍କେ ଏ ଉଦାଅରନ୍ କଇଲା ।

୪ “ଜଦି ତମର୍ ବିତ୍ତରେ ଗଟେକ୍ ଲକ୍ମର୍ ସଏଟା ମେଣ୍ଟା ରଇସି ଆରି ସେ ବିତ୍ତରେଅନ୍ତି ଗଟେକ୍ ଆଜିଜାଇସି ବଇଲେ ତମେ କାଇଟା କରସା ? ସେ ନବେ ନଅଟା ମେଣ୍ଟାମନ୍କେ ଚାରତ୍ବଲି ଚାଡ଼ିଦେଇ, ଆଜିଗାଲା ଗଟେକ୍ ମେଣ୍ଟା ମିଲ୍ବାଜାକ ନ କଜାସ୍ କି ? ୫ ଆରି ଜେତେବଲ୍ ସେ ମେଣ୍ଟା ମିଲାଇସି, ବେସି ସାରଦା ଅଇ ମେଣ୍ଟାକେ କନ୍ଦେ ବଇକରି ଗରେ ଦାରିଆଇସା । ୬ ତମେ ଗରେ କେଟ୍ଲା ପତେ, ତମର୍ ମଇତର୍ମନ୍କେ ଆରି ଗର୍ ଲଗର୍ ଲକ୍ମକେ ତାକିକରି ‘ମର ସଙ୍ଗ୍ ସାରଦା କରା, କାଇକେବଇଲେ ମର୍ ଆଜିଗାଲା ମେଣ୍ଟା ମିଲ୍ଲା’ ବଲି କଇସା । ୭ ସେନ୍ତାରି ମୁଇ ତମ୍କେ କଇଲିନ୍ତି, ‘ଆମେ ପାପି ଲକ୍ମନ୍ ନଉଁ’ ବଲି ବାବ୍ତେରଇବା ନବେ ନଅଟା ଦରମ୍

☆ ୧୫:୧ ୧୫:୧ ଲୁକ୍ ୫:୨୯,୩୦

ଲକ୍ଷ୍ୟମାନ ରକ୍ଷାକାର୍ଯ୍ୟ ଗଣେକ ପାପି ଲକ୍ଷ୍ୟ ନିଜେ ‘ମୁଁ ଗଣେକ ପାପି’ ବଳି ଏତାଉଅଛି । ପତେ ମନୁବାଦ୍‌ଲାଇ କରି ପରମେସରର ଲଗେ ଆଉଅଛି । ସେ ନବେ ନଅଟା ଦରମ୍ ଲକ୍ଷ୍ୟମାନରତେଇ ଅନି ଏ ଗଣେକ ଲକ୍ଷ୍ୟ ପାଇ ସରଗେ ଅଦିକ୍ ସାରଦା କରବାଇ ।”

ଆଜିରୁଲା ରୁପା ଟାଙ୍ଗା

୮ ଏ କାତା ସୁନାଇ ଦେବାକେ ଜିସୁ ଆରି ଗଣେକ କାତାନି ସେମାନକେ କଇଲା, “ଜଦି ଗଣେକ ମାଇଜିର ଦସଟା ରୁପାଟାଙ୍ଗା* ରଇଲା । ତେଇଅନି ଗଣେକ ଅଦଲି ଆଜିଗାଲେ ସେ କାଇଟା କରସି ? ସେ ବଡ଼ି ଲାଗାଇ ଗୁଲାଇ ଗର ସେଟା ନ ମିଲ୍‌ବାଜାକ ବାଡାନ ରୁଡାନ କରି କଇସି । ୯ ଆରି ସେଟା ମିଲ୍‌ଲା ଦାପରେ ତାର ମଇତରମାନକେ ଆରି ଗର ଲଗେ ରଇଲା ଲକ୍ଷ୍ୟମାନକେ କଇସି ‘ତମେ ମରସଙ୍ ସାରଦା କରା, କାଇକେ ବଇଲେ ଆଜିଗାଲା ରୁପାଅଦଲି ତାରୁ ମକେ ମିଲ୍‌ଲା ଆଟେ’ । ୧୦ ମୁଇ ତମକେ କଇଲିନି, ସେନ୍ତିସେ ଗଣେକ ପାପି ଲକ୍ଷ୍ୟ ମାପରୁରତେଇ ମନୁବାଦ୍‌ଲାଇସି ବଇଲେ, ପରମେସରର ଦୁତମାନ ବେସି ସାରଦା କରବାଇ ।”

ଆଜ୍ଞା ପିଲା

୧୧ ଏ କାତା ବୁଜାଇ ଦେବାକେ ଜିସୁ ସେମାନକେ ଆରି ଗଣେକ କାତାନି କଇଲା । ଗଣେକ ଲକ୍ଷ୍ୟକେ ଦୁଇଟା ପିଲାମାନ ରଇଲାଇ । ୧୨ ଦିନେକ୍ ସାନ ପଅ ତାର ବାବାକେ କଇଲା, “ଏ ବାବା ତର ଦନ୍ ମରବାଗେ ଜେଡକି ଅଇସି, ସେଟା ଏବେ ମକେ ଦେଇପାକା ।” ସେଟାର ପାଇ ତାର ବାବା ତାର ଦନ୍ ଦୁଇବାଗ୍ କରି ତାର ପିଲାମାନକେ ଦେଲା । ୧୩ ଅଲପ୍ ଦିନ୍ ଗାଲା ପତେ ସାନ ପିଲା ତାର ବାଗର ସବୁ ଦନ୍ ବିକିଦେଇ ମିଲ୍‌ଲା ତାରୁ ଚୁଲିଆଇ ଗଣେକ ଦୁର୍ ଦେସେ ଉଟିଗାଲା । ଆରି ତାର ସବୁ ତାରୁ ନିଜେ ମନକଲା ଇସାବେ କରଟ କଲା । ୧୪ ତାରଲଗେ ରଇଲା ସବୁ ତାରୁ ସାରାଇଦେଲା । ପତେ ସେ ଦେସର ଗୁଲାଇ ବାଟେ ମରଡ଼ି ଅଇଲା । ଆରି କାଇଟା ମିସା ଗେନି କାଇବାକେ ତାରଲଗେ ତାରୁ ନ ରଇଲା । ୧୫ ତେବେ ସେ ଗଡେ ଗଣେକ ଲକ୍ଷ୍ୟ ଗରେ କୁଲି ମିଲ୍‌ସି କାଇକି ବଲି କାମ୍

* ୧୫:୮ ୧୫:୮ ଗଣେକ ରୁପା ଟାଙ୍ଗାର ଦାମ୍, ଗଣେକ ଦିନରକୁଲି ତାରୁ ଏଡକି

କନ୍ଦୁ ବାବୁର ଗାଲା । ସେ ଲୁକ୍ ତାକେ ଗୁସ୍ତରି ଚାରାଇବା କାମ୍ ଦେଲା ।
 ୧୭ ଆରି ତାକେ ବେସି ବୁକ୍ ଲାଗୁତେ ରଇଲା । ତାକେ ଗୁସ୍ତରିମନର୍
 କାଦି କାଇବାକେ ମନ୍‌ଲାଗଲା ମାତର୍ ସେ କାଦି ମିସା ଦେଅଡ଼ ନାଇ
 । ୧୮ ସେବେଲେ ତାକେ ଚେଡ଼ନା ଆଇଲାଜେ ସେ ମନେ ମନେ ଏଡ଼ି
 ବାବୁଲା । ମର୍ ବାବୁର ଗରେଡା କାମ୍ କର୍ବା ଗତିଦାଙ୍ଗ୍‌ତାମନର୍
 କେଡେ କାଦି ଉର୍ରି ଗାଲାନି । ମାତର୍ ମୁଇ ଇଡି ବୁକେ ମରିଜିବିବେ
 । ୧୯ ସେଟାରପାଇ ମୁଇ ଏ ଜାଗା ଚାଡ଼ିକରି ମର୍ ବାବୁର ଲଗେ
 ବାଉଡି ଜିବି । ଆରି ତାକେ କଇବି, “ଏ ବାବା ମୁଇ ପର୍ମେସର୍
 ଆରି ତର୍ ବିରଦେ ପାପ୍ କରିଆତି । ୧୯ ମୁଇ ଆରି ତର୍ ପିଲା
 ଅଇବାର୍ ଅଦିକାର୍ ନାଇ ଆରି ତର୍ ଗତିଦାଙ୍ଗ୍‌ତାମନର୍ ବିତ୍ତରେ
 ଗଟେକ୍ ଗତିଦାଙ୍ଗ୍‌ତା ଅଇ ରଇବି” ବଲି କଇବି । ୨୦ ଆରି ସେ ଜାଗା
 ଚାଡ଼ି ବାବୁର ଲଗେ ଜିବାକେ ବାରଇଲା ।

ମାତର୍ ସେ ପିଲା ଦୁରିକେ ରଇଲାବେଲେ ବାବା ତାକେ ଦେକ୍‌ଲା
 । ତାକେ ଦେକି ବେସି କଲିକରମ୍ ଅଇ, ତାର୍ ଲଗେ ପାଲାଇ
 ଆସି ପାଟାଲିକରି ରୁମ୍‌ଲା । ୨୧ ସେ ପିଲା ତାର୍ ବାବାକେ କଇଲା,
 “ଏ ବାବା ମୁଇ ପର୍ମେସର୍‌ର ବିରଦେ ଆରି ତର୍ ବିରଦେ ପାପ୍
 କଲିଆତି ସେଟାରପାଇ ତର୍ ପିଲା ଅଇବାର୍ ମର୍ ଅଦିକାର୍ ନାଇ
 ।” ୨୨ ମାତର୍ ତାର୍ ବାବା ନିଜର୍ ଗତିଦାଙ୍ଗ୍‌ତାମନ୍କେ କଇଲା,
 “ତମେ ବେଗି ଜାଇକରି ସବୁର୍ଟାନେଅନି ନିମାନ୍ ଚକାପତିଆ ତାକେ
 ପିନ୍ଦାଇଦିଆସ୍ । ଆରି ତାର୍ ଆଙ୍ଗ୍‌ଟି ମୁନ୍ଦି ପିନ୍ଦାଆ । ତାର୍ ଗଡେ
 ପାଣ୍ଡୁଇ ପିନ୍ଦାଇଦିଆସ୍ ।” ୨୩ ଆରି ତାର୍ ଗତିଦାଙ୍ଗ୍‌ତାମନ୍କେ
 କଇଲା, “ଆମର୍‌ତେଇ ରଇଲା ସବୁର୍ଟାନେଅନି ଗଟେକ୍ ଗାଗଡ଼
 ରଇବା ପସୁ ଆନି ମାରା, ଆରି ଆମେ ସାର୍‌ଦା ଅଇକରି ବଜି କରୁ
 । ୨୪ କାଇକେ ବଇଲେ ମର୍ ପିଲା ମରିଜାଇରଇଲା, ଆରି ଏବେ
 ଜିବନ୍ ଅଇଲା ଆଚେ । ସେ ଆଜିଜାଇ ରଇଲା ଏବେ ମିଲ୍‌ଲା ଆଚେ
 ।” ସେଟାରପାଇ ସେମନ୍ ବଜି କର୍ବାର୍ ବସ୍‌ଲାଇ ।

୨୫ ସେ ବେଲା ତାର୍ ବଡ଼ ପଅ ତାସ୍‌ପଦାଇ ରଇଲା । ସେ ବାଉଡି
 କରି ଗର୍ ଲଗେ ଆଇବା ବେଲାଇ ବାଜାବାଇଦ୍ କରି ନାଟ୍‌ଗିଡ଼
 କର୍ବାଟା ସୁନ୍‌ଲା । ୨୬ ସେ ଗଟେକ୍ ଗତିଦାଙ୍ଗ୍‌ତାକେ ଡାକିକରି
 ପାଟାରୁଲା, “ଇଡି କାଇଟା ଅଇଲାନି ?” ୨୭ ଗତିଦାଙ୍ଗ୍‌ତା ତାକେ

କଲଲା, “ତର ବାଇ ଗରେ ବାଉଡ଼ି ଆଇଲା ଆଚେ । ଆରି ତର ବାବା, ତର ବାଇ ଜର୍ଦ୍ଦୁକା ନ ଅଇ ଜିବନ୍ ଅଇ ଆଇଲାକେ ଗଟେକ୍ ଗାଗଡ଼ ପସୁକେ ମାର୍ଲଲା ଆଚେ ।”

୨୮ ଏ କାତା ସୁନି ବଡ଼ ପଅ ବେସି ରିସା ଅଇଗାଲା । ସେ ଗର୍ ବିଡ଼ରେ ପୁରେ ମିସା ନାଇ । ମାତର୍ ତାର ବାବା ବଡ଼ ପଅର୍ ଲଗେ ଜାଇ ଗରେ ଜିବାକେ ବୁଜାଇବାର୍ ଦାରଲା । ୨୯ ମାତର୍ ବଡ଼ ପଅ ତାର ବାବାକେ କଲଲା, “ଦେକ୍, ମୁଇ ଏଡେକ୍ ବରସ୍ ଜାକ ଗଟେକ୍ ଗତିଦାଙ୍ଗଡ଼ା ପାରା ତର୍ ସେବା କଲିନି ଆରି ତର୍ କାତା ମାନି କରି ରଇଲି । ତୁଇ ମକେ କାଇଟା ଦେଇଆରୁସ୍ ? ମର୍ ମଇତର୍ମନର୍ ସଙ୍ଗ୍ ବଜି କରା ବଲି ଗଟେକ୍ ସାନ୍ଟା ପସୁ ମିସା ଦେଉସ୍ ନାଇ । ୩୦ ମାତର୍ ତର୍ ଏ ସାନ୍ ପଅ ସବୁ ଦନ୍ ଦାରିଜାଇ ବେସିଆମନ୍କେ ଦେଇ ସାରାଇଦେଲା ଆରି ସେ ଗରେ ବାଉଡ଼ି ଆଇଲାକେ ତୁଇ ତାର୍ ପାଇ ଗଟେକ୍ ଗାଗଡ଼ା ପସୁକେ ମାର୍ଲୁସ୍ !” ୩୧ ସେବେଲେ ତାର୍ ବାବା ବଡ଼ ପଅକେ କଲଲା, “ଏ ନୁନା ତୁଇତା ସବୁ ବେଲା ମର୍ ସଙ୍ଗ୍ ରଇଲୁସ୍ନି ଆରି ମର୍ ଜେଡ଼କି ଦନ୍ ଆଚେ ସେଟା ସବୁ ତର୍ଟାସେ । ୩୨ ମାତର୍ ତର ବାଇ ମରିଜାଇରଇଲା । ଏବେ ସେ ଜିବନ୍ ଅଇଆଚେ ସେ ଆଜିଜାଇରଇଲା ମାତର୍ ଏବେ ମିଲ୍ଲା ଆଚେ । ସେଟାର୍ପାଇ ଆମେ ସାରଦା କର୍ବାର୍ ରଇଲା ।”



ବିସ୍ବାସ କର୍ବା ଗୁମସ୍ତା

୧ ଜିସୁ ତାର୍ ସିସ୍ମାନକେ ଗଟେକ୍ କାତାନି ବୁଜାଇ କଲଲା । “ଗଟେକ୍ ସାଉକାର୍ ଲକ୍ ରଇଲା । ତାର୍ ଦନ୍ ଇସାବ୍ କିତାବ୍ କର୍ବାକେ ଗଟେକ୍ ମୁକିଅ ଗତିଦାଙ୍ଗଡ଼ା ରଇଲା । ଆରି ସେ ସବୁ ଦନ୍ ଏନେତେନେ କରିଦେଲାନି ବଲି ଗଟେକ୍ ଲକର୍ତେଇ ଅନି ସାଉକାର୍ ସୁନ୍ଲା ।” ୨ ସେଟାର୍ ପାଇ ସାଉକାର୍ ମୁକିଅ ଗତିଦାଙ୍ଗଡ଼ାକେ ଡାକି କଲଲା, “ତୁଇ ଟିକ୍ ସଙ୍ଗ୍ ଇସାବ୍ ପତର୍ କରୁସ୍ ନାଇ ବଲି ମୁଇ ବେସି କାତା ସୁନ୍ଲିନି । ମର୍ ସବୁ ତାବୁର୍ ଇସାବ୍ ମକେ ଦେ । କାଇକେ ବଇଲେ ତୁଇ ଆରି ମର୍ ମୁକିଅ ଗତିଦାଙ୍ଗଡ଼ାର୍ କାମେ ନ ରଉସ୍ ।” ୩ ସେବେଲା ସେ ମୁକିଅ ଗତିଦାଙ୍ଗଡ଼ା ମନେ ମନେ ଏତାଇଲା । ଏବେ ମୁଇ କାଇଟା କର୍ବି ? ମର୍ ସାଉକାର୍

କାମେ ଅନି ବାରକରିଦେବି ବଲି କଇଲା ଆଚେ । ମାଟି ମାରବାକେ ମକେ ବପୁ ନାଇ ଆରି ବିକ୍ ମାଗ୍‌ବି ବଇଲେ ମିସା ଲାଜ୍ ଲାଗ୍‌ଲାନ୍ତି । ୪ ମୁଇ କାଇଟା କର୍‌ବାର୍ ଆଚେ ବଲି ଜାନି ଆତି । ମକେ ଏ କାମେଅନି ବାର କରିଦେଲା ପଚେ କାଇଟା କଲେ ଲକ୍‌ମନର୍ ଗରେ ମକେ ଡାକି ନିକକରି ଦେକ୍‌ବାଇ ବଲି ବାବ୍‌ଲା ।

୫ ତେବେ ସେ ମୁକିଅ ଗତିଦାଙ୍ଗ୍‌ତା ତାର୍ ସାଉକାର୍‌ତେଇଅନି ଉଦାର୍ ନେଲା ସବୁ ଲକ୍‌କେ ଡାକ୍‌ଲା । ପର୍‌ତୁମ୍ ଗଟେକ୍ ଲକ୍‌କେ ଡାକି ପାଟାର୍‌ଲା, “ତୁଇ ମର୍ ସାଉକାର୍‌କେ କେତେକ୍ ଦେବାର୍ ଆଚେ ?” ୬ ସେ ଲକ୍ ଡାକେ “ସଏ ଡାବା ଚିକନ୍ ।” ବଲି କଇଲା । ମୁକିଅ ଗତିଦାଙ୍ଗ୍‌ତା ଡାକେ କଇଲା, “ତମେ ଉଦାର୍ ନେଲା ପତିଲଗେ ଉନା କରି ପଟାସ୍ ଡାବା ବଲି ଲେକିଦେସ୍ ।” ୭ ତାର୍ ପଚେ ସେ ଆରି ଗଟେକ୍ ଲକ୍‌କେ ପାଟାର୍‌ଲା, “ତମେ କେତେକ୍ ଦେବାର୍ ଆଚେ ?” ଉଦାର୍ ନେଲା ଲକ୍ କଇଲା, “ଅଜାର୍ ବାସ୍‌ତା ଦାନ୍ ।” ମୁକିଅ ଗତିଦାଙ୍ଗ୍‌ତା ଡାକେ କଇଲା “ତୁଇ ଉଦାର୍ ନେଲା ପତିତେଇ ଉନାକରି ଆର୍ ସଅ ବାସ୍‌ତା ବଲି ଲେକିଦେସ୍ ।”

୮ ଏଟାର୍ ପାଇ ସେ ମିରୁଆ ମୁକିଅ ଗତିଦାଙ୍ଗ୍‌ତାକେ ତାର୍ ସାଉକାର୍ କଇଲା, “ତୁଇ ବେସି ଚାଲାକି ଅଇକରି ଏନ୍ତି କାମ୍ କରିଆରୁସ୍ । କାଇକେ ବଇଲେ ଏ ଦୁନିଆର୍ ଲକ୍‌ମନ୍ ନିଜର୍ କାମ୍ କର୍‌ବାକେ ପର୍‌ମେସର୍ ଲକ୍‌ମନର୍ ଟାନେଅନି ଅଦିକ୍ ଚାଲାକି ।”

୯ ଆରି ଜିସୁ କଇଲା, “ସେଟାର୍ ପାଇ ମୁଇ ତମ୍‌କେ କଇଲିନି, ଲକ୍‌ମନ୍‌କେ ଏ ଦୁନିଆର୍ ଦନ୍ ଦେଇ କରି ନିଜର୍ ନିଜର୍ ପାଇ ମଇତର୍ କରା । ସେନ୍ତାରି କଲେ ଜେଡେବଲ୍ ତମର୍ ଦୁନିଆର୍ ଦନ୍ ସାରିଜାଇସି, ପର୍‌ମେସର୍ ତମ୍‌କେ କାଲ୍‌କାଲ୍ କୁଗ୍‌କୁଗ୍ ରଇବା ଗରେ ଡାକି ନେଇସି । ୧୦ କେ ସାନ୍ ବିସଇ ସଡ୍‌ସଙ୍ଗ୍ କର୍‌ସି, ସେ ବଡ୍ ବିସଇ ସଡ୍‌ସଙ୍ଗ୍ କର୍‌ସି । ସେନ୍ତାର୍‌ସେ କେ ସାନ୍ ବିସଇ ନେଇକରି ସଡ୍ କାମ୍ ନ କରେ ସେ ବଡ୍ ବିସଇତେଇ ମିସା ସଡ୍ କାମ୍ ନ କରେ । ୧୧ ପର୍‌ମେସର୍ ତମ୍‌କେ ଏ ଦୁନିଆଇ ଦେଲା ତାରୁ ଆରି ଦନର୍ ବିସଇ ସତଇସେ ନ କରାସ୍ ବଇଲେ ସରଗର୍ ଦନ୍ ତମ୍‌କେ ମିଲ୍‌ବାକେ ନ ଦେଏ । ୧୨ ତମେ ବିନ୍ ଲକ୍‌ମନର୍ ଦନ୍ ସଡ୍‌ବାବେ ନ ସଙ୍ଗାଇଲେ ନିଜର୍ ଦନ୍ କେ ତମ୍‌କେ ଦେଇସି

? ୧୩ ✨ଗଟେକ୍ ଗତିଦାଈଁତା ଦୁଇଟା ସାଉକାରର ଦାଈଡ଼ ସମାନ୍ ବାବେ କରିନାପାରେ । କାଈକେବଈଲେ ସେ ଗଟେକ୍ ସାଉକାରକେ ଆଲାଦ୍ କରସି ଆରି ଗଟେକ୍ ସାଉକାରକେ ଗିନ୍ କରସି । ଗଟେକ୍ ସାଉକାରକେ ନାମସି ଆରି ଗଟେକକେ ନ ନାମେ । ସେନ୍ତାରସେ ଗଟେକ୍ ଲକ୍ ଏକାତରେକ୍ ଏ ଦୁନିଆର୍ ଦନ୍ ଆରି ପର୍ମେସରକେ ସମାନ୍ବାବେ ସେବା କରିନାପାରେ ।”

ଜିସୁର୍ କେତେଟା କାତା

(ମାତିଉ ୧୧:୧୨-୧୩; ୫:୩୧-୩୨; ମାର୍କ ୧୦:୧୧-୧୨)

୧୪ ପାରୁସି ଦଲର୍ ଲକ୍ମନ୍ ଏ ସରୁ କାତା ସୁନି ଜିସୁକେ ଟାପରା କଲାଈ, କାଈକେ ବଈଲେ ତାରୁ ଆକା ସେମନ୍ର ଜିବର୍ ଦନ୍ ବଲି ବାବ୍ତେ ରଈଲାଈ । ୧୫ ଜିସୁ ସେମନ୍କେ କଈଲା, “ତମେ ଲକ୍ମନ୍ ମୁଆଟେ ନିକ ବଲି ଦେକାଈ ଅଈଲାସନି । ମାତର୍ ତମର୍ ମନ୍ବିଡ଼ରେ କାଈଟା ଆଟେ ସେଟା ପର୍ମେସର୍ ଜାନିଆଟେ । ଜନ୍ ଦିନ୍ସୁ ଲକ୍ମନ୍ ବେସି ମୁଲିଅ ବଲି ବାବ୍ଲାଈନି ସେଟା ପର୍ମେସର୍ ଦେକ୍ବା ଈସାବେ ବେସି ଗିନ୍ର୍ ବିସଈ ।”

୧୬ ✨“ତୁବନ୍ ଦେଉ ଜଅନ୍ ଆସି ନିକ କାତା କଈବାଟା ଆରାମ୍ କରବା ଜାକ୍, ମସାର ନିୟମ୍ ଆରି ବବିସତ୍ତବକ୍ତାମନ୍ର କାତା ତମ୍କେ କାତାଈ ନେଈତେ ରଈଲା । ଜଅନ୍ ଆଈଲା ପଟେ, ପର୍ମେସର୍ ରାଈଜର୍ ସୁବ୍ କବର୍ ଜାନାଈଲାଈନି । ଆରି ନିଜର୍ ବପୁସଈ ପର୍ମେସର୍ ରାଈଜେ ଜିବାକେ ବେସି ଲକ୍ମନ୍ ଟେସ୍ଟା କଲାଈନି । ୧୭ ✨ସରଗ୍ ଆରି ଦୁନିଆ ନସିଗାଲେ ମିସା ନିୟମେ ଲେକା ଅଈରଈଲାଟା ଗଟେକ୍ ମିସା ଅଈକର୍ ନ ନସେ ।”

୧୮ ✨“କେମିସା ନିଜର୍ ମାଈଜିକେ ଚାଡ଼ି ବିନ୍ଟା ଆନ୍ଲେ, ସେ ଦାଈଡ଼ିସଈ ବେସିଆ କାମ୍ କଲା ଲକ୍ ଅଈଜାଈସି । ଆରି କେ, ସେ ଚାଡ଼ିଲା ଦାଈଡ଼ିକେ ବିବା ଅଈସି ବଈଲେ ସେ ମିସା ଦାଈଡ଼ିସଈ ବେସିଆ କାମ୍ କଲା ଆଟେ ।” ବଲି କଈଲା ।

ଗଟେକ୍ ସାଉକାର୍ ଆରି ଲାଜାର୍

✨ ୧୭:୧୩ ୧୭:୧୩ ମାତିଉ ୭:୨୪ ✨ ୧୭:୧୭ ୧୭:୧୭ ମାତିଉ ୧୧:୧୨, ୧୩ ✨ ୧୭:୧୭ ୧୭:୧୭ ମାତିଉ ୫:୧୮ ✨ ୧୭:୧୮ ୧୭:୧୮ ମାତିଉ ୫:୩୨; ୧ମ କରନ୍ତ୍ରିୟ ୭:୧୦, ୧୧

୧୯ ଜିସୁ ସେମାନଙ୍କେ ଗଟେକ୍ କାତାନି ବୁଜାଇକରି କଇଲା, “ଗଟେକ୍ ସାଉକାର୍ ଲକ୍ ରଇଲା । ସେ ଲଟେକ୍ ମଲ୍ ଦେଇ ଗେନ୍‌ଲା ନିକ ନିକ ଚକା ପଟିଆ ପିନ୍ଦ୍‌ତେ ରଇଲା । ସେ ସବୁଦିନ୍ ବଜି କରି ନିଜେ ସାର୍‌ଦା ଅଇତେରଇଲା । ୨୦ ତେଇ ଲାଜାର୍ ନାଉର୍ ଅରକିଡ୍ ଲକ୍ ଗଟେକ୍ ରଇଲା । ତାର୍ ଗୁଲାଇ ଗାଗଡ୍ ଗାଉ ଅଇରଇଲା । ତାକେ ଆନିକରି ସାଉକାର୍ କାପାଟ୍ ଲଗେ ହୁଲାଇତେ ରଇଲା । ୨୧ ତେଇ ରଇ, ସେ ସାଉକାର୍ ତାଲିଅନି ଅଦରଲା ସକ୍ତି ବାଡ୍‌ସିତା ବେଟି କାଇବାକେ ମନ୍ କର୍ତେ ରଇଲା । କୁକୁର୍‌ମନ୍ ତାର୍ ଗାଗଡ୍ ଗାଉ ଚାଟ୍‌ତେ ରଇଲା ।”

୨୨ କେତେ ଦିନ୍ ଗାଲାପତେ ସେ ଅରକିଡ୍ ଲକ୍ ମରିଗାଲା । ଆରି ପର୍‌ମେସରର୍ ହୁଡ୍‌ମନ୍ ଆସି ତାକେ ସରଗ୍‌ପୁରର୍ ବଜିତେଇ ଅବ୍ରାଆମର୍ ଲଗେ ବସବାକେ ଦାରି ଗାଲା । ଆରି କେତେ ଦିନ୍ ଗାଲାପତେ ସେ ସାଉକାର୍ ମିସା ମରିଗାଲା । ତାକେ ନେଇ ତପିଦେଲା । ୨୩ ଆରି ସେ ନରକ୍ କୁଣ୍ଡେ ଗାଲା । ତେଇ ସେ ବେସି କସ୍‌ଟ ପାଇବାବେଲା ଉପ୍‌ରେ ସରଗ୍‌ପୁରେ ଦେକ୍‌ଲେ ଲାଜାର୍ ଅବ୍ରାଆମର୍ ଲଗେ ବସି ଆଟେ । ୨୪ ସେ ଆଉଲି ଅଇ କଇଲା, “ଏ ବାବା ଅବ୍ରାଆମ୍, ମକେ ଦୟା କର୍ । ଲାଜାର୍‌କେ ମର ଲଗେ ପାଟାଇଦେସ୍ । ସେ ଆସିକରି ନିଜର୍ ଆଙ୍ଗଟି ସଙ୍ଗ୍ ପାନି ଦେଇ, ମର୍ ଜିବ୍ କାକର୍ କର । କାଇକେ ବଇଲେ ମୁଇ ଏ ନରକ୍‌ପୁରର୍ ଜଇଲଗେ ବେସି କସ୍‌ଟ ପାଇଲିନି ।”

୨୫ ମାତର୍ ଅବ୍ରାଆମ୍ କଇଲା, “ବାବୁରେ, ତୁଇ ଜିବନ୍ ରଇଲାବେଲାର୍ କାତା ମନେ ଏତାଇ ଦେକ୍ । ତର୍ ଜିବ୍‌ନେ ସବୁ ନିମାନ୍ ବିସଇ ପାଇରଇଲୁସ୍ । ଆରି ଲାଜାର୍ ସବୁ କାରାପ୍ ବିସଇ ପାଇଲା । ମାତର୍ ସେ ଏବେ ଏ ଜାଗାଇ ସାର୍‌ଦାଅଇ ଆଟେ । ଆରି ତୁଇ ବେସି କସ୍‌ଟ ପାଇଲୁସ୍‌ନି । ୨୬ ଆରି ଗଟେକ୍ ବିସଇ ଅଇଲାନି, ତର୍ ଆମର୍ ମଜାଇ ଗଟେକ୍ ବଡେଟା ପାଗଡ୍ ଆଟେ । ଇଡିର୍ ଲକ୍ ସିତି ଜାଇ ନଏଁ ଆରି ସିଡିର୍ ଲକ୍ ଇତି ଆସି ନଏଁ ” ବଲି କଇଲା । ୨୭ ସେ ବେଲା ସେ ସାଉକାର୍ କଇଲା, “ଏ ବାବା ଏନ୍ତି ବଇଲେ ମୁଇ ତକେ ବାବୁଜିଆ କଲିନି ଲାଜାର୍‌କେ ଦୟାକରି ମର୍ ବାବାର୍ ଗରେ ପାଟାଇଦେସ୍ । ୨୮ କାଇକେ ବଇଲେ ତେଇ ମର୍ ପାଟିଟା ବାଇମନ୍ ଆଟଡ୍ । ଲାଜାର୍ ଜାଇ ସେମନ୍‌କେ ଜାଗ୍‌ରଡ୍ କରାଅ । ସେମନ୍ ସେ

କାତା ସୁନି ପାପେଅନି ମନ୍ ବାଦ୍‌ଲାଅଡ଼ । ସେମନ୍ ମଲେ ମୁଇ ଏବେ ବେସି କସଡ଼ ପାଇବା ଏ ଜାଗାଇ ନ ଆସଡ଼” ବଲି କଇଲା ।

୨୯ ମାତର୍ ଅବ୍ରାଆମ୍ ତାକେ କଇଲା, “ସେମନ୍ ଜାଗରଡ଼ ଅଇ ରଇବାକେ ମସାର୍ ନିୟମ୍ ଆରି ବବିସଡ଼ବକ୍ତାମନ୍ କଇଲା କାତା ସବୁ ତାକର୍ ଲଗେ ଆଟେ । ସେଟା ସେମନ୍ ପଡ଼ିକରି ସିକଡ଼ ।” ବଲି କଇଲା । ୩୦ ଆରି ସେ ସାତକାର୍ ଅବ୍ରାଆମ୍‌କେ କଇଲା, “ସେଡ଼କି ନର୍ସ ବାବା, ମଲାଟାନେଅନି ଉଟିକରି ଗଟେକ୍ ଲକ୍ ଜାଇ କଇଲେ ସେମନ୍ ବିସ୍‌ବାସ୍ କରି ପାପେଅନି ମନ୍ ବାଡ଼ତାଇବାଇ ।” ବଲି କଇଲା । ୩୧ ଅବ୍ରାମ୍ ତାକେ କଇଲା, “ତର୍ ବାଇମନ୍ ମସାର୍ ଆରି ବବିସଡ଼ବକ୍ତାମନ୍ କାତା ନ ସୁନଡ଼ ବଇଲେ ମଲାଟାନେଅନି ଉଟିକରି ଗଟେକ୍ ଲକ୍ ଜାଇ କଇଲେ ମିସା ସେମନ୍ ନ ମାନଡ଼ ।”



ପାପ୍

(ମାତିଉ ୧୮:୭-୭; ୨୧; ୨୨; ମାର୍କ ୯:୪୨)

୧ ଦିନେକ୍ ଜିସୁ ତାର୍ ସିସମନ୍‌କେ କଇଲା, “ଏ ଦୁନିଆଇ ସବୁ ବେଲା ଲକ୍‌ମନ୍‌କେ ପାପ୍ କରାଇବାକେ କାଇଆଲେ ପରିକା ଆଇସି । ମାତର୍ ଜନ୍ ଲକ୍ ଏନ୍ତି ବିନ୍ ଲକ୍‌କେ ପାପ୍ କରାଇସି, ସେମନ୍‌କେ କେଡେକ୍ କସଟର୍ ଦସା ଅଇସି । କାଇକେବଇଲେ ପର୍ମେସର୍ ସେମନ୍‌କେ ବେସି ବଡ଼ ଡଣ୍ଟ ଦେଇସି । ୨ ସେନ୍ତାରି ଲକ୍, ଦରମ୍ ଲକ୍‌ମନ୍‌କେ ପାପ୍‌କରାଇବା ବାଦୁଲେ ଗାଲାଇ ଗଟେକ୍ ବଡ଼ଟା ଜତା ପାକ୍‌ନା ବାନ୍ଧିକରି ତେଙ୍ଗ୍ ପାନିତେଇ ପିଙ୍ଗି ଦେବାପାରା ଡଣ୍ଟ ତାର୍‌ପାଇ ନିକ ଅଇତା । ୩ ✱ଡେବର୍‌ପାଇ ତମର୍ ଚଲାଚଲ୍‌ତିତେଇ ବେସି ଜାଗରଡ଼ଅଇ ରୁଆ । ଜଦି ତମର୍ ବାଇ କି ବଇନି ପାପ୍ କଲେ, ସେଟା ନିକ କାମ୍ ନର୍ସ ବଲି ଟିକ୍ କରା । ଆରି ସେ କରିରଇବା ବୁଲ୍ ଏତାଇ କରି ମନ୍ ବାଦ୍‌ଲାଇସି ବଇଲେ, ତାକେ କେମା ଦିଆସ୍ । ୪ ଜଦି ସେ ଗଟେକ୍ ଦିନେ ସାଡ଼ପାଲି ଜାକ ତମର୍ ବିରଦେ ପାପ୍ କରି, ପଟେ ନିଜର୍ ବୁଲ୍ କଲାଟା ଏତାଇ ମନ୍ ବାଦ୍‌ଲାଇକରି ତମର୍ ତେଇ ଆସି ଜେଡେପାଲି କେମା ମାଗ୍‌ଲେ, ସେଡ଼କିପାଲି ତାକେ କେମା ଦିଆସ୍ ।”

✱ ୧୭:୩ ୧୭:୩ ମାତିଉ ୧୮:୧୫

ବିସ୍‌ବାସ୍

୫ ଆରି ପେରିଡ଼ମନ୍ ଜିସୁକେ କଇଲା, “ଆମର୍ ବିସ୍‌ବାସ୍ ଅଦିକ୍ କରିଦିଆସ୍ ।”

୬ ଜିସୁ ସେମନ୍‌କେ କଇଲା, “ଗଟେକ୍ ସର୍ସୁ ମୁଞ୍ଜି ପାରା ତମର୍ ବିସ୍‌ବାସ୍ ରଇସି ବଇଲେ ତମେ ବଡ଼ ଗର୍‌କେ ଜିକିଅଇ ସମ୍‌ଦୁରେ ଜାଇ ରପିଅ ବଲି କଇଲେ ସେ ଗର୍ ତମର୍ କାତା ମାନ୍‌ସି ।”

ଗଟେକ୍ ଗତିଦାଙ୍ଗ୍‌ଡାର କାମ୍

୭ “ଜଦି ତୁଇ ଗଟେକ୍ ସାଉକାର୍ ଅଇରଇସୁ ବଇଲେ ତର୍ ଗତିଦାଙ୍ଗ୍‌ଡା କସ୍‌ବାଟାନ୍‌ନେଅନି ନଇଲେ ଗରୁଚାରାଇବାଟାନ୍‌ନେଅନି ଆସି ତାର୍ ନିଜର୍ କାମ୍ ନ ସାରାଇବା ଆଗ୍‌ତୁ ତୁଇ ତାକେ ‘କାଇବାକେ ବସ୍‌ବେ’, ବଲି କଇସୁ କି ? ନାଇ, ସେନ୍ତି ନ କଉସ୍ । ୮ ମାତର୍ ସେ ନିଜର୍ କାଦି କାଇବା ଆଗ୍‌ତୁ ତର୍‌ପାଇ ରାନ୍‌ସି ନ ଦେବା ଜାକ, ତୁଇ ତାକେ କାଇବାକେ ନ ଦେଉସ୍ । ୯ ଆରି ତୁଇ ସେ ଗତିଦାଙ୍ଗ୍‌ଡାକେ ‘ସବୁ କାମ୍ କରି ସାରାଇଲୁସ୍ !’ ବଲି ଦନିଅବାଦ୍ ଦେଇସୁ କି ? ନାଇ ନ ଦେଉସ୍ । ୧୦ ସେନ୍ତାରି ତମ୍‌କେ କଇରଇଲା ସବୁ ବିସଇ କରିସାରାଇଲା ପଟେ ତମେ କଇବାର୍ ଆଟେ । ଆମେ ଅବ୍‌କା ଗତିଦାଙ୍ଗ୍‌ଡାମନ୍, ଆମର୍ ଜେଡ଼କି କର୍‌ବାର୍ ରଇଲା, ସେଡ଼କିସେ ଆମେ କରିଆରୁ ।”

ଦସ୍‌ଟା ବଡ଼ରଗ୍ ଅଇଲା ଲକ୍‌ମନ୍ ନିକ ଅଇଲା

୧୧ ଜିସୁ ତାର୍ ସିସ୍‌ମନ୍‌ର ସଙ୍ଗ୍ ଜିରୁସାଲମେ ଜିବା ବେଲେ ସେ ଗାଲିଲି ଆରି ସମିରଣ ଜିଲାର୍ ମଜାଇ କେଟ୍‌ଲା । ୧୨ ଆରି ସେ ଗାଉଁ ବିଡ଼ରେ ପୁର୍‌ବା ବେଲେ ବଡ଼ରଗ୍ ଅଇରଇଲା ଦସ୍‌ଟା ଲକ୍‌ମନ୍ ତାକେ ଦୁରିକେଅନି ଦେକ୍‌ଲା । ସେମନ୍‌ର ନିୟମେ ବଡ଼ରଗ୍ ରଇଲା ଲକ୍‌ମନ୍, ବିନ୍ ଲକ୍‌ମନ୍‌ର ଲଗେ ଆସି ନାପାରତ୍ । ସେଟାର୍ ପାଇ ସେମନ୍ ଜିସୁର୍ ଲଗେ ନ ଆସି ଦୁରିକେ ରଇକରି, ୧୩ ବେସି ଆଉଲିଅଇ କଇଲା, “ଜିସୁ ! ଏ ଗୁରୁ ! ଆମ୍‌କେ ଦୟାକରା ।”

୧୪ ଜିସୁ ସେମନ୍‌କେ ଦେକି କରି କଇଲା, “ତମେ ଜାଇକରି ପର୍‌ମେସରର୍ ପୁଜାରିମନ୍‌କେ ତମର୍ ଗାଗଡ଼ ଦେକାଆ । ତମେ ନିମାନ୍ ଅଇଲାସ୍ କି ନାଇ ବଲି ସେମନ୍ ଦେକଡ଼ ।” ପଟେ ସେ

ଦସ୍ ଲକ୍ ପର୍ଯ୍ୟନ୍ତ ପୁଜାରିମାନଙ୍କ ଲଗେ ଜିବା ବେଲେ, ବାଟେ ନିମାନ୍ ଅଇଗାଲାଇ । ୧୫ ଏଦେ ଦେକା ! ସେମାନଙ୍କ ବିତ୍ତରେଅନି ଗଟେକ୍ ଲକ୍ ନିଜର୍ ଗାଗଡ୍ ନିମାନ୍ ଅଇଲାଟା ଦେକି, ଜିସୁର୍ ଲଗେ ବାଉଡି ଆଇଲା । ଆରି ସେ ବେସି ଆଉଲି ଅଇ ପର୍ଯ୍ୟନ୍ତ ଡାକ୍ ପୁଟା କଲା । ୧୬ ସେ ପାଲାଇ ଆସି ଜିସୁର୍ ପାଦେ ଅଦରଲା “ତମେ ମକେ ନିମାନ୍ କରିଆରାସ୍” ବଲି ଦନିଅବାଦ୍ କଲା । ସେ ଜିଉଦି ଲକ୍ ନଏ । ସେ ସମିରଣିୟ ବଲି ଗଟେକ୍ ଜାଗାର୍ ଲକ୍ । ୧୭ ଜିସୁ ତାକେ କଇଲା, “ମୁଇତା ଦସ୍ ଲକ୍ କେ ନିମାନ୍ କରି ରଇଲି । ତକେ ଗଟେକ୍ ଲକ୍ କେ ରାଡି ଆରି ନଅ ଲକ୍ କେନେ ଗାଲାଇ ? ୧୮ ନିମାନ୍ ଅଇଲା ପଟେ ବାଉଡି ଆସି ପର୍ଯ୍ୟନ୍ତ ଦନିଅବାଦ୍ କରବାକେ ଏ ଗଟେକ୍ ସମିରଣିୟ ଲକ୍ କେ ରଇଲା କି ?” ୧୯ ତାର୍ ପଟେ ଜିସୁ ତାକେ କଇଲା, “ତୁଇ ଏବେ ଉର୍ ଆରି ଜାଆ, କାଇକେ ବଇଲେ ମୁଇ ତକେ ନିମାନ୍ କରିପାରବି ବଲି ବିସ୍ ବାସ୍ କରିରଇଲୁସ୍ ।”

ପର୍ଯ୍ୟନ୍ତ ରାଇଜ୍ ଆଇଲାନି

(ମାତ୍ରି ୨୪:୨୩-୨୮, ୩୭-୪୧)

୨୦ କେତେଟା ପାରୁସି ଲକ୍ ନିସୁକେ “କେବେଅନି ପର୍ଯ୍ୟନ୍ତ ଲକ୍ ନିମାନ୍ କେ ସାସନ୍ କରସି ?” ବଲି ପାଚାରଲାଇ । ଜିସୁ ସେମାନଙ୍କେ କଇଲା, “ପର୍ଯ୍ୟନ୍ତ କେନ୍ତେ ସାସନ୍ କରସି, ସେ ରାଇଜ୍ ତମର ଆକିଡେଇ ନ ଡିସେ । ୨୧ ଆରି ପର୍ଯ୍ୟନ୍ତ ଇତି ସାସନ୍ କଲାନି ନଇଲେ ସିତି ସାସନ୍ କଲାନି ବଲି କଇବାର୍ ନାପାରାସ୍ । କାଇକେ ବଇଲେ, ଲକ୍ ନିମାନ୍ ମନ୍ ବିତ୍ତରେ ପର୍ଯ୍ୟନ୍ତ ସାସନ୍ କରସି ।”

୨୨ ପଟେ ତାର୍ ସିସ୍ ମାନକେ କଇଲା, ଏନ୍ତି ବେଲା ଆଇସି ତମେ ପର୍ଯ୍ୟନ୍ତ ଗାନେଅନି ଆଇଲା ନରପିଲା ମରସଙ୍ ଗଟେକ୍ ଦିନ୍ ରଇବାକେ ବେସି ମନ୍ କରସା । ମାତର୍ ସେବେଲା ମକେ ଦେକି ନାପାରାସ୍ ୨୩ ଲକ୍ ନିମାନ୍ ତମକେ କଇବାଇ, ପର୍ଯ୍ୟନ୍ତ ଗାନେଅନି ଆଇଲା ନରପିଲା ଇତି ଆଟେ ସିତି ଆଟେ ବଲି । ତମେ ସେଟା ଦେକବାକେ ନ ଜାଆ । ତମେ କନ୍ତି ଆରାସ୍ ତେଇସେ ରୁଆ ।

୨୪ କାଇକେବଇଲେ ପର୍ଯ୍ୟନ୍ତ ଗାନେଅନି ଆଇଲା ନରପିଲା ମୁଇ, ବାଉଡିବାଟା ତମେ ଦେକସା । ସେଟା କେନ୍ତାର୍ ବଇଲେ, ଆକାସେ ଜେନ୍ତି ଗଟେକ୍ ବାଟେଅନି ଆରି ଗଟେକ୍ ବାଟେ ବିଜୁଲି

ମାରିକରି ଗୁଲାଇ ଆକାସ୍ ଉଜଲ୍ ଅଇସି, ସେନ୍ତାରିସେ ସବୁ ଲକ୍ମନ୍ ଦେକିଅଇସି । ^{୨୫} ମାତର୍ ସେଟା ଅଇବା ଆଗ୍ତୁ ପର୍ମେସରର୍ ଟାନେଅନି ଆଇଲା ନର୍ପିଲା ମୁଇ ବେସି ଦୁକ୍ କସଟ ପାଇବାର୍ ଆତେ । ଆରି ମର୍ ସବୁ କାମ୍ ଦେକ୍ଲା ଲକ୍ମନ୍ ମକେ ନ ନାମଡ୍ ।

^{୨୬} ନଅ ରଇଲା ବେଲା ଲକ୍ମନ୍ ଜେନ୍ତାରି ରଇଲାଇ ସେନ୍ତାରିସେ ପର୍ମେସରର୍ ଟାନେଅନି ଆଇଲା ନର୍ପିଲା ମୁଇ ବାଉଡି ଆଇବାବେଲେ ଲକ୍ମନ୍ ରଇବାଇ । ^{୨୭} ସେବେଲାଇ ନଅ ବଡେଟା ପାନିଜାଜେ ପୁର୍ବା ଦିନ୍ ଜାକ ଲକ୍ମନ୍ ଅବକାସେ ରଇଲାଇ । ସେମନ୍ ବଜି କର୍ବାର୍, ଦାଙ୍ଗଡି ଆନ୍ବାର୍, ଆରି ଦାଙ୍ଗଡି ଦେବାର୍ କର୍ତେ ରଇଲାଇ । ପତେ ବେସି ପାନିଅଇ ସବୁ ଡାବିଅଇଲା । ନଅ ଆରି ତାର୍ କୁଟୁମର୍ ଲକ୍ମକେ ଚାଡି ସବୁ ଲକ୍ମକେ ପାନି ବୁଡାଇ ପାକାଇଲାଇ । ^{୨୮} ଲଡ୍ ନାଉର୍ ଗଟେକ୍ ଲକର୍ ବେଲେ ମିସା ସେନ୍ତାର୍ ପାରା ଅଇରଇଲା । ଲକ୍ମନ୍ ସବୁ ଦିନର୍ ପାରାସେ କାଆ ପିଇ, ବିକାବିକ୍ରି, ଗର୍ପା ଆରି ଗର୍ବାନ୍ଦାତେଇ ଲାଗିରଇଲାଇ । ^{୨୯} ମାତର୍ ଲଡ୍ ସଦମ୍ ନାଉର୍ ଗଡେଅନି ବାରଇକରି ଜିବା ଦିନେ ସେ ବାଦ୍ଲେଅନି ଜଇ ଆରି ଗନ୍ଦୁଲା ଆସି ଲଡ୍ ଆରି ତାର୍ କୁଟୁମର୍ ଲକ୍ମକେ ଚାଡି ସେ ଗଡର୍ ସବୁ ଲକ୍ମକେ ମରାଇ ଦେଲା । ^{୩୦} ପର୍ମେସରର୍ ଟାନେଅନି ଆଇଲା ନର୍ପିଲା ମୁଇ ବାଉଡି ଆଇବା ଦିନେ ମିସା ସେନ୍ତାରିସେ ଅଇସି ।

^{୩୧} ☆ ସେ ଦିନେ ନିଜର୍ ଗର୍ ଉପ୍ରେ ରଇଲେ ତୁଇ ଉଡ୍ରି ତର୍ ଦିନ୍ସୁ ଆନ୍ବାକେ ଗର୍ ବିଡ୍ରେ ନ ଜାଆ । ସେନ୍ତାରି ତାସ୍ ପଦାଇ ରଇଲେ, ଦିନ୍ସୁ ବେଟି ନେବାକେ ଗରେ ନ ଆଉ । ^{୩୨} ଲଡର୍ ମାଇଜିକେ କାଇଟା ଅଇରଇଲା ସେଟା ଏତାଇ ଦେକା । ତାର୍ ଦନ୍ ସପତି କେନ୍ତାର୍ ଅଇଲା ବଲି ପାସ୍ଲି ଦେକ୍ଲାଜେ ସେ ନୁନ୍ କୁମ୍ ପାସ୍ଲି ଗାଲା । ^{୩୩} ☆ କେ କେ ଏ ଦୁନିଆଇ ଜିଇବା ଜିବନ୍ ମନ୍ କଲେ ତାକେ ନ ସାର୍ବା ଜିବନ୍ ନ ମିଲେ । ଆରି କେ କେ ଏ ଦୁନିଆଇ ଜିଇବା ଜିବନ୍ ଆରାଇସି, ତାକେ ନ ସାର୍ବା ଜିବନ୍ ମିଲ୍ସି । ^{୩୪} ମୁଇ ବାଉଡି ଆଇବା ସେ ରାଡି, ତମେ ଦୁଇ ଲକ୍ ଗଟେକ୍ ବାକରାଇ

☆ **୧୭:୩୧** ୧୭:୩୧ ମାଡିଉ ୨୪:୧୭,୧୮; ମାର୍କ ୧୩:୧୫,୧୬ ☆ **୧୭:୩୩** ୧୭:୩୩ ମାଡିଉ ୧୦:୩୯; ୧୭:୨୫; ମାର୍କ ୮:୩୫; ଲୁକ ୯:୨୪; ଜଅନ୍ ୧୨:୨୫

ସଇରଇସା । ଗଟେକ୍ ଲକ୍‌କେ ଡାକି ନେବି, ଆରି ଗଟେକ୍ ଲକ୍‌କେ ଚାଡ଼ି ଦେବି । ^{୩୫} ଦୁଇଟା ମାଇଜିମନ୍ ଗରତେ ରଇବାଇ, ତେଇଅନି ଗଟେକ୍ ମାଇଜିକେ ନେବି ଆରି ଗଟେକ୍‌କେ ଚାଡ଼ି ଦେବି । ^{୩୬} ଦୁଇ ଲକ୍ ପଦାଇ ରଇବାଇ, ଗଟେକ୍ ଲକ୍‌କେ ନେବି, ଆରି ଗଟେକ୍ ଲକ୍‌କେ ଚାଡ଼ିଦେବି ।”

^{୩୭} ତାର୍‌ପଚେ ସିସ୍‌ମନ୍ ଜିସୁକେ ପାଚାରଲାଇ, “ଏ ମାପୁରୁ ଏଟା କନ୍ତି ଗର୍ସି ?” ଜିସୁ ସେମନ୍‌କେ କଇଲା, “ଜନ୍ତି ମତା ରଇସି, ତେଇ ମଡ଼କାଉ ଗିଦ୍‌ମନ୍ ରୁଣ୍ଡିରଇବାଇ ।”

୧୮

ରାଣ୍ଡି ମାଇଜି ଆରି ବିଚାର୍ କାରିଆ

^୧ ଜିସୁ ଦିନେକ୍ ତାର୍ ସିସ୍‌ମନ୍‌କେ ପର୍‌ମେସର୍‌କେ ମାଙ୍‌ବାବେଲେ ନ ଡାକି ପାର୍‌ତନା କରିକରି ରଇବାକେ, ଗଟେକ୍ କାତାନି ବୁଜାଇ କଇଲା, ^୨ ଗଟେକ୍ ଗତେ ଗଟେକ୍ ବିଚାର୍ କାରିଆ ଲକ୍ ରଇଲା । ସେ ପର୍‌ମେସର୍‌କେ ନ ଡରତେ ରଇଲା, କି ଲକ୍‌ମନ୍‌କେ ନ ନାମ୍‌ତେ ରଇଲା । ^୩ ସେ ଗତେ ଗଟେକ୍ ରାଣ୍ଡି ମାଇଜି ମିସା ରଇଲା । ସେ ସବୁ ବେଲେ ବିଚାର୍ କାରିଆର୍ ଲଗେ ଜାଇ ଏନ୍ତି କଇତେ ରଇଲା, ଗଟେକ୍ ଲକ୍ ମର୍ ବିରଦି ଅଇଲା ଆଚେ । ଏ ବିସଇନେଇକରି ତମେ ମର୍ ବିରଦିକେ ବିଚାର କରା । ଜେନ୍ତିକି, ସେ ମକେ ନିଆଇ ଇସାବେ ଚଲାଚଲ୍‌ତି କର୍ସି । ^୪ ଏନ୍ତି ବେସି ଦିନ୍ ସେ ବିଚାର୍‌କାରିଆ ନିଆଇ କର୍‌ବାକେ ମନ୍ ନ କଲେ ମିସା, ସେ ଦିନ୍‌କେ ଆସି ବେମଜା କର୍‌ତେରଇଲା । ମାତର୍ ସେ ବିଚାର୍‌କାରିଆ ଲକ୍ ମନେ ମନେ ବାବ୍‌ଲା, “ମୁଇ ପର୍‌ମେସର୍‌କେ ଡରି ନାଇକି ଲକ୍‌ମନ୍‌କେ ନାମି ନାଇ । ^୫ ମାତର୍ ଏ ରାଣ୍ଡିମାଇଜି ସବୁ ବେଲା ଆସି ବେମଜା କଲାମି । ସେଟାର୍‌ପାଇ ତାକେ ନିଆଇ ମିଲ୍‌ଲା ପାରା ବିଚାର୍ କର୍‌ବି । କାଇକେ ବଇଲେ ଏନ୍ତି ବିଚାର୍ ନ କଲେ ସେ ସବୁଦିନ୍ ଆସି ମକେ ବେମଜା କର୍‌ତେ ରଇସି ।”

^୬ ତେଇ ମାପୁରୁ କଇଲା, “ଏ ଅନିଆଇ ବିଚାର୍‌କାରିଆ କାଇଟା କର୍‌ବାକେ ବାବ୍‌ଲା, ସେଟା ତମେ ସିକା । ^୭ ସେନ୍ତି ଲାରୁଆଁ ବିଚାର୍‌କାରିଆ ସେ ରାଣ୍ଡିମାଇଜିର୍ ବିଚାର୍ କଲା । ସେନ୍ତାର୍ ଆଲେ,

ତାର୍ତ୍ତେଇଅନି କେତେ ନିମାନ୍ ଇସାବେ ପରମେସର୍ ସେ ବାବୁଲ୍ଲା ଲକ୍ମନର୍ ଦିନରାତିର୍ ପାର୍ତନା ସୁନି ନିମାନ୍ ନିଆଇ ବିଚାର କରସି । ସେମନ୍‌କେ ସାଇଜ କରବାକେ ସେ ଅଲ୍‌ସମ୍ ନ କରେ । ି ମୁଇ ତମ୍‌କେ କଇଲିନି, ସେ ଦାପ୍‌ରେସେ ତାର୍ ଲକ୍ମନର୍‌ପାଇ ନିମାନ୍ ନିଆଇବିଚାର କରସି । ମାତର୍ ପରମେସର୍ ଟାନେଅନି ଆଇଲା ନର୍‌ପିଲା ମୁଇ ଆରିତରେକ୍ ଆଇବାବେଲେ ଏ ଦୁନିଆଇ, ମକେ ବିସ୍‌ବାସ୍ କରବା ଲକ୍ମନ୍‌କେ ଦେକ୍‌ବି କି ନାଇ ?”

ପାରୁସି ଆରି ସିସ୍‌ତୁମାଞ୍ଜୁମନର୍ କାତା

୯ ତେଇ ରଇଲା କେତେକ୍ ଲକ୍ମନ୍ ନିଜ୍‌କେ ମୁଇ ନିକ ଆତି ବଲି ବାବିଅଇ ବିନ୍‌ଲକ୍‌କେ ଗିନ୍ କରତେ ରଇଲାଇ । ସେନ୍ତି ଲକ୍ମନର୍ ବିସଇ ବୁଜାଇବାକେ ଜିସୁ ସେମନ୍‌କେ ଏ କାତାନି କଇଲା । ୧୦ ଦିନେକ୍ ଦୁଇଲକ୍ ପାର୍ତନା କରବାକେ ଗଟେକ୍ ମନ୍ଦିରେ ଗାଲାଇ । ଗଟେକ୍ ଲକ୍ ପାରୁସି ଦଲର୍ ଲକ୍ ଆରି ଗଟେକ୍ ସିସ୍‌ତୁମାଞ୍ଜୁ । ୧୧ ପାରୁସି ଲକ୍ ନିଜେ ଅଲପ୍ ଦୁରିକେ ଚିଆଅଇ ଏନ୍ତି ପାର୍ତନା କରବାର ବସ୍‌ଲା, “ଏ ପରମେସର୍ ମୁଇ ତମ୍‌କେ ଦନିଅବାଦ୍ ଦେଲିନି । ମୁଇ ବିନ୍‌ଲକ୍‌କର୍‌ପାରା ଲବ୍‌ରା ନାଇ କି ମିର୍‌ମାୟା ନାଇ କି ବେସିଆ କାମ୍ କରି ନାଇ । ଆରି ତକେ ଜୁଆର୍ କଲିନି ମୁଇ ଏ ସିସ୍‌ତୁମାଞ୍ଜୁ ପାରା ନଇ ।” ୧୨ ଆରି ସେ କଇଲା, “ମୁଇ ଜିଉଦିମନର୍ ନିୟମ୍ ଇସାବେ ଆଟ୍‌କେ ଦୁଇ ଦିନ୍ ଉପାସ୍ ରଇ ପାର୍ତନା କଲିନି । କାମାଈଲାଟାନର୍ ଦସ୍‌ବାଗର ବାଗେକ୍ ତମ୍‌କେ ଦେଲିନି ।” ବଲି ପାର୍ତନା କଲା ।

୧୩ ମାତର୍ ସେ ସିସ୍‌ତୁମାଞ୍ଜୁ ଦୁରିକେ ଚିଆଅଇ ପାର୍ତନା କରବା ବେଲେ ସରଗ୍‌ବାଟେ ଦେକ୍‌ବାକେ ମିସା ମନ୍ ନକରି ନିଜର୍ ବୁକେ ମାରିଅଇ ଏନ୍ତି ପାର୍ତନା କଲା । “ଏ ପରମେସର୍ ମୁଇ ଗଟେକ୍ ପାପି ଲକ୍ ମକେ ଦୟା କରା !” ୧୪ ✨ଜିସୁ ତାର୍ ସିସ୍‌ମନ୍‌କେ କଇଲା, “ସେ ଦୁଇଲକ୍ ପାର୍ତନା ସାରାଇ ବାଅଡ୍‌ଲାକେ, ସିସ୍‌ତୁମାଞ୍ଜୁସେ ପରମେସର୍ ଦେକ୍‌ବା ଇସାବେ ଦରମ୍ ରଇଲା । ପାରୁସି ନାଇ । ଜେ ବଡ୍‌ପନ୍ ଦେକାଇ ଅଇସି ଆରି ବଡ୍ ବଲି ବାବ୍‌ସି, ତାକେ ପରମେସର୍

ସାନ୍ ଲକ୍ କରସି । ମାତର୍ ଜେ ନିଜ୍ଜକେ ସାନ୍ ଲକ୍ପାଠା ବାସି ତାକେ ପର୍ମେସର୍ ବଡ଼ ଲକ୍ କରସି, ଏ କାତା ଏତାଇ ରୁଆ ।”

ଜିସୁ ସାନ୍ପିଲାମନକେ ଆସିରବାଦ୍ କଲା

୧୫ ଆରି ଗଟେକ୍ ଦିନେ ଲକ୍ମନ୍ ତାକର୍ ସାନ୍ସାନ୍ ପିଲାମନକେ “ଜିସୁ ଚି କରି ଆସିରବାଦ୍ କର ।” ବଲି ଆନ୍ତେ ରଇଲାଇ । ସିସମନ୍ ସେଟା ଦେକି ଲକ୍ମନକେ ଲାଗିଲାଇ । ୧୬ ମାତର୍ ଜିସୁ ପିଲାମନକେ ଲଗେ ଡାକି, ସିସମନକେ କଇଲା, “ପିଲାମନକେ ମର୍ ଲଗେ ଆନ୍ବାକେ ମନାକରା ନାଇ । କାଇକେ ବଇଲେ ସରଗ୍ ରାଇଜ୍ ଏନ୍ତି ସାନ୍ ସାନ୍ ପିଲାମନର୍ ପାଠା ବିସବାସ୍ କରବା ଲକ୍ମନର୍ପାଇସେ । ୧୭ ଏତାଇ ରୁଆ ! ମୁଇ ତମକେ ସଡ଼କାତା କଇଲିନି । କେ ମିସା ଏ ସାନ୍ଲକ୍ ବିସବାସ୍ କଲାପାଠା ମକେ ବିସବାସ୍ ନ କଲେ, ସେ ପର୍ମେସରର୍ ରାଇଜେ ଜାଇ ନାପାରେ ।”

ଗଟେକ୍ ସାଡ଼କାର୍ ଲକ୍

(ମାତିଉ ୧୯:୧୬-୩୦; ମାର୍କ ୧୦:୧୭-୩୧)

୧୮ ଦିନେକ୍ ଗଟେକ୍ ଜିଉଦି ନେତା ଜିସୁକେ ପାଟାରଲା, “ଏ ନିମାନ୍ ଗୁରୁ ! ନ ସାର୍ବା ଜିବନ୍ ମିଲାଇବାକେ ମୁଇ କାଇଟା କର୍ବାର୍ ଆଚେ ?”

୧୯ ଜିସୁ ତାକେ କଇଲା, ମକେ କାଇକେ ନିମାନ୍ ବଲି କଇଲୁସନି ? କାଇକେ ବଇଲେ ପର୍ମେସର୍ ଗଟେକ୍ ଲକ୍ସେ ନିମାନ୍ । ୨୦ ମାତର୍ ମୁଇ ତମକେ କଇଲିନି “ବେସିଆ କାମ୍ କରା ନାଇ, କାକେ ମରାଆ ନାଇ, ବିନ୍ ଲକର୍ ଦିନ୍ସୁ ଚରାଆ ନାଇ, ମିର୍ ସାକି କୁଆ ନାଇ, ଆରି ତମର ମାଆବାବାର୍ କାତା ମାନା । ପର୍ମେସର୍ ମସାକେ ଏନ୍ତି ନିୟମ୍ ଦେଲାଆଚେ ଜାନି ଆଚୁସ୍ ।”

୨୧ ସେ ଲକ୍ ଜିସୁକେ କଇଲା, “ଏ ସବୁ ନିୟମ୍ ତା ମୁଇ ପିଲାବେଲେ ଅନି ମାନ୍ଲିନି । ମୁଇ ଆରି କାଇଟା କର୍ବାର୍ ଆଚେ ?”

୨୨ ଜିସୁ ଏଟା ସୁନି ତାକେ କଇଲା, ତରଟାନେ ଆରି ଗଟେକ୍ ବିସଇ ଉନା ଆଚେ । ତର୍ ସବୁ ଦନ୍ ସପତି ବିକି ଗରିବ୍ ଲକ୍ମନକେ ବାଟାକରିଦେସ୍ । ଏନ୍ତି କଲେ ତକେ ସର୍ଗେ ଦନ୍ ରଇସି । ଏଟା ସବୁ କଲା ପଚେ ତୁଇ ମର୍ ସଙ୍ଗ୍ ଆଉ । ୨୩ ମାତର୍ ସେ ଲକ୍ ଏ କାତା ସୁନି

ମନ୍ ଦୁକ୍ ଅଇ ଉଚିଗାଲା । କାଇକେ ବଇଲେ ସେ ବେସି ସାଉକାର୍ ରଇଲା ।

୨୪ ସେ ଲକ୍ ମନ୍ଦୁକ୍ ଅଇଲାଟା ଦେକି ଜିସୁ ତାର୍ ସିସ୍‌ମନ୍‌କେ କଇଲା, “ସାଉକାର୍ ଲକ୍‌ମନ୍ ସରଗ୍ ରାଇଜେ ଜିବାଟା କେତେ କସ୍‌ଟର୍ ବିସଇ ! ୨୫ ସେ ଲକ୍‌ମନ୍ ସରଗ୍ ରାଇଜେ ଜିବାଟା‌ନେଅନି ଗଟେକ୍ ବଡ଼ ଜିଢ଼୍ ସୁଜିକାଣାବାଟେ ଚିଙ୍ଗିଲି ଜିବାକେ ସଅଜ୍ ଅଇସି ।” ୨୬ ଏକାତା ସୁନ୍‌ତେ ରଇଲା ଲକ୍‌ମନ୍ କଇଲା, “ଏଡ଼ି ବଇଲେ କେ ତେବେ ଉଦାର୍ ପାଇସି ?” ୨୭ ଜିସୁ କଇଲା, “ପର୍‌ମେସର୍‌ ଟାନେ ନାପାରୁଲା ବିସଇ କାଇଟା ନାଇ ।” ୨୮ ପତର୍ ଜିସୁକେ କଇଲା, “ଦେକା ଆମର୍ ଗରର୍ ସବୁ ଚାଡ଼ିକରି ତମର୍ ସଙ୍ଗ୍ ଆଇଲୁଆରୁ ।”

୨୯ ଜିସୁ ସେମନ୍‌କେ କଇଲା, “ଉଁ ମୁଇ ତମ୍‌କେ ସଡ଼କାତା କଇଲିନି । ଜନ୍ ଲକ୍ ପର୍‌ମେସର୍‌ ରାଇଜ୍ ପାଇ ନିଜର୍ ଗର୍‌ଦୁଆର୍, ମାଇଜିପିଲା, ବାଇବଇନି, ମାଆବାବା ଆରି ପିଲାଟକିକେ ଚାଡ଼ି ଆଟେ ବଇଲେ, ୩୦ ତାକେ ଏ ଦୁନିଆର୍ ଜିବନେ, ସେ ଜେଡ଼କି ଚାଡ଼ି ରଇଲା ତାର୍ ତେଇ ଅନି ଅଦିକ୍ ମିଲ୍‌ସି । ଆରି ପଟେ ତାକେ ନ ସାର୍‌ବା ଜିବନ୍ ମିଲ୍‌ସି ।”

**ଜିସୁ ଏଟାସଙ୍ଗ୍ ତିନ୍‌ତର୍ ଅଇଲା ତାର୍ ମରନର୍ କାତା କଇଲା
(ମାତିଉ ୨୦:୧୭-୧୯; ମାର୍କ ୧୦:୩୨-୩୪)**

୩୧ ତାର୍ ପଟେ ଜିସୁ ତାର୍ ବାର୍‌ଟା ସିସ୍‌ମନ୍‌କେ ବିନେ ଡାକିନେଇ କଇଲା, “ସୁନା ! ଆମେ ଜିରୁସାଲମେ ଗାଲୁନି, ଜନ୍‌ବେଲା ଆମେ କେଟ୍‌ରୁ ସେବେଲା ପର୍‌ମେସର୍ ଟାନେଅନି ଆଇଲା ନର୍‌ପିଲା, ମର୍ ବିସଇ ନେଇ ବବିସଡ଼ବକ୍‌ତାମନ୍ ଲେକି ରଇଲା ସବୁ ବିସଇ ପୁରାପୁରୁନ୍ ଅଇସି । ୩୨ ସେଟା କାଇଟା ବଇଲେ, ଜିରୁସାଲମେ ମକେ ରମିୟ ଲକ୍‌ମନ୍‌କେ ସର୍‌ପିଦେବାଇ ଆରି ସେମନ୍ ମକେ କିଜାଇବାଇ ଆରି ଲାଜ୍ କରାଇ, ମର୍ ଉପରେ ଡୁକ୍‌ବାଇ । ୩୩ ତାର୍‌ପଟେ କର୍‌ଡା ସଙ୍ଗ୍ ମାର୍‌ବାଇ, ପଟେ ମକେ ମରାଇବାଇ । ମାତର୍ ତିନ୍‌ଦିନ୍ ପଟେ ମୁଇ ଆରି ତରେକ୍ ଜିବନ୍ ଅଇ ଉର୍‌ବି ।”

୩୪ ମାତର୍ ସିସ୍‌ମନ୍ ଏ ସବୁ କାତା ଅଲପ୍ ମିସା ବୁଜିନାପାରୁଲା, ସେ ବିସଇ ସେମନ୍‌ଟାନେଅନି ଲୁଚିରଇଲା ।

ଆଁକି ନ ତ୍ରିସ୍‌ବା ବିକାରିକେ ଜିସୁ ନିକକଲା
(ମାତ୍ତ ୨୦:୨୯-୩୪; ମାର୍କ ୧୦:୪୭-୫୨)

୩୫ ଜିସୁ ଜିରିଅ ଗଡେ କେଟାକେଟି ଅଇଲାବେଲେ ଗଟେକ୍ କାଣା ବାଟପାଲି ବସି ବିକ୍ ମାଙ୍ଗ୍‌ଡେ ରଇଲା । ୩୬ ଜିସୁର୍ ସଙ୍ଗ୍ ଜିବା ଲକର୍ କାତା ସୁନି, “ଏଟା କାଇଟା ଅଇଲାନି ?” ବଲି ତେଇ ରଇଲା ଲକ୍‌ମନ୍‌କେ ପାଟାରଲା ।

୩୭ ସେ ଲକ୍‌ମନ୍ କାଣାକେ କଇଲାଇ, “ନାଜରିତ୍ ଗାଉଁର୍ ଜିସୁ ଏ ବାଟେ ଗାଲାନି ।”

୩୮ ତେଇ ସେ ଆଉଲିଅଇ କଇଲା, “ଏ ଦାଉଦ୍ ରାଜାର କୁଟୁମର୍ ପିଲା ଜିସୁ ! ତମେ ମକେ ଦୟା କରା ।”

୩୯ ଆଗେ ଜିବା ଲକ୍‌ମନ୍ କାଣାକେ ଦମ୍‌କାଇ କରି ରୁପ୍‌ଅଇ ରଇବାକେ କଇଲାଇ । ମାତର୍ ସେ ଅଦିକ୍ ଅଦିକ୍ ଆଉଲି ଅଇ “ଏ ଦାଉଦ୍ ରାଜାର କୁଟୁମର୍ ପିଲା ଜିସୁ ! ମକେ ଦୟା କରା !” ବଲି କଇଲା । ୪୦ ଜିସୁ ତାର କାତା ସୁନି ଚିଆ ଅଇଲା ଆରି, “ତାକେ ମର୍ ଲଗେ ଆନା” ବଲି ଆଦେସ୍ ଦେଲା । ୪୧ କାଣା ବିକାରି ଜିସୁର୍ ଲଗେ ଆଇଲାଜେ, ଜିସୁ ତାକେ ପାଟାରଲା, “ମୁଇ ତର୍‌ପାଇ କାଇଟା କର୍‌ବି ବଲି ମନ୍ କଲୁସ୍‌ନି ?” ସେ ଜିସୁକେ “ଏ ମାପ୍‌ରୁ, ମକେ ଦେକ୍‌ବା ବପୁ ଦିଆ । ସେନ୍ତ୍ର ମକେ ନିମାନ୍ କରଦେ ।” ବଲି କଇଲା ।

୪୨ ତେବେ ଜିସୁ ତାକେ କଇଲା, “ତୁଇ ଦେକ୍‌ବାକେ ପାଆ ! ମୁଇ ତର୍ ଆଁକି ନିକ କର୍‌ବି କାଇକେ ବଇଲେ, ତୁଇ ମର୍‌ତେଇ ବିସ୍‌ବାସ୍ କରି ଆରୁସ୍ ।” ୪୩ ସେ ଦାପ୍‌ରେ, ସେ କାଣା ଦେକି ପାରଲା । ଆରି ପରମେସ୍‌ରକେ ଦନିଅବାଦ୍ କରକରି ଜିସୁର୍ ସଙ୍ଗ୍ ଗାଲା । ଏ ଗର୍‌ନା ଦେକ୍‌ଲା ସବୁ ଲକ୍‌ମନ୍ ପର୍‌ମେସ୍‌ରର୍ ଡାକ୍‌ପୁଟା କଲାଇ ।

୧୯

ଜିସୁ ଆରି ଜକିୟ

୧ ଜିସୁ ଆରି ତାର ସିସ୍‌ମନ୍ ଜିରିଅ ବାଟେ ଜାଇତେ ରଇଲାଇ । ୨ ତେଇ ଜକିୟ ନାଉଁର୍ ଗଟେକ୍ ମୁକିଅ ସିସ୍‌ତୁମାଙ୍ଗ୍ ରଇଲା । ସେ ବେସି ସାଉକାର୍ ରଇଲା । ୩ ଜିସୁ କେନ୍ତ୍ରାର୍ ଲକ୍ ବଲି ଦେକ୍‌ବାକେ ଜକିୟ ମନ୍ କର୍‌ତେ ରଇଲା । ମାତର୍ ଜିସୁର୍ ସଙ୍ଗ୍ ବେସି ଲକ୍‌ମନ୍ ଜାଇତେ ରଇଲାଇକେ ତାକେ ଦେକିନାପାରତେ

ରଇଲା । କାଇକେବଇଲେ ସେ ବୁଟି ରଇଲା । ୪ ସେଟାର ପାଇ ସେ, ଲକ୍ଷ୍ମୀନର ଆଗତୁ ପାଲାଇ ଜାଇ ଜିସୁକେ ଦେକ୍‌ବାକେ ଗଟେକ୍ ତୁମ୍‌ରି ଗଟେ ଚଗଲା । କାଇକେ ବଇଲେ ଜିସୁ ସେ ବାଟ୍‌ଦେଇ ଜିବାର ରଇଲା । ୫ ଜିସୁ ସେ ଜାଗାଇ କେଟି ଉପ୍‌ରେ ଦେକିକରି ଜକିୟକେ କଇଲା, “ଜକିୟ ବିଗି ଉଡ଼ରି ଆଉ, ଆଜି ମୁଇ ତମର୍ ଗରେ ରଇବି ।”

୬ ତାର ପଟେ ଜକିୟ ଦାପ୍‌ରେ ଉଡ଼ରି ଆସି ବେସି ସାର୍‌ଦାଅଇ ଜିସୁକେ ତାର ଗରେ ଡାକିନେଲା । ୭ ସେଟା ଦେକି ତେଇ ରଇଲା ଲକ୍ଷ୍ମୀନ ଜିସୁ ଗଟେକ୍ ପାପି ଲକର୍ ଗରେ କାଇବାକେ ଗାଲାନ୍‌ି ବଲି ଗୁର୍‌ମୁରି ଜାଇତେରଇଲାଇ ।

୮ ଜକିୟ ଚିଆଅଇ ଜିସୁକେ କଇଲା, “ଏ ମାପରୁ, ସୁନା ! ମର୍ ସିପତିଅନି ଅଦାବାଗ୍ ଗରିବ୍ ଲକ୍ଷ୍ମୀନକେ ଦାନ୍ କରିଦେବି । ଆରି ସିସ୍‌ତୁ ମାଙ୍‌ବା ବେଲାଇ କାର୍‌ଟା ଅନିଆଇକରି ଆନି ରଇଲାଟା ମୁଇ ଚାର୍‌ଗୁନ୍ ଅଦିକ୍ ବାଉଡାଇ ଦେବି ।”

୯ ଜିସୁ ଜକିୟକେ କଇଲା, “ଆଜି ଏ ଗରେ ମୁକ୍ତି ମିଲ୍‌ଲା । କାଇକେବଇଲେ ଏ ମିସା ଗଟେକ୍ ଅବ୍‌ରାଆମର୍ ନାତିତିତି । ୧୦ ☆ପର୍‌ମେସର୍ ଗାନେଅନି ଆସିରଇବା ନର୍‌ପିଲା ମୁଇ ପାପେ ରଇଲା ଲକ୍ଷ୍ମୀନକେ ସେମନ୍‌ର୍ ପାପେଅନି ରକିଆ କର୍‌ବାକେ ଆସିଆତି ।”

**ସୁନା ଟାଙ୍ଗା କାତାନି
(ମାତିଉ ୨୫:୧୪-୩୦)**

୧୧ ସେମନ୍ ଜିରୁସାଲାମ୍ ଲଗେ ଆଇଲା ବେଲାଇ ଜିସୁର୍ ସଙ୍ଗ୍ ଜିବା ଲକ୍ଷ୍ମୀନ ତାର କଇବା ସବୁ କାତା ସୁନ୍‌ତେ ରଇଲାଇ । କାଇକେବଇଲେ ତାର କାତା ସୁନ୍‌ଲା ଲକ୍ଷ୍ମୀନ ପର୍‌ମେସର୍‌ର ରାଇଜର୍ ସାସନ୍ ଦାପ୍‌ରେ ଅଇସି ବଲି ବାବ୍‌ତେ ରଇଲାଇ । ୧୨ ସେଟାରପାଇ ସେ ଏ କାତାନି କଇଲା, ଗଟେକ୍ ବଡ଼ ଗରେ ଜନମ୍ ଅଇଲା ଲକ୍ ଦୁର୍ ଦେସେ ଜିବାକେ ତିଆର୍ ଅଇଲା । କାଇକେ ବଇଲେ ତେଇ ତାକେ ରାଜା କରାଇବାଇ । ସମାନ୍ ବେଲାଇ ତାର ଦେସେ ସେ ବାଉଡ଼ି ଆଇସି । ୧୩ ତାର ଆଗତୁ ସେ ତାର ଦସ୍‌ଟା

☆ ୧୯:୧୦ ୧୯:୧୦ ମାତିଉ ୧୮:୧୧

ଦାଙ୍ଗଡ଼ାମାନଙ୍କେ ଡାକି, ଗଟେକ୍ ଗଟେକ୍ ଲକ୍ଷ୍ୟକେ ଗଟେକ୍ ଗଟେକ୍ ସୁନାର୍ ଡାବୁ ଦେଇ କରି କଇଲା, “ମୁଇ ବାଉଡ଼ି ଆଇବାଜାକ ଏ ଡାବୁ ବେବାର୍ କରି ବୁଡେକ୍ କରି ରୁଆ ।”

୧୪ ମାତର୍ ତାର୍ ଦେସର୍ ଲକ୍ଷ୍ୟମନ୍ ତାକେ ଇନ୍ କର୍ତେତରଇଲାଇ । ଆରି ସାସନ୍ କର୍ବା ଲକ୍ଷ୍ୟମନ୍ ଲଗେ କବର୍ କଇ ପାଟାଇଲାଇ, “ଏ ଲକ୍ଷ୍ୟ ଆମ୍‌କେ ସାସନ୍ କର ବଲି ଆମେ ମନ୍ କରୁନାଇ ।”

୧୫ ଏକ୍ତି ବଲି କଇଲେ ମିସା, ସେ ରାଜାଅଇ ଗରେ ବାଉଡ଼ି ଆଇଲା । ଆରି ସେ କାକେ କାକେ ସୁନାର୍ ଡାବୁ ଦେଇ ରଇଲା, ସେମନ୍ କେଡେକ୍ ଲାକା ଲାବ୍ କଲାଇ ଆତଡ୍ ବଲି ଜାନ୍‌ବାକେ ଡାକାଇ ପାଟାଇଲା । ୧୬ ତେଇ ପର୍ତୁମର୍ ଲକ୍ଷ୍ୟ ଆସି କଇଲା, “ଏ ଆଗିଆଁ, ତମେ ଦେଲା ଗଟେକ୍ ସୁନାର୍ ଡାବୁ ନେଇ ଆରି ଦସଟା କଲିଆଟି ।” ୧୭ ସେ ରାଜା ସାର୍‌ଦା ଅଇ ତାକେ କଇଲା “ତୁଇ ନିକ ଦାଙ୍ଗଡ଼ା, ଅଲପ୍ ବିସଇ ଦାଇଡ୍ ନେଇ କାମ୍ କଲୁସ୍ । ସେଟାର୍‌ପାଇ ମୁଇ ତକେ ଦସଟା ଗଡ୍ ଉପ୍‌ରେ ସାସନ୍ କର୍ବାକେ ସର୍ପି ଦେଲିନି ।” ୧୮ ଆରି ଗଟେକ୍ ଲକ୍ଷ୍ୟ ଆସି କଇଲା, “ଆଗିଆଁ, ତୁଇ ଦେଇରଇଲା ସୁନାର୍ ଡାବୁ ନେଇ ଆରି ପାଁଟା ଲାବ୍ କଲିଆଟି ।” ୧୯ ସେ ରାଜା ତାକେ ମିସା କଇଲା “ତକେ ସାସନ୍ କର୍ବାକେ ପାଁଟା ଗଡ୍ ସର୍ପିଦେଲିନି ।”

୨୦ ମାତର୍ ଆରି ଗଟେକ୍ ଦାଙ୍ଗଡ଼ା ରାଜାର୍ ଲଗେ ଆସି କଇଲା, “ଏ ଆଗିଆଁ, ତମେ ଦେଇରଇଲା ସୁନାର୍ ଡାବୁ ଏଦେ ଦେକା, ଗଟେକ୍ ଗର୍ଣ୍ଣାଇ ଗୁଡିଆ ବାନ୍ଧି ସଙ୍ଗଇ ଦେଇରଇଲି । ୨୧ ତୁଇ ସାସନ୍ କର୍ବା ଲକ୍ଷ୍ୟ ବଲି ଡରିକରି ମୁଇ ସେଟା ନେଇ ବେବାର୍ କରିନାଇ । କାଇକେବଇଲେ ଜାକେ ଦେଇ ନ ରଉସ୍ ତାର୍‌ଡେଇଅନି ମାଙ୍ଗିନେଇସୁ । ଆରି ଜକ୍ତି ବୁନି ନ ରଉସ୍ ତେଇଅନି କାଟି ନେଇସୁ ।” ୨୨ ସେ ରାଜା ରିସାଅଇ କଇଲା, “ଅଇରେ ଦାଙ୍ଗଡ଼ା, ତର୍ କାତା ଇସାବେ ଆକା ତକେ ବିଟାର୍ କର୍ବି । ମୁଇ ଲକ୍ଷ୍ୟମନ୍ ଜନ୍‌ଟା ଦେଇ ନ ରଇ ସେଟା ମାଗିନେବି, ଆରି ଜନ୍‌ଡେଇ ବୁନି ନ ରଇ ତେଇଅନି କାଟିବି, ସେଟା ଜାନିରଇଲୁସ୍ । ୨୩ ସେନ୍ତାର୍‌ଆଲେ ମର୍ ସୁନାର୍ ଡାବୁ କାଇକେ ବେକେ ସଙ୍ଗଉସ୍ ନାଇ ? ସଙ୍ଗଇ ରଇଲେ ତେଇଅନି ମକେ କଲକ୍ତର୍ ମିଲ୍‌ତା ।”

୨୪ ଆରି ସେ ଲଗେ ଚିଆଅଇଲା ଲକ୍ଷ୍ମୀନକେ ରାଜା କଇଲା, “ତାର୍ ତେଇଅନି ଏ ଅଦ୍‌ଲି ମାଗିନେଇ ଜେ ଦସ୍‌ଟା ଅଦ୍‌ଲି ଲାବ୍‌କଲା ଆରେ, ତାକେ ଦିଆସ୍ ।” ୨୫ ମାତର୍ ସେ ଲକ୍ଷ୍ମୀନ ରାଜାକେ ପାଚାରୁଲା, “ଏ ଆଗିଆଁ ତାର୍‌ଟାନେ ଦସ୍‌ଟା ଆରେ ଆରି ତାକେ କାଇକେ ଦେଉଁ ?” ୨୬ ☆ସେ କଇଲା, “ମୁଇ ତମ୍‌କେ କଇଲିନି, ଜାକେ ଆରେ ତାକେ ଅଦିକ୍ ଦିଆଅଇସି, ମାତର୍ ଜାର୍ ନାଇ, ତାର୍‌ତେଇ ରଇଲା ଅଲପ୍ ମିସା ଚାଡାଇ ନିଆଅଇସି । ୨୭ ☆ମାତର୍ ଜେମନ୍ ମୁଇ ତାକର୍ ରାଜା ଅଇବାକେ ମନ୍ ନ କରତେ ରଇଲା, ସେମନ୍‌କେ ତାକି ଆନି ମର୍ ମୁଆଟେ ମରାଇଦିଆସ୍ ।”

ଜିସୁ ଜିରୁସାଲାମ୍ ଜିତିକରି ଜିବାଟା

(ମାତିଉ ୨୧:୧-୧୧; ମାର୍କ ୧୧:୧-୧୧; ଜଅନ୍ ୧୨:୧୨-୧୯)

୨୮ ଜିସୁ ଏ ସବୁ କାତା କଇସାରାଇ ସିସ୍‌ମନ୍‌ର ଆଗତୁ ଆଗତୁ ଜିରୁସାଲାମ୍ ବାଟେ ଗାଲା । ୨୯ ଜେତେବଲ୍ ଜିସୁ ଆରି ତାର୍ ସିସ୍‌ମନ୍ ଜିଡ୍‌ଗର୍‌ମନ୍ ରଇଲା ତଙ୍ଗର୍ ପାଲି ଆରି ବେଡ୍‌ପାଗି ଆରି ବେଡ୍‌ନିଆ ଗତେ କେଟ୍‌ଲା, ସେ ସିସ୍‌ମନ୍‌ର ବିଡ୍‌ରେ ଅନି ଦୁଇ ଲକ୍‌କେ, ସେମନ୍ ଜିବା ଆଗତୁ ଏନ୍ତାରି କଇପାଟାଇଲା । ୩୦ ତମ୍‌ର୍ ମୁଆଟେ ରଇବା ଗାଏଁ ଜାଆ । ସେ ଗାଏଁ ଗାଲେ, କେ କେବେ ମିସା ଚଗିନରଇବା ଗଦପିଲା ବାନ୍ଧିଅଇରଇଲାଟା ଦେକ୍‌ସା । ତାକେ ମେଲି ଦାରିଆସା । ୩୧ ଜେ ଜଦି ତମ୍‌କେ “କାଇକେ ମେଲି ନେଲାସ୍‌ନି ?” ବଲି କଇଲେ “ଏଟା ଗୁରୁକେ ଦର୍‌କାର୍ ଆରେ ବଲି କୁଆ ।”

୩୨ ପରେ ସିସ୍‌ମନ୍ ସେ ଗାଏଁ ଜାଇ, ଜିସୁ ଜେନ୍ତି କଇରଇଲା ସେନ୍ତି ଦେକ୍‌ଲା । ୩୩ ଆରି ସେମନ୍ ସେ ଗଦପିଲାକେ ମେଲ୍‌ବାବେଲେ ଗଦ ପିଲାର୍ ସାଉକାର୍ ସେମନ୍‌କେ ପାଚାରୁଲା, “କାଇକେ ଗଦପିଲାକେ ମେଲ୍‌ଲାସ୍‌ନି ?”

୩୪ ସିସ୍‌ମନ୍ କଇଲା, “ଏ ଗଦପିଲା ଗୁରୁକେ ଦର୍‌କାର୍ ଆରେ ।” ୩୫ ସିସ୍‌ମନ୍ ଗଦ ପିଲାକେ ଜିସୁର୍ ଲଗେ ଆନି ନିଜର୍ ନିଜର୍ ଲୁଗା ଗଦର୍ ଉପ୍‌ରେ ତାବି ଜିସୁକେ ତାର୍ ଉପ୍‌ରେ ବସାଇଲା ।

☆ ୧୯:୨୭ ୧୯:୨୭ ମାତିଉ ୧୩:୧୨; ମାର୍କ ୪:୨୫; ଲୁକ୍ ୮:୧୮ ☆ ୧୯:୨୭ ୧୯:୨୭ ମାତିଉ ୨୫:୧୪-୩୦

୩୭ ଆରି ଜିସୁ ଗାଲା ବାଟେ ଲକ୍ଷ୍ମୀନ୍ ନିଜର୍ ନିଜର୍ ପଟିଆମନ୍ ଅଟାଇ ଦେଲାଈ ।

୩୭ ଜିସୁ ଜେଡେବଲ୍ ଜିଡ୍‌ଗର୍ମନ୍ ରଇଲା ଗଡ୍‌ଗଡା ଜାଗା ଲଗେ କେଟ୍‌ଲା, ସେବେଲା ତେଇ ରଇଲା ତାର୍ ଜେଡକି ସିସ୍ ମାନ୍ଦା ସେ କରରଇଲା କାବାଅଇଜିବା କାମ୍ ଏତାଇ, ସାର୍‌ଦାଅଇ ଆଉଲିଅଇକରି ପର୍‌ମେସର୍‌କେ ଜୁଆର୍ କରି କଇଲାଈ, ୩୮ “ପର୍‌ମେସର୍‌ର ନାଉଁ ନେଇକରି ଜନ୍ ରାଜା ଆଇଲାନ୍ତି ତାକେ ସେ ଆସିର୍‌ବାଦ୍ କର । ସର୍‌ଗେ ସାନ୍ତି ଅ, ଆରି ସବୁର୍‌ଟାନ୍‌ନେ ଅନି ବଡ୍ ପର୍‌ମେସର୍‌ର ମଇମା ଅ ।”

୩୯ ସେ ସିସ୍ ମାନ୍ଦାର୍ ବିଡ୍‌ରେ କେଡେଟା ପାରୁସିମନ୍ ଜିସୁକେ କଇଲାଈ, “ଏ ଗୁରୁ ତର୍‌ସଙ୍ଗ୍ ଆଇବା ସିସ୍‌ମନ୍‌କେ ଚିମ୍‌ରାଅଇ ରଇବାକେ କଅ ।”

୪୦ ମାତର୍ ଜିସୁ ସେମନ୍‌କେ କଇଲା, “ମୁଇ ତମ୍‌କେ କଇଲିନ୍ତି, ଏ ଲକ୍ଷ୍ମୀନ୍ ଚିମ୍‌ରାଅଇ ରଇଲେ ପାକ୍‌ନାମନ୍ ତାକର୍ ନିଜେ ନିଜେ ଆଉଲି ଅଇବାଇ ।”

ଜିସୁ ଜିରୁସାଲାମର୍ ପାଇ କାନ୍ଦଲା

୪୧ ଜିସୁ ଜିରୁସାଲାମ୍ ଲଗେ କେଟ୍‌ଲା ବେଲେ ସେ ଗଡ୍ ଦେକି କାନ୍ଦିକରି କଇଲା, ୪୨ “ସାନ୍ତି ପାଇବାକେ କାଇଟା ଦର୍‌କାର୍, ସେଟା ଜଦି ତମେ ଆଜି ଜାନିରଇତାସ୍ ଆଲେ, କେଡେ ନିକ ଅଇତା ! ମାତର୍ ସେସବୁ ଏବେ ତମେ ଦେକି ନାପାରୁଲାସ୍‌ନି । ୪୩ ସେଟାର୍‌ପାଇ ବଲି ଏନ୍ତି ବେସି ବାଦା ଅଇଜିବା ଦିନ୍ ଆଇସି । ତମର୍ ସଡ୍‌ରୁମନ୍ ତମର୍ ଚାରିବେଡ୍‌ତି ପାରୁରି ବାନ୍ଦି ଅଟ୍‌କାଇବାଇ ଆରି ଚାରିବେଡ୍‌ତି ଅନି ତମର୍ ଉପ୍‌ରେ ମାଣ୍ଡି ଆଇବାଇ । ୪୪ ସେମନ୍ ତମ୍‌କେ ଆରି ତମର୍ ପାରୁରି ତେଇ ରଇବା ଲକ୍ଷ୍ମୀନ୍‌କେ ପୁରାପୁରୁନ୍ ନସାଇ କୁଟ୍‌କୁଟା କରିଦେବାଇ । ଗଟେକ୍ ପାକ୍‌ନା ମିସା ନିଜର୍ ଜାଗାଇ ନ ଚାଡ୍‌ଡ । କାଇକେବଇଲେ ପର୍‌ମେସର୍‌ ତମ୍‌କେ ରକିଆ କର୍‌ବାକେ ଆସିରଇଲା, ସେବେଲା ତମେ ଜାନି ନାପାରୁଲାସ୍ ।”

ଜିସୁ ମନ୍ଦିରେ ଗାଲା

(ମାତ୍‌ତ୍‌ ୨୧:୧୨-୧୭; ମାର୍‌କ ୧୧:୧୫-୧୯; ଜଅନ୍ ୨:୧୩-୨୨)

୪୫ ଆରି ଜିସୁ ଜିରୁସାଲାମ୍ ମନ୍ଦିର୍ ବିଡ୍‌ରେ ପୁରିକରି ତେଇ ଗେନାବିକା କର୍‌ବା ଲକ୍ଷ୍ମୀନ୍‌କେ ବାର୍‌କରାଇଦେବାର୍ ଦାରୁଲା ।

୪୭ ସେମାନଙ୍କେ କଇଲା, “ଦରମ୍ ସାସ୍ତରେ ଏନ୍ତାରି ଲେକାଅଇଲା ଆରେ, ମର୍ ଗର୍ ପାର୍ତନା ଗର୍ ଅଇସି । ମାତର୍ ତମେ ସେଟା ଚର୍ମନର୍ ଲୁଚ୍‌ବା ଜାଗା କରିଆଟାସ୍ ।”

୪୭ ✧ତାର୍ ପରେ ଜିସୁ ସବୁଦିନେ ଜିରୁସାଲାମ୍ ମନ୍ଦିରେ ସିକିଆ ଦେଇତେ ରଇଲା । ମାତର୍ ମୁକିଅ ପୁଜାରିମନ୍, ସାସ୍ତର୍ ସିକାଇମନ୍ ଆରି ନେତାମନ୍ ମିସି ଜିସୁକେ ମରାଇବାକେ ଚେସ୍ଟା କର୍ତେ ରଇଲାଇ । ୪୮ କାଇକେ ବଇଲେ ଗୁଲାଇ ଲକ୍, ଜିସୁ ସିକାଇଦେବା କାତା ଆରି ସେ କଇତେରଇବା ପଦମନ୍ ମନ୍ଦିଆନ୍ ଦେଇ ସୁନ୍ତେ ରଇଲାଇ । ତେବର୍ ପାଇ ସେମନ୍ କେନ୍ତାର୍ କର୍ବାର୍ ବଲି ବାଟ୍ ମିଲାଇ ନାପାର୍ତେ ରଇଲାଇ ।

୨୦

ଜିସୁର୍ ଅଦିକାର ବିସଏ ପର୍ସନ୍

(ମାତିଡ ୨୧:୨୩-୨୭; ମାର୍କ ୧୧:୨୭-୩୩)

୧ ଦିନେକ୍ ଜିସୁ ମନ୍ଦିରେ ଲକ୍ମନ୍‌କେ ମାପୁରୁର୍ ନିମାନ୍ କାତାର୍ ସିକିଆ ଦେଇତେରଇଲା । ସେବେଲାଇ ମୁକିଅ ପୁଜାରିମନ୍, ନିୟ୍ମ୍ ସିକାଇଦେବା ଲକ୍ମନ୍ ଆରି ପାର୍ତିନ୍‌ମନ୍ ଜିସୁର୍ ଲଗେ ଆସି ପାଟାରୁଲାଇ । ୨ “ତୁଇ କାର୍ ଅଦିକାର୍ ମିଲାଇକରି ଏସବୁ ବିସଇ କଲୁସିନି ? କେ ତକେ ଏ ଅଦିକାର୍ ଦେଲା ? ଆମ୍‌କେ କ ।”

୩ ମାତର୍ ଜିସୁ କଇଲା, “ମୁଇ ମିସା ତମକେ ଗଟେକ୍ କାତା ପାଟାର୍‌ବି, ତମେ ମକେ କୁଆ । ୪ ଜଅନ୍ କାର୍ ଅଦିକାର୍ ମିଲାଇ ଲକ୍ମନ୍‌କେ ତୁବନ୍ ଦେଇତେ ରଇଲା ? ସରଗର୍ ପର୍ମେସର୍ ଦେଲାଟାନେ ଅନି କି, ଲକ୍ମନ୍‌ରଟାନେ ଅନି ?”

୫ ସେବେଲାଇ ସେମନ୍ ନିଜର୍ ନିଜର୍ ବିତ୍ତରେ ଦଦାପେଲା ଅଇଲାଇ । ଜଦି ଜଅନର୍ ତୁବନ୍ ସର୍ଗେଅନି ବଲି କଇଲେ, କାଇକେ ତାକେ ବିସବାସ୍ କରାସ୍ ନାଇ ? ବଲି କଇବାଇ । ୬ ମାତର୍ ଆମେ ଲକ୍ମନ୍‌ରତେଇଅନି ବଲି କଇଲେ ସବୁ ଲକ୍ ଆମ୍‌କେ ପାକ୍‌ନା ମାର୍‌ବାଇ । କାଇକେ ବଇଲେ, ଜଅନ୍ ସତଇସେ ପର୍ମେସରତେଇ ଅନି ଆଇଲା ବବିସତ୍‌ବକ୍ତା ବଲି ଆମର୍

ଜିଉଦି ଲକ୍ଷ୍ମୀନ୍ ବିସ୍ତ୍ରାସ କଲାଲାନି । ୭ ଏଟା ବାବିକରି ସେମନ୍
“ଆମେ ନାଜାନୁ ।” ବଲି କଇଲାଲ ।

୮ ଆରି ଜିସୁ ସେମନ୍‌କେ କଇଲା, “ଏନ୍ତି ବଇଲେ ମୁଇ ମିସା କାର୍
ଅଦିକାର୍ ମିଲାଲକରି ଏସବୁ ବିସଇ କଲିନି, ସେଟା ତମ୍‌କେ ନ କଇ
।”

ଅଙ୍ଗୁର୍ ବାତର୍ ଆଦିବାଗ୍ ନେବା ତାସିମନ୍

(ମାତିଉ ୨୧:୩୩-୪୪; ମାର୍କ ୧୨:୧-୧୨)

୯ ତାର୍ ପତେ ଜିସୁ ଲକ୍ଷ୍ମୀନ୍‌କେ ବୁଜାଇବାକେ ଗଟେକ୍ କାତାନି
କଇଲା । “ଗଟେକ୍ ଲକ୍ ତାର୍ ପଦାଇ ଅଙ୍ଗୁର୍ ତାସ୍ କରି, କେତେଟା
ତାସିକେ ଆଦିବାଗ୍ କର୍ବାକେ ଦେଲା । ଦେଇକରି ସେ ବେସି ଦିନର୍
ପାଇ ଗଟେକ୍ ଦୁର୍ ଦେସେ ରଇବାକେ ଉଟିଗାଲା । ୧୦ ଆରି ଅଙ୍ଗୁର୍
ତଲ୍‌ବାବେଲା କେଟ୍‌ଲାକେ ସାଉକାର୍ ତାର୍ ଗଟେକ୍ ଦାଙ୍ଗ୍‌ତାକେ
ତାର୍ ବାଗ୍ ମାଙ୍ଗି ଆନ୍‌ବାକେ ପାଟାଇଲା । ମାତର୍ ସେ ଲକ୍ଷ୍ମୀନ୍
ତାର୍ ବାଗ୍ ନ ଦେଇ ତାର୍ ଦାଙ୍ଗ୍‌ତାକେ କୁଟ୍‌କୁଟା ମାରି ରୁଟା
ଆତେ ପାଟାଇଦେଲାଲ । ୧୧ ତାର୍ ପତେ ସେ ଆରି ଗଟେକ୍
ଦାଙ୍ଗ୍‌ତାକେ ପାଟାଇଲା । ସେମନ୍ ତାକେ ମିସା ମାରିକରି ନିନ୍ଦା
କାତା କଇ, ଲାଜ୍ କରାଇକରି ରୁଟା ଆତେ ପାଟାଇ ଦେଲାଲ ।
୧୨ ତାର୍ ପତେ ସାଉକାର୍ ଆରି ଗଟେକ୍ ଦାଙ୍ଗ୍‌ତାକେ ସେମନ୍‌ର୍ ଲଗେ
ପାଟାଇଲା । ମାତର୍ ସେ ଦାଙ୍ଗ୍‌ତାକେ ମିସା ରଗ୍‌ରଗା ଅଇତେ ମାରି
କେଦିଦେଲାଲ ।” ୧୩ ତାର୍ ପତେ ସାଉକାର୍ ମନେ ମନେ ବାବ୍‌ଲା,
“ଏବେ ମୁଇ କାଇଟା କର୍ବି ? ମୁଇ ବେସି ଆଲାଦ୍ କର୍ବା ମର୍
ପିଲାକେ ପାଟାଇବି । ବାଇଦରେ ସେମନ୍ ତାକେ ମାନ୍‌ବାଇ ।”
୧୪ ମାତର୍ ସେମନ୍ ସେ ପିଲା ଆଇବାଟା ଦେକିକରି ତାକର୍ ବିତ୍‌ରେ
କାତାଅଇଲାଲ, “ଏଟାସେ ସେ ସାଉକାର୍ ପିଲା, ଆମେ ଆକେ
ମରାଇଦେଲେ ଏ ସବୁ ଦନ୍ ଆମର୍ ଅଇଜାଇସି । ୧୫ ଆରି ସେମନ୍
ସାଉକାର୍ ପିଲାକେ ବାଇରେ ନେଇ ମାରି ମରାଇଦେଲାଲ । ଏନ୍ତି
ବଇଲେ ସାଉକାର୍ ସେ ଲକ୍ଷ୍ମୀନ୍‌କେ କାଇଟା କରିରଇସି ? ୧୬ ମୁଇ
ତମ୍‌କେ କଇଲିନି, ସେ ଆସିକରି ସେ ଲକ୍ଷ୍ମୀନ୍‌କେ ମରାଇ ଦେଇସି ।
ଆରି ବିତ୍ ବିନ୍‌ଲକ୍ଷ୍ମୀନ୍‌କେ ଆଦିବାଗ୍ କର୍ବାକେ ଦେଇସି ।” ମାତର୍
କାତାନି ସୁନ୍‌ତେ ରଇଲା ଲକ୍ଷ୍ମୀନ୍ କଇଲାଲ, “ଏନ୍ତାର୍ କେବେ ମିସା
ନଅ ।”

୧୭ ମାତର୍ ଜିସୁ ଲକ୍ଷ୍ମୀନକେ ନିକ ଦେକିକରି କଇଲା,
 “ଏନ୍ତି ବଇଲେ ପର୍ଯ୍ୟେସରର୍ ସାସ୍ତରେ ଲେକାଅଇଲା ଅରଡ୍
 କାଇଟା ?
 ଗର୍ବାଦ୍ବା ଲକ୍ଷ୍ମୀନ ଜନ୍ ପାକ୍ନା ‘ନଏ’ ବଲି ଚାଡ଼ି
 ଦେଇରଇଲା
 ସେ ପାକ୍ନାସେ ଗର୍ କନର୍ ମୁଲ୍ ପାକ୍ନା ଅଇଲା ।
 ୧୮ ଜନ୍ ଲକ୍ଷ୍ମୀନ ସେ ପାକ୍ନା ଉପ୍ରେ ଅଦର୍ବାଇ, ସେମନ୍ କଣ୍ଠ
 କଣ୍ଠ ଅଇଜିବାଇ, ଆରି ସେ ପାକ୍ନା ଜାର୍ ଉପ୍ରେ ଅଦର୍ସି, ସେ ବିଲି
 ଆଜିଜାଇସି ।”

ସିସ୍ତ୍ରୋମାକ୍ଷ୍ମୀନ ଦେବା ବିସଇ ପାଚାର୍ବାଟା
 (ମାତିଉ ୨୨:୧୫-୨୨; ମାର୍କ ୧୨:୧୩-୧୭)

୧୯ ସେବେଲା ସାସ୍ତର୍ ସିକାଉମନ୍ ଆରି ମୁକିଅ ପୁଜାରିମନ୍
 ଜିସୁର୍ କାତାନି ସୁନି, ତାକେ ଦାପ୍ରେ ବନ୍ଦି କରବାକେ ବାଟ୍ କଜ୍ଜେ
 ରଇଲା । କାଇକେ ବଇଲେ ଜିସୁ କଇବା ଅକ୍ଷୁର୍ ବାଡ୍ କାତା,
 ସେମନ୍ ବିସଇନେଇ କଇଲାନି ବଲି ବୁଜ୍ଜଲା । ମାତର୍ ସେମନ୍
 ଲକ୍ଷ୍ମୀନକେ ଡରଡେ ରଇଲା ।

୨୦ ସେଟାର୍ପାଇ ସେମନ୍ ତାର୍ ବୁଲ୍ ଦାର୍ବାକେ ଗଟେକ୍ ସୁଜଗ୍
 କଜ୍ଜେ ରଇଲା । ସେମନ୍ କେତେଟା ଚର୍ମନକେ ଲାଟ୍ଦେଇ
 ଦର୍ମ୍ ଲକ୍ଷ୍ମୀନା ଦେକାଇ ଅଇବାକେ ପାଟାଇଲା । କାଇକେ
 ବଇଲେ ଜିସୁର୍ ଟଣ୍ଡେଅନି ବୁଲ୍କାତା ବାର୍କରାଇ, ଦସ୍ ଦାରି,
 ରମିୟ ସାସନ୍କାରିଆକେ ସର୍ପି ଦେବାକେ ମନକର୍ଡେ ରଇଲା ।
 ୨୧ ସେଟାର୍ପାଇ ସେ ଚର୍ମନ୍ ଜିସୁକେ ପାଚାର୍ଲାଇ, “ଏ
 ଗୁରୁ, ତମେ ଟିକ୍ କଇଲାସ୍ନି ଆରି ଟିକ୍ ସିକାଇଲାସ୍ନି ବଲି
 ଆମେ ଜାନିଆରୁ । କାର୍ବାଟେ ନ ଅଇ ଲକ୍ଷ୍ମୀନର୍ ଜିବନର୍ପାଇ
 ପର୍ଯ୍ୟେସରର୍ ସଡ୍ ବିସଇସେ ସିକାଇଲୁସ୍ନି । ୨୨ ଏବେ ତୁଇ
 ଆମକେ କଅ, ରମିୟ ସର୍କାରର୍ ରାଜା କାଇସର୍କେ ସିସ୍ତ୍ରୁ
 ଦେବାଟା ଆମର୍ ନିୟ୍ ଇସାବେ ଟିକ୍ କି ନାଇ ?”

୨୩ ମାତର୍ ଜିସୁ ସେମନ୍ ମନ୍ବିଡ୍ରେ କାତା ଜାନିକରି କଇଲା,
 ୨୪ “ମକେ ଗଟେକ୍ ରମିୟ ସର୍କାରର୍ ଅଦ୍ଲି ତାରୁ ଦେକାଆ ।
 ତେଇ କାର୍ ମୁର୍ଡି ଆରି କାର୍ ନାଉଁ ଆଟେ ?” “କାଇସର୍ ମୁର୍ଡି
 ଆରି ନାଉଁ ଆଟେ ।” ବଲି ସେମନ୍ କଇଲା ।

୨୫ “ସେନ୍ତାଇଁ ରଇଲେ ଜନ୍ମଟା କାଇସରରଟା ସେଟା କାଇସରକେ ଦିଆସ୍, ଜନ୍ମଟା ପରମେସରରଟା ସେଟା ପରମେସରକେ ଦିଆସ୍ ।” ବଲି କଇଲା ।

୨୬ ଏ କାତା ସୁନି ସବୁଲକର ମୁଆଟେ ସେମନ୍ ଜିସୁର ବୁଲ୍ ଦାରବାର ନାପାରଲାଇ । ଆରି ଜିସୁର କାତା ସୁନି ସେମନ୍ କାବାଅଇଜାଇ, ତୁପଅଇ ରଇଲାଇ ।

ଆରିତରେକ୍ ଜିବନ୍ ଅଇ ଉଟ୍‌ବା ବିସଇ ନେଇ ପର୍‌ସନ୍
(ମାତିଉ ୨୨:୨୩-୩୩; ମାର୍କ ୧୨:୧୮-୨୭)

୨୭ ☆ତାର ପଟେ କେତେଟା ସାଦୁକି ଲକ୍‌ମନ୍ ଜିସୁର ଲଗେ ଗାଲାଇ । ସେମନ୍, ମଲା ଲକ୍‌ମନ୍ ଆରି ତରେକ୍ ଜିବନ୍‌ଅଇ ଉଟ୍‌ବା ବିସଇ ବିସବାସ୍ ନ କର୍‌ତେ ରଇଲାଇ । ୨୮ ସେମନ୍ ଜିସୁକେ ପାଟାରଲାଇ, “ଏ ଗୁରୁ, ମସା ଆମର୍ ପାଇ ଏନ୍ତି ନିୟମ୍ ଲେକିଆଟେ ଜେ, ଗଟେକ୍ ଲକ୍ ବିବାଅଇ ପିଲାଟକି ନ ଅଇତେ ମରିଗାଲେ ତାର୍ ବାଇ ସେ ରାଣ୍ଡିମାଇଜିକେ ସଙ୍ଗଇସି । ଆରି ପିଲାଟକି ଅଇଲେ ତାର୍ ବଡ଼ବାଇର୍ କୁଟୁମ୍ ରକିଆ ଅଇସି । ୨୯ ଏନ୍ତି ସାଡ଼ବାଇ ରଇଲାଇ । ପର୍‌ତୁମ୍ ବାଇ ବିବା ଅଇ ପିଲାଟକି ନଇତେ ମରିଗାଲା । ୩୦ ତାର୍ ପଟେ ବଡ଼ମଜିଆ ରାଣ୍ଡିମାଇଜିକେ ସଙ୍ଗଇଲା । ମାତର୍ ସେ ମିସା ପିଲାଟକି ନଇତେ ମରିଗାଲା । ୩୧ ତାର୍ ପଟେ ମଜିଆବାଇ ରାଣ୍ଡିମାଇଜିକେ ସଙ୍ଗଇଲାକେ ପିଲାଟକି ନଇତେ ମରିଗାଲା । ସେନ୍ତି ସେ ରାଣ୍ଡିମାଇଜିକେ ସାଡ଼ ବାଇ ଜାକ ସଙ୍ଗଇ ପିଲାଟକି ନଇତେ ମରିଗାଲା । ୩୨ ସାରାସାରି ପଟେ ସେ ମିସା ମରିଗାଲା । ୩୩ ଏନ୍ତି ବଇଲେ ମଲାତେଇଅନି ଉଟ୍‌ଲା ପଟେ ସେ କାର୍ ମାଇଜି ଅଇସି ? କାଇକେ ବଇଲେ ସେମନ୍ ସାଡ଼ ଲକ୍‌ଜାକ ତାକେ ସଙ୍ଗଇ ରଇଲାଇ ।”

୩୪ ଜିସୁ ସେମନ୍‌କେ କଇଲା, “ଏ ଜୁଗର୍ ମାଇଜି ମନସ୍ ବିବା ଅଇବାଇ, ୩୫ ମାତର୍ ଜନ୍ ମାଇଜିମନସ୍ ମଲାଟାନେଅନି ଉଟି, ଆଇବା ଜଗତେ ଜିଇବା କାଇବାକେ ବାଟିଅଇଆଟଡ଼, ସେମନ୍ ବିବା ନ ଅଅଡ଼ । ୩୬ ସେମନ୍ ପରମେସରର୍ ଦୁଡ଼ମନର୍‌ପାରା ଅଇ ଆରି କେବେମିସା ନ ମରଡ଼ । ପଟେ ମଲାଟାନେଅନି ଉଟି ପରମେସରର୍ ପିଲାଟକି ଅଇ ରଇବାଇ । ୩୭ ମସା ବଲ୍ କରି ବୁଜାଇ ଦେକାଇଦେଇ

☆ ୨୦:୨୭ ୨୦:୨୭ ପେରିଡ଼ ୨୩:୮

ଆଚେ । ମଲା ଲକ୍ମନ ଜିବନ୍ ଅଇ ଉଟ୍‌ବାଇ । ଲାଗତେ ରଇବା ବୁଟାର କାତାଇ, ମସା ଅବରାଆମର୍ ପର୍ମେସର୍, ଇସାକର୍ ପର୍ମେସର୍ ଆରି ଜାକୁବର୍ ପର୍ମେସର୍ ବଲି ପର୍ମେସର୍‌କେ ଜାନାଇ ଆଚେ । ୩୮ ପର୍ମେସର୍ ମଲା ଲକ୍ମନର୍ ମାପରୁ ନଏଁ, ଜିବନ୍ ରଇଲା ଲକ୍ମନର୍ ମାପରୁ । ପର୍ମେସର୍‌ର ଦେକ୍‌ବା ଇସାବେ ତେଇ ସେମନ୍ ସବୁ ଲକ୍ ଜିବନ୍ ଅଇଆଚତ୍ ।”

୩୯ ତାର୍ ପଚେ କେତେଟା ସାସ୍‌ତର୍ ସିକାଉମନ୍ “ଏ ଗୁରୁ ତୁଇ ବଡେ ନିକସଙ୍ ଉତର୍ ଦେଇଆରୁସ୍ !” ବଲି ଜିସୁକେ କଇଲାଇ । ୪୦ କାଇକେବଇଲେ ଜିସୁକେ ଆରି କେ ମିସା ପର୍‌ସନ୍ ପାଚାର୍‌ବାକେ ସାଆସ୍ କରତ୍ ନାଇ ।

ମସିଅ କାର୍ ପିଲା ?

(ମାତିଉ ୨୨:୪୧-୪୬; ମାର୍କ ୧୨:୩୫-୩୭)

୪୧ ତାର୍ ପଚେ ଜିସୁ ତାର୍ କାତା ସୁନ୍‌ବା ଲକ୍ମନକେ ପାଚାର୍‌ଲା, “ପର୍ମେସର୍‌ର ବାଟିପାଟାଇଲା କିରିସ୍‌ଟ ଦାଉଦ୍ ରାଜାର୍ ନାତିତିତି ବଲି ଲକ୍ମନ କାଇକେ କଇଲାଇନି ?”

୪୨ କାଇକେ ବଇଲେ ଦାଉଦ୍ ରାଜା ଗିତ୍‌ସଙ୍‌ଗିତା ବଇତେଇ ନିଜେ ଏନ୍ତି ଲେକି ଆଚେ, ପର୍ମେସର୍‌ ମର୍ ମାପରୁକେ କଇଲା,

୪୩ ମୁଇ ତର୍ ବିରଦିମନ୍‌କେ ଆରାଇକରି ତର୍ ପାଦ୍‌ତଲେ ସଙ୍‌ଗିବା ପିତାପାରା ନ କର୍‌ବା ଜାକ, ତୁଇ ମର୍ ଉଜାବାଟେସେ ବସି ର ।

୪୪ ଜଦି ଦାଉଦ୍ ରାଜା କିରିସ୍‌ଟକେ ମାପରୁ ବଲି ଡାକି ରଇଲେ ଆରି କିରିସ୍‌ଟ କେନ୍ତି ଦାଉଦ୍ ରାଜାର୍ ନାତିତିତି ଅଇସି ? ବଲି ପାଚାର୍‌ଲା ।

ଜିସୁ ସାସ୍‌ତର୍ ସିକାଇବା ଲକ୍ମନକେ ଜାଗ୍‌ରତ୍ କରାଇଲା

(ମାତିଉ ୨୩:୧-୩୬; ମାର୍କ ୧୨:୩୮-୪୦)

୪୫ ସେବେଲା ସବୁ ଲକ୍ମନ ଜିସୁ ସିକାଇବା ବିସଇ ସୁନ୍‌ତେ ରଇଲାବେଲେ, ସେ ତାର୍ ସିସ୍‌ମନ୍‌କେ କଇଲା, ୪୬ “ନିୟ୍‌ମ୍ ସିକାଇବା ଲକ୍ମନର୍‌ତେଇଅନି ଜାଗ୍‌ରତ୍ ରୁଆ । ସେମନ୍ ନିମାନ୍ ପଟିଆ ପିନ୍ଦି ବୁଲ୍‌ବାକେ ମନ୍ କର୍‌ବାଇ । ଆଟେବାଟେ ଜୁଆର୍

ପାଇବାକେ, ପାରତନା ଗରର୍ ମୁକିଆ ଜାଗାଇ ବସ୍‌ବାକେ, ଆରି ବଜିତେଇ ସବୁ ଲକରଟାନେଅନି ଆଗ୍‌ତୁ ବସ୍‌ବାକେ ମନ୍ କରବାଇ । ୪୭ ସେମନ୍ ଲାଜ୍ ନଅଇ ରାଣ୍ଡି ମାଇଜିମନ୍‌କେ ନାଡାଇକରି ସେମନ୍‌ର୍ ଦନ୍‌ସ୍‌ପତି ଜୁରି ନେବାଇ । ମାତର୍ ସେମନ୍ ନିମାନ୍ ଲକରପାରା ଦେକାଇଅଇବାଇ । ଆରି ଲକ୍‌ମନ୍‌ର୍ ମୁଆଟେ ବେସି ଲମାଇକରି ପାରତନା କରବାଇ । ଏନ୍ତାରି ଲକ୍‌ମନ୍‌କେ ପର୍‌ମେସର୍ ବେସି ବଡ୍ ଡଣ୍ ଦେଇସି ।”

୨୧

ଗଟେକ୍ ରାଣ୍ଡିମାଇଜିର୍ ଚାନ୍ଦା

୧ ତାର ପଟେ ଜିସୁ ଚାରିବେଡ୍‌ଡି ଦେକ୍‌ଲା ଆରି ସାଉକାର୍ ଲକ୍‌ମନ୍ ମନ୍‌ରର୍ ପେଟିଆଟାନେ ଦାନ୍ ଦେବାଟା ଦେକ୍‌ଲା । ୨ ସେବେଲା ଗଟେକ୍ ଅରକିଡ୍ ରାଣ୍ଡି ମାଇଜି ମିସା ଜଡେକ୍ ତାମାକାସୁ ଦେବାଟା ଜିସୁ ଦେକ୍‌ଲା । ୩ “ମୁଇ ତମ୍‌କେ ସଡ୍ କାତା କଇଲିନି, ସବୁ ଲକରଟାନେଅନି ଏ ରାଣ୍ଡିମାଇଜି ଅଦିକ୍ ଦେଲା ଆଟେ । ୪ କାଇକେ ବଇଲେ ସାଉକାର୍ ଲକ୍‌ମନ୍ ନିଜର୍ ନିଜର୍ ଅଗଲ୍‌ଲା ଦନ୍‌ଡେଇଅନି ଅଲପ୍ ଅଲପ୍ ଦେଲାଇ ଆଟଡ୍ । ମାତର୍ ଏ, ନିଜେ ବର୍‌ବା ପାଇ ତାର୍ ଜେଡ୍‌କି ରଇଲା ସବୁ ଦେଲା ଆଟେ ।”

ମନ୍‌ର ବସ୍‌ଲ୍‌ଲାଟା

(ମାତିଉ ୨୪:୩-୧୪; ମାର୍କ ୧୩:୩-୧୩)

୫ କେତେଟା ସିସମନ୍ ମନ୍‌ରର୍ ବିସଇ ନେଇକରି ନିଆଇ କର୍‌ଡେ ରଇଲାଇ । “ଡେଇ ଲାଦିରଇବା ସୁନ୍‌ର୍ ସୁନ୍‌ର୍ ପାକ୍‌ନା ଆରି ପର୍‌ମେସର୍‌କେ ସର୍‌ପି ଦେଲା ଦାନ୍ ସଙ୍‌ କେତେକ୍ ସୁନ୍‌ର୍ ଗର୍ ବାନ୍‌ଲାଇ ଆଟଡ୍” ବଲି କାତାଅଇଡେ ରଇଲାଇ । ୬ “ଏନ୍ତି ଦିନ୍ ଆଇସି, ଏବେ ତମେ କାଇ କାଇଟା ଦେକ୍‌ଲାସ୍‌ନି ସେଟା ସବୁ କୁରୁପ୍‌ନାସ୍ ଜାଇସି । ଗଟେକ୍ ପାକ୍‌ନା ମିସା ତାର୍ ଜାଗାଇ ନ ରଏ । ସବୁ ମାଟିଡେଇ ମିସି ଜାଇସି ।”

ଦୁକ୍ ଆରି ତାଡ୍‌ନା

(ମାତିଉ ୨୪:୩-୨୪; ମାର୍କ ୧୩:୩-୧୩)

୭ ତାର ପତେ ସେମନ୍ ଜିସୁକେ ପାଚାରଲାଇ, “ଏ ଗୁରୁ, ଏଟା ସବୁ କେବେ ଅଇସି ? ଆରି ଏ ସବୁ ଗଟ୍‌ନା କେଟ୍‌ବା ଆଗତୁ ସେଟା କେଡେବଲ୍ ଅଇସି ବଲି କେନ୍ତ୍ରି ଚିନି ଅଇସି ?”

୮ ଜିସୁ ସେମନ୍‌କେ କଇଲା, “ଜାଗରତ୍‌ଅଇକରି ରୁଆ, ନାଡ଼ାଇ ଉଆ ନାଇ । ବେସି ଲକ୍ ମର୍ ନାଉଁଦାରି ଆସି କଇବାଇ, ‘ମୁଇ ସେ ଆକା ।’ ବେଲା କେଟ୍‌ଲା ଆଚେ, ମାତର୍ ତମେ ସେମନ୍‌ର୍ ପତେ ଜାଆ ନାଇ ।^୯ ଆରି କେବେ ତମେ ଜୁଇଦ୍ ଆରି କିରମାର ଅଇବାଟା ସୁନ୍‌ସା, ସେବେଲା ତରା ନାଇ । କାଇକେ ବଇଲେ ଏ ସବୁ ଗଟ୍‌ନା ଆଗତୁ ଅଇସିସେ । ମାତର୍ ଏ ଦୁନିଆର୍ ସେସ୍ ଦିନ୍ ସେଦାପ୍‌ରେ ନ ଆସେ ।”

୧୦ ଆରି ଜିସୁ କଇଲା, “ଦେସ୍ ବିରୁଦେ ଦେସ୍ ଆରି ଜାତି ବିରୁଦେ ଜାତି ଉଟ୍‌ସି ।^{୧୧} ଦର୍ତ୍ତନି ତୁଲ୍‌ତୁଲ୍‌ସି । ବଡ଼ ରଗ୍‌ମନ୍ ଅଇସି ଆରି ଆକାସେ କେବେ ନ ଅଇବା କାବା ଅଇଜିବା ଚିନ୍‌ମନ୍ ତ୍ରିସି ।^{୧୨} ମାତର୍ ଏ ସବୁ ବିସଇ ନ ଅଇବା ଆଗତୁ, ତମ୍‌କେ ବାନ୍ଧିକରି ନେଇ ସାସ୍‌ତି ଦେବାଇ, ପାର୍‌ତନା ଗର୍‌ମନ୍‌କେ ବିଚାର୍ କରି ବନ୍ଧିଗରେ ପାକାଇବାକେ ସର୍‌ପିଦେବାଇ । ମର୍‌ପାଇ ତମେ ରାଜା ଆରି ସାସନ୍ କାରିଆମନ୍‌ର୍ ମୁଆଟେ ଟିଆ ଅଇସା ।^{୧୩} ମର୍ ବିସଇ ତମେ ବିନ୍ ଲକ୍‌ମନ୍‌କେ କଇବାକେ ଗଟେକ୍ ସମାନ୍ ବେଲା ଅଇସି ।^{୧୪} ✨ଡେବର୍ ପାଇ ‘ମୁଇ ନିଜ୍‌କେ କେନ୍ତ୍ରି ରକିଆ କର୍‌ବି ?’ ସେ ବିସଇ ବାବିକରି ଆଗେଅନି ଚିନ୍ତା କରା ନାଇ ।^{୧୫} କାଇକେ ବଇଲେ ମୁଇ ତମ୍‌କେ ଟିକ୍‌ପଦ୍ କଇବାକେ ଗିଆନ୍ ଦେବି । ତମ୍‌କେ ବିରଦ୍ କର୍‌ବା ଲକ୍‌ମନ୍ ସେ ଗିଆନ୍‌ର୍ ବାଦୁଲେ କାଇଟା କଇନାପାରତ୍ ।^{୧୬} ଆରି ତମର୍ ମାଆ ବାବା, ବାଇ, ନିଜର୍ ଲାଗାର୍ ଲିଡାର୍ ଲକ୍, ମଇତର୍‌ମନ୍ ଆରି କୁଟୁମର୍ ଲକ୍‌ମନ୍, ତମ୍‌କେ ବିରଦିମନ୍‌କେ ସର୍‌ପି ଦେବାଇ ଆରି ତମର୍ ବିଡ଼ରେ ଅନି କେଡେ ଲକ୍‌କେ ମରାଇଦେବାଇ ।^{୧୭} ତମେ ମରଡେଇ ବିସ୍‌ବାସ୍ କଲାସ୍‌ନି ବଲି ଗୁଲାଇ ଲକ୍‌ମନ୍ ତମ୍‌କେ ଇନ୍ କର୍‌ବାଇ ।^{୧୮} ମାତର୍ ତମର୍ ମୁଣ୍ଡର୍ ଚେଣ୍ଡି ମିସା ଗଟେକ୍ ନ ନସେ ।^{୧୯} ତମେ ଡାଟ୍‌ଅଇ ରଇଲେ ଏ ସବୁ ବିସଇ ମୁରଚିକରି, ତମର୍ ଆଡ଼ମାକେ ରକିଆ କର୍‌ସା ।”

ଜିରୁସାଲମ୍ ନସ୍ତ ଅଇଜାଇସି
(ମାତିଉ ୨୪:୧୫-୨୧; ମାର୍କ ୧୩:୧୪-୧୯)

୨୦ “ମାତର୍ ଜେଡେବଲ୍ ତମେ ଜିରୁସାଲମ୍ ଗଡେ ବିରଦି ସନିଅମନ୍ ଚାରିବେଡୁତି କିନ୍ଦରି ରଇବାଟା ଦେକ୍ସା ବଇଲେ, ସେବେଲା ଜିରୁସାଲମ୍ ନସ୍ତ ଅଇବା ବେଲା ଲଗେ କେଟ୍ଲା ବଲି ଜାନା । ୨୧ ସେବେଲାଇ କେ କେ ଜିଉଦା ଦେସେ ରଇବାଇ, ସେମନ୍ ଡଙ୍ଗର୍ ବିଡରେ ପାଲାଅଡୁ । କେ କେ ଗଡୁ ବିଡରେ ରଇବାଇ ସେମନ୍ କେନେ ମିସା ବର୍ଦବାକେ ପାଲାଅଡୁ । କେ କେ ଗଡୁ ବାଇରେ ରଇବାଇ ସେମନ୍ ଗଡୁ ବିଡରେ ନ ପୁରଡୁ । ୨୨ କାଇକେ ବଇଲେ ସେଟା ସାସ୍ତରର୍ ସବୁ ବିସଇ ଜେକ୍ତିକି ସିଦ୍ ଅଇସି, ସେଟାର ପାଇ ସେ ଦିନ୍ମନ୍ ବେସି ଡଣ୍ଡ ପାଇବା ଦିନ୍ମନ୍ ଅଇସି । ୨୩ ସେ ଦିନ୍ମନ୍କେ ଗାଗ୍ଡେ ରଇବା ମାଇଜିମନ୍ ଆରି ଦୁଦ୍ କୁଆଇଡେରଇବା ମାଆମନର୍ କେଡେକ୍ ଦୁକର୍ ଦିନ୍ ଅଇସି । ଏ ଦେସର୍ ଲକ୍ମନ୍କେ ଅପରବଲ୍ ଦୁକ୍ ଆଇସି ଆରି ସେମନ୍ ଡଣ୍ଡ ପାଇବାଇ । ୨୪ କେଡେ ଲକ୍ମନ୍କେ କାଣ୍ଡୁର୍ଦାର୍ ସଙ୍ଗ୍ ମରାଇବାଇ ଆରି କେଡେ ଲକ୍ମନ୍କେ ବନ୍ଦିକରି ବିନ୍ବିନ୍ ଦେସେ ଦାରିଜିବାଇ । ଜିଉଦି ନଇଲା ଲକ୍ମନ୍ ବେଲା ନ ସାର୍ବାଜାକ ଜିରୁସାଲମ୍ ବିନାସ୍ କରବାକେ ଚାଡିଦେବାଇ ।”

ନରପିଲା ଆଇବାଟା
(ମାତିଉ ୨୪:୨୯-୩୧; ମାର୍କ ୧୩:୨୪-୨୭)

୨୫ ☆“ବାଦ୍ଲେ, ବେଲ୍ଟାନେ, ଜନ୍ଟାନେ ତାରାମନର୍ଟାନେ କେବେ ନ ଡିସ୍ବା ଚିନ୍ମନ୍ ଡିସ୍ସି । ଦୁନିଆର୍ ସବୁ ଦେସର୍ ଲକ୍, ବେସି ଦୁକ୍ କସ୍ଟ ପାଇବାଇ । ଜେଡେବେଲା ସମ୍ଦୁରର୍ ବଡୁ ଲଅଡି ଗରଜଲେ ଲକ୍ମନ୍ କାଇଟା କରବାର୍ ଆଟେ କାଇଟା ନାଇ ବଲି ବାୟାବିକଲ୍ ଅଇଜିବାଇ । ୨୬ ଆରି ଲକ୍ମନ୍ ଦୁନିଆଇ ଆଇବା ସବୁ ଗଟ୍ନା ଦେକିକରି ‘କାଇକେ ଏକ୍ତି ଅଇଲାନି ?’ ବଲି ଡରିକରି କେଡେ ଲକ୍ ମୁରଟା ଅଇଜିବାଇ । କାଇକେ ବଇଲେ ଆକାସେ ରଇଲା ସବୁ ବିସଇ ପର୍ମେସର ତୁଲ୍ତୁଲାଇ ଦେଇସି । ୨୭ ☆ସେବେଲାଇ

☆ ୨୧:୨୫ ୨୧:୨୫ ପରକାସିତ ୭:୧୨,୧୩ ☆ ୨୧:୨୭ ୨୧:୨୭ ପରକାସିତ ୧:୭

ଲକ୍ଷ୍ମୀ ପରମେଶ୍ୱର ତେଜସ୍ୱୀ ଆସିରଇବା ନରପିଲା ମୁଖ, ବେସି ବସୁସଙ୍ଗ ଆରି ତାଙ୍କପୁଟାଅଇକରି ବାଦଲେ ଆଇବାଟା ଦେଖିବାଇ । ୨୮ ମାତର ଏ ସବୁ ଗର୍ବନା ଆରାମ ଅଇଲେ ତମେ ତାଟ୍‌ସଙ୍ଗ ଚିଆଅଇ ଉପରେ ଦେବା । କାଇକେ ବଇଲେ ତମର ରକିଆ ପାଇବା ଦିନ ଲଗେ ଆଚେ ।”

ତୁମ୍ଭରି ଗରବ୍ ସିକିଆ

(ମାତିଉ ୨୪:୩୨-୩୫; ମାର୍କ ୧୩:୨୮-୩୧)

୨୯ ଆରି ଜିସୁ ସେମନ୍‌କେ ଗଟେକ୍ ଉଦାଅରନ୍ କଇଲା, “ତୁମ୍ଭରି ଗର୍ବ ଆରି ବିନ୍ ସବୁ ଗରବ୍ କାତା ଚିନ୍ତା କରା । ୩୦ ଜେଡେବେଲେ ତାର୍ କେନ୍ଦିଅନି ପତର ପାଲୁଆନି କର୍ସି, ଆରି କାଁତାପଡ଼ିଆ ଡିସ୍‌ଲେ କାରାଦିନ୍ କେଟ୍‌ଲା ବଲି ତମେ ଜାନ୍‌ସା । ୩୧ ସେନ୍ତାରିସେ ଏ ସବୁ ବିସଇ ଅଇବାଟା ଦେଖଲେ ପରମେଶ୍ୱରର ରାଇଜ୍ କେଟି ଆଇଲା ବଲି ଜାନ୍‌ସା ।”

୩୨ “ମୁଇ ତମକେ ସତ୍‌କାତା କଇଲିନି । ମନେ ରକା, ଏବେ ଜିବନ୍ ରଇବା ସବୁ ଲକ୍ଷ୍ମୀନର୍ ମରନ୍ ଅଇବା ଆଗ୍‌ତୁ ଏ ସବୁ ଗର୍ସି । ୩୩ ସରଗ୍ ଆରି ମର୍ପୁର ନସି ଜାଇସି, ମାତର ମର୍ ବାକିଅ କେବେ ନ ନସେ ।”

ସବୁବେଲା ଜାଗରତ୍ ରୁଆ

୩୪ “ମାତର ତମେ ନିଜର୍ ନିଜର୍ ବିସଇ ନେଇକରି ଜାଗରତ୍ ରୁଆ । ତମର୍ ମନ୍ ସବୁବେଲାଇ ବଜିବାଡ୍ କରି ମଦ୍ ପେଣ୍ଡମ୍ କାଇବା ବିସଇ ଆରି କେନ୍ତାର୍ ଜିଇବାର୍ ଅଇସି କେନ୍ତାର୍ ନାଇ ବଲି ଚିନ୍ତାକରି ରଇଲାବେଲେ, ସେ ଦିନ୍ ଅଟାଡ୍ ପାନ୍ ପାରା ଆସି ଲାଗିଜାଇସି । ୩୫ ସେନ୍ତାରିସେ ଏ ଦୁନିଆର୍ ସବୁ ଲକ୍ଷ୍ମୀକେ ସେଟା ଗର୍ସି । ୩୬ ସେ ଦିନମନ୍‌କେ ଗର୍ବ୍‌ବା ସବୁ ବିସଇ ଦେଇ, କାଇ ବିପଦ୍ ନ ଅଇ ଜିବାକେ ଆରି ପରମେଶ୍ୱର ପାଟାଇରଇବା ନରପିଲା ମର୍ ମୁଆଟେ ଚିଆ ଅଇବାକେ, ପାର୍‌ତନା କରି ଜାଗରତ୍ ଅଇରୁଆ ।”

୩୭ ☆ଜିସୁ ସେ ଦିନମନ୍‌କେ ମନ୍‌ରେ ଜାଇ ନିମାନ୍ କାତା ସିକାଇ ଦେଇଡେ ରଇଲା । ଆରି ତାର୍ ସିସ୍‌ମନ୍‌ର୍ ସଙ୍ଗ୍ ସବୁ ରାତି ବାରିଜାଇ

ଜିହ୍ୱା ନାଉଁର ଡଙ୍ଗରେ ବିତାଇତେ ରଇଲା । ୩୮ ବେସି ଲକ୍ ଜିହ୍ୱା କାତା ସୁନ୍‌ବାକେ ସବୁ ଦିନ୍ ସାକାଲେ ମନ୍ଦିରେ ଜାଇତେରଇଲା ।

୨୨

ଜିହ୍ୱା ବିରଦେ ସତ୍‌ଜିତ୍‌ର

(ମାତିଉ ୨୬:୧-୫; ମାର୍କ ୧୪:୧-୨; ଜଅନ୍ ୧୧:୪୫-୫୩)

୧ କମିର୍ ନ ପାକାଇ ରୁଟି ତିଆର୍ କରବା ପରବ୍ ଜାକେକି ନିସ୍ତାର ପରବ୍ ବଲି ମିସା କଇବାଇ, ସେ ପରବ୍ ଲଗାଲଗି କେଟି ଆଇତେ ରଇଲା । ୨ ଆରି ମୁକିଅ ପୁଜାରିମନ୍, ସାସ୍‌ତର୍ ସିକାଉମନ୍ ଲକ୍‌ମନ୍‌କେ ଡର୍‌ତେ ରଇଲା । ଜିହ୍ୱାକେ କେନ୍ଦ୍ରି ଲୁଟ୍‌ତେ ମରାଉଁ ? ବଲି ବାଟ୍ କଜ୍‌ତେ ରଇଲା ।

ଜିହ୍ୱାକେ ଦାରାଇ ଦେବାକେ ଜିଉଦା ରାଜି ଅଇଲା

(ମାତିଉ ୨୬:୧୪-୧୬; ମାର୍କ ୧୪:୧୦-୧୧)

୩ ଆରି ଜିହ୍ୱା ବାର୍‌ଟା ସିସ୍‌ମନ୍‌ର ବିଡ୍‌ରେଅନି ଇସ୍‌କାରିୟ୍‌ଡ୍ ଜିଉଦା ନାଉଁର ଗଟେକ୍ ସିସ୍ ରଇଲା । ସେବେଲାଇ ତାର୍ ମନ୍ ବିଡ୍‌ରେ ସଇତାନ୍ ପୁରିଦେଲା । ୪ ଆରି ସେ ମୁକିଅ ପୁଜାରିମନ୍ ଆରି ମନ୍‌ଡିର୍ ଜାଗି ରଇବା ସେନାପତିମନ୍‌ର ଲଗେ, କେନ୍ଦ୍ରିକରି ଜିହ୍ୱାକେ ବିସ୍‌ବାସେ ବିସ୍ ଦେଲା ପାରା କରି, ତାକେ ଦାରାଇଦେବି ବଲି ସେମନ୍‌ର ସଙ୍ଗ୍ କାତାବାର୍‌ତା ଅଇବାର୍ ଗାଲା । ୫ ସେଟାର୍‌ପାଇ ସେ ଲକ୍‌ମନ୍ ବେସି ସାର୍‌ଦା ଅଇକରି ତାକେ ତାରୁ ଦେବାକେ ରାଜି ଅଇଲା । ୬ ଜିଉଦା ମିସା ରାଜି ଅଇଲା ଆରି ଲକ୍‌ମନ୍‌ ନ ଜାନ୍‌ତେ ଜିହ୍ୱାକେ ଦାରାଇଦେବାକେ ସୁଜଗ୍ କଜ୍‌ତେରଇଲା ।

ନିସ୍ତାର ପରବ୍‌ର ବଜିର୍‌ପାଇ ଜିହ୍ୱା ଜାଗ୍‌ରଡ୍ ଅଇଲା

(ମାତିଉ ୨୬:୧୭-୨୫; ମାର୍କ ୧୪:୧୨-୨୧; ଜଅନ୍ ୧୩:୨୧-୩୦)

୭ ତାର୍‌ପଟେ ନିସ୍ତାର ପରବ୍‌ର ବଜି କରି ମେଣ୍ଡାପିଲା ମାର୍‌ବା ଦିନ୍ ଆଇଲା । ୮ ଜିହ୍ୱା ପିତର୍ ଆରି ଜଅନ୍‌କେ ଏ କାତା କଇ ପାଟାଇଲା । “ଜା ଆରି ଆମର୍‌ପାଇ ନିସ୍ତାର ପରବ୍‌ର ବଜି କାଇବାକେ ଟିକ୍ କରା ।”

୯ ସେମନ୍ ଜିହ୍ୱାକେ ପାଟାର୍‌ଲାଇ, “ଆମେ କନ୍ ଜାଗାଇ ବଜି ତିଆର୍‌କର୍‌ରୁ ବଲି ତମେ ମନ୍ କଲାସ୍‌ନି ?”

୧୦ ଜିସୁ ସେମାନଙ୍କେ କଇଲା, ଦେକା, ତମେ ଗଡ଼ ବିତ୍ତରେ ପୁରବା
 ବେଲେ ଗଟେକ୍ ଆଣ୍ଡିତେଇ ପାନିନେଇ ଜିବା ଲକ୍‌କେ ବେଟ୍‌ପାଇସା
 । ସେ ଜନ୍ ଗରେ ପୁରସି, ତାର ପର୍ପର୍ ଜାଇ ସେ ଗରର୍
 ସାଉକାର୍‌କେ କୁଆ, ୧୧ “ଆମର୍ ଗୁରୁ ତମ୍‌କେ ଏ କବର୍ କଇ
 ପାଟାଇଆଟେ, ମୁଇ ଆରି ମର୍ ସିସ୍‌ମନ୍ କନ୍ ବାକ୍‌ରାଇ ରକିଆ
 ପାଇବା ପରବର୍ ବଜି ମାନବୁ ? ୧୨ ତାର୍‌ପଟେ ସେ ଲକ୍‌ ତମ୍‌କେ
 ଗର୍ ଉପ୍‌ରେ ରଇବା ମଅଲା ତିଆର୍ ଅଇରଇଲା ଗଟେକ୍ ବଡ଼
 ବାକ୍‌ରା ଦେକାଇ ଦେଇସି । ତେଇ ତମେ କାଦି ତିଆର୍ କରା ।”

୧୩ ସେମନ୍ ଜାଇକରି ଜିସୁ ସେମାନଙ୍କେ ଜେନ୍ତି କଇରଇଲା
 ସେନ୍ତିସେ ଦେକଲାଇ । ଆରି ନିସ୍‌ତାର୍ ପରବର୍ ବଜି ତିଆର୍ କଲାଇ
 ।

ପର୍‌ବୁ ବଜି

(ମାଟିଉ ୨୬:୨୬-୩୦; ମାର୍କ ୧୪:୨୨-୨୬; ୧ମ କରନ୍ତିୟ
 ୧୧:୨୩-୨୫)

୧୪ ସମାନ୍ ବେଲା କେଟ୍‌ଲାକେ ଜିସୁ ପେରିତ୍‌ମନ୍‌ର୍ ସଙ୍ଗ୍
 କାଇବାକେ ମିସ୍‌ତେ ବସ୍‌ଲାଇ । ୧୫ ସେବେଲା ଜିସୁ ସେମାନଙ୍କେ
 କଇଲା, “ମୁଇ ଦୁକ୍ କସ୍‌ଟ ପାଇବା ଆଗ୍‌ତୁ ନିସ୍‌ତାର୍ ପରର୍
 ତମ୍‌ର୍‌ସଙ୍ଗ୍ ମିସ୍‌ତେ କର୍‌ବାକେ ବେସି ମନ୍ କରୁରଇଲି । ୧୬ ମୁଇ
 ତମ୍‌କେ କଇଲିନି, ପର୍‌ମେସର୍‌ର ରାଇଜେ ଏଟା ପୁରାପୁରୁନ୍ ନ
 ଅଇବାଜାକ, କେବେ ମିସା ଏଟା ନ କାଇ ।”

୧୭ ଆରି ସେ ଅଙ୍ଗ୍‌ର୍ ରସ୍ ଦାରି ପର୍‌ମେସର୍‌କେ ଜୁଆର୍ କରି
 କଇଲା, “ଏଟା ନେଇ ତମ୍‌ର୍ ନିଜର୍ ନିଜର୍ ବିତ୍ତରେ ବାଟା କରା ।
 ୧୮ ମୁଇ ତମ୍‌କେ କଇଲିନି ପର୍‌ମେସର୍‌ର ରାଇଜ୍ ନ ଆଇବା ଜାକ,
 ଏ ରସ୍ କେବେ ମିସା ନ କାଇ ।”

୧୯ ଆରି ରୁଟି ଦାରିକରି ପର୍‌ମେସର୍‌କେ ଦନିଅବାଦ୍‌ଦେଇ
 ବାଙ୍ଗାଇ ସେମାନଙ୍କେ ଦେଇକରି କଇଲା, “ଏଟା ମର୍ ଗାଗଡ଼, ଜନ୍‌ଟା
 ତମ୍‌ର୍ ପାଇ ଦିଆଅଇଲା ଆଟେ । ମକେ ଏତାଇବା ପାଇ ଏଟା କରା
 ।” ୨୦ ସେନ୍ତାରିସେ କାଇଲା ପଟେ ସେ ମୁତାଇ ଅଙ୍ଗ୍‌ର୍ ରସ୍ ଦାରି
 କଇଲା, “ଏ ମୁତା ମର୍ ବନିତେଇ, ପର୍‌ମେସର୍‌ ଲକ୍‌ମନ୍‌ର୍ ସଙ୍ଗ୍
 କଲା ନୁଆ ରାଜିନାମା । ଏଟା ତମ୍‌ର୍‌ପାଇ ଜର୍‌ଲା ମର୍ ବନି ।”

୨୧ “ମାତର୍ ଦେକା ଇତି ମର୍ସଙ୍ଗ୍ ବସି କାଇବା ଗଟେକ୍ ଲକ୍ଷେ ବିରଦି ଲକ୍ଷମନର୍ ଆତେ ମକେ ଦାରାଇ ଦେଇସି । ୨୨ ପର୍ମେସରର୍ ଟାନେଅନି ଆଇଲା ନର୍ପିଲା ମୁଇ, ସେ ଜେଡ୍ଡି ଜଜ୍ନା କଲାଆରେ, ସେନ୍ତାରିସେ ମର୍ବାକେ ଅଇସି । ମାତର୍ ଜନ୍ ଲକ୍ ମକେ ବିସ୍ବାସେ ବିସ୍ ଦେଲାପାରା ବିରଦିମନର୍ ଆତେ ଦାରାଇ ଦେଇସି, ତାକେ ବେସି ଡଣ୍ଟ ମିଲ୍ସି ।”

୨୩ ସେବେଲାଇ ସିସ୍ମାନ୍ ସେମନର୍ ବିତ୍ତରେ କାତା ଅଇଲାଇ, “ଏଡ୍ଡି ବଇଲେ ଆମର୍ ବିତ୍ତରେ କେ ଜିସୁକେ ସେଡ୍ଡି କର୍ସି ?”

କେ ବଡ଼ବଲି କାତାବାର୍ତ୍ତା ଅଇଲାଇ

୨୪ ✠ତାର୍ ପରେ ସେମନର୍ ବିତ୍ତରେଅନି କେ ବଡ଼ ବଲି ଦଦାପେଲା ଅଇଲାଇ । ୨୫ ଜିସୁ ସେମନ୍କେ କଇଲା, “ଏ ଦୁନିଆର୍ ରାଜାମନ୍ ସେମନର୍ ଲକ୍ଷମନ୍କେ ନିଜର୍ ଅଦିକାର୍ ଦେକାଇ ସାସନ୍ କର୍ବାଇ । ଆରି ସେମନ୍, ଆମେ ଲକ୍ଷମନ୍କେ ଦରମ୍ କର୍ବା ଲକ୍ ବଲି ତାକ୍ପୁଟା ଅଇବାଇ । ୨୬ ✠✠ମାତର୍ ତମର୍ ବିତ୍ତରେ ଏଡ୍ଡି ନ ଉଆ । କେ ବଡ଼ ସେ ସାନ୍ ଅ । ଆରି କେ ନେତା ରଇସି ସେ ସବୁଲକର୍ ସେବା କର୍ବାର୍ ଆରେ । ୨୭ ✠ଏ ଦୁନିଆର୍ ଇସାବେ, ବସିକରି କାଇବା ଲକ୍ ବଡ଼ କି, ବାଟାକରି ଦେବା ଲକ୍ ବଡ଼ ? ବସିକରି କାଇବା ଲକ୍ ସେ ବଡ଼ ଅଇସି । ମାତର୍ ମୁଇ ସେଡ୍ଡି ନଇ । ମୁଇ ତମର୍ ବିତ୍ତରେ ବାଟାକରି ଦେବା ଲକର୍ ପାରା । ୨୮ ତମେ ମର୍ ସବୁ ପରିକାଟାନେ ମର୍ସଙ୍ଗ୍ ରଇ ଆଇଲାସ୍ନି । ୨୯ ମର୍ ବାବା ପର୍ମେସର୍ ଜେଡ୍ଡି ସାସନ୍ କର୍ବାକେ ମକେ ତାର୍ ରାଇଜର୍ ଅଦିକାର୍ ଦେଲା ଆରେ, ସେଡ୍ଡି ମୁଇ ମିସା ତମ୍କେ ଅଦିକାର୍ ଦେବି । ୩୦ ✠ଆରି ତମେ ମର୍ ରାଇଜେ ମର୍ସଙ୍ଗ୍ ବସି କାଆପିଆ କର୍ସା । ରାଜ୍ଗାଦି ବସି ଇସ୍ରାଏଲର୍ ବାରଟା ଜାତିର୍ ଲକ୍ଷମନ୍କେ ସାସନ୍ କର୍ସା ।”

ଜିସୁ ପିତର୍କେ ମକେ ନାଜାନି ବଲି କଇସୁ ବଲି କଇଲା
(ମାତିଉ ୨୬:୩୧-୩୫; ମାର୍କ ୧୪:୨୭-୩୧; ଜଅନ୍ ୧୩:୩୬-୩୮)

✠ ୨୨:୨୪ ୨୨:୨୪ ମାତିଉ ୧୮:୧; ମାର୍କ ୯:୩୪; ଲୁକ୍ ୯:୪୬ ✠ ୨୨:୨୬ ୨୨:୨୬ ମାତିଉ ୨୩:୧୧; ମାର୍କ ୯:୩୫ ✠ ୨୨:୨୭ ୨୨:୨୭ ମାତିଉ ୨୦:୨୫-୨୭; ମାର୍କ ୧୦:୪୨-୪୪ ✠ ୨୨:୨୭ ୨୨:୨୭ ଜଅନ୍ ୧୩:୧୨-୧୫ ✠ ୨୨:୩୦ ୨୨:୩୦ ମାତିଉ ୧୯:୨୮

୩୧ “ଏ ସିମନ୍, ସିମନ୍ ! ସୁନ୍ ! ଚାସି ଜେନ୍ତ୍ର ଦାନ ଉତାଲିକରି ପର୍ବିନେ କର୍ସି, ସେନ୍ତାରି ସଇତାନ୍ ତମ୍ବକେ ତେରେପେତେ କର୍ବାକେ ଆଦେସ୍ ପାଇଲା ଆଚେ । ୩୨ ମାତର୍ ତର୍ ବିସ୍ବାସ୍ ଉନା ନ ଅ ବଲି ମୁଇ ପାର୍ତନା କଲିଆଚି । ସେ ପରିକାଇ, ବିସ୍ବାସେ ତାଟ୍ ଅଇ, ଜିତି ଆଇଲେ ତର୍ ବାଇମନ୍ କେ ମିସା ସେନ୍ତ୍ର ତାଟ୍ କରାଇସୁ ।”

୩୩ ସେବେଲାଇ ସିମନ୍ ଜିସୁକେ କଇଲା, “ଏ ମାପରୁ ମୁଇ ତର୍ସଙ୍ଗ୍ ବନ୍ଦି ଗରେ ଜିବାକେ ଆରି ମର୍ବାକେ ମିସା ରାଜି ଆଚି ।”

୩୪ ତାର୍ ପଚେ ଜିସୁ କଇଲା, “ଏ ପିତର୍ ମୁଇ ତକେ କଇଲିନି, ତୁଇ ଏବେ ଏନ୍ତ୍ର କଇଲୁସିନି, ମାତର୍ ଆଜି ରାତି କୁକ୍ତା ନ ତାକ୍ବା ଆଗ୍ତୁ ମକେ ତିନ୍ତର୍ ନାଜାନି ବଲି କଇସୁ ।”

ବେସ୍ନି, ମୁନା ଆରି କାଣ୍ଡା

୩୫ ✧ ଜିସୁ ତାର୍ ସିସ୍ମନ୍ କେ ପାଚାରଲା । “ମୁଇ ତମ୍ବକେ ପାଚାଇଲାବେଲେ ବେସ୍ନି, ମୁନା ଆରି ପାଣ୍ଡୁଇ ନ ନେବାକେ କଇରଇଲି । ସେବେଲାଇ ତମ୍ବକେ କାଇ ଅବାସ୍ ଅଇଲା କି ?” “ନାଇ, କାଇଟା ମିସା ଅବାସ୍ ଅଏ ନାଇ ।” ବଲି କଇଲାଇ । ୩୬ ଆରି ସେ କଇଲା, “ମାତର୍ ଏବେ ତମ୍ବକେ କଇଲିନି, ବେସ୍ନି କି ମୁନା ରଇଲେ ନିଆ । ଆରି ଜାକେ କାଣ୍ଡା ନାଇ, ସେ ପିନ୍ଦ୍ବାଟା ବିକି କାଣ୍ଡା ଗେନ । ୩୭ ମୁଇ ତମ୍ବକେ କାଇକେ କଇଲିନି ‘ସେ ଅପରାଦିମନ୍ ସଙ୍ଗ୍ ସମାନ୍ ଦସା ପାଇଲା’ ବଲି ସାସ୍ତରେ ଲେକା ଅଇଲା କାତା ସିଦ୍ ଅଇବାକେ ଗାଲାନି ।”

୩୮ ସିମନ୍ ଜିସୁକେ କଇଲା, “ଏ ମାପରୁ, ଦେକା ଆମର୍ ବିତ୍ରେ ଜଡେକ୍ କାଣ୍ଡା ଆଚେ ।” ଜିସୁ କଇଲା, “ସେତ୍ କି ଅଇସି ।”

ଜିସୁ ଜିଡ୍ ତଙ୍ଗ୍ରେ ପାର୍ତନା କର୍ବାକେ ଗାଲା

(ମାତିଉ ୨୬:୩୬-୪୬; ମାର୍କ ୧୪:୩୨-୪୨)

୩୯ ତେଇଅନି ଜିସୁ ଗଡ୍ ଚାଡି ଆଗ୍ତୁର୍ ଅବିଆସ୍ ଇସାବେ ଜିଡ୍ନାଉର୍ ତଙ୍ଗ୍ରେ ପାର୍ତନା କର୍ବାକେ ଗାଲା । ସିସ୍ମନ୍ ମିସା ତାର୍ ସଙ୍ଗ୍ ରଇଲାଇ । ୪୦ ଆରି ସେ ଜାଗାଇ କେଟିକରି ସିସ୍ମନ୍ କେ

✧ ୨୨:୩୫ ୨୨:୩୫ ମାତିଉ ୧୦:୯,୧୦; ମାର୍କ ୬:୯; ଲୁକ ୯:୩,୧୦:୪

କଲଲା, “ତମେ ପରିକାର୍ ପାନ୍ଦେ ନ ଲାଗାଇ ଅଇବାକେ ପାର୍ତନା କରା ।”

୪୧ ତାର ପତେ ଜିସୁ ତାକର୍ତେଇଅନି କଣ୍ଠେକ୍ ଦୁର୍ ଜାଇ ମାଣ୍ଡିକୁଟା ଦେଇକରି ପାର୍ତନା କରବାର ଦାରଲା । ୪୨ “ଏ ବାବା, ତୁଇ ମନକଲେ ଏ କସ୍ତର୍ ମୁତା ମର୍ତେଇଅନି ଦୁରିକେ ନେ । ମାତର୍ ମୁଇ ମନ କଲା ଇସାବେ ନାଇ, ତର୍ ମନକଲା ଇସାବେ ସିଦ୍ ଅ ।” ୪୩ ସେତ୍‌କିବେଲେ ଏଦେ ଦେକା ! ପର୍ମେସର୍‌ର ଗଟେକ୍ ଦୁର୍ ଆସି ଜିସୁକେ ଦେକାଇଅଇଲା ଆରି ତାଟ୍‌ସଙ୍ଗ୍ ରଇବାକେ ବପୁଦେଲା । ୪୪ ମାତର୍ ଜିସୁ ଅଦିକ୍ ବିକଲ୍ ଅଇ, ମନ୍‌ଦିଆନ୍ ଦେଇ ପାର୍ତନା କରବାର ଦାରଲା । ତାର୍ ଗାଗ୍‌ତର୍ ଜାଲ୍ ପାନି, ବନିପାରା ଜରଜର୍ ଅଇ ବୁର୍ ଡିପିଗାଲା ।

୪୫ ଆରି ଜିସୁ ପାର୍ତନା କରିସାରାଇ ସିସ୍‌ମନ୍‌ର୍ ଲଗେ ଗାଲା । ସେମନ୍ ସବୁ ଲକ୍ ଦୁକ୍‌ଅଇକରି ତାକିଜାଇ ସଇରଇଲାଟା ସେ ଦେକଲା । ୪୬ ତେଇ ସେମନ୍‌କେ କଇଲା, “ତମେ କାଇକେ ସଇଦେଇ ଆଗାସ୍ ? ଉଟା ପରିକାର୍ ପାନ୍ଦେ ନ ଲାଗାଇ ଅଇବାକେ ପାର୍ତନା କରା ।”

ଜିସୁକେ ସତ୍‌ରୁମନ୍ ବନ୍ଦି କଲାଇ

(ମାତିଉ ୨୬:୪୬-୫୨; ମାର୍କ ୧୪:୪୩-୫୦; ଜଅନ୍ ୧୮:୩-୧୧)

୪୭ ଜେଡେବଲ୍ ଜିସୁ ଏ କାତା କଇତେରଇଲା ଗାଦି ଲକ୍‌ମନ୍ ତେଇ ଆଇଲାଇ । ଜିସୁର୍ ବାରଟା ସିସ୍‌ମନ୍‌ର୍ ବିଡ୍‌ରେଅନି ଜିଉଦା ନାଉର୍ ସିସ୍, ସେମନ୍‌ର୍ ଆଗ୍‌ତୁ ଅଇ ସେମନ୍‌କେ ତାକିଆନ୍‌ଲା, । ଆରି ଜିସୁକେ ରୁମିକରି ସେମନ୍‌କେ ଚିନାଇଦେଲା । ୪୮ ଜିସୁ ଜିଉଦାକେ ପାଚାରଲା, “ଏ ଜିଉଦା ପର୍ମେସର୍‌ତେଇ ଅନି ଆଇଲା ନର୍‌ପିଲା ମକେ, ତୁଇ ବିରଦି ଲକ୍‌ମନ୍‌କେ ରୁମିକରି ଦାରାଇଦେଲୁସ୍‌ନି କି ?”

୪୯ ସେ ବିରଦି ଲକ୍‌ମନ୍ ଜିସୁକେ ବନ୍ଦିକରି ଦାରିଜିବାଇ ବଲି ସିସ୍‌ମନ୍ ଜାନ୍‌ଲାଇ । ସେବେଲାଇ ସିସ୍‌ମନ୍ ଜିସୁକେ ପାଚାରଲାଇ, “ଏ ମାପ୍‌ରୁ, ଆମର୍ କାଣ୍ଡା ବେଟ୍‌ରୁ କି ?” ୫୦ ସିସ୍‌ମନ୍‌ର୍ ବିଡ୍‌ରେଅନି ଗଟେକ୍ ଲକ୍, ବଡ୍ ପୁଜାରିର୍ ଗତିଦାଙ୍ଗ୍‌ଡାର୍ ଉଜା କାନ୍ ଚିଡ୍‌ତେ କାଟିପାକାଇଲା ।

୫୧ ଏଠା ଦେକି ଜିସୁ କଇଲା, “ନିରୁ” । ସେ ଚିତ୍ତଲା କାନ ଚିକକରି ନିକ କଲା ।

୫୨ ଜିସୁ ତାକେ ବନ୍ଦି କରବାକେ ଆଇଲା ମୁକିଅ ପୁଜାରିମନ୍‌କେ, ମନ୍ଦିର୍ ଜାଗି ରଇବା ସେନାପତିମନ୍‌କେ ଆରି ପାର୍ତିନମନ୍‌କେ କଇଲା, “ମୁଇ କାଇ ଡାକୁ କି ? ମକେ ଦାରବାକେ ବଡ଼ ବଡ଼ ଟେଙ୍ଗ୍ ଆରି କାତିକାଣ୍ଡା ଦାରି ଆସି ଆତାସ୍ । ୫୩ ✧ ସବୁ ଦିନେତା ମୁଇ ମନ୍ଦିରେ ତମର୍ ସଙ୍ଗ୍ ରଇଲି, ମାତର୍ ତମେ ମକେ ବାନ୍ଦାସ୍ ନାଇ । ଏବେ ବେଲା କେର୍ଲା ଆତେ । ମକେ କାଇଟାମିସା କରବାକେ ପରମେସର୍ ସଇତାନ୍‌କେ ଅନୁମତି ଦେଲାଆତେ ।”

ଜିସୁକେ ପିତର୍ ନାଜାନି ବଲି କଇଲା

(ମାତିଉ ୨୬:୫୭-୫୮, ୬୯-୭୫; ମାର୍କ ୧୪:୫୩-୫୪, ୬୬-୭୨; ଜଅନ୍ ୧୮:୧୨-୧୮, ୨୫-୨୭)

୫୪ ତାର ପତେ ସେମନ୍ ଜିସୁକେ ବାନ୍ଦିକରି ବଡ଼ ପୁଜାରିର୍ ଗରେ ଦାରିଗାଲାଇ । ପିତର୍ ଦୁରିକେ ରଇ ସେମନ୍‌ର୍ ପତେପତେ ଗାଲା । ୫୫ ସନିଅମନ୍ ଜଇଲାଗାଇ ଚାରିବେଡ଼ି ବସଲାଇ । ପିତର୍ ମିସା ସେମନ୍‌ର୍ ସଙ୍ଗ୍ ବସଲା । ୫୬ ଗଟେକ୍ ଗତିଦାଙ୍ଗ୍ଡି ପିତରକେ ଜଇପାଲି ବସଲାଟା ନିକକରି ଦେକି କଇଲା, “ଏ ଲକ୍ ମିସା ଜିସୁର୍ ସଙ୍ଗ୍ ରଇଲା !”

୫୭ ମାତର୍ ପିତର୍ ରାଜି ନ ଅଇ କଇଲା, “ଏ ଗତିଦାଙ୍ଗ୍ଡି, ତାକେ ମୁଇ ମୁଲ୍‌କେ ନାଜାନି ।”

୫୮ ତନେକ୍ ରଇଲା ପତେ ଆରି ଗଟେକ୍ ଲକ୍ ପିତରକେ ଦେକି କଇଲା, “ତୁଇ ମିସା ତାର୍ ସଙ୍ଗ୍ ରଇଲୁସ୍ ।” ମାତର୍ ପିତର୍ ତାକେ କଇଲା, “ମୁଇ ନଇ ।”

୫୯ ଗଟେକ୍ ଗଟା ଗାଲାପତେ ଆରି ଗଟେକ୍ ଲକ୍ ପିତରକେ ଦେକି କଇଲା, “ଏ ଲକ୍ ମିସା ନିଜେ ତାର୍ ସିସ୍‌ମନ୍‌ର୍ ସଙ୍ଗ୍ ରଇଲା । ଆକେ ମୁଇ ନିକକରି ଜାନି । କାଇକେ ବଇଲେ ସେ ଗଟେକ୍ ଗାଲିଲିର୍ ଲକ୍ ।” ୬୦ ଏଠା ସୁନି ପିତର୍ ସେ ଲକ୍‌କେ କଇଲା, “ଏ ବାଇ ତୁଇ କାଇଟା କଇଲୁସ୍‌ନି ? ମୁଇ ବିଲ୍‌କୁଲ୍ ନାଜାନି ।” ସେ କାତା ପିତର୍ କଇଲା ଦାପ୍‌ରେ, କୁକ୍‌ଡା ଡାକ୍‌ଲା । ୬୧ ସେବେଲେ ଜିସୁମାପୁରୁ ପିତରକେ

ପାସଲି ନିମାନ୍ କରି ଦେକଲା । ଜିସୁ ଆଗତୁ କଇଲା କାତା ସେ ଏତାଇଲା । ସେ ତାକେ କଇରଇଲା ତୁଇ ମକେ ଆଜି କୁକ୍ତା ତାକ୍‌ବା ଆଗତୁ ତିନ୍‌ତର୍ ନାଜାନି, ବଲି କଇସୁ । ^{୨୨} ସେଟାପାଇ ପିତର୍ ସେଟା ଏତାଇ, ଦୁକ୍ ଅଇ ତାଣ୍ଟେଅନି ବିନେ ଜାଇ ବେସି କାନ୍‌ଲା ।

ଜିସୁକେ ମାର୍‌ଲାଇ

(ମାତିଉ ୨୨:୨୭-୨୮; ମାର୍କ ୧୪:୨୫)

^{୨୩} ଜିସୁକେ ଦାରିକରି ସଙ୍ଗଇରଇଲା ଲକ୍‌ମନ୍ ତାକେ ମାରିମାରି କିଜାଇଲାଇ । ^{୨୪} ଆରି ତାର୍ ଆକି ବାନ୍‌କରି ତାକେ ପାଚାରିଲାଇ, “ତକେ କେ ମାର୍‌ଲା, କଅ ?” ^{୨୫} ଆରି କେତେଟା କାତା କଇ ତାକେ ନିନ୍ଦା କଲାଇ ।

ଜିସୁକେ ବଡ଼ ସବାତେଇ ଆନ୍‌ଲାଇ

(ମାତିଉ ୨୨:୫୯-୬୨; ମାର୍କ ୧୪:୫୫-୬୪; ଜଅନ୍ ୧୮:୧୯-୨୪)

^{୨୬} ତାର୍ ଆରକର୍ ଦିନେ ଜୁଲ୍‌ପୁଲ୍ ଉଜଲ୍ ବେଲାଇ, ପାର୍‌ତିନିମନ୍, ମୁକିଅ ପୁଜାରିମନ୍ ଆରି ସାସ୍‌ତର୍ ସିକାଇଦେବା ଲକ୍‌ମନ୍ ଗଟେକ୍‌ଟାନେ ରୁଣ୍ଡିଲାଇ । ଆରି ଜିସୁକେ ବିଚାର କର୍‌ବା ବଡ଼ଟା ଜାଗାଇ ନେଲାଇ । ^{୨୭} “ତୁଇ ସତଇସେ ପର୍‌ମେସର୍‌ ବାଟିପାଟାଇଲା କିରିସ୍‌ଟ କି ? ଆମକେ କଅ ।” ମାତର୍ ଜିସୁ ସେମନ୍‌କେ କଇଲା, “ମୁଇ କଇଲେ ମିସା ତମେ ବିସ୍‌ବାସ୍ ନ କରାସ୍ । ^{୨୮} ମୁଇ ତମକେ ପାଚାରିଲେ ମିସା ନ କୁଆସ୍ । ^{୨୯} ମାତର୍ ଏବେ ଅନି, ପର୍‌ମେସର୍‌ଟାନେଅନି ଆଇଲା ନର୍‌ପିଲା ମୁଇ ତାର୍ ଉଜାବାଟେ ବସିରଇବି ।”

^{୩୦} ସେ କାତା ସୁନି ଗୁଲାଇ ଲକ୍‌ମନ୍ ଆଉଲିଅଇ ଜିସୁକେ ପାଚାରିଲାଇ, “ଏନ୍ତି ବଇଲେ ତୁଇକାଇ ପର୍‌ମେସର୍‌ ପିଲା କି ?” ଜିସୁ ସେମନ୍‌କେ କଇଲା “ମୁଇସେ ବଲି ତମେ କଇଲାସ୍‌ନି ।”

^{୩୧} ଆରି ସେମନ୍ କଇଲାଇ, “ଆମକେ ଆରି କାଇ ସାକି ଦର୍‌କାର୍ ତା ? ଆମେ ନିଜେ ତାର୍ ଟାଣ୍ଟେଅନି ସୁନ୍‌ଲୁ ଆତୁ ।”

୨୩

ଜିସୁକେ ପିଲାତର୍ ଲଗେ ନେଲାଇ

(ମାତିଉ ୨୨:୧-୨, ୧୧-୧୪; ମାର୍କ ୧୫:୧-୫; ଜଅନ୍ ୧୮:୨୮-୩୮)

୧ ତାର ପତେ ବିଚାର କରବା ବଡ଼ ସବାର ଜାଗାଇ ବସିରଇଲା ସବୁ ଲକ୍ଷ୍ମୀନ୍ ଉଚିକରି ଜିସୁକେ ପିଲାତର୍ ଲଗେ ଦାରିଗାଲା । ୨ ସେ ଲକ୍ଷ୍ମୀନ୍ ଜିସୁକେ ନିନ୍ଦା କରି ଏକ୍ତି କଇବାର ବସିଲା, “ଏ ଲକ୍ଷ୍ ଆମର୍ ଲକ୍ଷ୍ମୀନ୍‌କେ ବୁଲ୍ ସିକିଆ ଦେଇତେ ରଇଲା ଆରି କାଇସର୍ ସମ୍‌ରାଟ୍‌କେ ସିସ୍ତୁ ଦିଆସ୍ ନାଇ ବଲି ସିକାଇଲା ବେଲେ ତାକେ ଦାରୁଲୁ । ଆରି ସେ ନିଜ୍‌କେ ମୁଇ ପର୍‌ମେସର୍ ବାଟି ପାଟାଇଲା ରାଜା କିରିସ୍‌ଟ ବଲି କଇଲାନ୍ତି ।”

୩ ସେଟାର ପାଇ ପିଲାତ୍ ଜିସୁକେ ପାଟାରୁଲା, “ତୁଇ କାଇ ଜିଉଦି ଲକ୍ଷ୍ମୀନ୍‌ର୍ ରାଜା କି ?” ଜିସୁ ତାକେ କଇଲା, “ତମେତା କଇଲାସ୍‌ନ୍ତି ।”

୪ ତାର ପତେ ପିଲାତ୍ ମୁକିଅ ପୁଜାରିମନ୍‌କେ ଆରି ତେଇ ରଇଲା ସବୁ ଲକ୍ଷ୍ମୀନ୍‌କେ କଇଲା, “ମୁଇ ଏ ଲକ୍ଷ୍ ଦସି ବଲି କାଇ ବୁଲ୍ ଦେକି ନାଇ ।”

୫ ମାତର୍ ସେମନ୍ ତର୍‌କେତର୍ ଆଉଲିଅଇ କଇଲା, “ତାର୍ ସିକିଆର୍ ଲାଗି ସେ ଜିଉଦାର୍ ସବୁବାଟର୍ ଲକ୍ଷ୍ମୀନ୍‌ର୍ ବିତ୍‌ରେ କଲି ଲାଗାଇଲାନ୍ତି । ସେଟା, ସେ ଗାଲିଲିତେଇ ଆରାମ୍ କରି, ଏବେ ଇତି ଜାକ ଆଇଲା ଆଚେ ।”

ଜିସୁକେ ଏରଦ୍ ଲଗେ ପାଟାଇଲା

୬ ଏ କାତା ସୁନି ପିଲାତ୍ ଲକ୍ଷ୍ମୀନ୍‌କେ ପାଟାରୁଲା, “ଏଟା ଗଟେକ୍ ଗାଲିଲି ଦେସର୍ ଲକ୍ କି ?” ୭ ପିଲାତ୍ ଜିସୁକେ ଗାଲିଲି ଦେସର୍ ଲକ୍ ବଲି ଜାନି, ତାକେ ଗାଲିଲି ଦେସ୍ ସାସନ୍ କରବା ଏରଦ୍‌ଲଗେ ପାଟାଇ ଦେଲା । କାଇକେ ବଇଲେ, ସେ ବେଲେ ଏରଦ୍ ମିସା ଜିରୁସାଲମେ ରଇଲା । ୮ ଏରଦ୍ ଜିସୁକେ ଦେକି କରି ବେସି ସାର୍‌ଦା ଅଇଲା । କାଇକେ ବଇଲେ ଜିସୁର୍ ବିସଇ ଆଗ୍ତୁ ସୁନି ରଇଲା ଆରି ତାର୍ ମୁଆଟେ କାବା ଅଇଜିବା କାମ୍ ଦେକ୍‌ବାକେ ମନ୍ କର୍‌ତେରଇଲା । ୯ ସେଟାର୍ ପାଇ ଏରଦ୍ ତାକେ କାଇ କାଇ ବିସଇ ପାଟାରୁବାର୍ ଦାରୁଲା । ମାତର୍ ଜିସୁ ତାକେ କାଇବଲି ମିସା କଏ ନାଇ । ୧୦ ସେତିକି ବେଲେ ତେଇ ଚିଆଅଇରଇଲା ମୁକିଅ ପୁଜାରିମନ୍ ଆରି ନିୟ୍‌ମ୍ ସିକାଉମନ୍ ସବୁ ମିସି କରି ଜିସୁର୍ ବିରୁଦେ ଆଉଲିଅଇ କଇବାର୍ ଦାରୁଲା । ୧୧ ଏରଦ୍ ଆରି ତାର୍ ସନିଅମନ୍ ଜିସୁକେ କିଜାଇଲା ଆରି ନିନ୍ଦା କଲା । ଜିସୁକେ ରାଜାମନ୍ ପିନ୍ଦ୍‌ବା ନିମାନ୍

ପରିଆ ପିନ୍ଧାଇ ପିଲାଡ଼ଟାନେ ପାଟାଇ ଦେଲା । ^{୧୭} ସେ ଦିନେଅନ୍ତି ପିଲାଡ଼ ଆରି ଏରଦ୍ ମଇତର ଅଇଲା । ତାର ଆଗତୁ ସେମନ୍ ଦୁଇ ଲକ୍ ସତ୍ତର ଅଇରଇଲା ।

ଜିସୁକେ ମରବା ଦଣ୍ଡଦେଲା

(ମାତିଉ ୨୭:୧୫-୨୬; ମାର୍କ ୧୫:୬-୧୫; ଜଅନ୍ ୧୮:୩୯-୧୯:୧୬)

^{୧୩} ତାରପତେ ପିଲାଡ଼ ମୁକିଅ ପୁଜାରିମନ୍‌କେ, ନେତାମନ୍‌କେ ଆରି ସବୁ ଲକ୍‌ମନ୍‌କେ ଗଟେକ୍‌ଟାନେ ରୁଣ୍ଡାଇକରି ସେମନ୍‌କେ କଇଲା, ^{୧୪} ଏ ଲକ୍ ଲକ୍‌ମନ୍‌କେ ସରକାରର୍ ବିରୁଦେ ବୁଲ୍ ସିକିଆ ଦେଲାନି ବଲି ମର୍ ଲଗେ ଆନିଆଟାସ୍ । ଆରି ଦେକା ମୁଇ ତମର୍ ମୁଆଟେ ତାକେ ପରିକା କଲି, ତାର ବିରଦେ ତମେ ସବୁଲକ୍ ନିନ୍ଦାକଲାଟା ମିଲେନାଇ । ^{୧୫} ଏରଦ୍ ମିସା ତାରଟାନେ କାଇ ବୁଲ୍‌କଲାଟା ନ ଦେକି ଆମ୍‌କେ ବାଉଡାଇଦେଲା ଆଟେ । ଏ ଲକ୍ ମରନ୍ ତଣ୍ଡ ପାଇବାପାରା ବୁଲ୍ କାମ୍ କରେ ନାଇ । ^{୧୬} ସେଟାରପାଇ ମୁଇ ଆକେ କର୍ତ୍ତା ମାଡ଼ ମାରିକରି ଚାଡ଼ିଦେବି । ^{୧୭} ଆରି ଦେକା ସବୁ ବର୍‌ସେ ରକିଆ ପାଇବା ପରଦ୍ ବେଲାଇ ଜିଉଦି ଜାତିକେ ସନ୍‌ମାନ୍ ଦେବାକେ ଗଟେକ୍ ବନ୍ଦିକେ ମୁକ୍‌ଲାଇ ଦେବା ନିୟମ୍ ରଇଲା ।

^{୧୮} ମାତର୍ ସବୁଲକ୍‌ମନ୍ ଆଉଲିଅଇ କଇଲା, “ଆକେ ମରାଆ ଆରି ଆମର୍ ପାଇ ବାରବାକେ ଚାଡ଼ିଦିଆସ୍ ।” ^{୧୯} ଏ ବାରବା ବଲ୍‌ବା ଲକ୍, ସରକାରର୍ ବିରଦେ ବୁଲ୍ କରିରଇଲା ଆରି ଗଟେକ୍ ଲକ୍‌କେ ମାରି ରଇଲା । ସେଟାରପାଇ ତାକେ ବନ୍ଦି କରିରଇଲା ।

^{୨୦} ମାତର୍ ପିଲାଡ଼ ଜିସୁକେ ଚାଡ଼ିଦେବାକେ ମନ୍‌କରି ତାର ଲଗେ କାଇ ବୁଲ୍‌କଲାଟା ଡିସେନାଇ ବଲି ସେମନ୍‌କେ ତର୍‌କେ ତର୍ ବୁଜାଇଲା । ^{୨୧} ମାତର୍ ଲକ୍‌ମନ୍ ବେସି ଆଉଲି ଅଇ, “ତାକେ କୁର୍‌ସେ ଚଗାଇ ମରାଆ ! ତାକେ କୁର୍‌ସେ ଚଗାଇ ମରାଆ !” ^{୨୨} ତାରପତେ ପିଲାଡ଼ ସେମନ୍‌କେ ଆଗେ ଦୁଇତର୍ ପାଟାରଲାଟା ଚାଡ଼ି ଆରିତରେକ୍ ସମାନ୍‌ଟାସେ କଇଲା, “କାଇକେ ? ସେ କାଇ ବୁଲ୍ କଲାଆଟେ ଜେ ? ତାରଟାନେ କାଇମିସା ମରନ୍ ପାଇବା ତଣ୍ଡ ଏଡ଼କି ଦସ୍ ମିଲେ ନାଇ । ଏନ୍ତି ବଇଲେ ମିସା ତାକେ କର୍ତ୍ତା ମାଡ଼ ମାରି ଚାଡ଼ି ଦେବି ।”

୨୩ ମାତର ଲକ୍ମନ ଆରି ବେସି ଆଉଲିଅଇ ତରକେ ତର “ତାକେ କୁରସେ ଚଗାଇ ମରାଆ !” ବଲି ବାଦିଅ କଲାଇ । ସାରାସାରି ପଚେ ସେମନ୍ ଆଉଲିଅଇଲାଟା ଜିଡ଼ଲା । ୨୪ ତାର ପଚେ ପିଲାଡ଼ ଲକ୍ମନର୍ ଜାଇଟା କରବାକେ ମନ୍ କଲାଇ, ସେ ଇସାବେ ଜିସୁକେ ମରନର୍ ଡଣ୍ଡ ଦେବାକେ ରାଜି ଅଇଲା । ୨୫ ପଚେ ପିଲାଡ଼ ଲକ୍ମନର୍ କଇବା ଇସାବେ, ବାରବା ନାଉଁର୍ ଲକ୍ ଜେ କି, ଆଗତୁ ଗଟେକ୍ ଲକ୍ କେ ମରାଇରଇଲା ଆରି ସରକାରର୍ ବିରୁଦେ ବୁଲ୍‌କାମ୍ କରି ବନ୍ଦି ଅଇରଇଲା, ତାକେ ମୁକ୍‌ଲାଇଲା । ଜିସୁକେ ତାକର୍ ମନ୍‌କଲା ଇସାବେ ଡଣ୍ଡ ଦେବାକେ ସର୍ପିଦେଲା ।

ଜିସୁକେ କୁରସେ କୁଟିମାରଲାଇ

(ମାତିଡ ୨୭:୩୨-୪୪; ମାରକ ୧୫:୨୧-୩୨; ଜଅନ୍ ୧୯:୧୭-୨୭)

୨୬ ସନିଅମନ୍ ଜିସୁକେ ଦାରିଜିବା ବେଲେ କୁରିଣିୟ ସିମନ୍ ନାଉଁର୍ ଲକ୍ କେ ବେଟ୍‌ପାଇଲାଇ । ଜେ କି ଗାଏଁଅନି ଜିରୁସାଲାମେ ଆଇତେରଇଲା । ତାକେ ଅଟ୍‌କାଇକରି ଜିସୁ ବଇଲା କୁରସ ଲାଦିଦେଲାଇ ଆରି ତାର ପଚେ ଜିବାକେ ବାଦିଅ କଲାଇ ।

୨୭ ଆରି ବେସି ଲକ୍ମନ ଜିସୁର୍ ପଚେ ପଚେ ଜାଇତେ ରଇଲାଇ । ତେଇ କେତେଟା ବୁକେ ପିଟିଅଇ କାନ୍ଦବା ମାଇଜିମନ୍ ମିସା ରଇଲାଇ । ୨୮ ମାତର ଜିସୁ ସେମନର୍ ବାଟେ ପାସଲିକରି କଇଲା, ଏ ଜିରୁସାଲମ୍ ଗଡର୍ ମାଇଜିମନ୍, ମର୍ପାଇ କାନ୍ଦା ନାଇ । ମାତର ନିଜର୍ ପାଇ ଆରି ନିଜର୍ ପିଲାମନର୍ ପାଇ କାନ୍ଦା । ୨୯ କାଇକେବଇଲେ ଦେକା “ଜନ୍ ମାଇଜି ବାଞ୍ଜି ଆରି କେବେ ମିସା ଗାଗ୍‌ତେ ନ ଅଇକରି ଆଚଡ଼, ଆରି ଜେ କି କେବେ ମିସା ଦୁଦ୍ କୁଆଏ ନାଇ, ସେମନ୍ କେତେକ୍ ନିକ କରମର୍ ଲକ୍ !” ବଲି କଇବା ଦିନ୍ ଆଇଲାନି । ୩୦ ☆ସେବେଲାଇ ଲକ୍ମନ ଡଙ୍ଗର୍‌ମନ୍‌କେ କଇବାର୍ ଦାରବାଇ, ଆମର୍ ଉପ୍‌ରେ ଅଦ୍‌ରି ଦିଆସ୍ । କୁପ୍‌ଲିମନ୍‌କେ କଇବାର୍ ଦାରବାଇ, ଆମ୍‌କେ ତପିଦିଆସ୍ । ୩୧ କାଇକେ ବଇଲେ ଗର୍ କାଁପାପଡ଼ରିଆ ରଇଲା ବେଲେ, ଜଦି ଏ ସବୁ ଗର୍‌ନା ଗର୍‌ଲାନି ବଇଲେ ସେଟା ସୁକିଗାଲେ ଆରି କାଇଟା ଅଇସି ।

☆ ୨୩:୩୦ ୨୩:୩୦ ପରକାସିତ ୨:୧୭

୩୨ ଜିସୁର ସଙ୍ଗେ ଆରି ଦୁଇଟା ବଡ଼ ବୁଲ୍ଲ କରିରଇବା ଲକ୍ଷ୍ମୀନକେ ମିସା ମରାଇବାକେ ନେଲା । ୩୩ ଆରି ସେମନ୍ କପୁରି ନାଉଁର ଗଟେକ୍ ଜାଗାଇ କେଟିକରି ଜିସୁକେ ଆରି ଚର୍ଚ୍ଚମନ୍କେ, ତାର୍ ଡେବ୍ରି ବାଟେ ଗଟେକ୍ ଲକ୍ଷ୍ମୀକେ ଆରି ଉଜାବାଟେ ଗଟେକ୍ ଲକ୍ଷ୍ମୀକେ ଆଡେ, ପାଦେ କୁଟିମାରି ଟେକିଦେଲା । ୩୪ ସେବେଲା ଜିସୁ କଇଲା, “ଏ ବାବା ଏମନ୍କେ କେମା କରିଦିଆସ୍, କାଇକେ ବଇଲେ ଏମନ୍ କାଇଟା କଲାଇନି ସେଟା ନାଜାନତ୍ ।” ସେମନ୍ ଜିସୁର ପଟିଆ ନେଇ କାକେ ମିଲ୍ସି ବଲି କେଡ଼ ପୁଟାଇଲା । ୩୫ ସବୁ ଲକ୍ଷ୍ମୀନ୍ ଚିଆଅଇ ଦେକ୍ବାବେଲେ ଜିଉଦି ନେତାମନ୍ ଜିସୁକେ କିଜାଇକରି ଆସିଲା ଆରି କଇଲା “ସେ ବିନ୍ଲକ୍ଷ୍ମୀନକେ ରକିଆ କଲା, ଜଦି ତୁଇ ପର୍ଯ୍ୟେସର୍ ବାଟିପାଟାଇଲା କିରିସ୍ଟ ବଇଲେ ନିଜ୍ଜକେ ରକିଆ କର ।”

୩୬ ଆରି ସନିଅମନ୍ ଜିସୁର ଲଗେ ଆସିକରି ତାକେ ଗନ୍ଦ୍ବା ରସ୍ ଦେଇ କିଜାଇକରି କଇଲା, । ୩୭ “ତୁଇ ଜଦି ଜିଉଦି ଲକ୍ଷ୍ମୀନର୍ ରାଜା, ନିଜ୍ଜକେ ରକିଆ କର୍ ।”

୩୮ ଆରି ତାର୍ କୁର୍ସର୍ ଟିପେ ଏଟା ଜିଉଦିମନ୍ ରାଜା, ବଲି ଲେକି ଅଲାଇଦେଲା ।

୩୯ ତେଇ ବଡ଼ ବୁଲ୍ଲ କରି କୁର୍ସେ ଚଗାଇଅଇରଇବା ଗଟେକ୍ ଲକ୍ଷ୍ମୀ ଜିସୁକେ ନିନ୍ଦା କରି କଇଲା, “ତୁଇ ଜଦି ପର୍ଯ୍ୟେସର୍ ବାଟି ପାଟାଇଲା କିରିସ୍ଟ ରାଜା ଜିସୁ ବଇଲେ, ନିଜ୍ଜକେ ରକିଆ କରି ଆମ୍ବକେ ମିସା ରକିଆ କର୍ ।” ୪୦ ମାତର୍ ଆରି ଗଟେକ୍ ଲକ୍ଷ୍ମୀ ତାକେ ଦମ୍ବକାଇ କରି କଇଲା, “ତୁଇ କାଇ ପର୍ଯ୍ୟେସର୍କେ ତରୁସ୍ ନାଇ କି ? ତୁଇ ମିସା ତାର୍ପାରା ସମାନ୍ ତଣ୍ଡ ପାଇଲୁସ୍ନି କି ନାଇ ? ୪୧ ଆରି ଆମେ ବୁଲ୍ଲକରି ନିୟମ୍ ଇସାବେ ତଣ୍ଡ ପାଇଲୁନି । ମାତର୍ ସେତା କାଇ ବୁଲ୍ଲ କରେ ନାଇ ।” ୪୨ ଆରି ସେ ଜିସୁକେ, “ଏ ଜିସୁ, ତୁଇ ନିଜର୍ ରାଇଜେ ରାଜା ଅଇ ଆଇଲେ ମକେ ଏତାଆ ।”

୪୩ ଜିସୁ ତାକେ କଇଲା, “ମୁଇ ତକେ ସଡ଼ କଇଲିନି, ଆଜିସେ ତୁଇ ମର୍ସଙ୍ଗ୍* ପାରଦେସେ ରଇସୁ ।”

* ୨୩:୪୩ ୨୩:୪୩ ଜିସୁକେ ବିସ୍ବାସ୍ କରି ମଲା ଲକ୍ଷ୍ମୀନ୍ ରଇବା ସାର୍ଦ୍ଦାର୍ ଜାଗା

ଜିସୁ ମରବାଟା

(ମାତିଉ ୨୭:୪୫-୫୬; ମାର୍କ ୧୫:୩୩-୪୧; ଜଅନ୍ ୧୯:୨୮-୩୦)

୪୪ ସେବେଲେ ଆଡ଼ବେଲା ଅଇରଇଲା । ଆରି ବେଲର ଉଜଲ୍ ଜାଉଁଲିଜାଇକରି, ତିନ୍ ଗାଁଟା ଜାକ ଗୁଲାଇ ଦେସ୍ ଆନ୍ଦାର ଅଇଗାଲା ୪୫ ଆରି ଏଦେ ଦେକା ! ମନ୍ଦିରର ସୁକଲ୍ ଜାଗା, ବିନେ କରବା ପାରଦା ମଜାଇ ଦୁଇପତା ଅଇ ଚିରିଅଇଲା । ୪୬ ଆରି ଜିସୁ ଆଉଲିଅଇ କଇଲା, “ଏ ବାବା, ମର୍ ଆତ୍ମା ତକେ ସର୍ପିଦେଲିନି ।” ଏଡ଼କି କଉ କଉ ତାର ଜିବନ୍ ଚାଡ଼ିଗାଲା ।

୪୭ ରମିୟ ସନିଅମନର୍ ସେନାପତି ଏ ଗଟ୍‌ନା ଦେକି, ପରମେସରର ମଇମା କରି କଇଲା, “ସତଇସେ ଏ ଗଟେକ୍ ଦରମ୍ ଲକ୍ ରଇଲା ।”

୪୮ ଆରି ଜନ୍ ଲକ୍‌ମନ୍ ଏ ଗଟ୍‌ନା ଦେକବାକେ ରୁଣ୍ଡିରଇଲାଇ ସେମନ୍ ସେଟା ସବୁ ଦେକି ଦୁକ୍‌କରି ବୁକେ ମାରିଅଇ ଗରେ ବାଅଡ଼ଲାଇ । ୪୯ ✧ମାତର୍ ଜିସୁର୍ ତିନାର୍‌ଜାନାର୍ ଲକ୍‌ମନ୍ ଆରି ଗାଲିଲିଅନି ଆସି ତାର ପର୍ପର୍ ଆଇତେରଇବା ମାଇଜିମନ୍ ଦୁରିକେ ଚିଆଅଇ ଏ ସବୁ ଦେକ୍‌ତେ ରଇଲାଇ ।

ଜିସୁର୍ ମତା ସଙ୍ଗଇବା ଜାଗା

(ମାତିଉ ୨୭:୫୭-୬୧; ମାର୍କ ୧୫:୪୨-୪୬; ଜଅନ୍ ୧୯:୩୮-୪୨)

୫୦ ଆରି ଦେକା, ଆରାମାତିଆ ଗଡର୍ ଜିଉଦିମନର୍ ନେତା ଜସେପ୍ ନାଉର୍ ଗଟେକ୍ ଦରମ୍ ଆରି ମର୍‌ଜିତାର୍ ଲକ୍ ରଇଲା । ସେ ପର୍ମେସରର୍ ରାଇଜ୍ ଆସ ବଲି ଜାଗିରଇଲା । ୫୧ ମାତର୍ ଆରାମାତିଆ ଗାଉର୍ ସେ ଲକ୍ ବଡ଼ସବାର୍ ଗଟେକ୍ ମେମର୍ ରଇଲେ ମିସା, ସେମନର୍ ନିଆଇ ଆରି କାମ୍ ସଙ୍ଗ୍ ରାଜିଅଇ ନ ରଇଲା । ଆରି ପର୍ମେସରର୍ ରାଇଜ୍ ଜାଗ୍‌ତେରଇଲା । ୫୨ ସେ ପିଲାତର୍ ଲଗେ ଜାଇ ଜିସୁର୍ ମଲା ମଡ଼ ମାଙ୍ଗ୍‌ଲା । ୫୩ ଜିସୁର୍ ମଡ଼ କୁର୍‌ସେଅନି ଉଡ଼ରାଇ ଉଲ୍‌ଉଲା ପଟିଆଇ ଗୁଡ଼ିଆଇକରି ଜେନ୍ତିକି କେବେ କାକେ ନ ସଙ୍ଗଇରଇଲା, ଗଟେକ୍ ରାଙ୍ଗ୍‌ନି କାଟି ତିଆରକରି ରଇଲା ପାଆରେ ନେଇ ସଙ୍ଗଇଲାଇ । ୫୪ ସେ ଦିନ୍ ବିସ୍‌ରାମ୍‌ବାର୍ ଦିନ୍ ନ ଅଇରଇଲା, ସେ ଦିନ୍ କେଟି ଆଇତେରଇଲା ।

✧ ୨୩:୪୯ ୨୩:୪୯ ଲୁକ୍ ୮:୨,୩

୫୫ ଆରି ଗାଲିଲିଅନି ଜିସୁର ସଙ୍ଗ ରଇଲା ମାଇଜିମନ୍ ଜସେପର୍ ସଙ୍ଗ ଜାଇକରି ପାଆର୍ ବିତ୍ତରେ ଜିସୁର ଗାଗଡ଼ କେନ୍ତି ସଙ୍ଗଇଲା ଆଚେ ବଲି ଦେକ୍‌ଲାଇ । ୫୬ ସେମନ୍ ବାଉଡ଼ିଜାଇ ବାସନା ଚିକନ୍ ଆରି ବାସନା ଦିନ୍‌ସୁ ତିଆର୍ କର୍ତ୍ତେ ରଇଲାଇ । ସେ କାମ୍ ସାର୍‌ବାକେ ବିସ୍‌ରାମ୍‌ଦିନ୍ କେଟ୍‌ଲା । ଆରି ସେ ଦିନେ ମସାର୍ ନିୟମ୍ ଇସାବେ, ସେମନ୍ ବିସ୍‌ରାମ୍ କଲାଇ ।

୨୪

ଜିସୁ ଆରି ତରେକ୍ ଜିବନ୍ ଅଇ ଉଟ୍‌ଲା

(ମାତିଉ ୨୮:୧-୧୦; ମାର୍କ ୧୬:୧-୮; ଜଅନ୍ ୨୦:୧-୧୦)

୧ ଆଚର୍ ପର୍ତୁମ୍ ଦିନର୍ ସାକାଲେ, ମାଇଜିମନ୍ ସେମନ୍ ତିଆର୍ କରିରଇବା ବାସନା ଦିନ୍‌ସୁ ଆରି ବାସନା ଚିକନ୍ ଦାରି ଜିସୁର୍ ମଡ଼ ରଇଲା ପାଆରେ ଗାଲାଇ । ୨ ଆରି ପାଆରର୍ ମୁଆଟେ ରଇଲା ପାକ୍‌ନା ଗୁଣ୍ଡୁଲିରଇଲାଟା ଦେକ୍‌ଲାଇ । ୩ ସେଟା ଦେକି ପାଆର୍ ବିତ୍ତରେ ଜାଇ ଦେକ୍‌ଲାଇ, ତେଇ ଜିସୁର୍ ଗାଗଡ଼ ନ ରଇଲା । ୪ କାକଟା ଅଇଲାବେ, ବଲି, ବାବିକରି ରଇଲାବେଲେ, ଏଦେ ଦେକା ! ବିଜ୍‌ଲି ପାରା ଜଗ୍‌ଜଗି ଜାଇତେରଇବା ଲୁଗା ପିନ୍ଦି ଦୁଇ ଲକ୍ ସେମନ୍‌ର୍ ମୁଆଟେ ଚିଆ ଅଇଲାଇ । ୫ ମାଇଜିମନ୍ ସେ ଦୁଇ ଲକ୍‌କେ ଦେକି ଡରିକରି ଉଁତାଡ଼ିଅଇ ଡୁଲିଦେଲାଇ । ସେ ଦୁଇଲକ୍ ସେମନ୍‌କେ କଇଲାଇ, “ଜିବନ୍ ରଇଲା ଲକ୍‌କେ କାଇକେ ମଲା ଲକ୍‌କେ ସଙ୍ଗଇଲାଟାନେ କଜ୍‌ଲାସ୍‌ନି ? ୬ ☆ଜିସୁ ଇତି ନାଇ, ପର୍‌ମେସର୍ ତାକେ ଉଟାଇଲାଆଚେ । ସେ ତମ୍‌ର୍ ସଙ୍ଗ ଗାଲିଲିତେଇ ମିସ୍‌ତେ ରଇଲା ବେଲେ ତମ୍‌କେ କାଇବଲି କଇରଇଲା, ସେଟା ତମ୍‌ର୍ ମନେ ନାଇ କି ? ୭ ନର୍‌ପିଲା ପାପି ଲକ୍‌ମନ୍‌ର୍ ଆତେ ସର୍‌ପାଇ ଅଇସି ଆରି ସେମନ୍ ତାକେ କୁର୍‌ସେ କୁଟିମାରି ମରାଇ ଦେବାଇ । ମାତର୍ ତିନ୍‌ଦିନ୍ ଗାଲାପଚେ ସେ ଆରି ତରେକ୍ ଜିବନ୍ ଅଇ ଉଟ୍‌ସି ।”

୮ ସେଡ଼କି ବେଲେ ମାଇଜିମନ୍ ଜିସୁ ଏନ୍ତି କାତା କଇରଇଲା ବଲି ଏତାଇଲାଇ । ୯ ସେଟାର୍ ପାଇ ସେମନ୍ ତେଇଅନି ଦାପ୍‌ରେ ବାଉଡ଼ି

☆ ୨୪:୬ ୨୪:୭ ମାତିଉ ୧୬:୨୧;୧୭:୨୨,୨୩;୨୦:୧୮,୧୯; ମାର୍କ ୮:୩୧;୯:୩୧;୧୦:୩୩,୩୪; ଲୁକ୍ ୯:୨୨;୧୮:୩୧-୩୩

ଆସିକରି ଏଗାରଟା ସିସ୍ତମନ୍‌କେ ଆରି ତେଇ ରଇଲା ଲକ୍‌ମନ୍‌କେ ସେ ଜାଗାଇ ଅଇଲା ଗର୍‌ନା ସବୁ କଇଲା । ^{୧୦} ମଗ୍‌ଦଲିନି ମରିୟମ୍, ଜଥାନା, ଜାକୁବର୍ ମାଆ ମରିୟମ୍ ଆରି ତାକରସଙ୍ଗ୍ ରଇଲା ବିନ୍ ମାଇଜିମନ୍ ମିସା କାଇ କାଇଟା ଗର୍‌ଲା, ସେ ସବୁ ବିସଇ ପେରିଡ୍‌ମନ୍‌କେ କଇଲା । ^{୧୧} ମାତର୍ ପେରିଡ୍‌ମନ୍ ମାଇଜିମନ୍‌ର କାତା ଟଣ୍ଡେ ପାନ୍ଦି କଇଲାଜନି ବଲି ବିସ୍‌ବାସ୍ କରଡ୍ ନାଇ । ^{୧୨} ମାତର୍ ପିତର୍ ଅଦର୍‌ପଡ୍ ଅଇ ପାଲାଇ ପାଆରେ ଜାଇ ଏରି ଦେକ୍‌ଲା । ପାଆର୍ ବିଡ୍‌ରେ ଏରି ଦେକ୍‌ଲାକେ ତେଇ ଜିସୁକେ ଗୁଡିଆଇଲା ଉଲ୍‌ଉଲା ପଟିଆ ଗାଡି ଆରି କାଇଟା ନ ରଇଲା । ପିତର୍ ସେ ଗର୍‌ନା ଦେକି କାବାଅଇ ଜାଇକରି, ଗରେ ବାଉଡି ଆଇଲା ।

**ଦୁଇଟା ସିସ୍ତମନ୍ ଇମାୟୁ ଗାଏଁ ଗାଲାଇ
(ମାର୍କ ୧୬:୧୨-୧୩)**

^{୧୩} ସେ ଦିନେସେ ଜିସୁର୍ ଦୁଇଟା ସିସ୍ତମନ୍ ଜିରୁସାଲମେଅନି ଏଗାର କିଲମିଟର୍ ଦୁରକେ ରଇଲା ଇମାୟୁ ନାଉର୍ ଗାଏଁ ଇଣ୍ଡିକରି ଜାଇତେ ରଇଲା । ^{୧୪} ଜିସୁକେ କାଇକାଇଟା ଅଇରଇଲା ଆରି ସେ ସବୁ ବିସଇନେଇ ସେମନ୍ କାତାଅଇ କାତାଅଇ ଇଣ୍ଡିକେ ରଇଲା । ^{୧୫} ସେମନ୍ ଏନ୍ତି କାତାବାର୍ତା ଅଇ ଆଇବାବେଲେ ଏଦେ ଦେକା ! ଜିସୁ ନିଜେ ଆସି ସେମନ୍‌ର ସଙ୍ଗ୍ ଇଣ୍ଡିକାର୍ ଦାର୍‌ଲା । ^{୧୬} ସେମନ୍ ତାକେ ଦେକ୍‌ଲା, ମାତର୍ ଚିନି ନାପାର୍‌ଲା । ^{୧୭} ସେଡିକିବେଲେ ଜିସୁ ସେମନ୍‌କେ କଇଲା, “ତମେ ଇଣ୍ଡି ଇଣ୍ଡି କାର୍ ବିସଇନେଇକରି ଏତେକ୍ କାତା ଅଇଲାସନି ?” ସେବେଲାଇ ସେମନ୍ ମନ୍‌ଦୁକକରି ମୁଁ ସୁକାଇ ଚିଆଅଇଲା । ^{୧୮} “ଗାଲା କେତେଦିନ୍ ବିଡ୍‌ରେ ଜିରୁସାଲମ୍ ଜନ୍ ଗର୍‌ନା ଗଟିଗାଲା ଆତେ ? ସେଟା ନାଜାନିଲାଟା ତୁଇ ଗଟେକ୍ ଲକ୍‌ସେ କି ?”

^{୧୯} ଜିସୁ ସେମନ୍‌କେ ପାଚାର୍‌ଲା, “କାଇଟା ଅଇରଇବା ବିସଇ ତମେ କଇଲାସନି ?” ସେମନ୍, “ନାଜରିତର୍ ଜିସୁକେ ଜାଇଟା ସବୁ ଗର୍‌ଲା । ସେ ଗଟେକ୍ ବବିସଡ୍‌ବକ୍‌ତା ରଇଲା । ପର୍‌ମେସରର୍ ମୁଆଟେ ଆରି ଲକ୍‌ମନ୍‌ରଟାନେ ଗଟେକ୍ ବପୁସଙ୍ଗ୍‌ର୍ ଲକ୍ ରଇଲା । ତାର୍ ସବୁକାମ୍ ଆରି କାତାଅନି ଏ ସବୁ ଜାନାପଡ୍‌ତେ ରଇଲା ।

୨୦ ଆମର ମୁକ୍ତି ପୁନଃପ୍ରାପ୍ତି ଆରି ସାସନ କାରିଆମନ୍ ତାକେ ମରନ୍ ଡକ୍ସ ପାଇବାକେ ସତ୍ତ୍ୱମନ୍‌କେ ସର୍ପିଦେଲା ଆରି ତାକେ କୁର୍ସେ ଚଗାଇ ମରାଇଲା । ୨୧ ସେ ଆକା ଇସ୍ରାଏଲର୍ ଲକ୍ମନ୍‌କେ ରକିଆ କର୍ସି ବଲି ଆସା କରି ରଇଲୁ । ମାତର୍ ତାକେ ମରାଇ ତିନ୍‌ଦିନ୍ ଅଇଲାନି । ୨୨ ଆମର୍ ଦଲର୍ କେତେଟା ମାଇଜିମନ୍ ଆମ୍‌କେ କାବାଅଇଜିବା କାତା କଇଲା । ସେମନ୍ ଆଜି ସାକାଲ୍ ସାକାଲ୍ ତାର୍ ମଡ୍ ରଇବା ପାଆରେ ଗାଲା । ୨୩ ମାତର୍ ତେଇ ତାର୍ ଗାଗଡ୍ ନ ରଇଲା । ସେମନ୍ କଇଲା, ପାଆରେଅନି ବାଉଡ୍‌ଲାବେଲେ ସରଗର୍ ଦୁଡ୍‌ମନ୍‌ର୍ ଦର୍ସନ୍ ପାଇରଇଲା ଆରି ସେ ଦୁଡ୍‌ମନ୍ ଜାନାଇଲାକେ, ସେ ଏବେ ଜିବନ୍ ଅଇଆତେ । ୨୪ ଆମର୍ ସଙ୍ଗାରିମନ୍‌ର୍ ବିଡ୍‌ରେଅନି ଜେ ଜେ ସେ ପାଆରେ ଜାଇ ଦେକ୍‌ଲା ମିସା ମାଇଜିମନ୍ ଜେନ୍ତି କଇରଇଲା, ସେ ସମନ୍ ଇସାବେ ଦେକ୍‌ଲା । ମାତର୍ ସେମନ୍ ଜିସୁକେ ଦେକଡ୍ ନାଇ ।”

୨୫ ସେବେଲେ ଜିସୁ ସେମନ୍‌କେ କଇଲା, “ତମେ କେତେକ୍ ବକ୍ସୁଆ ଲକ୍ମନ୍, ବବିସଡ୍‌ବକ୍‌ତାମନ୍ କଇଲା କାତା ବିସ୍‌ବାସ୍ କର୍‌ବାକେ କାଇକେ ଜାଗ୍‌ଡ୍ ଉଆସ୍ ନାଇ ? ୨୬ ଏ ସବୁ ଦୁକ୍‌କ୍‌ସଟ୍ ପାଇଲା ପତେସେ ପର୍‌ମେସର୍ ବାଟିପାଟାଇଲା କିରିସଟ୍‌କେ ମଇମା ପାଇବାକେ ଅଇସି । ୨୭ ଜିସୁ ମସାର୍ ବଇତେଇଅନି ଆରି ବିନ୍ ବିନ୍ ବବିସଡ୍‌ବକ୍‌ତାମନ୍ ଲେକିରଇଲା କାତାଇ ଅନି ଆରାମ୍ କରି ସବୁ ଦରମ୍ ସାସ୍‌ତରେ ତାର୍ ଜେଡ୍‌କି ବିସଇ ଲେକା ଅଇରଇଲା, ସେ ସବୁ ସେମନ୍‌କେ ବୁଜାଇଦେଲା ।”

୨୮ ଆରି ସେମନ୍ ଜନ୍ ଗାଉଁ ଜିବାର୍ ରଇଲା, ସେ ଗାଉଁ ଲଗାଲଗି ଅଇବାକେ ଜିସୁ ଆଗ୍‌ଡୁ ଗାଲାପାରା ଅଇ ଇଣ୍‌ବାର୍ ଦାରଲା । ୨୯ ମାତର୍ ସେ ଲକ୍ମନ୍ ଜିସୁକେ ସୁଡ୍‌ରାଇ କରି କଇଲା, “ଆମର୍ ସଙ୍ଗ୍ ର, କାଇକେ ବଇଲେ ବେଲ୍ ବସିଗାଲା ଆରି ରାତି ଅଇଗାଲାନି ।” ସେଟାର୍ ପାଇ ଜିସୁ ସେମନ୍‌ର୍ ସଙ୍ଗ୍ ରଇବାକେ ଗର୍‌ବିଡ୍‌ରେ ଗାଲା । ୩୦ ଆରି ସେମନ୍‌ର୍ ସଙ୍ଗ୍ କାଇବାକେ ବସ୍‌ଲା । ରୁଟି ଦାରି ପର୍‌ମେସର୍‌କେ ଦନିଅବାଦ୍ ଦେଇକରି ସେଟା ବାଙ୍ଗାକରି ସେମନ୍‌କେ ଦେଲା । ୩୧ ସେ ବେଲାଇ ସେମନ୍‌ର୍ ଡାବିଅଇ ଜାଇରଇଲା ଆଁକି ପିଟିଗାଲାକେ ତାକେ ଚିନି ପାର୍‌ଲା । ମାତର୍ ସେ ଦାପ୍‌ରେ ଜିସୁ ସେମନ୍‌ର୍‌ତେଇଅନି ମାୟା ଅଇଗାଲା

। ୩୨ ସେବେଲାଇ ସେମନ୍ ସେମନ୍ ବିତ୍ରେ କାତା ଅଇଲାଇ,
“ଜେଡେବଲ୍ ସେ ଆମର୍ ସଙ୍ଗ ବାଟେ କାତା ଅଇତେ ରଇଲା, ଆରି
ପର୍ଯ୍ୟେସରର୍ ସାସ୍ତରର୍ କାତା ବୁଜାଇ ଦେଇତେ ରଇଲା, ଆମର୍
ମନ୍ ବିତ୍ରେ ଉଡୁକ୍ ଦୁଡୁକ୍ ନ ଅଇତେ ରଇଲା କି ?”

୩୩ ସେଦାପ୍ରେ ସେମନ୍ ଦୁଇଲକ୍ ଉଟିକରି ଜିରୁସାଲାମେ
ବାଉଡି ଉଟିଗାଲାଇ । ତେଇ ଜିସୁର୍ ଏଗାର୍ଟା ସିସ୍ମନ୍ ଆରି
ବିନ୍ଲକ୍ମନ୍ କାତାବାର୍ତା ଅଇତେରଇଲାଟା ଦେକ୍ଲାଇ । ୩୪ ସେ
ଲକ୍ମନ୍ ଚେତେଅନି ସେମନ୍ ଜିସୁମାପ୍ରେ ଆରି ତରେକ୍ ଜିବନ୍ ଅଇ
ଉଟଲା ଆଟେ ଆରି ସିମନ୍ କେ ଦେକାଇଅଇଲା ଆଟେ ବଲି
ଜାନ୍ଲାଇ ।

୩୫ ତାର୍ ପଟେ ଦୁଇଲକ୍ ଇମାମ୍ମୁ ଗାଉଁ ଆଇବା ବାଟେ
କାଇକାକାଟା ଅଇରଇଲା ସେଟା ସବୁ କଇଲାଇ । ଆରି ସେମନ୍ ଜିସୁ
ରୁଟି ବାଙ୍ଗାଇ କରି ଦେଲାବେଲେ କେନ୍ତ୍ର ତାକେ ଚିନି ଦେଇରଇଲାଇ
ସେଟା ମିସା ସେମନ୍ କେ କଇଲାଇ ।

ଜିସୁ ତାର୍ ସିସ୍ମନ୍ କେ ଦେକା ଅଇଲା

(ମାତିଉ ୨୮:୧୭-୨୦; ମାର୍କ ୧୬:୧୪-୧୮; ଜଅନ୍ ୨୦:୧୯-୨୩;
ପେରିଡ୍ ୧:୬-୮)

୩୬ ସେ ଦୁଇଲକ୍ ଏନ୍ତି କଇବା ବେଲେ ଏଦେ ଦେକା ! ମାପ୍ରେ
ନିଜେ ସେମନ୍ ମଜାଇ ଚିଆଅଇଦେଲା । ଆରି ସେମନ୍ କେ
କଇଲା, “ତମ୍ କେ ସାନ୍ତି ଅ ।” ୩୭ ମାତର୍ ସେମନ୍ ସବୁ ଲକ୍ ଏଟା
ଗଟେକ୍ ବୁଡ୍ ଦେକ୍ଲୁନି ବଲି ଉଟିଗାଲାଇ । ୩୮ ଜିସୁ ସେମନ୍ କେ
କଇଲା, “ତମେ କାଇକେ ଉରଲାସନି ? ଆରି ଦେକି କରି ମିସା
କାଇକେ ବିସ୍ବାସ୍ କରାସ୍ ନାଇ ? ୩୯ ମର୍ ଆତେ ଆରି ଗଡେ ଦେକା,
ଏଟା ମୁଇ ନିଜେ । ମକେ ଚିଇକରି ଦେକା । ଏଟା ମକେ ଜେନ୍ତାରି
ଆଡ୍ ଆରି ମାଉସ୍ ଆଟେ ସେନ୍ତି ବୁଡ୍ କେ ନ ରଏ ।” ୪୦ ଜିସୁ ଏଟା
କଇକରି, ତାର୍ ଆଡ୍ ଆରି ଗଡ୍ ସେମନ୍ କେ ଦେକାଇଲା । ୪୧ ସେଟା
ଦେକି ସେମନ୍ ସାର୍ଦା ଅଇକରି କାବାଅଇ ଗାଲାଇ ମିସା ତାକେ
ବିସ୍ବାସ୍ କରଡ୍ ନାଇ । ସେଟାର୍ ପାଇ ଜିସୁ ସେମନ୍ କେ ପାଚାରୁଲା,
“ତମର୍ ଲଗେ କାଇଟା କାଇବାଟା ଆଟେ କି ?” ୪୨ ସେବେଲାଇ

ସେମନ୍ ତାକେ କଣ୍ଠେକ୍ ବାଜ୍ଜଲା ମାତ୍ ଦେଲାଇ । ୪୩ ସେଟା ଜିସୁ ଦାରିକକରି ସେମନ୍‌ର୍ ମୁଆଟେ କାଇଲା ।

୪୪ ଜିସୁ ସେମନ୍‌କେ କଇଲା, “ମସାର୍ ନିୟମ୍ ଆରି ବବିସତ୍‌ବକ୍‌ତାମନ୍ କଇଲା କାତା ଆରି ଗିତ୍‌ସଙ୍ଗିତା ବଇଟାନ୍‌ନେ କାଇକାଇଟା ଲେକା ଅଇଲାଆଟେ ସେ ସବୁ, ସତ୍ ଅଇବାର୍ ରଇଲା । ମୁଇ ତମର୍ ସଙ୍ଗ୍ ରଇଲାବେଲେ ଏ ସବୁ କାତା ତମ୍‌କେ କଇରଇଲି ।”

୪୫ ତାର୍‌ପଟେ ଦରମ୍ ସାସ୍‌ତରର୍ ଅରତ୍ ବୁଜ୍‌ବାକେ ଜିସୁ ସେମନ୍‌ର୍ ବୁଜ୍‌ବା ବପୁ ଉଗାଡି ଦେଲା । ୪୬ ଆରି ସେମନ୍‌କେ କଇଲା, “ପର୍‌ମେସର୍ ବାଟି ପାଟାଇଲା କିରିସ୍‌ଟ ରାଜା ମୁଇ, ଏନ୍ତି ଦୁକ୍ କସ୍‌ଟ ପାଇକରି ମର୍‌ବି । ପଟେ ତିନ୍‌ଦିନ୍ ଗାଲେ ଆରି ତରେକ୍ ଉଟ୍‌ବି ବଲି ଲେକା ଅଇଲା ଆଟେ । ୪୭ ଆରି ଜିରୁସାଲମେଅନି ଆରାମ୍ କରି ସବୁ ଦେସର୍, ସବୁ ଜାତିର୍ ଲକ୍‌ମନ୍‌କେ ମର୍ ନାଉଁଦାରି ପାପ୍ କେମା କରାଇ, ମନ୍ ବଦ୍‌ଲାଇବାକେ କଇବାର୍ ଆଟେ । ୪୮ ତମେ ଏ ସବୁ ବିସଇର୍ ସାକି ଆଗାସ୍ । ୪୯ ଆରି ମର୍ ବାବା ଜନ୍ ଜିଦ୍ କରିରଇଲା, ମୁଇ ନିଜେ ସେଟା ପାଟାଇବି । ମାତର୍ ତମେ ପର୍‌ମେସରର୍ ଟାନ୍‌ନେଅନି ବପୁ ନ ମିଲ୍‌ବା ଜାକ, ଏ ଜିରୁସାଲମେସେ ରୁଆ ।”

ଜିସୁ ସର୍‌ଗେ ବାଉଡି ଗାଲା

(ମାର୍‌କ ୧୬:୧୯-୨୦; ପେରିଡ୍ ୧:୯-୧୧)

୫୦ ତାର୍‌ପଟେ ଜିସୁ ସେମନ୍‌କେ ବେଡ୍‌ନିଆ ନାଉଁର୍ ଜାଗାଇ ଜିବା ବାଟ୍‌ଜାକ ଡାକିନେଲା । ଆରି ସେମନ୍‌କେ ଆଡ୍ ଟେକି ଆସିର୍‌ବାଦ୍ କଲା । ୫୧ ସେ ଏନ୍ତି ସେମନ୍‌କେ ଆସିର୍‌ବାଦ୍ କର୍‌ବାବେଲେ ପର୍‌ମେସର୍ ତାକେ ସରଗ୍‌ପୁରେ ଦାରିଗାଲା । ୫୨ ସେମନ୍ ତାକେ ଜୁଆର୍ କଲାଇ ଆରି ସାର୍‌ଦାଅଇ ଜିରୁସାଲମେ ବାଉଡି ଆଇଲାଇ । ୫୩ ସବୁବେଲା ମନ୍‌ଦିରେ ରଇକରି ପର୍‌ମେସରର୍ ଡାକ୍‌ପୁଟା କର୍‌ବାର୍ ଦାରଲାଇ ।

ସତ୍ତ୍ୱିୟ ବାବ୍
The New Testament in the Desiya language of India:
ସତ୍ତ୍ୱିୟ ବାବ୍ (Bible)

copyright © 2020 The Word for the World International

Language: ଦେଶିଆ (Desiya)

Contributor: The Word for the World International

ସତ୍ତ୍ୱିୟ ବାବ୍
ଦ୍ୱିତୀୟା ନିୟମ, 2020

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde